

Одил
Ёқубов

ИЗЛАЙМАН

РОМАН
ҚИССА
ХИКОЯЛАР

ҒАФУР ҒУЛОМ НОМИДАГИ
АДАВИЕТ ВА САНЪАТ НАШРИЁТИ
ТОШКЕНТ — 1977

Y₃
E 93

II $\frac{70303 - 17}{352(06) - 77}$ 120-77



ЭР БОШИГА ИШ ТУПСА

Р о м а н

БИРИНЧИ ҚИСМ

Биринчи боб

Кечаси Ҳулкар тик тепага келганда ҳандалак ўғирлашга боришмоқчи эди.

Машраб шундай қаттиқ ухлаган әканки, уни уйготишганда бир дақиқа ҳушини йиголмай ётди. Лекин «ҳандалак» сўзи қулоғига чалиниши билан, назаридা, Муяссарнинг: «Вой ҳандалак пишибди-я!» деган майин товуши хаёлида қайта янграгандай туюлди-ю, кўзлари чарақлаб очилиб кетди.

— Кўп имиллайвермасдан тезроқ бўл! — деди Қўчқор. — Ой чиқади сал ўтмай!

Машраб устидаги пўстиннинг илиқ оғушидан ба зўр чиқиб қаддини тутиб ўтирди.

Одатда тўп отса ҳам уйғонмайдиган Акмал хом семиз бу сафар, нима бўлиб Mashrabdan олдин йиғонган, ариқ бўйида ўтириб, пишиллаб этигини ки ярди.

— Сув қалай? Хабар олдиларингми?

— Сувдан гапирма! — деди Қўчқор. — Тошқин эмаски, бир ёгини ўпириб кетса!

Аммо Mashrab бу гапни эшитмагандай қоронгида қоқиниб-суриниб ўқариқни ёқалаб чопиб кетди. Қўчқор ҳақ: чимлар жойида, сув ювиб кетган битта ҳам жўяқ кўринмайди. Ғўзалар орасида симобдай ялтиллаган кумуш тасмаларнинг ҳэммасиям картанинг охирига бориб қолган.

Машраб ҳар эгилганида жўякларда пар-пар ёнган сиргачаларни кўрарди. Ҳали ой чиқмагани учунми, сиргачалар ғуж-ғуж бўлиб ётар, Mashrab, агар истаса, ҳовучлаб оларди.

Ниҳоят, Ақмал хомсемиз кийиниб бўлди-ю, улар ариқ ёқалаб яқиндаги сойга томон йўл олишиди.

Сойнинг у юзида, қишлоқнинг қоқ ўртасида, атрофи боғлар билан қуршалган ўн гектарча очиқ пайкал бор. Одатда пайкалга пахта экиларди. Бу йил, нима бўлиб, қовун, бир четига ҳандалак экилган.

Машраб, ҳандалак пишгандан хабари йўқ, бугун эрталаб елкасида кетмон Муяссарларни бир кўриш умидида боғлари четидаги ёлғиз оёқ йўлдан кетаётib, тўсатдан унинг: «Вой, ҳандалак пишибди-я, ўртоқжон!» деган хитобини эшитиб қолди.

Бундоқ бўйини чўзиб караса Муяссар билан унинг дугонаси — Ақмал хомсемиз ошиқу бекарор бўлиб қолган дўндиқ Гулчеҳра шафтоли теришяпти. Муяссар шафтолининг тепасида, пакана бўлса ҳам юлдузи иссиқкина Гулчеҳра эса, Муяссар қоқаётган шафтолиларга этагини тутиб турипти.

Муяссарнинг хитобига Гулчеҳра хандон ташлаб кулди-да:

— Кўнглинг ҳандалак тусаса... шу ҳам ташвишми? — деди шўх ўйноқи овоз билан, — Девонаи Машрабингга қошингни бир учирсанг-ку, ернинг тагидан бўлса ҳам топиб келади!

— Вой, қаёқдаги гапларни гапирмай ў-ўл! — деди Муяссар.

У «ўл» сўзини шундай нафис чўзиб, шундай ноз билан айтдики, пахса девор тагига писиб қолган Машраб, юраги жаз этиб, вужудидан ўт чиқиб кетди.

— Йўқ, рост айтаман! — деди Гулчеҳра.

— Бўлди! Кўп алжирама! Ундан кўра хомсемизингга айт, топиб келсин! Даври давронингда биз ҳам бир тўйиб ҳандалак ейлик, дугонажкон!

— Бе-е, ҳандалак қидирмасданоқ қорнини эплаб юрсин у бечора.— Дўндиқ қийқириб кулди.— Кошки, шоиринг менга ошиқ бўлса! Нима қилишимни ўзим билардим!

Бу сафар Муяссар чиндан зардаси қайнаб Дўндиқ-қа қараб бир-иккита шафтоли отганди, биттаси Машрабнинг ёнидаги шотутга тегиб чалпак бўлди. Кейин шохлар силкиниб, ерга дув тўқилган шафтолиларнинг «тап-тап» и-ю, қийқириб қочган Гулчеҳранинг шўх овози эшитилди.

Машраб бир неча дақика анграйиб қолди.

У кўпдан бери Муяссарни пинҳон севар, унга атаб дафтар-дафтар шеърлар ёзиб, ўзёғида ўзи қовурилиб юрар, лекин Муяссар ҳам уни севишини хаёлига келтирган эмас эди...

Назарида, тоғлар ортидан кўтарилиган офтоб у ёқда қолиб, ўз кўкрагидан бошқа бир офтоб чиққандай, бу офтоб бутун оламни яшинатиб юборгандай, боғларга кўмилган катта қишлоқ, пастдаги сойлик, тўғон бўйнадаги лайлак уя қўйган оқ тераклар, сувга салом бериб ўстган мажнунтоллар—ҳаммаси тўсатдан бўлакча бир жозиба кашф этгандай бўлди.

Кун бўйи қулоқлари остидан жуда ғалати, ҳам киёл ҳазин, ҳам кишини аллақандай эркаловчи, қаёққадир олис-олисларга чорловчи ажиг бир мусиқа кетмади. Кўзини бир зум юмса, гўё боғлар устида парвоз қилаётгандай туюлар, болалигига тушида учгандаги-дай енгил ва ғалати сезарди ўзини.

Тўғриси, дўстларини йўлдан урган ҳам Машраб бўлди.

Қўчқор усиз ҳам саргузашталаб чапгани йигит, бу фикрга жон-дили билан қўшилди. Акмал сал мужмаллик қилган эди, Машраб уни четга тортиб: «Қизларни бир хурсанд қиласмиш, каллаварам!» дейиши билан у ҳам лаққа тушди қолди.

... Улар жар бўйидаги мажнунтоллар орасидан ўтиб, сойга тушдилар.

Сой жимжит, кимсасиз, фақат у ер-бу ерда ўтлаб юрган молларнинг қораси кўзга чалинади, олисроқда, тўғонда бақалар қуриллайди. Қўчқор, тор кўчага кираверишдаги қўшёнғоқнинг тагида тўхтади.

— Гап бундоқ бўлсин! Ҳандалак чангалзорнинг орқасида дейишувди. Ҳозир тор кўчадан кириб, шундоқ ўнгга буриламизу, ариқдан «лип» этиб чиқамиз-қўяшимиз. Уқтиларингми, хомкаллалар? Уқсаларинг... Ўзим бошлай қолай. Сен, хомсемиз, ўртага туш, Кўр Шермат бостириб келиб қолса бир бало қилиб икки ёнингдан судраб кочамиш.

— Аввал ўз ғамингни е, кейин мени айт!— пўнғиллади Акмал.— Бўйингни қара, Маккаю Мадинадан кўринади!

— Бўйимга яраша оёғим ҳам бор, хомсемиз!—

хушнуд кулди Қўчқор.— Сенда қорин зўру, пут йўқ — икки ҳатлашда етиб олади Кўр Шермат!

Кўр Шермат деганлари полизнинг қоровули, бир кўзи болалигида чиллак тегиб оқиб тушган норғул йигит.

У болалигида жуда тегажоқ бўлгани учунми, азалдан Кўр Шермат деб чақиришади, бу лақабни айтмагунча қишлоқда уни бирор танимайди.

Тор кўчанинг икки томонидаги мирзатераклар қоронгига баланд деворга ўхшайди, фақат у ер-бу ердаги жийдалар кумушга ботириб олингандай галати оқариб кўринади.

«Тиқ» этган товуш эштилмайди, ўқтинг-ўқтингда болохоналарда товуқлар питирлайди, ҳовлиларда мудраб ётган итлар уйқу аралаш ириллайди, қаердадир орқада, тўғонда қурбақалар қуриллайди.

Болалигида битта-яримта олма узиб қочгаилари бўлмаса, ўғирлик нималигини билмаган Машраб, ҳозирданоқ юраги пўкиллай бошлади. Назарида, ҳар бир дарахт, ҳар бир соя пойлаб тургандай.

Акмал хомсемиз ҳам бунақа ишларга уқуви йўқ. Ёлғиз Қўчқор ёқавайрон, яланг оёқ, яланг бош, олдинда зипиллаб кетяпти. Ана, икки ёндаги пахса деворлар чекиниб, олдинда теп-текис полиз кўринди. Улар чапга бурилиб, ўт босган катта ариқдан йигирма-ўттиз қадам юргач, тўп-тўп чанглал бошланди.

Қўчқор чангларнинг орасидан бўйинни чўзиб бир зум у ёқ-бу ёқка разм солди, сўнг ўзини ариққа оларкан:

— Эҳ, ой чиқиб қолди!— деди афсус билан.— Майли,— деди у яна,— уч кунлик ойни деб орқага қайтамиزمи? Полизда тирик бир жон кўринмайди... Кетимдан сен чиқасан хомсемиз, сенинг кетингдан девона...

Машраб вужуди қалт-қалт титраб чанглал орасидан оҳиста мўралаб қаради.

Уч кунлик эмас, камида бир ҳафталик ой тоғлар ортидан секин кўтарилиб келарди. Кафтдай текис полиз майин, сирли шуълага чўмиб, осойишта тин олиб ётипти. Узоқда — ўнг қўлдаги боғлар томонида, биттаю битта қамиш чайла қорайиб кўринади, бошқа на бир соя, на бир одам шарпаси!

Қўчқор билан Акмал чапга бурилган, ўзлариям

гўё амма-холаларининг полизида юргандай шатиршутур қилиб, парвойи фалак кезиб юришипти.

Машраб ариқдан эмаклаб чиқиб, полиз четидаги сийрак палаклар орасига шўнғиди.

Полизга шудринг тушган, палакларнинг ғадир-будур япроқлари муздай.

Машраб, бахти бор эканми, ариқдан чиқиши билан катта палакка дуч келди-ю, қўлига чойнақдай бир нарса илинди. Машраб уни секин узиб ойга солиб кўрди. Ҳандалак! Етилиб, тўрлаб қопти. Тумшуғи сал ёрилибди. Ҳиди шундай хушбўй, шундай нафиски, Машраб қаерда ўтиргани эсидан чиқиб, қайта-қайта ҳидлади. Ахийри бир жилмайиб ҳандалакни қўйнига солди-да, қулоқларини диккайтирди: авави икки каллаварамга қаранг! Мунча бошларига кўтаришади палакларни! Буваларининг полизи бўлсаям агар...

У ичиди бир сўкиниб, ўгирилиб қаради. Қаради-ю, тошдай қотди қолди.

Ундан нари борса йигирма қадам жойда қўлида таёқ, бошида ағдарма телпак, новча бир одам қоқкан қозикдай серрайиб турарди!

— Кўр Шермат!

Машраб ўгирилиб қаравши билан Кўр Шермат ҳам гўё шуни кутиб тургандай, қўйқисдан:

— Бос! Ушла ўғрини!— деб сурон солди-да, тағини кўтариб олдинга ташланди.

Машраб жон ҳолатда сакраб туриб, ўзини жўякка отди.

У Қўчқордай бақувват бўлмаса ҳам, зуваласи пишиқ ва анча чопқир эди. Бироқ ҳозир, назарида, оёқларига қўргошин қўйилгандаи оғир, устига-устак палаклар ҳам худди Кўр Шерматга бўлишгандай, унга ёпишар, оёқларидан оларди!..

Ариққа атиги уч қадам қолганда югуриб кета туриб бурилиб қаради, қаради-ю, тирноқларигача музлаб кетди.

Ажабо, гарчанд Қўчқорлар жойидан жилмаса ҳам бир кўзлик Шерматвой уларнинг ёнгинасидан ўтиб, Машрабни қувиб келарди!..

Машраб ўзини ариққа отди, лекин суриниб кетиб ариққа кифти билан тушди-ю, бир қўли остида қолди. Кетма-кет гурсиллаб қулаган Шерматвой эса уни ерга қапиштириди қўйди.

— Ҳи, хумпар, полизни пайҳон қилиб, туёгимни шиқиллатмокчиман де? Қани тур, муттаҳам!

У Машрабнинг қўлларини қайириб бир силташда тургазиб қўйди.

Боя сутдай оқариб ётган далалар энди совуқ чақнаган ой шуъласида гўё қора лиbosга ўралган, бу шуълада қоровулнинг юзи, ялт-ялт этган ёлғиз кўзи аллақандай ваҳимали кўринади.

— Э, сенмисан, гирром? — кўр, ниҳоят уни таниб оғир энтиқди.— Ҳандалак тусаб қоптилар-да кўнгиллари, лаббай? Ҳа, муттаҳам! Сен тенги йигитлар фронтда тиззадан қон кечиб немис билан беллашсину, сен хумпар бу ерда колхоз мулкига чанг сол!. Менга қара, ҳай тирранча! Бу ошналаринг ким ўзи? Нечакиши эдиларинг?

— Қанақа ошна?

— Қанақа дейди-я? Ҳали полизда писиб қолган иккитасини айтаман, хумпар!

Бир секунд Машрабнинг дилида Кўчқорларният айтиб юбориш истаги «ярқ» этгандай бўлди. Лекин... наҳотки Машраб шундай номардликка борса? Куни кеча эмасми ўн олти яшар партизан қиз тўғрисидаги китобчани ўқиб, юраги зир титрагани, немислар тилини кесгандა ҳам ўз дўстларини сотмагани ҳақидаги жойига келганда эса, уйга сигмай тун ярмигача сойда айланаб юргани!

— Йўқ, билмайман... бир ўзим эдим мен...

— Шунақами? Жуда соз! Қани, олдимга туш! Бир ўзим дейди-я даюс! Шошма, ҳали шунақаям сайраб берасанки, булбул бўлиб кетасан!

...Улар катта кўчага чиқишли. Бу ёғи идорагача бир чақирим ҳам келмайди. Лекин бу масофани ўтгунча Машрабнинг хаёли минг бир кўчага кириб чиқдиёв! Бироқ қайси кўчага кирмасин, ҳаммасининг боши берк, олдинда «йилт» этган бир шуъла кўринмас эди.

Рост, қишлоқда бирорнинг богидан мева узиш, айниқса қовун ўғирлаш азалдан айб ҳисобланмайди, аксинча, баъзилар буни шунчаки бир ҳазил деб билишади. Лекин Кўр Шерматнинг: «Сен тенги йигитлар фронтда немис билан беллашиб юрсину, сен бу ерда колхоз мулкига чанг сол!» деган гапидан кейин кўзи очилиб кетди-ю, назарида, кечириб бўлмас бир гуноҳ қилиб қўйгандай туюлди.

Нега буни боя ўйламадийкин, Машраб? Бу ёғи нима бўлади энди? Одамлар нима дейди? Ойиси билан бувиси-чи? Бўлажак кенойиси Барно-чи? Улар ҳам майли, ҳар нима бўлгандаям — жигар. Муяссарчи? Унинг дадаси Қурбон ота-чи? Уларнинг юзига қандай қарайди энди?

Колхоз идораси қишлоқнинг қоқ ўртасида, Боймат ҳожи деган машҳур бойнинг ҳовлисига жойлашган.

Машраблар ўғирликка барвақтроқ чиқишиган эканми, ё иш кўл эканми, хуллас, идоранинг кўчага қараган қатор деразаларидан бир нечтаси ҳалиям ёруғ эди.

Ҳовлининг қўш тавақали катта темир дарвозаси берк.

Кўр Шермат оғир қуйма ҳалқаларни қоққанди, ичкаридан уйқу аралаш:

— Хў-ўш? — деган ҳорғин товуш эшитилди.

— Очинг дарвозани! Ўлжа келди омборингизга!

Қоровул оғир эснади, сўнgra дарвозанинг ўнг қанотидаги эшик очилиб, қўлида хира фонаръ, әгнида пахтали чопон, паканагина бир чол кўринди.

— Идорада бирор борми, ота?

— Қайдам, бугалтирлар ўтиришибди, чоғи.

— Сиз бунга қараб туринг, мен кириб чиқай,— деди Кўр Шермат.

— Бор, боравер,— чол фонарини кўтариб Машрабнинг юзига тўғрилади:

— Э-э... Аъзам ячейканинг ўғлимисан? Афт-ангрингни қол-қора қон қилибди-ку, бу тентак!

Чол белидан белборини ечиб Машрабга узатди:

— Ма, арт, болам! Иккита хом салчага-я? Аҳмоқ!..

Машраб гўё қишида офтоб чиққандай дили ёришиб, юзини, шилиниб кетган қўлларини артди. Шу пайт идора томондан қишлоқ советининг раиси Холмат чаандознинг овози эшитилди:

— Хўп, хўп, қамаб қўйинглар, эртага Инобатхонга айтасан. Ҳозир фурсат йўқ!

У чиндан бир ёқса шошиб турган бўлса керак, жеркиб гапиради.

Кўр Шермат боягидан ҳам дарғазаб бўлиб, тўнини тескари кийиб қайтди. Чолнинг: «Э, қўйиб юбор, бола фақирни, бўрк ол деса бош оласанми, тентак?»

деб, ялиниб-ёлворишиларига қулоқ солмади. Машрабни омборга ёндош темир шанжарали ҳоронги бир хонага қамаб, қалитни ўзи олиб кетди.

Хонага қуруқ пичан түшалгани, оёқ остида эгаржабдуқ ва бир неча боғ беда ётарди.

Машраб ҳоронгидан тимискиланиб, ёруғ тушиб турган томонга ўтди. Деразани очиб, кўкрагини тўлдириб нафас олган ҳам эдики, деразанинг ёнгинасидан аёл кишининг жуда таниш, хиёл эрка ва аллақандай чўзиқ овози келди:

— Қўйинг, Холмат ака! Ярим кечада нима ҳам қиласдим!

Машраб юраги томогига тиқилгандай бўлиб, темир панжараларни чанглаб олди. Эркаланиб гапираётган қиз... акасининг қайлиги Барно эди!

— Шунақа қилманг, Барнохон! — деди Холмат Чавандоз.— Ярим соат сұхбатлашиб ўтирамиз. Ўртоқ Эртоев қаттиқ илтимос қилдилар!..

— Вой, у киши... қанақа ишлари бор экан менда?

— Бе, иш нима қилсан, Барнохон! Бир нафас бегараз дилкашлик қилиш, вассалом! — деди Чавандоз бепарво.

Барно, иккиланиб бўлса керак, бир лаҳза жим қолди.

— Майли-ю, бироқ... кўп эмас, бир нафас ўтираман.

— Албатта. Барнохон, албатта!.. Бу ёқдан юра қолинг, қоровул чол кўрмай қўя қолсан.

Нозик туфлининг «дук-дук»лари, Чавандознинг «гурс-гурс» қадамларига қўшилиб, узоқлаша-узоқлаша, ниҳоят, тинди.

Машраб ҳушига келди, бор кучини тўплаб панжарани юлқиди, сўнг, бу йўғон қўйма тўсиқларга кучи етмаслигини пайқагач, ўзини бедага отди. Ажабо, ҳовиргина эшитган гаплари олдида унинг ўз алами, шармисорлиги, ҳатто «Муяссар нима деркин?» деган ташвиши араимаган бир нарса бўлиб қолди.

Тўсатдан унинг хаёлига акасининг бундан беш-олти ой олдин, десантга кетиш олдида ёзган хати (ўшандан бери ундан дом-дарақ йўқ!) ва бу хатда Барнога аталган эҳтиросли сўалари, ҳар бир мисрасидан ҳижрон тафти уриб турган оташ мақтуби тушди.

— Ака, акажоним!..— деди-да, азбаройи аламига чидай олмаганидаи бошини беда боғлари орасига яширди. Димогига «гун» этиб ялпиз ва какра ҳиди урилди-ю, ёруғ ва ғамгин бир оқшомни эсига солди...

* * *

...Ўшанда ҳам вақт тун ярмидан оғиб кетган эди.

Ака-ука иккиси икки қучоқ қуруқ пичан кўтариб сойга чиқишиди. Сойда, «такта кўприк» деб аталган эски кўприкнинг бир томонида, тол ва тераклар билан ўралган катта тўғон бор.

Улар тўғон бўйидаги лайлак уя қўйган оқ терак тагига, салқин шабадада шитир-шитир қилиб чайқалаётган ўсиқ қамишлар ёнига пичанни тўшаб, ёнма-ён ётишди.

Ашрафжон қўлларини бошининг орқасига олиб, осмонга тикиларкан, қандайдир маъюс бир оҳангда:

— Қандай ажойиб қишлоғимиз бор!— деди.— Бу кўм-кўк сой, бу азим тераклар, бу тўғон!.. Балиқ сакраяпти, эшитапсанми, ука?

Ака-ука балиқларининг чўлл-чўлл сакрашига, терак япроқларининг мулоим шивирлашига қулоқ солиб, узоқ сукутга толишиди.

Осмон шундай тиниқ ва яқин туюлардики, гўё оқ терак учига майни қора чодир ёпилган, гўё япроқлар орасида юлдузлар эмас, минг-минг тиллақўнғизлар учеб-қўниб юради...

Ашрафжон қишлоқни жонидан ҳам яхши кўради.

Одатда у отпускага келгандан бир нафас уйда ўтириб ором ололмас, эгнидаги темирйўлчилар формасини ечиб ташлаб (у транспорт институтини битиргандан бери Тошкент темир йўлида инженер бўлиб ишларди), оқ кўйлагини кияр, сўнг дам қўштиғ милтигини елкасига ташлаб, сой бўйидаги жийдазор ва қамишзорларга шўнғир, дам қўшёнғоқча чиқиб этак-этак ёнғоқ қоқар ва болалар билан ўйнар, дам маҳалланинг ёшлилангини йиғиб, тўғондан балиқ овларди. Кейин сув бўйига қозон осиб, балиқ қовураг, овга кўпчилик қатнашгани учун бунинг номи «халфана» бўлар, шундай пайтларда тун яримгача маъюс ва дилрабо қўшиқлар янграб, сойда мисоли тўй бўлиб кетарди.

Лекин акаси ҳеч қачон бундай ғамгин ўйларга толмас, бундай маъюс гапирмас эди...

Ашрафжон, гўё укасининг фикрига тушунгандай:

— Эртага... урушга кетяпман, ука,— деди.

Машраб беихтиёр бир сапчиб тушди.

— Нега? Темирийўлчиларга бронь беришади дейишувди-ку, ака?

— Бронь беришмоқчи эди — унамадим, ука!—

Ашрафжон Машрабга қараб ёнбошлаб ётди.— Сен энди катта йигит бўлиб қолдинг, билиб қўй, ука, бундан беш-олти йил олдин, отамизга ноҳақ осилиб, уни партиядан ўчиришга эришган баъзи нопок одамлар у киши вафот этганларидан кейин бизга анча ёмонлик қилишибди. Фалончининг авлоди, деб кўзимиага чўп солмоқчи бўлишибди... Айникса Эртоев деган биттаси кўп осилди. Сен ёшсан, билмайсан, ука, отамизниң бошига иш тушишдан олдин бу абллаҳ дадамларга ўғил тутинганди!.. Ушалар энди билиб қўйишибсин.— Ашрафжоннинг овози тўсатдан ўзгариб, шиддатли янгради.— Бир маҳаллар отамиз революция ишига қандай фидойлик қилган бўлса, биз ҳам шундай фидойи бўлишимиз керак, ука!

Ашрафжон қоронгида Машрабнинг қўлинин топиб, қаттиқ сиқди, кейин аллақандай ўйчан товушда давом этди:

— Яқинда поччам ҳам фронтга кетсалар керак. Ҳамма оғирлик энди сенинг елкангга тушади, билиб қўй, ука.

Машраб ўшандан бир-икки кун аввал Сталиннинг радиодан гапирган нутқини эшитган, унинг: «Ака-укалар! Опа-сингиллар!» деган сўзларини ҳар эслаганда бир эти жимиirlаб ғалати бўлиб юрганди. Бунга Ашрафжоннинг гаплари қўшилди-ю, юраги илик бир меҳрга тўлиб, акасини маҳкам қучоқлаб олди...

Уша кеча Ашрафжон укасига яна бир сирини, тўғрироғи, илтимосини айтди. Буниси — Барно ҳақида ёди!

Барно!

У Тошкентда турадиган узоқроқ қариндошларининг қизи эди. Машраб уни фақат урушдан бир йил аввал қишлоққа келиб, тоғасиникида уч-тўрт кун меҳмон

бўлиб турганида кўрган, кўриб одам боласиям шунчалик кўҳлик бўлишидан ҳайратда қолганди.

Барно майин қўнғир соchlарини белига ташлаб, эгнида хонатлас кўйлак, оёғида пошнаси балаид қора туфли, қуralай кўзларини сал сузиб қишлоқ кўчаларидан виқор билан юриб ўтганида ўқишдан келган йигитлар деворларда чумчуқдай тизилиб қоларди...

Машраб ҳали-ҳали эслайди: Ашрафжон бир кун унинг қўлига аллақайси китобни тутқазиб, Барнога олиб бориб беришини илтимос қилди.

Машраб борганде Барно баланд ишкомнинг тагида бир тўп қизлар билан қошига ўсма қўйиб ўтиради.

Қизлар, ҳар бирининг қўлида бир кўзгу, уни кўриб ҳар тарафдан гап отишиди:

— Бу боғда берухсат нима қилиб юрибсиз, йигитча?

Машраб бу қочириқлардан қаёққа яширининини билмай саросимага тушиб қолган эди, Барно ҳам уятдан қошлари чимирилиб, мулојим кулди.

— Сўраган китобимни олиб келдингизми, Машрабжон?

У Машрабнинг қўлидан китобни оларкан, ичидан икки букланган хат ерга тушди-ю, қиз мисоли оловдай ёниб, қуralай кўзлари ғалати ялтиллаб кетди.

Буни кўрган қизлар қийқириб кулишди. Барно эса:

— Майли, сиз бораверинг, Машрабжон,— деди энтиқиб.

Эртасига Барно уларнида меҳмон бўлди. Боғда йигитлар тўпланиб, жўр ашула бошлаганда Машрабдан секин илтимос қилди:

— Боғларингизни бир кўрсатинг, Машрабжон!..

Кейин, «боғни кўриш» эсидан чиқиб олчазорга яшириниб, йигитларнинг қўшиқларига қулоқ солиб узоқ турди. У Машрабни ёнидан жилдирмас, унинг соchlарини силаб эркалар. Ашрафжоннинг овози бошқалардан ажралиб, гўё Барно эшитаётгалини билгандай бўлакча хушоҳанглар билан янграганида қизнинг бармоқлари титраб, кафтида олов тафти пайдо бўларди...

Барно аксарият Муяссарларнига, унинг ТошМИда ўқийдиган опаси Зебохоннинг олдига меҳмон бўлиб келарди. Шундай пайтларда Муяссарларнинг

богидан оқиб ўтадиган бир ариқ сув йигитларнинг исмлари ўйиб ёзилган нақш олмаларга тўлиб кетар, бу олмаларнинг энг катта ва энг чиройлиларида ҳамиша «А» ҳарфи бўлар, уларни Ашрафжон оқи-зарди.

Машраб бунинг ҳаммасини яхши билар, чунки кў-пинча олмаларни Муяссер иккиси тутиб олишар, ёмон кўрган «почча»ларининг олмасини еб, ўзларига ёққан-ларнинг олмаларини қизларга элтиб беришарди. Барно «А» ҳарфи ўйилган олмаларни кўрганда қуралай кўзлари чараклаб кетарди.

Охири бир кун Ашрафжон ойиси билан поччаси Ра-сулжонни Тошкентга совчиликка жўнатди. Сўнг Барно билан тил бириктириб қўйганига қарамай, совчилар қайтгунча оёғи куйган товуқдай питирлаб юрди.

Йўқ, хайрият, Гулсум опа билан Расулжон хушхабар билан қайтишди. Қиз томон, гарчанд тўйни бир йил кейин қилиш шарти билан бўлса ҳам, розилик берибди.

Бир йил кейин эса, Ашрафжон тўғон бўйида Барно тўғрисида гапирапкан, овози дутор қўйларидай ғам-гин янграб, Машрабни титратиб юборди.

Ашрафжон шу келишда Барнонинг ўзи билан ҳам, ота-онаси билан ҳам гаплашиб келганини, яқин кун-ларда Барно қишлоққа келиб, то у фронтдан қайтгунча қишлоқда, тогасиникида туришини айтди.

— Мабодо менинг гапларимни бошқача тушуниб юрмагин,— деди Ашрафжон.— Мен сени унга айгоқчи бўл демайман, иним. Фақат икковларинг дўстлашиб, ўртоқлашиб кетишларингни хоҳлардим. Ҳали танишганда кўрасан — у жуда яхши қиз...

Ашрафжон юрагини тўлдириб чуқур тин олди-да, қўшимча қилди:

— Бу уруш беш кун давом этадими, ё беш йилми — билиб бўлмайди, ука. Тўғрисини айтсан ойимдан, сенлардан қўнглим тинчу Барно учун бир оз қўрқаман. Худо кўрсатмасин, бир нима бўлса... усиз ҳаётим нима бўлишини билмайман. Ҳуллас... Гап шу, ука!

Ашрафжон шундай деди-да, ўрнидан туриб кетди, сўнг, анчагача тўғон атрофига айланиб юрди...

... Наҳот, Барно унинг шундай севгисига рахна солса? Яна келиб-келиб қандай пайтда денг, олти ой-

дан бери Ашрафжондан хат-хабар бўлмай, бутун оила ташвишу таҳликада қолган бир пайтда!

Рост, Ашрафжон бултур ҳам бир-икки ой дом-дарақсиз кетиб, бирдан қалқиб чиққанди. Кейин маълум бўлишича, душман орқасига десант тушганида ярадор бўлган, баҳтига партизанлар отрядига дуч келиб, қутулиб қолган, сўнгра бир гурӯҳ жангчилар билан фронт линиясидан қайта ўтишга муваффақ бўлган.

Бу сафар ҳам шундай бўлса эҳтимол, ҳар нечук, Моҳира буви айтгандек, «ноумид шайтон», ҳали ҳеч ким шум хаёлга боргани йўқ. Лекин... Барно-чи? Наҳот у олти ой ўтмасданоқ умидини узган бўлса? Берган аҳд-паймонлари эсдан чиқса? Ё акаси билан Барно ўртасида бир гап ўтдимикин? Йўқ, бундай бўлиши мумкин эмас, чунки, содатда Машрабларникуға бир хат келганда Барнога уч хат келар, хат келган кунлари у гуллаган бодомдай очилиб, қуралай кўзларида ёш томчилари милтиллаб, бир неча кун бошқача бўлиб юрарди...

Демак... ҳамма бало Эртоевда!

Машраб тикинда ётгандай тўлганиб, бедада ағана-ди. Эркин Эртоев... Эркин Эртоев! Бу одам ясли рапижроком раисининг муовини бўлса ҳам, кўкламдан бери қишлоқдан кетмайди. Қишлоқдаги иккита колхозга доимий вакил, шаҳарга бир ҳафта, ярим ҳафта бориб келмаса, ҳамиша шу ерда. «Бундан чиқди... қишлоқда ўралашиб қолиши бежиз эмас экан-да!»

Бирор деразани чёртгандай бўлдими? Машраб се-кин туриб, мўралаб қаради. Деразанинг тагида кимдир писиб ўтириби.

Машраб юраги «шиғ» этиб:

— Қўчқор! — деб юборди.
— Тисс!.. — Қўчқор вахимали шивирлаб ён-верига қаради.

— Қидирмаган жойим, кирмаган тешигим қолмади-я! Эшикда отининг калласидек қулф! Энди нима қиласиз, девона?

— Майли,— деди Машраб.— Овора бўлма...
— Ие, эсинг жойидами, девона! — деди Қўчқор.— Бир бало қилиб қочиш керак. Бўлмаса ҳаммамизни тутиб олишади.

Бу гап Машрабга сопқон тошдай тегиб, суяк-суягидан ўтиб кетди.

— Нима, айтиб қўяди деб қўрқялсанми?

— Бе-е, гап унда эмас, каллаварам, қочишнинг иложи борми — қочиш керак, вассалом! Машраб: «Мени қўявер, ундан кўра дадангнинг ишларини бир билиб қўй», — демоқчи бўлди-ю, Чавандоз унга ўгай ота экани, Қўчқор ўзиям уни кўп хушламаслиги эсига тушиб, тилини тишлади.

— Шошма! — деди Қўчқор. — Мен ҳалиям бўлса калит топиб келаман. Болохонада темир-терсаклар орасида ётарди беш-олтитаси... Аммо сира ғам ема, оғайни, бир бало қилиб қутқариб оламиш!

Қўчқор қандай қўққисдан пайдо бўлса, шундай тез гойиб бўлди.

Қўчқор келиб кетгандан кейин Машрабнинг миясида гўё бурғидай айланган оғир ўйлар сал тарқаб, хиёл енгил тортди.

Йўқ, Қўчқор яхши йигит эканига шубҳа қилган эмас у. Лекин бултур, ўнинчи синф очилмасдан, Қўчқор билан Акмал «кетмончи»га айланниб, Машраб эса тўққизинчи синфда ўқиб қолганидан бери оралари бир оз совиди. Чунки ўшандан кейин Қўчқор уни гоҳ шоир, гоҳ «девонаи Машраб» деб чақириш одатларини чиқарди.

Бу йил мана, бир ой бўлдики, бирга гўза суғориш япти. Шундан бери фикри сал ўзгарди чоги, гарчи аввалгидаи «девонаи Машраб» дейишини қўймаса ҳам, камситишлари озайди. Бу жиҳатдан, Машраб қўлга тушгани ҳам дуруст бўлди.

Ҳа, билиб қўйсин Қўчқор, Машраб у ўйлаганчалик инжиқ эмас. Қўчқор билан хомсемиздай кучли бўлмаса-да, ўзига яраша иродаси бор.

Фақат... шундай долзарб пайтда унинг бу ерда ётишию Барононинг бундай бўлиши!..

Машраб яна юз тубан тушиб ётиб олди.

* * *

Бу сафар уни Қўр Шермат уйғотди.

— Қани, олдимга туш, гирром!.. Курортда ётгандай талтайиб ётишини қаранг бунинг!

Офтоб энди чиққан, ҳовлилардан, боғлардан бузоқларнинг маъраши, хотинларнинг қарғанган овоzlари, «ушла бузоғингни, ер юткур» деган товушлари эши-тиларди.

Машраб Кўр Шерматнинг олдига тушиб шаҳдам юриб боряпти, мақсад: таниш-билишлар учраб қолса, ўғирлик қилиб қўлга тушганини сездирмаслик.

Хайрият, идора билан полиз ораси унча олис эмас. Уч-тўртта таниш-билишлар учраса ҳам, ҳар нечук, кўчада одам кўпаймасдан етиб олишди.

Полиз ям-яшил бўлиб яшнаб ётиби.

Кечаси палак япроқларига тушган шудрингни ҳўпласа бўлади, ҳар бир япроқ офтоб билан ўпишиб, сув тўла пиёлалардай ялтиллайди. Палаклар орасида юмалаб ётган чойнакдай-чойнакдай босвондилар, амири қовунлар, тумшуғи дара кетган кўкчалар, ҳали кўм-кўк бўлса ҳам, кўзни ўйнатади... Қани энди, Машраб қўлга тушмаган бўлса-ю, бу полизларни тонг палласи бир ораласа!..

Мана, ҳандалак полизи!..

Машраб чангал билан ўралган жойга қадам босди-ю, капалаги учиб кетди: ҳамма ёқда пайҳон бўлган палак! Узилган ҳандалак ва сапчалар тоғдай уйилиб ётипти!

Наҳотки, улар кечаси шунчаликка боришган бўлса?

— Хўп, нималар қилиб қўйганингни кўрдингми, хумпар?

Кўр дағал бармоқлари билан Машрабнинг иягидан ушлаб юқори кўтарди.

— Қани, ҳа, чакагингни оч! — деди.— Шерикларинг ким? Айтасанми, йўқми? Бундан чиқдики, битта ўзинг қилибсан-да бу расвогарчиликни! Тўнғиз бўп кет-е, даюс! — У қўлтиғидаги катта қора жун қопни газаб билан Машрабга отди:

— Қани, сол қопга! Палак-малаги билан қўшиб сол, хумпар!

Ҳандалаги тушмагур салкам бир қоп бўлди, ҳатто ушлайдиган жойи ҳам қолмади!

— Қани кўтар, ағраймасдан! Бу кунингдан баттар бўласан ҳали! — Шерматвой қопни тагидан кўтариб Машрабнинг елкасига қўйиб берди.

Қопни туриб турган ҳандалаклар, айниқса сапчалар биқинига мисоли қирра тошдай ботиб, суяқ-суягини зирқиратиб юборди.

Машраб лабини қаттиқ тишлаб, тишларини ғижирлатди. Майли! Ботмоқ тугул биқинини тешиб юборсин

бу ҳандалаклар! Майли, унга қолса бутун қишлоқ устидаи кулсин! Кечаги ўйлари, «одамлар нима деркин», деган аидишалари — ҳаммаси бекор! Унақа ўйларга борадиган бўлса дўстларини сотиши ҳам ҳеч гап әмас. Афтидан, жанговар дўстларини сотган хоинлар ҳам ўзларини оқладиган минг бир баҳона топишса керак!. Йўқ, Машраб унақа беқарорлардан әмас. У чидайди. Фақат... Фронт тўғрисидаги гаплар... Йўқ, бу гаплар ҳам бекор, чунки Кўр ўзи узиб, жўрттага кўпайтириб қўйган бу ҳандалакларни!

Полиз орасидаги ёлғиз оёқ йўлдан юриб катта кўчага етгунча, Машраб тамом ҳолдан тойди.

Бу сафар кўча серқатнов бўлиб қолган, эшиклари ни «хих-хих» лаб, далага шошаётган мўйсафидлар, елкаларида кетмон, тўп-тўп қиз-жувонлар тез-тез учрай бошлади.

— Вой, ана уни қаранглар!

— О, ўлжка катта-ку, Шерматбой!

— Бола бечорани зазиб ташлабсан-ку, тентак!— каби хитоблар орасидан гоҳо:

— Ие, ячейканинг ўғли-ку бу!— деган овозлар ҳам эшитилиб қоларди.

Машраб бу овозларни ҳар эшитганида бир эти жунжикиб, ҳар қадамда бир қоқилиб борарди. У фақат бир нарсани — идорага тезроқ етиб олишини ўйларди, холос!

Лекин, аксига олиб, Машраб «етдим деганда, елкаси узилди», чунки шу топда ўнг қўлдаги олчазордан Гулчеҳранинг:

— Вой, Муяс, бу ёққа бир қара! Девонанг!— деган қувноқ овози жаранглади.

Машраб юраги бир ҳалприқиб, қўлидаги қоли «гурс» этиб ерга тушди. У ялт этиб овоз келган томонга қаради, қаради-ю, кўзи Муяссарнинг таажжуб ва ваҳима тўла катта очилган кўзларига тушди. Қиз, чаккасида райҳон, ранги бўздай оқарган, нафис қайрилма қошлари фалати чимирилиб, қоққан қозиқдай қотиб туарди.

Тўсатдан Гулчеҳра қаҳ-қаҳ отиб кулиб юборди.

— Ҳа... ҳан... ҳандалакка борган экан-да бу бечора!— деди у ва кулгидан йиқилиб кетай деб, Муяссарни қучоқлаб олди.

Машрабга Гулчеҳранинг кулгиси гўё заҳарли қам-

чидай тегди. Бу қамчи унинг вужудини, наинки вужудини — юрагини парча-парча қилиб тилиб юборди!..

У боши сиртмоққа илингани асов тойдай атрофига алланглади, шафқат тилаб Муяссарга тикилди. Лекин қизниңг мулойим серкиприк күзларида, узунчоқ бугдой ранг юзида худди изтиробга ўхшаш бир ифода қотиб қолганди.

— Мана, госпиталга деган ҳандалакларга бир қараб қўйинг, ўртоқ комсорг,— деди Кўр Шермат.

Муяссар илжайиб турган Кўрга қаради, кейин яна Машрабга тикилди, тўсатдан кўзлари қаҳр билан чақнаб:

— Сен! Сен!..—деди-ю, гапиролмай қолди. Бирдан кескин бурилиб ўзини орқадаги олчазорга урди. Кетмакет Гулчехра ҳам ўша ёққа отилди, сал ўтмай узоқдан унинг:

— Вой, жинни бўлдингми, дугонажон, қаёққа қочяпсан?— деб кулган шўх овози эшитилди.

Илжайиб турган Кўр лаб-лунжини йигиштириб:

— Қани, йиг буларни!— деди тупроққа қорилиб ётган ҳандалакларга имо қилиб.— Бувингнинг полизидан чиққан эмас була, колхозчининг пешана тери билан бўлган-а, хумпар!

— Йигмайман! Ўзинг йиг керак бўлса!— Машрабнинг кўзларида милтиллаган ёш бирдан булоқдай қайнади.— Отиб ташласанг ҳам йигмайман!

— Йигасан!

Кўр Шермат Машрабнинг бўйнидан «шап» ушлаб пастга эга бошлиди. Машраб жон ҳолатда унинг ўзига тармашди, лекин шу маҳал орқадан:

— Вой,вой! Машрабжон!—деган сал бўғиқ, майин овоз эшитилди-ю, Кўр уни қўйиб юборди.

Машраб янгилишиши мумкин эмас, бу — Барно эди! Битталаб терилгандаи чиройли қошларининг бири паст, бири баланд, ҳамиша ноз билан сузилиб турадиган хумор кўзларида саросима. Чопқиллаб келди-да:

— Ҳа, сенга нима бўлди, Машрабжон?— деди, бурун катаклари пирпираб бир Кўр Шерматга, бир қайнисига қаради.

Кўр негадир жилпанглаб қолди.

— Ҳа шу... кўрмайсизми бу тентакни, опажон? Кечаси полизга тушиб ҳамма ёқни ағдар-тўнтар қилибди, бу аҳмоқ...

Барно бирдан воқеага тушуннб, юзидан қони қочди.

— Энди шу... тўртта хом ҳандалакни деб, буни... шунчалик ҳақорат қиласизми?— деди норози товуш билан.

— Ахир бу... қандоқ қиласиз, опажон? Узингиз биласиз...

— Бас, қўйиб юборинг буни!— деди Барно кутилмаганда ўқтам бир товушда.

— Қандоқ бўларкин, опажон?..

— Жуда соз бўлади-да! Қўрқманг, катталарга ўзим айтиб қўяман. Ҳозир бориб Ҳомил акага айтаман. Ло-зим бўлса ўртоқ Эртоев билан ҳам гаплашаман...

«Эртоев» сўзини эшигган Машраб, худди калтакесак теккан одамдай бир сапчиб тушди. Лаблари титраб, Барнога томон энгашди:

— Керак эмас менга бунақа яхшилигинги!— деди-ю нафаси етмай сўзида тўхтади. Барно ранги де-вордай ўчиб қараб турарди.— Керак эмас ўша бузукдан тилаб олиб берадиган яхшилигинги!— такрорлади Машраб ва негадир, эҳтимол заҳар томчилаб турган бу аччиқ гапни севимли янгасининг юзига солаётгани учундир, ўпкаси тўлиб, кўзига ёш олди.— Узингизга буюрсин ўшандан келган яхшилик!

У шундай деди-да, ўзини ариқ бўйидаги олчазорга урди.

Иккинчи боб

Идора қоровули: «Сизни ўртоқ Эртоев чақириятилар» деб келганда Гулсум опа ўғли Машрабни кутиб ўтиради.

Гулсум опа бир лаҳза ўйлангач, сандиқдан эски бўлса ҳам эгнидагидан дурустроқ атлас кўйлагини олиб кийди, бошига қизи Мастиуранинг дуррасини ўради, сўнг кўзгудан жиддий тикилиб турган ҳорғин, қора мағиз юзли аёлга қараб, соchlарини тузатаркан:

«Тағин қанақа иши чиқиб қолдийкин бу одамнинг?»— деган фикр кўнглидан ўтди.

Эртоев Гулсум опани бундан бир ой муқаддам ҳам бир чақиритириб, фронтга кетган мактаб директори ўрнида ишлаб туришни топширганди.

Гулсум опа бу буйруқни эътирозсиз қабул қилди, чунки қишлоқда қолган ўқитувчи ва ўқувчиларнинг

ҳаммаси Фронтчи бригада тузиб, усиз ҳам кўкламдан бери далада ишларди. Лекин ўша учрашууда уни бир нарса таажжубга солди, у ҳам бўлса Эртоевнинг муомаласи.

Бир маҳаллар Аъзам ака ҳаёт вақтида у кишига анча осилган бу ёш йигит, тунов куни Гулсум опани жуда яхши қарши олди, гўё аввалги қилгуликларидан хижолат чеккандай ийманиб, шундай мулойим гаплашдики, Гулсум опа бир ой ўйлаб, ўйининг тагига етолмади.

Гулсум опа ҳаёл сурганича тахта кўприкдан ўтиб, қўшёнгоқча яқинлашганда тор кўчадан «лип» этиб Қўчкор билан Ақмал чиқди.

Қўчкор кўйлаги камаридан чиқсан, сал жингалак қалин соchlari тўзигиган, ғалати кўк-сарғиш кўзлари аллақандай бежо. Одатда оламни сув босса тўпигидан келмайдиган Ақмал ҳам бугун бошқачароқ: ўсиқ қора қошлиари бир-бирига туташган, қовоғи солиқ, негадир ўзини орқага олади.

— Ҳа, йўл бўлсин, йигитлар? — деди Гулсум опа бир унисига, бир бунисига қараб. — Машраб қани?

— Машраб?.. — Қўчкор бошини қашиб, бир йўталиб олди. — Уйга бормадими?

— Йўқ. Даладан келяпсанларми ўзи?

Қўчкор кўзларини яшириб:

— Даладан келяпмиау, бироқ... — деб имиллай бошлаганди, Ақмал:

— Э, қўйсанг-чи, аравани қуруқ олиб қочмасдан, — деб пўнғиллади. — Идора томонга борувдик. Машраб қочиб кетди, дейишиди. Гап шу.

— Қаёқча қочади? Нима қилади қочиб?

— Ҳа, шу... Кечаси ҳандалакка борувдик. Шу... Машраб қўлга тушиб қолди.

Гулсум опанинг кўзлари катта-катта бўлиб кетди.

— Кейин нима бўлди, қамаб қўйишидими?

— Ҳа, шунаقا қилишувди, ҳозир билсак... у ҳам туёғини шиқиллатиб қолибди! — деди Қўчкор ва шошиб қўшимча қилди: — Биз уни кечасиёқ қутқариб олмоқчи эдик — бўлмади! Энди ернинг тагидан бўлсаям топмоқчи бўлиб...

Қўчкор Гулсум опанинг кўзларида, лабларининг теграсида истеҳзао аралаш маъюс табассум жилва қилганини кўриб, дудуқланиб қолди:

— Йўқ, ион урсин, агар...

— Яхши. Ишдан қолманглар. Ҳандалак деб, ғўзани сув босиб кетмадими тағин?

Акмал, катта қийғир бурни галати қимирлаб, жилмайди.

— Хотиржам бўлинг, опажон.

— Хўп. Сувга қаранглар...

Мана энди ўртоқ Эртоев нима мақсадда чақиргани равшан бўлди. Ахир.. вақтинча бўлса ҳам мактабга директорлик қилаётган бир одамнинг ўғли колхса полизига ўғирликка тушиб қамалади-ю, Эртоев буни юзига солмайдими? Лекин гап унда ҳам әмас, энг муҳими... Қаёққа қочдийкин, Машраб? Ҳали но-мусга чидай олмай ўзини бир бало қилиб қўймаса денг?

Гулсум опанинг юраги ҳаприқиб кетди, сўнг у ўзини койиди:

«Баъзан қаёқдаги гаплар келади-я кишининг хаёлига! Бувисиникига кетгандир-да, қочиб қаёққа борарди?..»

— Э, салом, опажон!

Қўштавақали таниш дарвозанинг олдида эгнида эскироқ гимнастёрка, оёғида катта этик, ўнг қўлининг остига тахта қўйиб, кўкрагига осиб олган Комил Жалолов деган жангчи йигит турарди.

Йигитнинг ўнг кўкрагида Қизил Байроқ ордени, чап кўкрагида иккита медали ялт-ялт этарди.

Комил фронтдан орден тақиб омон қайтган биринчи қалдирғочлардан бўлгани учунми, Гулсум опа уни ҳар кўрганда худди Ашрафжонни кўргандай дили ёришиб кетарди.

— Салом, Комилжон! Омонмисан?

Комил сал сепкил юзида кулгичлари ўйнаб, ўқ чизиб ўтган қоши чимирилиб, салом берди.

— Ўзингиздан сўрасак, опажон! Бардаммисиз?.. Э, кечирасиз,— деди у ва чан қўли билан кўришаркан, гўё ўнг қўли майиб бўлганига ўзи айбордай, қизариб кетди.

— Қўлинг қалай, яраси битиб қояганми ўзи?— деди Гулсум опа, унинг қизариб кетганидан ичида кулимисираб.

Комил дока орасидан кўриниб турган чўпдай сўлиқ бармоқларини ушлаб қимирлатиб кўрсатдп.

— Қўлдан гапирманг, опа. «Разрывная пуля» деган касофати теккан. Докторлар кесиб ташламоқчи эди-ю ўзим унамадим, ҳарна қўлга ўхшаб турсин, деб!..

— Шукур қил, жоним,— Гулсум опа койиб гапирди.— Бола бечораларимизнинг жони қайтса ҳам қувонардик.

— Буям тўғрику-я, аммо... қани, ичкарига марҳамат, мажлисни боплайверсак ҳам бўлади,— деди Комил ва кулди.— Бизни табриклаб қўйинг, онажон, парторг бўлдик.

— И, шунақами? Табриклайман, жоним.

Раиснинг чореигина хонаси одамга тўла. Тўрдаги катта бесўнақай столнинг орқасида Эртсев ўтирипти, унинг бир ёнида колхоз раиси Инобатхон, бир ёнида қишлоқ советининг раиси Холмат Чавандоз. Чавандознинг ёнида бошида катта бесўнақай фуражка, тиззасида қалин чарм сумка — кекса коммунист Қурбон ота жой олган. Бурчакда, ниманидир ҳисоблаб Барно ўтиради. Қолғаилар — бригадирлар, завхоз, омбор мудири, ферма бошлиги. Уларнинг орасида илмий мудир Азиз домла ҳам кўринарди.

Комил билан Гулсум опа кирган ҳамон, Эртоев катта, оппоқ қўлларини столга тираб ўрнидан турди.

— Қани, бу ёққа ўтинглар,— деди у, Барононинг ёнидаги биттаю битта бўш стулни кўрсатиб.

Гулсум опа унинг илтифотидан қандайдир тортишиб, шошқалоқлик билан тўрга ўтди, стулга ўтирапкан, эгилиб Барно билан секин саломлашди:

— Яхшимисан, жоним.

Барно кўзини дафтардан узиб бир қаради:

— Раҳмат, ўзингиз,— деди-ю, юзини яна дафтарга яширди.

Барно қараганда сал суаук кўзлари ҳурккал кийикнинг кўзларидай жавдиради, айни замонда бу қарапада, айниқса, тўладан келган оппоқ юзида, сал қалироқ лабларининг ҳимирилишида аллақандай совуқ бир ифода жилва қилди... Нега? Унга нима бўлди?

Бу ўй Гулсум опанинг хаёлида чақмоқдай чақнаса ҳам, у ўзини босиб, Эртоевга юзланди, чунки у бошини сал эгиб, ҳамманинг диққат-эътиборини талаб этган бир қиёфада қовоғини солиб турарди.

Оёгига сақичдай ялтиллаган хром әтиқ, эгнида

кўқрак чўнтақли оқ шоҳи кўйлак ва кўк шерстъ шим, белида сариқ ҳалқали қайиш камар, Эртоев худди фронтдан яқинда қайтган ёш командирларга ўхшайди.

— Бундай, ўртоқлар,— деди Эртоев ва ҳурпайган қалин соchlарини икки қўллаб орқасига силади, семиз бўлмаса-да, тўладан келган юзи тағин ҳам жиддийлашди.

— Сизларни бу ерга таклиф қилишдан мақсад — асосан, ғаллани йигиб-териб олиш масаласи... Бу масалада шуни айтиш лозимки, мен вакиллик қилаётган иккала колхозда, айниқса, сизларнинг колхозингизда аҳвол чатоқ! — Эртоев сўзида тўхтаб, ҳаммага бир-бир қараб олди. — Ўзларингиздан қолар гап йўқ. Шу кечаю кундузда душман Курск — Белгород районларида куч тўплаб, ҳужумга ўтишга ҳозирланяпти. Шундай оғир бир вазиятда бундай ишлаб бўладими, ўртоқлар? Ҳали ғалланинг учдан бириям ўрилгани йўқ, заготовка ундан баттар. Бунга... қандай баҳо берсак бўлади, ўртоқ... Раис опа?

Инобат озгин юзида жуда катта кўринган қўй кўзлари ялтираб:

— Энди, нима қилайлик, одам бўлмаса? — деганди, Эртоев қўлинни кескин силтади:

— Бу... бу жавоб эмас, Инобатхон! Бунақа бўлса... даштга олти юз гектар ғалла экишнинг нима ҳожати бор эди?

— Олти юз гектар эксак... ёмон бўптими?

— Мен ҳалиям ёмон бўпти деётганим йўқ!

— Демасангиза... Мен ҳамма эркаклар фронтга кетиб қолишини қаёқдан билай? — Инобат, худди бўғилиб кетаётгандай, гулдор рўмолини очиб, томогини силади. — Кўкламда меҳнат батальонига одам олишганда айтдим. Лоақал Эшмат акамлардай заҳматкашларни олиб қолайлик...

У гапини тугатмаган ҳам эдики, Холмат Чавандоз сўзини кесди:

— Қўйинг шу Эшмат ака-Тошмат ака деган гапларни. Бари бир фойдаси йўқ. Планни бажариш керакми? Керак! Шуни айтяптилар ўртоқ Эртоев.

— И бажарамиз ҳам! — Қурбон ота катта фуражкасини тўғрилаб, бир қўзгалиб олди, овози қалтираб хитоб қилди: — Гражданлар уруши қаҳрамони ўртоқ

Чапаев айтганларидек, оламда биз большевиклар забт этмаган қалъя йўқ, и бўлмайди ҳам!

— Яшанг, ота! — Эртоев атрофдагилар кулимсираётганини кўриб ўзи ҳам кулимсиради, кейин, кутилмаганда мулойимлашиб деди:

— Инобатхон хафа бўлсин-бўлмасин очиқ айтаман — аҳвол оғир. Аммо... умид қиласманки, янги парторгимиз, халқимизнинг ажойиб фарзанди, Улуг Батан урушининг қаҳрамони Комил Жалолов... — Комил босшини эгди. Унинг қулоқлари ловиллаб кетганини кўриб Эртоев жилмайди. — Уяладиган жойингиз йўқ, Комилжон, мен ҳақ гапни айтапман, сиз чин қаҳрамон, биз фахрланамиз... Хуллас, дўстимиз Комил Жалолов ёрдамида бу камчиликларга тезда барҳам беришимизга аминман... Энди, бизни қувонтирадиган яна бир масала бор. — Эртоев Барнонинг қўёлидан қандайдир қотозни олиб, кўз югуртириб чиқди.

— Масала шундаки, район раҳбарлари колхозда одам тақислигини эътиборга олиб, қишлоғимизга бултур эвакуация бўлиб келган ўн тўрт оила, ҳаммаси бўлиб ўттиз икки кишини юборишга қарор қилди... Албатта, биа буларни оғир ишга сололмаймиз...

Ҳар жой-ҳар жойдан:

— Тўғри! Тўғри! — деган овозлар эшитилди. Эртоев яна эътибор талаб қилиб, қовоғини солди.

— Аммо... масаланинг нозик томони шундаки, меҳмоnlар орасида шонли Ленинград шаҳридан эвакуация қилинган, тўғрироғи, салкам икки йиллик қамалдан кейин, яқинда самолётларда олиб чиқилган касалманд аёллар, ёш болалар ҳам бор... Бу ерга юборишдан мақсад, ўзларинг биласизлар, ҳозир курорт, санаторий деган гап йўқ. Бу ер, ҳар қалай, тоғ ҳавоси, мега-чева бор... тўғрими, Гулсум опа?

Гулсум опа шошиб бош иргади:

— Тўғри.

Эртоевнинг оғзидан «Ленинград» сўзи чиқиши билан Гулсум опанинг вужудини иссиқ бир титроқ жи-мирлатиб юборди-ю, бир неча дақиқа Эртоевнинг гаплари ҳам қулогига кирмай қолди.

Ашрафжон бултур ярадор бўлиб, Ленинград атрофидаги госпиталда даволаниб чиққандан бери бу сўза Гулсум опа учун бўлакча маъно кашф этган, у улуг шаҳар остонасида бўлаётган жанглар, шаҳар аҳлининг

иродаси тўғрисидаги ҳар бир хабарни жон қулоги билан эшитар, «Ленинград» деганда кўзига ёш келарди.

Мана ҳозир ҳам бир зум галати бўлиб кетди ва Эртоев:

— «Мен ишонаманки, ҳеч қанақа норозилик бўлмайди», дегандагина ҳушига келди.

— Қанақа норозиликни айтяпсиз, ўртоқ Эртоев?— Гулсум опа ноўрин қаттиқ гапириб юборганини сезиб, хижолатдан қошлари чимирилди.

— Сиз тушунмадингиз шекилли,— деди Эртоев ва жилмайди.— Демоқчиманки, азиз дўстларимиз, хусусан ленинградлик биродарларимиз, нақадар қаттиқ ваҳмат чекканини ҳисобга олиб, энг яхши уйларимиз, меҳмонхоналаримизни бўшатиб беришимиша лозим...

Гулсум ола босиқ бўлишга уринса ҳам, яна боягидай ўзини тутолмади:

— Мен ҳам шуни айтапман. Марҳамат, ўзимда бўлмаса ойимда бор ўй!— деди-ю, қизариб кетди.

Гўё шуни кутиб тургандай ҳамма бирдан «тур» этди.

— Норози бўладиганлар йўқ!

— Боримизни баҳам кўрамиз!

— Одам кўрмапти дейсизми бизни, Эртоев ака?

Эртоев мамнун бош иргади ва ташкилий масалаларга ўтди.

Комил Жалолов раислигига меҳмонларни кутиб оладиган ва уларни ўй-жой билан таъминлайдиган комиссия тузилди.

Комиссия иккига бўлинди: Инобат билан Холмат чавандоз дарҳол шаҳарга жўнаб, меҳмонларни олиб келади. Комил билан Гулсум опа бошлиқ иккинчи бир гуруҳ эса колхозчилар билан суҳбатлашиб уйларни шай қилиб туради...

Гулсум опа шу гаплар билан бўлиб Машраб ҳам эсидан чиққан экан, қалин дафтарни кўкрагига босиб, ичкаридан чиққан Барнони кўрганда эсига тушди-да, уни ҳовлига имлади: «Бу ёққа қара!»

Барнонинг кўзларидаги бояги ҳадиксираш ва аллақандай совуқлик тарқамаган, у негадир Гулсум опага қарамас эди.

— Сенга чима бўлди, жоним?

— Вой, ҳеч нима бўлгани йўқ!— Барно қизариб кулди.

Унинг кулгиси Гулсум олга аллақандай совуқ ва ясама туюлди. Бир хўрсиниб:

— Машрабдан хабар топмадингми? — деб сўради.

— Кўрувдим боя,— Барно, тўсатдан бурун катаклири пирпираб, кўзлари муз парчасидай йилтиллаб кетди.— Ҳайронман, опа. Боя йўлда қоровул судраб келаётган экан, қўйиб юборинг деб, орага тушувдим, раҳмат ўрнига ўдағайлаб берса бўладими!— Барно лаблари титраб четга қаради.— Ҳар нечук, кўп хўжайнлик қиласермасалар ҳам бўларди.

Барно бу гапни шундай кескин гапирдики, Гулсум опа Машраб иккиси аразлашиб қолганларинигина эмас, айни маҳалда Баронинг ўзида қандайдир бир ўзгариш рўй берганини ҳам сезди. Юрагидаги ташвишини босиб:

— Билмадим энди,— деди.— Болалик қилгандир балки. Мен гаплашаман. Ҳар ҳолда, ҳеч ким сенга хўжайин бўлолмайди, жоним.

Гулсум опа шундай деди-да, идорадан чиққан Иnobатни кўриб, унга томон юрди.

Инобат, бошида гулдор рўмол, оёғида катта этик, жуда ҳорғин кўринар, доим кулимсираб турадиган қўялари маъюс эди.

— Ҳорма, Инобат. Ишларинг яхшими?

— Раҳмат,— Инобат чуқур тин олди.— Эшитдингиз-ку ҳамма гапни.

— Ҳафа бўлма, катта одам...

— Нега ҳафа бўлай, у ҳам ўзи учун эмас, фронт учун жон куйдиряпти,— деди Инобат.— Ўз ишларингиз қалай? Анча бўлди хабар ололмадим.

Гулсум опа кулди:

— Биздаям аҳвол шу. Одам етишмайди.

— Биламан. Бўлмаса ҳалиги уч лочинингизни аллақачон даштга олиб кетардим.

— Уларни олиб кетсангиз мен нима қиласман? Сувни шулар эплаштиряпти.

— Сувни эплаштиряптими, ё...— Инобат бирдан тишлари ярқираб кулиб юборди.— Машрабжонни айтаман, қизиқ қилити-ю, опажон?

— Ҳа, шунақа бўпти — мен ҳам ҳозир эшитдим.

— Булар Эртоевга айтиб, шов-шув кўтаришмоқчи экан, уришиб бердим.

— Қайдам...

— Э, қўйинг, опа! — Иnobат мулойим кўзлари шўх ўйнаб яна жилмайди. — Қизлик чоғимиэда ўзимис ҳам қанча марта қилганмиз бунақа ишларни. Нима бўлти шунга?

У кулганича қамчиси билан этигини «чарс-чарс» уриб, дарвозага қараб кетди. Гулсум опа аллақандай енгил тортиб, Комилжоннинг олдига кирди.

* * *

Машраб Моҳира бувининг болохонасида шифтга тикилиб ётиби.

Бувининг ҳовлиси қишлоқнинг ўртасида, бир маҳаллар эски қалъа жойлашган кўхна тепаликнинг шундоқ этагида.

Машраб бу ерга боғ оралаб, сув кечиб, деворлардан ошиб, зўрга етиб келган ва ҳеч кимга билдиrmай болохснага чиқиб олган. Мана, пешин бўлиб қолди шекили, ҳовли томондаги дарчадан тушган шуъла кўк пиchanда сомондай сочилиб ётиби...

Болохонанинг шифтида, қуриб буришиб қолган терилар орасида уч-тўрт тўрва қурт, ипга маржондай терилган қалампир, шафтоли қоқи, бир-икки боғ садарайҳон тулкидай майнин ойим супурги, эгар-жабдуқ ва яна алланарсалар кўринарди. Бу — меҳрибон бувининг «катта хўжалиги». Бошидан не-не очлик ва ялонгочликларни кечиравериб, юрак олдириб қўйган бечора буви ҳар бир туршак, ҳар бир данакни йигади. Машраб шундай қўл чўзиб қуртданми, шафтоли қоқиданми олиб еса бўлади, лекин бунга ҳам тоқати йўқ. Эрталабдан бери ўзи билан ўзи олишавериб чарчаган, әнди, гўё юрагини тилка-тилка қилган оғир ўйлар ўз кучини йўқотгану, уни ғалати бир лоқайдлик эгаллаб олган.

Тўсатдан пастдан, боғ томондан аёлларнинг таниш овозлари эшитилди: ойиси билан бувиси!

Машраб вужудини чулгаб олган лоҳасликни енгиб, дарчадан мўралаб қаради.

Болохонанинг шундоқ остида, кўчанинг у юзидан шарқираб оқаётган бир ариқ сувнинг бўйида бувиси чўнқайиб ўтирас, унинг ёнида Гулсум опа турарди.

Машраб ойисининг чеҳрасида акс этиб турган саросимага кўзи тушди-ю, беихтиёр юраги «шиғ» этди:

оийсининг чеҳрасида фақат ташвиш әмас, аллақандай қўрқув ҳаж бор эди.

Моҳира буви оппоқ соchlарини ҳўллаб силади, рўмолининг учи билан артиниб ўрнидан туаркан:

— Ҳа, болам, намунча хавотирдасан? Бир нима бўлдими? — деб сўради.

— Йўқ, ойижон, шунчаки... бугун уйга бормади.

— Уйга бормаса юргандир ўйнаб. Бирам серташиши, бирам серташвишсанки, болагинам!

У «болагинам»ни эркалаб әмас, аллақандай норозиллик билан койиб гапирди, сўнг, она-бала боғдан чопқиллаб чиқсан набиралари Фотима, Зухрани етаклаб, пастдаги уйчага кириб кетишиди.

Машраб бирпас олис-олисларга тикилди. Дарчадан яқиндаги боғларгина әмас, анча наридаги сой, сойининг у юзидағи Муяссарларнинг ҳовлиси, ҳатто қўшёнгоқ ва тўғон бўйида лайлак уя қўйган оқ тераккача кафтдек кўринади. Ана кечаси суғоришган яхлит карталари.

Машраб бу карталарга қараши билан эсига негадир илк кўклам, Азиз домла бошлиқ кекса ўқитувчилар ҳўкиз қўшиб ер ҳайдаганлари, ойиси қозон осиб, атала пиширганлари, улар эса эшак билан мола босганлари тушди, тушди-ю, безгак тутган одамдай жунжикиб, жойига чўзилди.

Аслида учови ҳам шу кунларда даштда, ўроқда бўлишлари керак эди. Қиз-жувонларни кечаси ғўза суғоришидан озод қилиш учунгина уларни олиб қолишган, юз гектар пакта учовига ишониб топширилган эди. Шундай оғир бир пайтда Mashrab бу ерда писиб ётибди! Мактаб директорининг ўғли, кечагина бригадада агитаторлик қилиб, Гастелло билан Аҳмаджон Шукурров тўғрисида гапириб бериб, аёлларни йиғлатиб юрган одам... Эҳ!.. Шундан кейин ким деган одам бўлди? Бундан кўра уятни йиғишириб кўйиб, юрак ютиб чиқиб боргани яхши әмасми? Уз айбига иқор бўлиб, жаво олгани тузук әмасми? Тузук бўларди-ю, бироқ... Муясар-чи?

Уни ўйлаши билан ҳар сафаргидай эсига қизнинг катта очилган кўзлари, уларда акс әтган изтироб тушди, қулоқлари остида: «Сен... сен!» деган бўғиқ овози янгради-ю, тиканда ётгандай тўлғанди... Ахир Mashrab қаёқдан билсин бу ҳандалаклар госпиталга мўлжал-

ланганини, Муяссар? Ахир у бу ишни сени деб, сени бир севинтираман деб, серкинрик, мулойнм кўзларинг билан кулиб, бир оғиз «Раҳмат!» дейишингни эшитсан деб, қилганди-ку! Сен буни ҳеч қачон билармикансан? Унинг дардини эшитармикансан, Муяссар?

Пастдан яна бувининг овози эшитилди:

— Наҳот ғурбат қувиб келган бева-бечоралардик ватанимни аясам? — дерди буви, уйдан чиқаркан.— Ишқилиб, болажонларим эсон келишса бўлди. Худодан тилагим шу. Битта эмас, юзта уй топилади.

— Раҳмат, ойижон,— деди Гулсум опа.— Шундай дейишингизни билувдиму, Ширинойнинг кўнглига келармикин, деб...

— Нега кўнглига келсин Ширинойнинг? Одам кўрмаган дейсаими уни?

— Майли бўлмаса, ойижон, ҳар нечук, сиз Ширинойнинг уйидан сўзана билан қозиқ лунгиларни олиб қўйинг. Мен болалардан у-бу нарса бериб юборман.

Машраб ҳайратда қолди: «Қанақа бева-бечора, қанақа мусофиirlар. Тоғасининг уйига бировлар келишмоқчими? Кўчиб келишганда ҳам ойисининг нима даҳли бор бу ишга?»

Сал ўтмай, елкасида кетмон, тоғасининг хетини Шириной даладан қайтиб келди. Бу ўртада ҳаммоллардай «пўшт-пўшт»лашиб ҳовлига Қўчқор билан Акмал хомсемиз кириб келишиди.

Қўчқор, белида кўрпача, катта шкафга арқон боғлав орқалаб олган, Акмалининг елкасида Машрабнинг столи!

Машраб тепа сочи типпа-тиқ бўлиб кетди: «Ахир шкафдаги китоблар нима бўлди? Стол тортмасидаги ёзув дафтарлари-чи?»

Машраб қаерда ётгани эсидан чиқиб, болохонадан сакрашга чоғланган ҳам эдики, бири иккита стул, бири кўрпа-ёстиқ кўтариб Муяссар билан Гулчеҳра кириб келди.

Акмал билан Қўчқор бир-бирини туртиб-суртиб стол билан шкафни ичкарига олиб киришди, Муяссар уйини, Шириной билан Дўндиқ ҳовлини супуришга киришди, буви эса боғ билан ҳовли ўртасида ҳаллослаб чопиб юрар, дам сув ташир, дам ўчоқ бопида куймаланарди.

Бирдан борг томонда шов-шув кўтарилиди: тор кўчанинг бошида, олдинда Комил билан Азиз домла, учтўргта арава кўринди.

Беш-олтита ёшрўқ аёллар жойлашган биринчи арава бувининг дарвозасида тўхтамасдан ўтиб кетди.

Аравани Мирза деган таниш бола ҳайдаб келар, унинг икки ёнида ўтирган икки ёш жувон малла сочларини силкитиб кулишар. Бу Мирзага хуш ёқса керак, оғзи қулогида, атрофга гердайиб қаради. Уч-тўртта кампир ва ёш болалар минган иккинчи арава ҳам бувининг дарвозасида тўхтамади.

Булар биринчи аравадагиларнинг тамом тескариси эди.

Аёлларнинг юзлари касалманд ва тунд. Улар пичан тўшалган шотили аравада қоплар ва чамадонларга ёнбешлаб ётишар, оғзин, малла ранг юзларида бефарқ бир ифода бор, ўзлариям втрофга лоқайд тикилишарди. Фақат болаларнинг сомон юзларида таажжуб жилва қиласди, кўзлари милтирайди.

— Вой, вой, ана уни қара Володя, олмаларни кўрдингми? Тизилиб турипти-я!

— Олма эмас, шафтоли у, тентак!

— Эй, бу ёқка бир қара — лайлакнинг уяси!

— Ие, лайлак бу ёқда ҳам бўларкан-да, а?..

Машраб арава муюлишдан бурилиб кетгунча куазиб қолди.

У «меҳмон»ларга кўзи тушган заҳотиёқ, улар қаёқ-дандир узоқдан, афтидан. Фронтга яқин жойлардан эвакуация қилинган оиласлар эканини, демак, кичик тоғасининг уйига ҳам шундай оиласлардан бири кўчиб келишини, ўзининг ёзув столи билан шкафи ҳам шуларга мўлжалланганини тушунди.

У уруш бошлангандан бери Ўзбекистонга бунаقا оиласлар жуда кўп кўчиб келганини эшилган, уларга ёрдам берган одамлар, хусусан, ёшлар тўғрисида газетада босилган хабарларни ҳасад билан ўқирди.

Мана энди шундай одамлар ўз қишилогига ҳам келишди, аммо баҳти чопмаганини қарангки, унинг бoshiga иш тушган бир мавридда келишди.

Ана, тор кўча одамга тўлиб кетди. Борзашиклар олдидаги кампирлар, болалар, чоллар... Чолларнинг қўллари кўкракларида, хотин-халажнинг кўзларида ёш.

— Юзларига қаранглар — мисоли сомон!

— Сомон бўлмасдан нима қўлсин — мусофирик осон дейсанми, жонгинам!

— Ечора болаларимиз ҳам юришгандир мусофирикда мана шунаقا сарғайишиб!

Ана, яна бир арава кўринди. Араванинг кетида Гулсум опа келарди. Бу аравада ҳам қоп ва чамадонлар орасида аёллар ва ёш болалар ўтиришипти. Ўртада жигар ранг одеялга ўралиб олган бир аёл чўзилиб ётипти.

Аёлнинг кўзлари юмуқ, ўйиб олингандай ичига ботган сўлгин юзи зательфарон. Аёлнинг ёнида унинг озгин қўлини ушлаб, ўн беш-ён олти ёшлардаги бир қиз ўтирибди, қизанинг ҳар бири пиёладай қорамтирик кўзлари кўчадаги одамларга жавдираф қарайди, гўё шафқат тилайди.

Арава бувининг дарвозасига келиб тўхтади, шу заҳоти изма-из келаётган Гулсум опа чалқанча ётган аёлга энгашди:

— Серафима Федоровна, келдик уйга.

Аёл бошини секин қимирилатди, кўзини бир очиб, яна юмди.

— Ҳозир, ҳозир,— аёл учун жавоб берди ёнидаги қиз.— Ойим... Ёрдамлашмасак туролмайдилар.

Қиз чопиб келган Қўчқор билан Акмалга тугунларини олиб берди, сўнг, онасининг бошини суюб кўтарди.

Аёл қаддини ростлаб ўтиргач, узоқ йўталди. Ҳар йўталганда озғин кўкраги темирчининг дамидай бир кўтарилиб тушар, юмуқ кўзларидан ёш оқарди.

Ниҳоят, буви тутган бир пиёла совуқ чойни ичгач, йўтали бир оз босилди, кейин ён-веридан чўзилган қўлларга суяниб ерга тушди. Шу заҳотиёқ аравадаги аёллар:

— Хайр, Серафима Федоровна!

— Омон бўл!

— Илоҳим шифо берсин!— дейишиб, қўлларини қимирилатишиди ва гўё узоқларга кетаётгандай, гўё бундан кейин юз кўришмайдигандай кўзларига ёш олишди.

Серафима Федоровна Гулсум опа билан қизининг қўлига суяниб ва бир-бир босиб ҳовлига томон йўл олди. Арава ҳам қўзгалди. Уйдагиларнинг кўзлари ҳамон Серафима Федоровнада.

Машраб бу кўзлардаги ҳадиксираш, ачиниш, ҳатто қўрқувга ўхшаш ифоданинг сабабига кейин тушунди.

Узоқ-узоқларда туғилиб ўсган бу одамлар учун боғларга кўмилган пастқам уйлар, тор кўча ва пахса деворлар, атрофларини қуршаган қорамағиз юзли оломон сирли ва ғалати туюлиши табиий эди..

Машраб чопиб ҳовли томондаги дарчага ўтди.

Иғилганлар касалманд аёлни қуршаб олганларича уйга кириб кетишиди.

Ҳовлида фақат Акмал билан Қўчқор қолди.

Қўчқор дераазадан мўралаб қаради да, айвоннинг устунига суюниб ўтирган Акмалнинг ёнига келди.

— Хў-ўш, бу иш ҳам битди, энди бу ёғи қандай бўлди, хом семиа?

— Нимани айтяпсан?

— Нимани дейди я! Девонани айтаман!

Акмал елкасини қисди.

— Ҳайронман. Изламаган жойимиз қолмади ю!

Қўчқор қўлини бир силтаб уйдан чиқдан Муяссар билан Гулчеҳрани четга имлади, бироқ кетма-кет эшикда Гулсум ола билан ҳалигиmall сочли қиз кўринди.

Қиз ҳам онасидай озғин эди. Лекин, елкасига тушган силлиқ соchlари, пешанасини, бўйини қучиб, тўзғиб ётгани учунми, озғинлиги учча билинмасди.

— Менга қаранглар, қиалар,— деди Гулсум ола,— бемор дам олсин, сенлар Ларисага боғни кўрсатинглар.

Муяссар бир Ларисага, бир Гулсум опага қараб таклиф қилди:

— Бўлмаса бизнинг боққа бора қолайлик.

— Майли,— деди Гулсум ола.

Шу пайт, қўлида сопол коса, Моҳира буви пайдо бўлди:

— Ҳой, болам Қўчқоржон, болохонага чиқиб, бир коса қурт олиб туш. Бетобга жиндай сарёғ солиб қуртава қилиб берай, бувинг ўргилсин.

— Хўп бўлади, бувижон!

Кўп ўтмай болохонадан Қўчқорнинг.

— Топдим, топдим ўғрини! — деб оламни бошига кўтарган овози эшитилди. Кейин, бояги сопол коса дарчадан стилиб чиқди ю, ерга тушиб чил-чил синди, бир ҳовуч оқ қурт ёнгоқ бўлиб сочилиб кетди. Ниҳоят, дарчада кимнидир оёғидан маҳкам ушлаб олган Қўчқор кўринди.

— Тутдим ўгрини, тутдим!

Кетма-кет Машрабнинг ўзи ҳам кўринди. У қўлларини дарчанинг икки томонига тираб ўтириб олди.

Унинг афти ангорини таниб бўлмас, ҳамма ёғи тегирмончидай чанг-тўзон, саватдай тўзигиган соchlарига пичан ва беда япроқлари ёпишиб қолган, умуман шунчалик ғалати бир аҳволда эдики, ҳамма бирдан «гур» этиб кулиб юборди. Кулганда ҳам ҳеч ким Машрабдан кўзини узмай, негадир бир-бирига кўрсатишб қулишар, Дўйнид эса қулаб кетишдан қўрқиб Муяссарни маҳкам қулоқлаб олганди.

Машраб Қўчқорнинг юзига бир шапати уриб, қочиш хаёлига ҳам борди-ю, Муяссарга кўзи тушиб беихтиёр жилмайди. Муяссарнинг кулишида, қопиларининг майин чимирилишида, бошини сал буриб қиё боқиб туришида юракни жизиллатадиган бир нафосат ва илиқлик бор, гўё у Машрабнинг дилига озор берганини сезгану, энди буни юшратмоқчи бўларди.

Машрабнинг кўнглидаги бутун гурбат бирдан булатдай тўзгиди, у ерга сакраб тушди.

Шу заҳотиёёт йўқотган жўжаси топилган товуқдай чопқиллаб буви келди, бағрига босиб у юзидан, бу юзидан чўлп-чўлп ўтти:

— Вой болагинам-ей, юракларимни ёриб юбордингку, бўйгинангдан бувигинанг гиргиттон!

Машраб кампирнинг қучогидан базур чиқиб, айвоннинг устунига суюниб турган ойисига қаради.

— Кечирасиз, ойижон, мен... шундоқ бўлди...

Гулсум опа унинг юзига қарамасдан:

— Бор,— деди,— боққа чиқинглар. Кейин... у ёқда сувга ҳам кеч қолманглар.

— Сувдан хотиржам бўлинг, опажон! Ҳаммаси жойида бўлади!— Қўчқор Машраб «топилганидан» хурсанд, кулиб жавоб берди ва чопиб Ларисанинг олдига ўтди:

— Қани, қани, боққа марҳамат қилинг, Ларисахон! Свой огород, персик мног. Асло тап тортманг. Хорошай девушка, персик не жалка!

Ҳамма кулиб юборди. Машраб ер остидан секин Муяссарга қаради. Қиз дарҳол кўзини олиб ҳочди, қовоги осилиб, лабларидаги табассум шабада теккан шамдай сўнди-қолди.

* * *

Йўқ, гап госпиталда ҳам эмас, ҳамма гап шундаки, госпиталга бу ҳандалакларни Муяссар олиб бориши керак эди.

Кечакешинда, Муяссар, тушки овқатга чиққан аёлларнинг олдига бориб, газета ўқиб бераман, деб турганида, уни тўсатдан идорага чақириб қолишиди. Кирса уни Комил кутиб ўтирипти.

У Муяссарни кулиб қарши олди:

— Келинг, Муяссархон! Ўзим ҳам ўйловдим-а, шунақа яхши қиз бўлсангиз керак деб! — деди Комил ва соғ қўлини бериб кўришаркан, ҳўшимча қилди:

— Эшитдим, эшитдим, жа яхши иш бўти, Муяссархон!

Муяссар унга қарашга журъат этолмай:

— Вой, нима қипман шунча! — деганда, тўрда нималарнидир ёзиб ўтирган Барно кўзларини сузив кулади:

— Камтарлигинги здан ўргилай, Муяссархон! Бозорга деган икки яшик олчани ярадорларга бепул улашадилару, тағин нима қипман дейдилар! Ойингиздан калтак емадингизми ишқилиб?

Комил, қиз жижолат чекканини сезди шекилли, гапни бурди:

— Бундоқ бир иш қилсак, Муяссархон, колхозда ҳандалак пишиб қолган эмиш. Шунақами?

— Ҳа, етилиб қолди, ака... — Пойгаҳда ўтирган Кўр Шермат ўрнидан туриб жавоб берди. Муяссар уни әндигина пайқади. — Бир қоп-ярим қоп топилиб қоллади...

— Жуда соз! — деди Комил. — Бу киши шу бир қоп-ярим қоп ҳандалагини берса, боғдан бир-икки қути олма-полма олсангиз. Кейин... Дугоналарингиздан учтўрттасини топиб, ҳаммаларинг атлас кўйлакларингни кийиб... Атлас кўйлакларинг борми? — кулди Комил ва яна дарров жиддийлашди. — Хуллас, госпиталдаги ярадорларни бир хурсанд қилсак! Колхозда комсорг йўқ экан. Бироқ... Колхоз нима-ю, мактаб нима? Сиз мактаб комсорги сифатида шу ишни ўз зимманига олсангиз, нима дейсиз?

Муяссар нима ҳам дерди? Жон-жон дейди, холос!

Шу-шу, у кечаси билан госпиталь түғрисида ўйлаб чиқди. Бир арава ҳандалагу мева-чевалар билан шаҳар касалхонасига жойлашган госпиталга кириб боришларини, уч-тўрт кун олдин танишган ярадор йигитлару, ҳамшира қизлар билан қайта кўришишларини ўйлаб тонг оттириди.

Унинг ярадорлар билан танишуви ҳам жуда қизиқ бўлганди. Бу йил дадаси эрта кўкламда даштда юргани учун олчаларини териб сотадиган одам бўлмади. Ахийри, ойиси Гулсум опага айтиб, бир кунга рухсат олиб берди-ю, Муяссар икки яшик олча териб, тонг палла йўлга тушди. У билмасдан қишлоқдан кеч чиқкан экан, шаҳарга офтоб найза бўйи кўтарилилганда кириб борди. Бунинг устига йўлни билмас экан, бир вақт шаҳар касалхонасининг ёнидан чиқди. Қараса, касалхонанинг ҳовлисида турна қатор бўлиб ярадорлар ўтиришилти!

Бировларнинг қўлида қўлтиқтаёқ, бировлар таёқсиз бир оёқлаб сакраб юрипти. Бировларнинг бошлари боғланган, бировлар қўлларини бўйинларига осиб олган...

Муяссар шаҳарга госпиталь кўчиб келганини эшитган, қанча одамлар ўз жигарбандларини ахтариб келиб-кетганини ҳам биларди. Шундай бўлса ҳам, юраги алланечук ўйнаб кетди. Шу пайт, кўзи темир панжарага суюниб ярадор йигит билан гаплашиб турган ёшгина қизчага тушди. Қиэча Муяссарга худди бултур ёзда ТошМИнинг тўртиничи курсидан фронтга кетган опаси Зебони эслатди-ю, азбаройи унинг овозини эшитгиси келлаб:

- Бозор шу ёқдами, опажон? — деб сўради.
- Йўқ, орқангга қайтасан. Сал юриб, чапга буриласан,— деди қиача ва кулимсираб сўради:
- Яшигинг-да ўрик эмасми, мабодо, синглим?
- Йўқ, олча, опажон,— деди Муяссар,— яхши олча.
- Яхши бўлса бир-икки стакан сотинг — бозор нархини берамиа.

— Вой, нега ундай дейсиа? — Муяссар эшагини тўхтатиб ерга сакраб тушди.— Сотиб олибманми сизга сотаман?..

У яшикнинг қопқоғини кўтариб, бир ҳовуч олча олди ва темир панжара орасидан қизга чўэди.

— Мана, еб кўринг, спажон!

Қиз битта олчани оғзига солиб тилини такиллатиб кулди·да:

— Алёша, стакан? — деб бақирди.

Бу ўртада, қўлларида мис товоқ ва котелок, дарвозадан бир-икки йигит чиқиб келди.

Муяссар шошганидан стакан ҳам эсидан чиқиб ҳовчлаб олча тарқатаркан, вужудини чулғаб олган иссиқ бир меҳрдан энтикиб дерди:

— Йўқ, йўқ, пул керак эмас, ўзимизнинг олча, ахир!..

Киши фақат яхшилик қилгандагина ҳис әтадиган ажиб бир туйғу уни ўз қанотларида осмонга олиб чиқиб кетган, шу топда у заҳил юзли бу солдатларнинг кулимсираб айтган битта раҳмати учун икки яшик эмас, ўн яшик олчаси бўлса ҳам аямас эди.

Муяссар қишлоққа ҳам шу ҳислар қанотида кириб келди, фақат қўлида челак, сойга сувга чиққан ойисини кўрганидагина... ҳушига келди.

Ойиси унинг палапартиш гапларини әшитиб, секин «уф» тортди.

— Майли, бўлари бўпти, бўёғи синибди, беш-ён сўм пул қилиб келсанг... укаларингга уст-бош бўлармикин девдим...

Муяссар Комилнинг топшириғидан кейин кечаси билан ухлай олмади. Ҳаёлида минг хил режалар тузиб, тонг оттирди·ю, эрталаб Гулчехрани олиб, дугоналари билан гаплашгани кетаётганида... бу кўнгилсиз воқеанинг устидан чиқди!

Ахир... Машраб қандай қилиб бунчаликка бордийкин? Бундан чиқди, унинг ҳамма гаплари, шу йил баҳорда комсомолга ўтаётган пайтда ичган қасамлари, севимли хитобларнинг қаҳрамонларидан бўлишга уришилари, ҳаммаси·ҳаммаси бекор экан·да?

Муяссар шу ўйлар билан бўлиб, сойга чиққанларини ҳам пайқамай қолди, фақат тахта кўприкдан ўтаётганларидагина ҳушига келиб:

— Вой, кечирасизлар, хаёлим қочипти,— деди ва олдинга ўтиб, чап қўлдаги дарвозага бошлиди.

Муяссарларнинг боғи катта бўлмаса·да, дараҳтлари ёш, қалин, ўзиям бир томони қир ён бағридаги пахтазорга бориб туташади. Фақат мева сийраклашиб қолган. Рост, кузги олма ва олхўрилар ҳали шундоқ ту-

рибди, бироқ шафтоли билан ўрик, битта-яримта чумчук чўқиганилари бўлмаса, деярли қолмаган.

Шундай бўлса ҳам Лариса боғни кўриб, оғзи очилиб қолди.

Ҳар бир дараҳт тагида узоқ-узоқ тўхтар, япроқлар орасида товланган битта-яримта шафтолиларни уэишдан қўрққандай әҳтиёт билан силар, олхўри ва олмалар чинакам эканига ишонмагандан ушлаб-ушлаб кўрарди.

Атрофида гирдикапалак бўлган йигит-қизлар эса у тортинган сайин кўнглини олишга уринишарди. Айниқса, Қўчқор унга ёқишига жон-жаҳди билан ҳаракат қиласиди. Гоҳ шафтолиларнинг энг баланд шоҳларига чиқиб, япроқлар орасида яшириниб қолгани битта-яримта меваларни топиб этагига ташлайди, гоҳ қуш чўқиб асал бўлиб кетган ўриклардан териб тутади.

Лекин қизиқ, улар кўнглини олишга уринган сайин Лариса ҳам ўзини галати тута бошлади. Олдин тортиниб турган қиз салдан кейин кўзига нима кўринимасин—ҳаммасини қўлидаги челакка тера бошлади. Фақат Қўчқор тутган меваларнигина эмас, ерда, бедалар орасида ётган олма пўчоқлари, шафтоли ва олча данакларигача териб олар, кўзлари олазарак бўлиб атрофига қаради.

Аввал ҳамма ҳайрон бўлиб қолди, кейин имо-ишора билан шафтоли ва олча данакларини еб бўлмаслигини тушунтиришга ҳаракат қилиб кўришиди, ахийри Қўчқор аччиғи чиқиб челягини қўлидан олди-да, шафтоли ва олча данакларини ҳар тарафга сочиб юборди.

— Буни еса жинни бўлади одам,— деди у, бармоги билан пешонасини «дук-дук» уриб.—Горъко! Тушунасанми, горъко!

Лариса олдин қўрқиб кетиб, орқага тисарилди, сўнг лаблари титраб, кўзи жиққа ёшга тўлди-ю, ўзини бедага отиб йиглаб юборди.

Ҳамма эсанкираб қолди. Айниқса, Қўчқор ўзини йўқотиб қўйди. Худди оғир жиноят устида қўлга тушгандай, кўзлари жавдираб, Машрабга қаради.

— Ахир мен... яхшиларидан териб берсам девдим...

Муассар ўзи ҳам сезмасдан «сен» лаб юборди:

— Булар қайси шаҳардан келгани эсингдан чиқдими? Фаҳм-фаросат борми ўзингда?

У Ларисанинг елкасидан қучоқлади.

— Лариса, менга қара, Лариса...— деди, сўнг, қиа ўзидан уялгандай тескари бурилганини кўриб, йигитларга юзланди.

— Бораверинглар, ўзимиз юпатиб оламиз.

Қўчқор индамай пахтазорга томон йўналди, лекин беш-олти қадам юрмасдан тўхтади.

— Муяссархон, пахтазорга чиқинглар. Бирпас гаплашиб ўтирамиз...

Акмал хомсемиз ҳам бир-икки марта томоқ қоқиб олгач:

— Шундай қилинглар, биз кутамиз,— деди.

— Ҳа, сақлаб қўйган ҳандалакларинг борми?— Гулчехра «пиқ» этиб қулиб юборди.

Муяссар ер остидан Машрабга қаради: у кўзлари аянчли жавдираб, тескари бурилди. Муяссар унинг нимадир демоқчи бўлиб оғиз жуфтлаганини, бироқ гапиришга журъат этмаганини пайқади-ю, ойисининг угра ошини ичиб бўлиши билан, ўзи қизларни пахтазорга бошлади.

Қизлар ариқ ёқалаб, пахтазорга боришганда, йигитлар шимларининг почалари тиззаларигача шимарилган жўякларга чим босиб сув тақсимламоқда, четроқда дастурхонга ўроғлиқ овқатлари турарди.

Кун ботган, тоғлар устидаги нафис бўёқлар сўнган, лекин ҳали ёруғ, пастдаги сой, сойнинг у юзидағи тор кўчалар, машъум полиз, тепадаги гишт мачит, узоқда, боғлар орасида оқариб турган мактаб—ҳаммаси, ҳатто тўғон бўйидаги терак учida, уясида қўниб ўтирган лайлаккача аниқ кўринар, гўё офтоб сўниши билан қишлоқни тўсиб турган аллақандай парда кўтарилгану, ҳамма нарса бўлакча бир тиниқлик кашф этган...

Пахтазорда одам қолмаган, фақат олисда, қир этагида бир-иккита аёлнинг рўмоллари оқариб кўринади.

Сал ўтмай осмонда илк юлдузлар милтиради. Сўнг кимдир уларни ҳовучлаб сочаётгандай бирпасда осмон ғуж-ғуж юлдузларга тўлди. Қаердадир олисда, қишлоқнинг у бошида ит ҳуриди, сойда адашиб қолган қўй маъради, у ер-бу ерда чироқлар йилтиради.

— Ит ҳуриши, қўй маъраши...— деди Лариса. Унинг овози чуқур таажжубга тўла эди.— Ишонасанларми, ҳаммаси эсимдан чиқиб кетипти. Сув шилдираши, мушу.. миёвлаши, сигир бўкириши—ҳаммаси-ҳам-

маси ғалати эшитилади қулогимга,— у секин бурилиб Қўчқорга қаради.— Боя мен сизни хафа қилдим. Бироқ... Гапимга ишонинг: ўзим ҳам билмайман нима бўлганини. Мана, бир ой бўлдики, овқатимиз анча яхшиланиб қолди. Яхшиланиб қолди-ю... бари бир ейдиган нарса кўрсам кўзим тўймайди!..

Қўчқор хижолат чекиб қўлини силтади:

— Э, нималар деяпсиз, Ларисахон, Ленинград дегандаёқ тушунганимиз ҳаммасига!

Лариса бўйнигача сип-силлиқ тушиб, елкасида шаршарадай кўпириб ётган сарғиш соchlарини тўғрилаб ўлланиб қолди. Кейин кўзларини олисларга тикиди, унинг кўзлари кипригининг қалинлигидан қоп-қора кўринар, аслида кўм-кўк эди. У ўаига гапираётгандай сеқин гапира бошлади.

— Йўқ, улар бошдан кечирган икки йилни, икки йил қамалда қолган Ленинградни бошқалар кўз олдига келтира олмайди. Салкам етти юз кун милт этиб чироқ ёнмаган катта шаҳар... Қорга кўмилган, ҳувиллаб қолган кўчалар. Чаналарга ортилган тарашадай мурдалар... На кулги, на шўхлик! Ўқтин-ўқтин фақат тўп гумбурлайди, снарядлар портлайди-ю, хароба уйлар орасида аллақандай соялар, тўғриси, қалин кийимларга ўранган тирик мурдалар юради. Лекин бу соялар негадир таслим бўлмайди, кечалари музхонага айланган уйларда яхлаб қолишиса ҳам, қандайдир бир куч уларни оёққа турғизади-ю, ҳар куни эрталаб қор босган кўчаларда, завод дарвозаларида, мактабларда пайдо бўлишади...

Ларисанинг дадаси Владислав Мефодьевич Гордий машҳур хурург эди. Эҳтимол, эшитишгандир — у кишини газеталар ҳам тилга олган эди. Бултур қишда уни, госпиталда операция қилаётган жойида, самолётга ўтқазишиб, Белоруссия ўрмонларидаги қайси бир партизан отрядига олиб кетишибди... Шу-шу қайтиб келмади. Уликми, тирикми, ҳеч ким билмайди.

Ойиси Герцен институтида чет тилидан дарс берарди. Уларни бултур Ладога кўлида машҳур муз йўли очилгандай ёқ звакуация қилишмоқчи эди, бувиси қаттиқ касалга чалинди-ю ойиси уни ташлаб кетишини хоҳламади. Бироқ ташлаб кетмаганидан нима фойда, бувиси бари бир бу қийинчилкларга бардош беролмади... Очлик, совуқ ҳаммани шунчалик ҳолдан тойдир-

таг эдики, уни қабристонга әлтиб күмадиган одам ҳам топилмади. Ойиси билан Лариса ҳовлиларидан чуқур қазиб, ўзлари кўмишди. Балки ойиси ҳам ўшандада тамом бўлгандир!

Лариса юзини кафтлари билан босганича индамай қолди. Муяссар уни қучоқлаб, соchlарини тузатиб нималардир деб пичирлади.

Узоқ жимлик чўқди. Машраб кўигли бузилиб кетганидан чурқ этмас, Қўчқор билан Акмал ҳам қовоқлари осилган, пишиллаб нафас олишар, ҳатто енгилтак Гулчеҳра ҳам индамай қолганди.

Лариса ғамгин хаёллардан қутулмоқчи бўлгандай бошини силкитиб:

— Майли,— деди,— ойим сал ўзига келсин, яна кетамиз шаҳримизга. Албатта кетамиз!

Лариса ҳали гапириб бўлмаган ҳам эдики, ёнбошлиб ётган Машраб юрагини тўлдирган туйғулардан ўпкаси тўлиб:

— Дўстлар!— деди,—мен... менинг битта таклифим бор: келинглар ўша улуғ шаҳар учун, Ленинград учун курашларда ҳалок бўлган буюк одамларнинг ёруғ хотираси олдида... қасамёд қиласайлик... Халқимиз бошига оғир кунлар солган душманни тор-мор келтириши учун қўлимиздан келган ёрдамимизни, керак бўлса жонимизни ҳам аямайлик. Шу олтovимиз... эндиликда қўлни қўлга бериб, бир тан, бир жон бўлиб курашайлик!

Эҳтимол, бошқа пайт, бошқа вазият бўлганда Машрабнинг бу гапи одатдагидай ҳамманинг лабида табасум уйғотарди, лекин ҳозир, бошқалар у ёқда турсин, Қўчқорнинг ўзи (баландпарвоз гапларни жинидан ҳам ёмон кўрадиган Қўчқорнинг ўзи!) биринчи бўлиб Машрабга қўлини чўзди:

— Қасамёд қиласаман!

— Қасамёд қиласаман!

Дагал ва нозик қўллар чирмашди.

Қалбларини сўз билан ифода қилиш қийин бўлган, шунинг учун ҳам сукутга даъват этган аллақандай юксак ва мусаффо бир туйғу ғаллаб олди. Мардликка, сабот ва соғлилка ундовчи бу туйғу уларнинг ўзлари учун ҳам шуидай янги ва аллақандай ёқимли эдики, ҳеч ким бу сукутни буагиси келмас, шу ҳолда бир-бирларининг юрак уришларига қулоқ солиб, тонг отгунча туришга тайёр эдилар.

Муяссар Машрабнинг қўллари титраб кетаётганини ҳис этар, бу титроқ унинг вужудини ҳам жимиirlатар эди.

Машрабга ўхшаб, ўзиям осмони фалакда юрадиган қиз, шу бир гапи учун ҳозир унинг ҳамма гуноҳини кечиришга тайёр эди. Чунки Машраб шу топда унинг дилида қайнаб турган туйғуларини ҳис этди, унинг тили учидаги турган гапларни топиб айтди!..

Машраб ўзиям гўё кечирим сўрар, Гулсум опаникига ўхшаган сал маъюс қўй кўзлари — Муяссар буни аниқ кўриб турарди — гўё эндиликда ҳеч қачон бунаقا аҳмоқлик қилмасликка, ҳамиша пок ва ҳаққоний бўлишга ваъда берар, ҳатто қасам ичарди.

Муяссар, унинг дилидаги изтиробларига эндинга тушунгандай юраги бирдан алланечук бўлиб, «қўлт» этиб ютинди.

«Йўқ, ҳозир айтиб бўлмайди... Биламан, ўзинг ҳам уялиб юрисан, ҳаммасини биламан, Машраб!»

Учинчи боб

Эркен Эртоев кечурун бўладиган ўтиришни ҳар ўйлаганда юраги бир ўйнаб, Чавандозникига барвақт-роқ борди.

Чавандоз катта борнинг энг хилват жойига, ариқ бўйига ёғоч каравот қўйдириб, атлас кўрпача тўшаб, пар ёстиқлар қўйганини кўрди-ю, яна ҳам яйраб кетди.

Анвалги ўтириш меҳмонхонада бўлиб, Барнохон билан ёзилиб суҳбатлашолмаган ҳам эди. Бу сафар.., гиолослар билан ўралган бу хилват, атлас кўрпачаю пар ёстиқлар..

Эртоев кулимсираб ариқ бўйига чўнқайди, шариллаб оқаётгая ғалати яшил сувга бўлиқ билакларини, келишган бўйини, юзларини юваркан, сувдаги кўзачага кўзи тушиб Чавандозга юзланди:

— Балиқнинг подшоси илинибдими дейман, Холмат ака?

— Балиқ ҳам гапми, Эртоев ака, бу кўзачада шунақа бир тилсим борки, оғзини очсангиз кўнгилдаги ҳамма ғурбатни ювиб, ўзингизни арши аълога олиб чиқиб кетал!..

Улар кулиша·кулиша, каравотга чиқиб ёнбошлаган ҳам эди, рўпарадаги гилос шохлари силкиниб, олдин дастурхон, қўлида бир патнис шафтоли, новчадан келган, худди Чавандоздай қора кўз, қора қош бир йигит кўринди, йигитнинг кетидан қўлида бир сават патир, юмалоқ лўппи юзлари иссиқ нондай қизарган, бўйи пастроқ бўлса ҳам, хушбичим, дўндиққина бир қиз чиқиб келди.

Йигит гилослар орасидан чиқиб бирдан тўхтаган эди, қиз қўлидаги баркаш билан унга урилди-да, майдада садаф тишлари ярқираб кулиб юборди.

Чавандоз пешанаси бир тиришиб яна ёзилди:

— Намунча қозиқ бўлиб қотиб қолдинг, Ёдгорбек? Эртоев аканг билаи кўришмайсанми, ўғлим?

— Э, кечирасиз... Ассалому алайкум!..— Йигит қандайдир ўнгайсиз лапанглаб келиб патнисни дадасига чўзида-да, эгилиб кўришди.

Қиз баркашни каравотга қўйиб ўзини ғилосзорга урган эди, йигит ҳам орқасидан бесўнақай лапанглади, лаҳзадан кейин у ердан қизнинг хандон ташлаб кулган овози эшитилди.

— Бу қиз ким ўзи?

— Ҳа, шу... қўшнимизнинг қизи. Ўзи сал ҳалигидақа... бир қайнови камроқми, билмадим?

— Қайнови камми, ё қитиги қўзғаб юрибдими?

— Қитиги қўзғаса, ёнида биттаси юріпти-ку.

Эртоев истеҳзоли кулимсираб пичинг қилди:

— Ҳа, кишинаб турибди айғирингиз!

Чавандоз қалтис гапирганини тушуниб ўзидан фижинди: у бугун Эртоевни меҳмон қилишидан мақсад— Ёдгорбек тўгрисида гаплашмоқчи эди. Ёдгорбек биринчи хотинидан кўрган, ўз пушти камаридан бўлган биттаю битта фарзанди. Қўчқорга қолса «бўрини қанча боқма този бўлмайди» деганларидек, ўгайни қанча бағрингга тортмагин, бари бир ўгайлигига борар экан, Чавандоз Фотимага уйланганида, Қўчқор олти-етти яшар бола эди, ўшандан бери ардоқлайди, Ёдгорбекдан ортиқ кўрса кўрадики, кам кўрмайди, лекин Қўчқўр ҳамон ундан ётсирайди, ҳалиям бўлса кўнгли ўз отаси Қиличда. Чавандоа буни сезгандан бери Ёдгорбекка тағин ҳам меҳри ошиди.

Ёдгорбек тенги йигитлар бултур куздаёқ армияга чақирилган. Чавандоз уни бир ёш «кичрайтириб»

зўрга олиб қолди, баҳорда эса, бронь беради деган умидда, тракторчилар курсига юборди. Кейин тракторчилар тугул, ундан «йўғонлар» ҳам омон қолмаслиги ни пайқади-ю, МТС дан чақиртириб олди. Энди битта йўли — темир йўлга жойлаштириб қўйиш қолди, холос.

Бу жуда нозик гап, албатта, чунки бир томони военкомга бориб тақалади, лекин Эртоев «йўқ» дёёлмаслигига Чавандоз ишонади, чунки «ўтказиб қўйган» жоийи бор.

Бу йил қишида «меҳнат батальонига йигирма одам берасан», деб буйруқ келганда Эртоевнинг қил ўтмас қадрдени Эшвой Мўмин ҳам кетадиган бўлди. Лекин жўнашдан бир кун олдин Эртоев орага тушиб, унинг қолишига сабаб бўлди.

Эшвойнинг бактига, қишлоқда қўй оғзидан чўп олмайдиган Эшмат Мўмин деган бир одам бор эди. Чавандоз Эртоевнинг илтимосига йўқ дёёлмади-ю, Эшматни бир-икки ёш яшартириб, Эшвойнинг ўринига жўнатди юборди. Шу-шу, Эшмат Мўмин Эшвой Мўмин бўлиб Уралга кетди, чин Эшвой эса ханузгача колхозда экспедиторлик қилиб, гаштини суриб юрибди.

Рост, ўшандан кейин Чавандоз Эшмат Мўминнинг ўғли Акмални ва ундан кичик бешта боласини кўрганда виждони сал азобланиб қўяди, лекин... наҳот Эртоев унинг бу яхшилигини унутса?

Чавандоз баркашдаги патир билан сомсаларни Эртоевнинг олдига сураркан:

— Бу ёғи қандоқ бўлди? — деди кулимсираб. — Кўзачанинг оғзини очамизми, Эртоев ака?

— Сўраб бергунча уриб бер, деган гап бор...

— Яшанг, Эртоев ака, битта олдингиз!

Шаробнинг ютуми майин бўлса ҳам, ўзи ошқозонларни чўғ теккандай жизиллатиб юборди.

Иккинчи қадаҳдан кейин Эртоевнинг чеҳраси очилиб, пешанасидан маржон-маржон тер оқа бошлаганини кўрган Чавандоз, секин кўнглидаги галининг учини чиқарди, лекин Эртоев, гарчи олдин кулимсираб эшилса ҳам, кейин негадир пешанасини ишқалаб, ўйланиб қолди.

— Сиздан яширадиган гап йўқ, Чавандоз, — деди у ниҳоят. — Янги военком келган, Абубакир деган одам, биласиз.

— Билганимиз учун ўзларига мурожаат қиляпмизда, Эртоев ака!

— Тушуниб турибману, лекин тўғрисини айтсан, қалтис одам. Бунақа чўрткесарини кўрмаганман. Узи фронтовик. Капитан. Бир оёғидан айрилиб келгану, аммо лекин сиртидан ўтсангиз тепади, олдиdan келсангиз тишлайди, хумпар!

Абубакиров Ёдгорбекни кўриб, «Шундай соғлом йигит фронтга бормай нима қилиб юрибди бу ерда?» деган маънода шама қилганлари Эртоевнинг эсига тушиб, шикоятомуза гапирди-ю, Чавандоз индамай қолганини кўриб, лабини тишлади. Самими гапираман деб, ожизлигини ошкор қилиб қўйишига оз қолибди!

Эртоев йўталди, сўнг, гапни юмшатиш учун:

— Хайр майли, бир гап бўлар, Чавандоз,—деди.— Гаплашиб кўрармиз. Эшвойга ўхшаб бунинг ҳам бир йўли топилиб қолар. Аммо унгача бу ерда юрмасин. Даشتда тарозибон йўқ дейишаётувди. Бу ёғи тўғрилангунча бир ой-ярим ой ўша ерда ишлаб турсин.

— Ҳа, балли! Мана бу гапингизга бормизда, Эртоев ака!

Чавандоз мўйловини силаб кулди.

— Қе, қўйинг, хурсандчиликдан қолмайлик, ака!

Маладес Чавандоз: айни Эртоевнинг кўнглидагини топди!

Ҳар кун, ҳар соат маниман деган йигитлар ўққа ўчиб, дом-дараксиз кетаётган бир маҳалда гам-гуссага бало борми? Бир кун бўлса ҳам ўйнаб қол!

Эртоев бу гапни кўнглидан ўтказса-да, бу сафар Чавандоз тутган шаробни ичмади. У энди шаробни жаннат фариштаси билан қадаҳ уриштириб ичишни орзу қилас, Чавандозга сездирмасдан гиолосзорга зимдан назар ташлар, у ердан қурарай кўзларини сал сузиб, нафис қора қошлирини чимириб, бир-бир босиб чиқиб келадиган гўзални орзиқиб кутарди.

Эртоев Барнони дастлаб кўрганда тамом бошқа нарсаларни қўмсаган, яъни ҳар бир соғлом эркак кўҳлик қизни кўрганда нимани ўйласа, у ҳам шуни ўйлаганди.

Бора-бора қалбидаги туйғу тобора алангаланиб, қандайдир янги, илгари ҳеч қачон ҳис этмаган ширин изтиробга айланди. Бурноғи кун, ниҳоят, Барно билан биринчи марта холи суҳбатлашишга муваффақ бўлди.

Бу учрашув у кутган лаззатларни беролмади, ак-

синча, Эртоев ўз орзуларига аришиш осон эмаслигини, бунинг учун ҳали кўп «меҳнат» қилиши кераклигини тушунди. Бироқ шуниси қувонтирадики, агар сабот билан иш тутса, орзуси ушалиши эҳтимолдан ҳоли эмас эди!

Барно айниқса хайрлашаётганларида очилиб кетди. Эртоевнинг қўлинг қўйиб юбормасдан бир нафас ушлаб турди, сўнг, оппоқ тишларини кўрсатиб:

— Майли, бўлмаса, кўришгунча хайр, Эркинжон ака,— деб кулди.

Шу-шу, Эртоев тоғ отгунча ухлай олмади. Кафтида гўё қиз қўлининг илиқ тафти, қулоқлари остида «Эркинжон ака» деган майин товушининг ажиб ҳарорати қолган, бу ҳарорат иситмасини чиқарар, қиз кўзларини сузиб кулишлари всига тушганда аъзойи баданидан ўт чиқиб кетарди.

Ана, гилослар яна силкинади. Олдинда, негадир бошини елкасига қисиб олган Кўр Шермат, кетида...

Эртоевнинг юрагига қўйилган иссиқ тўлқин тош чироқ кўтарган Ёдгорбекни кўрганда муагга айланив, вужудини қақшатиб юборди.

Ёдгорбек тош чироқни гилосга осиб, орқасига қайтиди. Кўр Шермат каравотнинг четига омонатгина ўтириди, савол назари билан тикилиб турган Чавандозга қараб гуноҳкор жилмайди:

— Охир замоннинг бузуқларидан куйдик куйганда! На ўзлари бир нимани эплайди, на эплаганин кўра олади!

Эртоев шаҳд билан қаддини ростлаб ўтириди.

— Хўш, нима гап ўзи?

— Ҳа, шу...— деди Кўр Шермат.— Барнохоннинг битта ҳангى қайниси бор.

— Хўш?

— Уша бир нимани сезиб қолганми, кеча Барнохоннинг юзига солувди. Бугун тўнини тескари кийиб олибди.

— Ҳм...— деди Эртоев...

— Ўзи шунақа сал нобопроқ бола,— гап отди Чавандоз.— Ҳалиги... Бизни ўгай болани ҳам йўлдан урибди, аҳмоқ!

Чавандоз ер остидан Эртоевга қаради, қаради-ю, урушдан аввал, Аъзам ячейка ҳаёт вақтида унинг уйига бир арава мева-чева олиб боргани всига тушиб кетди.

Чавандоз аравани даръозанинг олдида тўхтатиб, қутиларни тушираётганида МТСнинг қизик қашқа отин елдириб ячейка келиб қолди.

Чавандоз унга пешвоз чиқаркан, кулимсираб:

— Мана колхоз боғида мева-чева пишган экан, жиндек совға...— деган эди, ячейка:

— Нима, нима?— деди ранги ўчиб.— Ким айтди сенга мени колхоз боғидан текин мева ейди деб? Ким? Қани кўттар қути-путингни! Кўттар!

Чавандоз, гўё Аъзам ячейканинг овози қулоқлари остида қайта янграгандай, титроқ босиб:

— Биласиз-ку, бу боланинг отаси ўзи шунаقا эди,— деди.— Отдан тушсаям, эгардан тушмайдиган ман-манлардан бўлади булар!

— Манман деб аста айтасизми?— деди Кўр Шермат.— Турган-битгани маҳмадана!

«Отаси!»...

Эртоев, оғир энтикиб, Чавандозга юзланди:

— Қани кўзачангизни очинг. Фаришта келмасалар, соғликлари учун биттадан отайлик!

Чавандоз шаробни пиёлага «қилт-қилт» қуяркан:

— Фаришта жон-жон деб келадилару, боласи тушмагур ишнинг белига тепибди-да!— деб қўйди.

— Аллақачон фронтга кетадиган давангидай йигитни ёш бола дейсиз-а, Холмат ақал— ясама кулди Кўр Шермат.

Эртоев унинг гапини әшитмагандай, бир пиёла шаробни индамасдан ичиб юборди-да, ёстиққа ёнбошлади.

Йўқ, Эртоев Аъзам ячейканинг оиласига ёмонлик қилиш пайида эмас. Бунга сабаб, Аъзам ячейканинг яхшиликлари эсига тушганидан эмас, йўқ, биттаю-битта сабаб — уруш!

Эртоев бир амаллаб бу ёқда жон сақлаб юрибди. Лекин у чаплашиб қолган кўп одамлар ҳозир фронтда. Уларнинг орасида ячейканинг ўғли билан куёви Расулжон ҳам бор. Гулсум оланинг иккита укаси ҳам фронтда. Бир оиласдан тўрт киши урушда ҳисоби! Булар фронтдан қайтишса, айниқса Комилга ўхшаб, қўш-қўш орден тақиб келишса нима бўлади? Умуман... урушдан кейин аҳвол нима кечади?

Гарчанд ҳали-ҳозир урушнинг охири кўринмаса-да, бу тўғрида ўйламасдан илож йўқ! Умуман... фронтовиклар билан чаплашиш яхшиликка олиб бормайди!

Эртоев шу қарорга келгандан бери негадир Аъзам ячейкани кўп әслаш одатларини чиқарди.

Йўқ, Эртоев ячейка олдида ўзини гуноҳкор, деб билмайди. Агар у ўша маҳалларда Аъзам ячейкага қарши чиққан бўлса, катта мажлисларда уни фош қилиб гапирган бўлса, буни ўша даврнинг талаблари тақозо этган. Эртоев бунга амин. Амину, лекин шунга қарамай, негадир кўнглининг бир чети ғаш, назарида кимдир унинг ўша пайтлардаги хатти-ҳаракатларини, гапирган гапларини кўнглига туғиб юргандай, урушдан қайтган ҳамон дарҳол дастак қилиб кўтариб чиқадигандай туюлади.

Ахир-оқибат Эртоев, бир маҳаллар қилган ишларини бу оиласининг кўнглидан чиқариш, чиқаролмаган тақдирда ҳам, бундан кейин эҳтиёт бўлиш, хуллас, мумкин қадар уларга тегмаслик керак, деган тўхтамга келди. Гулсум опага яхши муомала қиладиган бўлди, ҳатто РайОНО билан келишиб, унга вақтинча мактабнинг директорлигини топширди. Лекин кутилмагандан Барно чиқиб қолди-ю, ҳамма ўйлари ағдар-тўнтар бўлди.

Рост, Барнони қўлга тушириш режаларини тузаркан, Эртоев ўртадан бунақа ғов чиқишини кутмаганди, бироқ кутганда ҳам шундай қиздан воз кеча олармиди? Йўқ, аксинча, адабини бериб қўймаса бўлмайди бу тиранчанинг! Чавандоз ҳақ: яхшилик билан эл бўлмайди булар. Буларни эл қилишнинг фақат битта йўли бор, у ҳам бўлса шафқатсизлик!

Эртоев қалин соchlарини тўзғитиб қаддини тутиб ўтирди.

— У тенгилар урушда қон кечиб юрипти-ю, булар бу ёқда текканга тегиб, тегмаганга кесак отиб кишинаб юрибди де?

— Кишинаб юриш ҳам гапми? — деди Кўр Шермат.— Колхоз полизига тушиб, бор ҳандалакни кўтариб кетганларини айтинг!!

— Ҳали колхоз мулкига қўл чўзяпти де? Нега мен ошиитмадим бу гапни?

— Ҳа, шу... — деди Кўр Шермат.— Иnobatxon босди-босди қилиб юборди.

— Иnobatxon! — Эртоев титроқ босиб Кўр Шерматга қаради.— Ҳозир топиб бўлармикин уларни? Топиб бўлса... Дарҳол қувиб ке идорага! Мен бир кўрсатиб

қўйай уруш йиллари колхоз мулкига қўл чўзиш қанақа бўлишини!

Чавандоз кўзлари мўлтираб бир Эртоевга, бир Кўр Шерматга қаради.

— Бу ёғи қандоқ бўларкин, Эртоев ака?

— Яна қаёгини айтасиз?

— Ҳалиги... боя айтдим-ку у муттаҳам бизнинг тен-такниям йўлдан урибди деб!

— Яшанг! Ҳали қишлоқ оқсоқолининг боласи колхоз полизига ўғирликка тушиб юрибди денг!

— Энди илож қанча, Эртоев ака, ўзи ҳалигадақа... ўгай-да, ўгай!

— Ўгай бўлса намунча жонлари ачийди?

— Ўзларидан қолар гап йўқ, ўртада кенойилари бор, Эртсев ака'

— Кенойи!. Раис акамларнинг боласи... Ўғри! Шармандачилик!— Эртоев бу гапларни ғазаб билан эмас, сал ясама писанда билан айтди. У «раис акамларни» яна бир оз эзмоқчи эди, лекин шу пайт, қўлларида лаган, олчазордан чиққан Ёдгорбек билан Гулчеҳрага кўзи тушди-ю, илжайди:

— Хўп, раис акамларнинг ўғлига тегмагину, нариги иккисини дарҳол ҳайдаб бор идорага!

У сармаст кўзларини сузиб ва уни аллақандай шерсифат қилиб кўрсатадиган қалин соchlарини тўзгитиб, Гулчеҳрага тикилди.

— Жон оғритмай жонона қайда, дегандек, бу жўжахўролар ҳам билиб қўйишисин ҳандалак ейиш қанақа бўлади? Лаббай, дўндиқча?

Гулчеҳра «пик» этиб кулиб, ўзини Ёдгорбекнинг орқасига олди, сўнг, лаганин унга тутқазди-да, олчазорда ғойиб бўлди.

Чавандоз ўғлига караб имо қилди: рав бу ердан!

Уч-тўртта чучварани оғзиға солар-солмас Кўр Шермат ўрнидан турди: кўп ўтмай Эртоев ҳам қўзғалди.

* * *

Қўчқор у ёнидан бу ёнига ағдарилиб ухлай олмай ётарди.

Лариса... қандай мулойим экан бу... кўзлари бир қарасангиз денигиздай мовий, бир қарасангиз қоп-қора кўринган рус қизи!

Қўчқор шу маҳалгача бирорта қизага кўнгил берган әмас, умуман «севги»ни тан олмас. Машраб билан Акмалдан кулиб юришининг бир сабаби ҳам шунда эди. Лекин бугун унгаям бир бало бўлди! Ғалати малла соchlари бўйнида шаршарадай кўпирит ётган бу мулойим қиз унга шунчалик хуш ёқиб қолдики, боя уни кузатиб қўйганида сал ноқулайроқ бир иш қилиб қўйди.

Ким билсин, балки Лариса унинг таклифига тез кўна қолгани учундир, балки қизининг мулойим кулиб боқишилари бошқача кўрингандир, ишқилиб, йўлда кетаётганларида у қизни секин белидан олди.

Лариса бир чўчиб тушди-ю, унинг қўлидан чиқиб кетди. Қўчқор шошиб қолди, азбаройи кечирим сўраш учун тўхтамоқчи бўлган эди, Лариса куч билан силтаб ташлади.

Қўчқор ўзини тамом йўқотиб қўйди. Лекин қиз унинг саросимага тушиб қолганини сезди-ю, жайрлашаётганларида сал тушди, қўлини бермаса ҳам, ҳар ҳолда «хайр бўлмаса» деди мулойимгина кулиб.

Қўчқор ҳозир тўшакда ётганда қулоғига ҳамон ўша овоз, ўша мулойим кулги эшитиларди.

Бирдан Қўчқорнинг ширин хаёлини бузиб, ўгай отаси Чавандоз:

— Фотма! — деб бақирди, сўнг жавоб кутмасдан: — Бу ёққа қара! — деди-да, меҳмонхонага кириб кетди.

ЛАҲЗАДАН КЕЙИН КАВУШИ БИЛАН ЕРИН «ШИП-ШИП» БОСИБ ОЙИСИ ЎТДИ, МЕҲМОНХОНАДА ЧИРОҚ ЁНДИ.

— Яна эски ҳаммом, эски тос! — Қўчқор тескари қараб ётди.

У ҳозир Чавандоз билан ойиси ўртасида одатдаги жанжал бошланишини билади. Бу гиди-бидиларнинг ҳаммасига Қўчқор сабаб бўлгаги учун ойиси оғиз очиб зътиroz билдира олмайди. Шунинг учун бир томондан ойисига ич-ичидан ачинса, иккинчи томондан ойиси билан ўз дадаси ўртасидаги муносабатлар эсига тушиб, гижинади, юрагига қўйилиб келган раҳм-шафқат совуқ қояга урилган тўлқиндай зарра-зарра бўлиб парчаланиб кетади.

Қўчқор ёши улғайиб, ўз отаси тўғрисида кўпроқ эши тган сайин, бу туйғу ўсиб боради, баъзан ҳатто бу остонаядан бошини олиб шартта чиқиб кетгиси келади.

Дарҳақиқат, отаси Қиличнинг шуҳрати қишлоқда Аъзам ячейканинг шуҳратидан ўтса ўтадики, қолишмайди. Чунки улар оқ пошонониг мардикорлигига бирга кетиб, бирга «большевик» бўлиб қайтишган, шушу бирга ҳуррият учун курашган, ячейка тузишган, босмачилар билан олишган, ахири САКУда ҳам бирга ўқишишган.

Худди ўша пайтларда, дадаси САКУда ўқиб юрган пайтларда, нима ҳам бўлиб, ойиси Чавандознинг илмогига илинган!

Қўчқор бунинг сабабини билмайди, албатта фақат шуни биладики, ойиси ёшлигига жуда кўҳлик бўлган. Унга отасидан ҳам олдин Чавандоз кўз тиккану, бошда қўли етмаса-да, ахири йўлдан урган.

Шу-шу, қишлоққа келмай кетган отаси етти-саккиз йил деганда, бурноғи йили қузда Қўчқорни кўргани келди. Ота-бала Гулсум опанинг уйида учрашдилар. Бироқ Қўчқор, гарчи дадасининг аллақандай таниш туюлган озгин чеҳрасини, оқ оралаб қолган сочларини кўрганида, айниқса маъюс қулимсираб: «Ке, ўғлим, кўришайлик», деган бўғиқ овозини эшитганида юраги эриб кетса ҳам, очилиб гаплаша олмади. Чавандознинг: «Ўғли борлиги энди эсига тушибди-до! Фарзандининг бошини силагиси келган одам шу пайтгача қаёқларда юрибди?» деган сўзлари кўнглидан чиқмай, совуққина муомала қилди. Фақат эртасига отаси қишлоқдан тўғри урушга кетганини эшитганида— Қилич ака буни негадир Қўчқорга айтмаганди— айниқса, унинг йўлдан ёзган ғамгин хатини олганда, совуқ хайрлашганлари эсига тушиб, ич-ичидан зил кетди.

Отаси ҳозир қаердадир жанубда, Донбасс томонларда, отлиқ қўшинлар сафида эскадронга командирлик қиласди, ўзиям капитан.

Отаси унга жанг тафсилотларини ёзмайди, бироқ болаликдан «чапаев»ларни кўриб катта бўлган. Қўчқор учун «эскадрон» деган сўзининг ўзи кифоя, шунинг ўзи дилини илиқ нурга, юрагини ғууррга тўлдирди. Үмуман, аксарияти қалам билан ёзилган бу қисқа хатларни ўқиган сайин Қўчқор бир отасига ҳурмати ошса, бир Чавандознинг «ошпичоқ» эканига ишончи ортади!

Мана бугун ҳам у Чавандознинг «ошпичоқ» эканини

нига яна бир ишонди. Дўндиқ Гулчеҳра боя қайтаёт-
ганларида Эртоев билан Чавандоз ҳандалакни баҳона
қилиб Машраблардан қасд олмоқчи бўлганини айтиб
қолди...

...Эшик қарс этиб ёпилди. Гурс-гурс юрган Холмат
Чавандоз кўчага чиқиб кетди. Бир оздан кейин меҳ-
монхонадаги чироқ ўчиб, уйдан ойиси чиқди, «шип-
шип» юриб ўғлининг ёнига келди:

— Қўчқор, ухлаб қолдингми, болам?

Она секин ва аллақандай гуноҳкор гапирди, бироқ
Қўчқор жавоб бермади. Фотима сўрининг четига омо-
натгина ўтиреди, қўлини ўғлининг бошига қўрқибгина
чўзди:

— Болам, онанг ўргилсан, болам...

Унинг қўллари ўғлининг соchlарига оқиста тегди,
лаблари нимадир деб пичирлади...

Қўчқор бирдан юраги «шиф» этиб, томоги гип бў-
ғилди, бироқ индамади, тишини тишига қаттиқроқ бо-
сиб, қўзларини чирт юмиб олди.

Фотима қимир этмай узоқ ўтиреди, ўғлининг соchlарига
теккан бармоқлари секин қимирилади-ю, силашга
ҳам журъат этолмай, тўхтаб қолди. Сўнг, оғир уф тор-
тиб, айвонга ёзилган тўшагига томон кетди.

Қўчқор сўнгги пайтларда ойисидан ҳанча гина қил-
масин, ҳозир кечиришга тайёр эди. Чунки биринчи ойи-
сининг юрагида ҳам катта бир дард борлигини ҳис
этди. Ким билсин, эҳтимол, у ҳам ўз таҳдирини «ош-
пичноқ»нинг қўлига топшириб қўйганидан пушаймон
чекиб, кўп йиллардан бери ич-ичидан зил кетиб юр-
гандир? Дардини айтай деса тили, айтмай деса дили
куйиб, ўз ёғида ўзи қовурилиб келгандир?

Қўчқор секин ўгирилиб қаради. Бир парча муздай
совуқ ялтиллаган ой шуъласида тўшагида хаёлчан
ўтирган ойисининг оғизин юзи касалманд кўринди. Бир
иуқтага тикилган қўзлари шуздай ғамгин эди... Ойи-
сини бу кўйга солган Чавандоз ҳозир идорага бориб
нима қилаётганини? Қўчқор бирдан Гулчеҳранинг
гапларини эслади. Эҳтимол, ҳозир у ёқда Машраблар
жазо олаётгандир?.. Чавандоз Қўчқорни энг яқин
дўстларидан ажратиб қўймоқчими? У сакраб ўрнидан
турди.

Қўчқор идорага етиб боргандা, Машраб билан Ак-
мални аллақачон қувиб келишган, Эртоев қўлларини

силтаб ватъэ айтмоқда, улар эса ички бир түгёндан қалтираб, чўян ҳайкалдай қотиб туришарди.

Қўчқор эшикни шарақлатиб очганда Чавандоз билан Кўр Шермат тугул, Эртоев ҳам бир сапчиб тушди, Қўчқор йўл-йўлакай шундай тутаб, фифони чиқиб боргандики, кириши билан Чавандозга қараб, бўғилиб сўради:

— Дада! Бу қанақа гап ахир? Ҳамма қилғиликни мен қилсанму, сизлар буларни қийнасаларингиз!

Пойгаҳда ўтирган Чавандоз, кўзлари ўйнаб, бақирди:

— Аҳмоқ бўпсан, аҳмоқ!

— Майли, мен аҳмоқ бўла қолай. Бироқ... дигътларим олдида ерга қаратманг одамни!

Машраб унга томон толпиниб:

— Қўчқор, Қўчқор...— деди-ю, тили ғўлдираб гапиролмай қолди.

Акмал ҳам кўзлари пирпираб, бир-икки марта «қилт-қилт» ютунди.

Чавандоз, мўйлови дикрайиб:

— Сен... биласанми кимни ёқлаяпсан? — деганди, Эртоев истеҳзоли жилмайиб:

— Ким бўларди, ўша машҳур ячейканинг боласини ёқлаяпти ўғлингиз! — деди.— Билмайдики, у одам ким бўлган!

Машраб ранги ўчиб:

— Отамни тинч қўйинг, ўртоқ Эртоев,— деди. Чавандоз унга ялт этиб қаради.

— Бир гапдан қолсанг ўтирган тахtingдан тушсанми, ҳей бола? — деди.— Тўғри айтдилар Эртоев акамлар. Отанг ўзи шунақа одам эди. Бошини ўзи еди у!

Машраб, гўё юрагида пориллаб турган ўт сўниб қолгандай, бирдан бўшашиб, бошини эгди, Қўчқор эса, аксинча, қалтироқ босиб Чавандозга юзланди:

— Қўйинг, дада! Ёмонлаб нима қиласиз ўлган одамни? Тирик бўлгандаям бир сари. Аммо ўшандаям бутун қишлоқ билади у одамни...

— Лаббай? Бутун қишлоқ билади денг? — деди Эртоев, деди-ю, столни зарб билан урди.

— Бас! Шерматвой, шу бугун, ҳозир ҳайданг буларни даштга! — деди у, столда қурбақадай «дик-дик»

сакраган бўш сиёҳдонларни четга суриб.— Қишлоқда юриб семириб кетибди бу ҳаромтомоқлар. Бу тенгилар урушда юрганда, колхоз муликига қўл суқиб қутуриб кетибди булар! Борсин, буғдой ўрсин жазирамада! Тикан кечиб заготовка ташисин! Ушанда билишади қайси даврда яшаётганларини... Ҳайданг! Шу бугун ҳайданг даштга!

Иигитлар, худди шуни кутиб тургандай, эшикдан ўқдай отилиб чиқишди-ю, даҳлизда турган Гулсум опага тўқнашди. Гулсум опа ҳамма гапни эшитган бўлса керак.

— Бор, бораверинглар,— деди ва эшикни очиб ичкарига кирди...

* * *

— Кечирасиз, сизга бир оғиз гапим бор эди, ўртоқ Эртоев.

— Марҳамат.

— Шу ёш болага... отаси тўғрисида гапириб, дилига озор бериб нима қиласардингиз?

— Демак, сиз, мактаб директори бўла туриб, ўғлингизнинг хатти-ҳаракатларини оқламоқчимисиз?

— Йўқ, оқламайман. Бироқ, бу йўсин унга озор бериш... адолатданми?..

— Ҳм... Балки сиз... партия зерингизни ўз сафидан ўчириб, нотўғри қилган, деб ўйларсиз?

— Уни партиямас, баъзи шахслар ўчирган.

— Бунинг аҳамияти йўқ, чунки бу шахслар...

— Йўқ, аҳамияти катта. Чунки... Агар уруп бўлмаганда у киши партияга қайта тикланарди. Мен бунга аминман!

— О!. Мен биламан. Сиз мени Аъзам ака учун ёмон кўрасиз. Лекин сиз... бу масаланинг бутун мурakkabligини билмайсиз. Эрингиз ўзи...

— Майли. Мен ҳозир сиз билан бу ҳақда баҳслишини истамайман. Чунки гап ҳозир отаси эмас, боласи устида боряпти. Унинг отаси қандай одам бўлишидан қатъи назар, туғишган акаси, поччаси, иккита тоғаси шу кунларда кўкракларини ўққа тутиб Ватан тупрогини ҳимоя қиляшти, ўртоқ Эртоев!

— Бундан чиқди, ўғлингиз акаларим фронтда деб, билган номаъқулчилигини қилавериши мумкин эканда?

— Мен унақа демадим-ку. Нима қиласиз гапни буриб?

— Демасангиз... тўғри қилибмиэ! Борсин даштга.

— Ишласин! Кучи бўлса ўша ерда кўрсатсан!

— Майли, борсин. Лекин мен нима қиласаман? Юз гектар пахта...

— Яна юз гектар пахта! Бутун бир қишлоқ зиёлилари! Мактаб! Амбулатория! Матлубот жамияти! Экканлари юз гектар пахта-ю, машмашалари оламни бузади!

— Бу ишни бошлаган одамлар шу ерда бўлганда, мен сизга бу гапни айтиб ўтирмасдим. Ҳаммасини билиб туриб, нима қиласиз тагин буни юзимга солиб?

— Мен ҳол-аҳволга тушунаман, деб, ҳаммага енгиллик берадиган бўлсам... давлат мени бу ерга қўйиб нима қиласди? Йўқ, кечирасан. Сизга берадиган ёрдамимиз йўқ. Вассалом. Аммо шуни билиб қўйингки, план учун бошингиз билан жавоб берасиз.

— Агар жавобгарлиқдан қўрқсан... бошда бу ишни бўйнимга олмас эдим. Раҳмат.

Гулсум опа Эртоевнинг гапларидан тутаб кетса-да, дадил туриб гаплашгани учун ўзидан анча мамнун эди.

Ҳа, нега ҳам ўзини паст олсин?

Хатарли топшириқдан оғир яраланиб қайтган ўғли Ашрафжон яна фронтга кетган бўлса, кўёви Расулжон билан икки жигари ўт ичиди юрса... нега ҳам қаддини тутиб юрмасин? Тагин ҳам қаттиқроқ гаплашмади бу нопок билан!

Отаси әмиш!.. Машрабнинг отаси революция учун қон тўйкан пайтларда... сен оғзингдан сўлагинг оқиб юргандирсан! У киши хато қилса қилгандир, бироқ бу хато шундан иборатки, сендай бир мансабпастни билмай бағрига тортган экан!

Гулсум опа уйга етгунча хаёлида Эртоев билан баҳлашиб келди.

Машраб қайтмаган эди. Уйга қоронги тушган...

Гулсум опа чироқни ёқди-ю, уйнинг ўртасида нима қилишини билмай анча турди, кейин боқقا қараган дेразани очиб, юзини шабадага тутди. Деразанинг олдидаги бир туп ўрик япроқлари майин шитирлайди, боғнинг этагида, тўғонда бақалар тинимсиз қуриллайди. Майин оқшом осойишталикка ундейди, маъюс ўйлар

уйготади, лекин Гулсум опанинг юрагида түғён. У билади: кимдир Машрабнинг кўнглига шубҳа солган. Ҳар қалай, Эртоенга ўхшаган одамлар отаси тўғрисида гапирса титраб-қақшаб кетади-ю, жавоб тополмай қолади... Гулсум опанинг ўзи эса ҳанузгача бу ҳақда ба-фуржа гаплашолмади. Бир ўғлим вояга етсин деди, бир олдин отасининг иши тўғрилансан, кейин гаплашарман деди, энг ёмони — ҳар сафар бу тўғрида гапирмоқчи бўлса, негадир Аъзам ака юрагини чанглалаб йи-қилган ўша машъум оқшом эсига тушади-да, хаёли тўс-тўполон бўлиб кетади...

Гулсум опа оғир хўрсинди, деразани ёпиб, ламгани ўчирмоқчи бўлди-ю, кўзи китоб терилган жавон устидаги суратга тушиб, тўхтади. САҚУни дастлаб битиргаклардан бир гуруҳи, Аъзам акадан қолган битта-ю битта эсадалик!..

Гулсум опа аллақандай ички бир туйғуга бўйсуниб, суратни жавондан олди...

Ўтизинчи йилларнинг боши. Одамларнинг кийимларида, ҳатто чеҳраларида ўша йилларнинг акси бор: згниларида гимнастёрка, белларида камар, бошларида қизил юлдуз тақилган фуражка, ўзлари ҳам гўё суратчи эмас, командирнинг буйругини эшиштаган жангчилардай кўзларини бир нуқтага қадаб қотиб қолишган. Елғиз Аъзам аканинг чеҳрасида — у ўртада қўлларини тиззаларига қўйиб ўтиради — лаблариниг четигида билинар-билинмас бир табассум бор... Унинг бир томонида Қилич — у қўлини қайиш камарига суқиб, Аъзам акага сал суюниб турибди. Бир томонида... бошида худди ҳозиргидай катта бесўнақай фуражка, ёнбошида қалин чарм сумка... Қурбон ота. У киши ўқишини битира олмаган бўлсалар ҳам, негадир суратга тушганди!

Сал ғалатироқ, лекин ниҳоятда пок одам, Қурбон ота мардикорликдан қайтаётисб «фалакнинг гардиши» билан Урал томонларга бориб қолгану, Колчакка қарши урушларда қатнашган, шу-шу ўзини «чапаевчи» деб ҳисоблайди. Ота суратда ҳам худди «Россияда ўртоқ Чапаев бўлса, Ўрта Осиёда мана биз олишганимиз революция душманлари билан!» деб хитоб қилаётганга ўхшайди...

Йўқ, Гулсум опа минг йил умр кўриб, ҳамма нарса эсидан чиқса чиқадики, у йиллар эсидан чиқмайди.

Қишлоқ ўртасидаги ғишт масжид. Ҳар куни кечаси йигилиш. Тонг отгунча баҳс-мунозара.

Мардикорлик йиллари Киевда түя билан казар-маларга ўтик ташиб, шаҳар болаларига «томсша» бўлиб юрган уч киши (Аъзам ака бу воқеаларни ҳикоя қилганда кулавериб ичаги узиларди киши!) энди бутун қишлоқни ларзага келтиради. Манман деган бой-ваччаларнинг юрагига гулгула солади, ўзлари «инқи-лобий қонун» чиқариб, ер-сувларини мусодара қила-ди, камбагалларнинг ҳақларини ажратиб беради... Гулсум опа эса уч яшар қизи Маствурани бағрига бо-сиб, мижжа қоқмай тонг оттиради. Чунки кечаси би-лан уйлари атофида от туёқларининг дупури тинмайди, кимлардир таҳлика солади, милтиқ отади, ҳар ку-ни эрталаб зшикларининг тирқишидан бир хат чи-қади: «Большавойга имонингни неча пулга сотдинг, ячейка? Каллангни минг тиллага тикдик, эҳтиёт бўл, имонсиз кофир!»...

Ажойиб давр, ажойиб одамлар! Гулсум опанинг сира эсидан чиқмайди: худди ўша бетинч, таҳликали пайтларда... Қилич Фотимани севиб қолди.

У Қилич деса қилич, мардликда ёлғиз эди. Битта-ю, битта камчилиги — киссасида сариқ чақаси йўқ, шипшийдам эди, отаси эса, гарчи ўзига тўй дехқон бўлса-да, хасисликда ягона эди.

Шунинг учун Қилич отасининг омборига доим катта этик кийиб кирав, қўнжини галлага тўлдириб чиқар, кейин уни сотиб, ҳар хил мева-чева олиб ке-ларди:

— Жон Гулсумхон, мана шу... аразимаган совға... Фотимахонга ўзингиз бир бало қилиб тушунтиринг — сойга чиқсин. Бир оғиз гапим бор. Тезда тўй қилма-сак бўлмайди...

Тўй кечасининг эртасига эса, тепада, ўша ғишт масжидда яна мажлис, фақат бу сафар — бутун қишлоқ, етти ёшдан етмиш ёшгача йигилган деса бўлади.

Юм-юм йиглаган ёш келиннинг бир ёнида Гулсум опа, бир ёнида Қурбон станинг хотини.

Аъзам ака, ўзини вазмин тутишга уриниб:

— Ўзинг бошлайсан, Гулсум,— дейди секин,— бошқа иложи йўқ.

— Ҳа, сиз бошланг, кейин келиннингиз...— Қилич, қўли тўппончада, бир олисроқда кулишиб турган сал-

лаликларга, бир ёш қайлиғига қарайди. Қурбон ота эса, фуражкасини түғрилаб, қўшимча қилади:

— Асло қўрқма! Қани, ғинг деб кўришсин-чи бу салласи қозонлар!

— Узинг бошлайсан, Гулсум. Бошқа иложи йўқ...

Ловиллаб ёнаётган гулханга дастлаб унинг паранжиси тушади, кейин бошқаларнинг. Биринчи марта юзлари очилган уч ёш аёл, бир-бирларининг пинжига суқилишиб денгиздай гувиллаган оломон орасидан зўр-базўр ўтиб, ўзларини тор кўчага уришади... Кейин нималар бўлди? Ер ислоҳоти, лекбез, САКУ, САКУдан кейин коллективлаштириш, кейин райком, райкомдан кейин МТС...

Оғир бўлса ҳам аллақандай нурга, оловга йўғрилган у йиллардан шу эсдалиқдан бошқа нима қолди? Кимлар бор? Қурбон ота қариб қолди. Қилич эса, Фотима воқеасидан кейин қишлоққа қайтиб келмади, қаёққадир олисларга, чегара қўшинларига ишга ўтиб кетди.

У саккиз-тўққиз йил деганда бурноғи йил кузда, уруш бошлангандан келди.

У ўғлини бир кўриб кетиш учун келган эди, бироқ Қўчқор болалик қилиб, дадасини совуқ қарши олди-ю, Қилич Гулсум опа билан гаплашиб тонг оттирди.

Гулсум опа ҳамма ўзгарса ҳам, Қилич ўзгармагандир, деб ўйлаганди, йўқ, у ҳам соchlарига оқ оралаб, чиройли дўнг пешанасига ажинлар тушиб, хийла қариб қолибди. Ўзиям қандайдир ўйчан, ҳатто маъюс эди. Ўтмишни, Аъзам ака билан ишилаган чоғларини эслаб, узоқ-узоқ жим қолар, шунчадан бери бир келиб хабар олмагани учун Гулсум опадан қайта-қайта кечирим сўрарди.

Тонг палла хайрлашаётгандаридан Қилич Гулсум опадан Қўчқорга кўз-қулоқ бўлиб туришни илтимос қилди. Бироқ Фотима тўғрисида бир оғиз бир нима демади.

Қўчқор Чавандознинг қўлида катта бўлгани учун Гулсум опа анча ташвишланиб юрарди. Хайрият, ўз отасига тортди. Қуйиб қўйған Қилич! Ўша жусса, ўтдай ёнган ўша кўк-сарғиш кўзлар, ўша бир сўзлик, ўша самимият!

Акмал ҳам отасидай деҳқон табиат, содда, дангал. Бироқ... бола бечорага қийин бўлди. Эшмат ака меҳ-

нат батальонига олингандан кейин жўжабирдек жон унга қарам бўлиб қолди...

Машраб Акмалларникига кетганга ўхшайди. Энди келмайди, ана хўроҳ қичқиряпти...

Гулсум опа суратни жавонга қўймоқчи бўлиб ўрнидан қўзғалди-ю, ашикда серрайиб турган Машрабга кўзи тушди. Кийимлари фижим, соchlари тўзгиган, кўзлари... гўё таъна қилаётган одамнинг кўзларидаи салқисилган.

— Бери кел!

Машраб бир-бир босиб яқинроқ келди.

— Ўтири!

Машраб итоаткорлик билан ўтирди.

— Қаёқларда юрибсан?

— Юрибман... — Машраб юзини четга бурди.— Эртоевнинг гапларини бир эшитсангиз, сиз ҳам юриб чиқардингиз кечаси билан. Дадамлар...

— Дадангнинг хотирасини тинч қўй! Сен яхши бўлсанг Эртоев юзингга сололмас эди бу гапларни! Узинг ҳамма қилғуликни қилиб, уялмайсанми дадангта тош отгани? Билмадим, даданг ҳаёт бўлганда нима қиласарди?

Машраб энтикиб:

— Ҳаёт бўлганда! — деди ва қоронги дарчадан боққа қаради. Қани энди у ҳозир кўнглидаги бор гапни айта олса. Шу бугун... Эртоев отаси тўғрисидаги гапларни айтмаганда... Машраб ўзи биларди нима қилишини. Унинг қўлида ўлса ўлардики, бироқ Барно учун, севимли акаси учун ўчини оларди у!

— Бундан чиқди... ҳали дадамдан номус қилиб юрибман дегин? — Гулсум опа пастки лабини тишлаб бирпас жим қолди, кейин секин қўшимча қилди:

— Йўқ, болам. Сен номус қиладиган одам эмас эди даданг...

Машраб бошини кўтариб қарашга журъят этолмади, назарида, ойиси бўғилиб йиглаёттандай туюлди-ю, аъзойи бадани жимиirlаб кетди.

— Мен сенга ҳали отанг тўғрисида гапирмоқчи эмас эдим, ўзинг гап очганинг учун айтипман. — Гулсум опа қўлини ўғлининг бошига қўйди. — Отанг яхши одам эди, болам. Сен нимани ҳам биласан? Бир бўлса ўша сўнгги оқшом эсингда қолгандир...

Машраб сочларини силаётган узун бармоқлар тү-
сатдан титраб кетганини сезди-ю, миясида нимадир
«ярқ» этиб, сояда ётган бир эсдаликни ёритиб юборди.

* * *

...Ўша куни у мактабдан «беш» баҳо олиб, боши осмонга етиб қайтганди.

У эшикдан кириб келганда — ўшанда тўртинчи синфда ўқирди шекилли — Гулсум опа тўрда мужма-йиб, хафақон бир ҳолатда ўтиради. Ҳозир эсида йўқ.— ниманидир сўраган эди — қаттиқ жеркиб ташлади.

— Бор, ўйна! Сенсиз ҳам ғамим бошимдан ошиб ётиби!— деди ойиси. — Нонингни егину, ўйна!

Лекин, нима бўлиб, ўйин ҳам қовушмади. Машраб баттар мунғайиб ён қўшиларининг пахса дево-рида ўтирган эди, муюлишдан икки отлиқ чиқиб келди.

Уларнинг бири — бошида катта фуражка, ёнбоши-да чарм еумка, отда сал гўдайиб ўтира, иккинчиси, паҳлавон жусса, ёш бўлса ҳам шоп мўйлов, чапанироқ йигит (Машраб кейин билса фуражкалиги Муяс-сарнинг дадаси Қурбон ота, ёшроғи Иnobat опанинг эри Ҳошим полвон экан), келишган кўк айғирини ўй-натиб, негадир кулимсираб келарди.

Отлиқлар Машрабнинг рўпарасига келганда ёш-роғи:

— Аъзам ячейканинг ҳовлисини биласанми, оғай-ни? — деб сўради.

Машраб севинганидан баланд девордан сакраб тушди.

— Мана шу бўлади-да, бизни ҳовли, амаки!

Гулсум опа ҳам отлиқларни кўриб, чеҳраси очилиб кетди:

— Бор, дадангга чоп!—деди шошиб,—қишлоқдан дўстларингиз келди, дегин. Ҳовлиқмасдан тушунти-риб айт: босмачилар билан олишган эски қадрдонла-рингиз дегин! Ҳа, айтмоқчи поччанг ҳам эсингдан чиқмасин!..

Машраб борса, дадаси МТСда йўқ эди, райкомга кетган, дейишди. Лекин райкомда мажлис бўлаётган экан, киритишмади. Машраб ойисининг гапини ко-

ровулга тайинлади-да, Мастураларникига қараб чопди.

Райком биноси шундоқ йўл устида эди, қайтишда Машраб яна кирди.

Афтидан, у қайтгунча мажлис тугаган бўлса керак, Аъзам aka ниманидир ҳаяжонланиб гапираётган уч-тўртта одамнинг ўртасида бошини әгиб турарди.

Эсида бор: отаси тўладан келган, новча, сочларига оқ оралаган бўлса ҳам, қош-кўзлари қоп-қора, қийғир бурун, келишган бир одам эди. Эгнида сурранг коломенка кўйлак, белида қайиш камар.

У Машрабнинг гапини эшлитиб, тўсатдан маъюс жилмайди.

— Босмачилар билан олишган дўстларингиз дегин, ўғлим?

— Ҳа, ойим шунаقا дедилар. Ўзлариям... Во! — деди Машраб, қўллари билан меҳмонларнинг мўйловларини таърифлаб.

Бу сафар даврадагилар ҳам кулиб юборишиди. Шу пайт, райкомнинг ҳовлисидан дадаси миниб юрадиган МТСнинг қизил қашқа аргумогини ўйнатиб... Эртоев чиқиб келди.

Даврадаги кулги бирдан босилди. Эртоев эса, аксинча, билинар-билинмас жилмайиб:

— Партибилетингизни топширмаган эмишсиз, ячейка aka, — деб сўради.

Аъзам aka кескин бурилиб қаради, катта тим қора кўзларида ўт чақнаб:

— Билиб қўй, Эртоев,— деди.— Мен... партбилетимни топширадиган бўлсам.. фақат Марказкомга топшираман.

Сўнг даврадагиларни четга суриб, Эртоевга томон юрди. — Менга бу билетни сендай ифвогар, мансаб-парастлар берган эмас. Мен буни инқилоб учун жонини аямаган одамлар қўлидан олганман! — Аъзам aka юрагини гижимлаб тўхтади-ю:

— Иўқол кўзимдан! Иўқол! — деди бўғиқ ва даҳшатли бир овозда.

Эртоев яна боягидай билинар-билинмас кулимсираб отига қамчи урди, даврадагилар эса, Аъзам aka-ни яна қуршаб олишди, кимдир бир пиёла сув тутди.

— Қўйинг, шу одам билан гижиллашиб асабингизни бузманг, ячейка.

— Босиқ бўлинг!

— Қаддингни тут. Ҳақ қарор топади, дўстим!

Аъзам ака бир зум кўзини юмиб бошини осилтириб турди, кейин Машрабнинг бошига қўлини қўйиб:

— Юр ўғлим, — деди секин.

Машраб негадир юраги ачишиб унинг қўлига сурканган эди, дадаси тўхтади ва яна боягидай маъюс жилмайиб:

— Оббо сени-эй... шундай қилиб... босмачилар билан олишган дўстларингиз келди дегин? — деб сўради.

Умуман олганда у киши болалар билан иши йўқроқ, уларни кўп эркалатавермайдиган, вазмин бир одам эди. Ҳар қалай, отаси бирор марта бошини силагани Машрабнинг эсида йўқ. Лекин ўша куни Аъзам ака ўғлининг бошини силаб, куларкан:

— Юр, болам, сенга битта мороженое олиб берай! — деди тўсатдан. — Мороженоени яхши кўрасанми?

Мороженоени ёмон кўрадиган бола бўладими. Аммо ўша куни отасининг «болам» дейиши Машрабга мороженоедан ҳам ёқимлироқ туюлди.

Лекин буни қарангки, улар боргунча дўконда мороженое қолмапти!

Аъзам ака олдин астойдил хафа бўлди, кейин:

— Ҳа, майли, йўққа чора ҳам йўқ-да! — деди-да, чўнтагини ковлаб уч-тўрт танга олди: — Мана ўғлим, зартага ўзинг олиб ерсан мороженоени!

Улар қайтиб боришганда ҳовлиларига қандайдир жон кириб, яшнаб кетганди.

Гулсум опа елиб-югуриб ўчоқ бошида ўралашиб ўтар, қозонда сабзи-пиёз жаз-жуз қиласарди.

Машраб отларга қараб чопди. Отлар, эгар-жабдуқлари олинган, секин пишқириб охурдаги ёш бедани қирт-қирт чайнаб туарар, бири биридан чиройли, киши уларга қараб тўймас эди.

Машрабга айниқса Ҳошим полвон миниб келган кўк аргумоқ хуш ёқиб тушди. Ўзиям ювошгина экан, Машраб ойисидан бир бурда нон олиб қўли билан егизди, сўнг аргумоқнинг пешакасини, чиройли узун бўйнини силаб, жажжи қулоқларини қашлаб, эркалаб турганда, уйдан Ҳошим полвон, унинг кетидан дадаси билан Қурбон ота чиқиб келишди.

Ҳошим полвон, оғзи қулоғида, лорсиллаб келиб, кўк аргумоқни бостиридан етаклаб чиқди.

— Мана бу гўзалга бир қаранг, Ячейка ака! Эсингиадами, «Рустам довон»нинг ёнида жанг қилгани мизда онасининг кетидан чопиб юрган тойча эди... Эсингиэдами?

Аъзам ака бошини чайқаб ғамгин қулимсиради.

— Эсимда, ука, ҳаммаси эсимда... — У ўнг қўли билан кўкрагини силаркан, Машрабга юзланди:

— Бир пиёла сув бер-чи, ўғлим.

Машраб чопиб бориб, қудуқдан бир челак сув олиб келган эди, уст-устига икки пиёласини шимирди-да:

— У йилларни эсдан чиқариб бўлармиди, ука,— деди ва гўё юраги куйиб кетаётгандай, узоқ уф тортиди.

— Ҳей, менга қара, ячейка! — Қурбон ота бесўнақай фуражкасини тўғрилай-тўғрилай Аъзам ака-нинг ёнига келди.

— Между прочим, чин большевикка ярашмайди бунаقا тушкунлик. Парво қилма, ячейка...

Отанинг сўзи оғизда қолди, чунки шу пайт Аъзам ака кўзлари ғалати ялтиллаб чолга қаради.

— Нима? Нима? Парво қилма дедингми? Утакетган мансабпаст, извогар бир ифлос мени партиядан ўчиришга эришсину, мени парво қилмас эмишман. Ундан кўра сен мендан гуноҳинг нима, деб сўра! Коллективлаштириш пайтида қулоқларни яширган эмишман! Мен-а? Қариндошларимниям аямаган одам, мен энди... энди...

Аъзам ака тўсатдан чап кўкрагини чангаллади-ю, жудди ҳаво етмагандай бўйинини чўзганича бир томонга оға бошлади.

У йиқилмади, чунки Ҳошим полвон чаққонлик қилиб тутиб қолди. Кейин ҳовлига кириб келган Ра-сулжон билан Маствура ҳам чопиб келиб суюнди-да, биргалашиб уйга олиб кириб кетишиди.

Ҳовли сув қўйгандай жимжит бўлиб қолди. Ёлғиз Маствура, кўзларида милт-милт ёш, бир телефонга югуриб шифохонага қўнгироқ қилас, бир қўлида капкир, ҳайкалдай қотиб қолган Гулсум опага сув тутарди.

Сал ўтмай, врачлар келишиди. Машраб ундан кейин нима бўлганини билмайди, тун ярмига яқин ойиси уйғотиб меҳмонхонага бошлаб кирди.

Аъзам ака, юзи бўрдан ясалгандай оппок, қийғир бурни қандайдир сўрайиб қолган, деразанинг олди-даги каравотда чалқанча ётарди.

У каравотнинг ёнида тўхтаган ўғлига қандайдир маъюс бир меҳр билан бир зум тикилди, лаблари билинار-билинмас пичирлаб:

— Шундай қилиб... битта мороженое ҳам олиб беролмадим-а, ўғлим,— деди.

Машраб бирдан ўпкаси тўлиб, унга томон интиломоқчи бўлди, бироқ каравотнинг ёнида ўтирган Расулжон унинг қўлидан етаклаб, олиб чиқиб кетди.

Эртасига дадасини дафн этишди...

...Ажабо: отасининг «шундай қилиб... битта мороженое ҳам олиб беролмадим-а, ўғлим» деган сўзлари, маъюс тикилган кўзлари, гўё кечагина бўлгандай хаёлида шундай жонли гавдаландики, Машраб юраги «зир» титраб кетди. Лекин... Машраб нега илгари бу манзарани эслашни ёмон кўрарди? Буни эслаш оғир бўлгани учунми ёки Эртоевга ўхшаганлар кўнглига шубҳа солиб қўйгани учунми?

Машраб уйқу босган одамдай кўзларини уқалаб, ойисининг оғзига тикилди.

Йўқ, Гулсум опанинг гаплари Машраб учун янгилик эмас. Гарчи Гулсум опа дадаси ҳакида биринчи марта жиддий гаплашаётган бўлса-да, Машраб бу гапларни у ер-бу ерда кўп эшитган. Лекин қизиқ: илгари унинг бир қулоғидан кириб, бир қулоғидан чиқиб юрган бу ҳикоялар, энди гўё чанги артилган нодир буюмдай ярқираб, тамом янги бир маъно кашф этмоқда эди!

— Шундай, болам, отанг ҳеч качон ҳалқа хиёнат қилган эмас. Революциянинг содиқ солдати эди у киши... Извогарларнинг туҳмати билан партиядан ўчгани рост, бироқ мен дил-дилимдан ачинаман, ўғлим — уруш бўлиб қолмаганда даданг шу пайтгача партияда тикланарди. Ҳалиям бўлса тикланади, болам.

Гулсум опа кўкрагини тўлдириб нафас олди-да, қўлини ўғлининг бошига қўйди:

— Сен ҳам энди қадамингни ўлчаб босгин. Мен өхтиёткор бўл дейман, пок бўл дейман, отангдай одил, аканг ва поччангдай ҳаққоний бўл дейман. Ҳозир ҳамманинг хаёли фронтда. Буни унутма, болам! Мана, даштга кетяпсан. Яхши ишла, жонинг қийналса ҳам

қатордан қолма! Шунда Эртоев ҳам сенга бир нима дейёлмайди!

Йўқ, Гулсум опа буни насиҳатомуз эмас, қандай-дир койиб галирди, лекин Машрабнинг юраги офтобга интилган ёш ниҳолдай бу шиддатли сўзларга қараб толпинар, эшитган сайин эшитгиси келарди. Назарида, бу гаплар такрорланган сайин, юрагининг бир че-тидаги музлар эриб, дили равшан тортар, юрагига ёруғ бир нур қуюлмоқда эди.

Машраб, шу сўзлар қулоғида, худди гўдаклик пайтидагидай боши ойисининг тиззасида, уйқуга кетди...

Тўртинчи боб

Комил билан Инобат райком биноси олдидаги қа-тор толларга отларини боғлаб, ичкарига кирганда қа-булхонадаги катта деворий соат ҳали тўққизга жом урмаган эди.

Афтидан, райком секретари тайинлаб қўйган бўлса керак, ёшгина секретарь қиз уларни кўриб шошиб ўрнидан турди, лекин шу пайт чарм қопланган оғир эшик ўзи очилиб, оstonада Эртоев кўринди.

— Э, келдиларингми? Балли, балли.

У катта оппоқ қўлини чўзиб, хушвақт кўришди-да, Инобатга йўл берди.

— Қани, Инобатхон, марҳамат.

Райком секретари — олтмишларга бориб қолган, босиқ, камгап одам, деразалари боқقا қараган чорси хонанинг тўрида, қўлида трубка, кўзлари ярим юмуқ, ким биландир секин гаплашмоқда эди.

У Комиллар билан бош иргаб кўришди-да, қатор стулларга имо қилди — ўтиринглар.

Комил эсида бор — биринчи секретарь бундан бир ҳафта олдин уни чақириб сухбатлашганида ҳам худди шундай жуда ҳоргин кўринган, лекин сўрамаган саволи, айтмаган гапи қолмаганди, тағин нимага ча-киртирдийкин?

Комил савол назари билан Эртоевга қаради, бироқ у: «ишлар жойида», деган маънода кўё қисди-да, кўк-рак чўнтағидан ён дафтарини олиб ниманидир ҳисоблашга киришди.

Биринчи секретарь ниҳоят, трубкани жойига қўй-

ди, лекин шундан кейин ҳам бирмунча вакт ярим юмуқ кўзларини силаб сукут сақлади, гўё кўнглидаги гапни айтишга ийманган одамдай бир-икки марта йўталиб қўйди.

У чиндан ҳам гапни узоқдан бошлади. Душман яна куч тўплаб, Орёл — Курск районларида ҳужумга ўтгани, умуман, аҳвол жиддий экани, шундай бир вазиятда пахта, сабзавот, хусусан ғалла масаласи ниҳоятда муҳим аҳамиятга эга бўлаётгани ҳақида гапирди, кейин, «Ленин йўли» колхози районда энг катта хўжаликлардан бири эканини таъкидлаб, битта таклиф киритди:

— Иnobатхон, асосан, пахтани қўлга олсин, ғаллага эса Қурбон ота билан... уруш қаҳрамони, орденли парторг,— биринчи секретарь буни кулиб гапирди, — Комилжон жавоб берсин.

Райком секретари, бу гап Иnobатга қаттиқ тегишидан қўрқандай:

— Пахтанинг аҳамиятини ўзингиз биласиз, Иnobатхон,— деганди, Эртоев:

— Аҳамияти катта дейсиз қўясизми?— деди. — Пахта — бу ўқдори демакдир, бомба ва замбарак демакдир!

Иnobat, гўё Эртоевнинг гапини эшитмагандай, биринчи секретарга юзланиб:

— Нега бундай дейсиз, Умаров ака,—деди секин.

— Унисиям керак, бунисиям. Ишқилиб... ишимиз

юришса бўлди-да, шунчаки...

— Ҳа, айтаверинг, айтаверинг,— Умаров бошини бир томонга эгид Иnobатга тикилди.

Иnobat рўмолини пешанасига тортаркан:

— Шунчаки...— деди лаблари титраб. — Ўртоқ Эртоев бунчалик катта кетмасалар бўларди. Мен яхшиманми, ёмонманими, ҳар нечук, ҳали-ҳозир ўша ерда раисман.

Эртоев қўлинин кенг ёзиб қизариб кулди.

— Мен катта кетиб нима қилдим, Иnobатхон?

— Тагин нима қилдим дейсиз! Бир оғиз айтмасдан бутун бир бригаданинг ишини тебратиб турган уч йигитни даштга ҳайдабсиз. У ёқда Ёдгорбекни жирмонга тарозибон қилиб қўйибсиз...

— Сиз айтган йигитлар нима қилиб юрганини биласизми ўзи? — Эртоев биринчи секретарга қараб соҳ-

та жилмайди. — Уч барзангидай йигит колхоз полижига тушиб денг...

— Қўйинг, пашшадан фил ясаманг! — Инобат қўлини бир силтаб шартта ўрнидан турди. — Пича ёшлик қилишипти йигитлар. Шунгаям ота гўри қозихонами? Ундан кўра бу учовининг ишидан гапиринг. Қўилган меҳнатидан гапиринг.

Умаров «босиқ бўлинг», деган маънода Эртоевга кўз қисди.

— Мен одамларга, хотин-халажга қилаётган дагаллигинизни айтмай қўя қолай,— деди Инобат.

— Кечирасиз, мен бирорванинг кўнглини оғритган бўлсам... Ишимиз юришсин, деб, фронтни ўйлаб оғритгандирман.

Инобат гўё сўз тополмаган одамдай бир зум жим қолди, сўнг қилт ютиниб:

— Одамлар ҳозир бусиз ҳам кўнгли ярим, ўртоқ Эртоев,— деди. — Уларнинг дилини оғритиш эмас, далда бериш керак. Чунки ҳамма оғирлик ўша бева-бечораларнинг, хотин-халажнинг елкасида. Ҳа.

Умаров ер остидан Комилга бир қараб олди-да, ўрнидан турди.

— Бир жиҳатдан Инобатхон ҳақ, Эркинжон,— деди у жиддий.— Иккинчи томондан, сиз ҳам қизишманг, Инобатхон. Ҳоаир унча-мунча гапни кўнгилга оладиган пайт эмас. Хўш, йигитлар масаласига келсан... Улар қаерда ишлашини ўзларинг ҳал қилинглар. Айтмоқчи, у ёқда меҳмонлар бор. Улар ҳам ёрдам беришар.

— Майли, бир гап бўлар, Умаров ака.

Инобат шундай деди-ю, Комилни ҳам кутмасдан хайрлашиб чиқиб кетди. Комил жуда ўнгайсиз бир аҳволда қолди. У гарчи Эртоевни яхши билмаса-да, Инобат ҳақ эканини ич-ичидан сезиб турар, чунки Инобатнинг ўрнига даштга борганида ишни жадаллата оладими, йўқми — буни яхши тасаввур этолмас, айни замонда биринчи секретарнинг топширигини рад этиш ҳам қандайдир ноқулай әди.

Комил заготовканн тезлаштириш тўғрисида қатъий буйруқ олиб, райкомдан чиққанида, Инобат толга боғланган отларнинг ёнида хаёлга чўмиб маъюс турарди.

Мана, ўшандан бери бир соатча вақт ўтди, шаҳар боғлари орқада қолиб, олдинда куйган калладай таптақир дашт, паст-баланд адирлар бошланди. Лекин Инобат ҳамон чурқ этмайди.

У бир оз олдинда, тагидаги саман йўрганинг бир текис юришига мос сал чайқалиб, хаёлга чўмиб ўтирипти. Ёноқлари туртиб чиққан кең юзида, кунда куйган сарғиш киприкли кўзларида аллақандай бир муинг, дардини ичига ютишга ўрганиб қолган аёллардагина бўладиган бўлакча бир ўйчанлик бор... Наҳот райкомдаги гаплардан хафа бўлса? Йўқ, бундай бўлиши мумкин эмас, чунки Комил билади: Инобат майда-чўйда нарсаларни кўнглига олаверадиган хотинлардан эмас — жуда содда, оқ кўнгил, пок жувон. Комилнинг эсида бор: унинг номи урушдан олдин, машҳур юз центнерчилар билан бирга чиққанди. Комил у маҳалда агротехниклар техникумida ўқир, ёзда таътилга келган чоғларида кўради: Инобатхон кечаю кундуз пахтазордан чиқмайдиган, ҳозиргидан ҳам озғин, қотма, нозиккина бир келинчак эди. Шунчалик озғин ва нозик эдики, ҳазилкаш дугоналари доим унинг өрига тош отишар:

— Полвон ака, овқатнинг ёғлигини ўзингиз еб, Инобатхонга лавлаги шўрва берадиганга ўхшайсиз-а, қуруқ суюги қопти-ю бечоранинг? — деб кулишарди. Ҳошим полвон эса — у чиндан ҳам исми жисмига монанд, олти-етти пуд келадиган пахта тиқилган қанорларни шундоқ кифтига олиб кетаверадиган дуркун йигит эди, сoddадиллик билан қулиб жавоб берарди:

— Опаларинг сал семирса мен ҳам жон дердим-а! Қулоғигача сарёққа ботириб боқсам ҳам қовурғасига жир битмаса нима қиласай, оппоқ қизалар!

Комил сира эсидан чиқармайди — Инобатнинг худди ўзига ўхшаган нозиккина, қора қош, қора кўз бир синглиси бор эди.

Комил уни мактабда ўқиб юрган чоғларидаёқ севиб қолган, қизнинг ҳам унга кўнгли бор эди. Чунки кейинчалик, Комил техникумдан таътилга келган пайтларда, орасига хат қистириб бирорлардан бериб юборган китобларини олиб қолар, хатларига жавоб бермаса-да, китобларининг орасига қизил гул варайхон солиб қайтарарди.

Кейин Комил армияга чақирилди-ю, ҳиз бошқа йигиттга турмушга чиқиб кетди. Комилнинг бисотида эса район ва қизил гул баргларига тўла бир даста китоб қолди...

Инобат ўшанда ҳам Комилдан бир хафа бўлган ёди, мана энди яна кўнгли қолди.

Комил отининг жиловини силтаб, саман йўрга билан қаторлашди.

— Бир нимадан хафага ўхшайсизми, Инобатхон? Инобат вазиятини ўзгартирмасдан олисларга тикилди.

— Нимага ҳам хафа бўлай? Шунчаки... ўзим.

— Ҳошим акамлар госпиталдан қачон чиқармиш? Хатида айтмаптими?

— Йўқ. У бечора қаёқдан билсин? Содда одам, оёғи қачон тузалса, шунда чиқадигандир-да! — деди Инобат, сўнг, гулдор рўмолчаси билан мундоқ-мундоқ терларини артаркан:

— Сиз... кўнглингизга бир нима келмасин, Комилжон,— деди. — Шунчаки ўзим... аёл киши шунаقا бўлади ўзи...

— Наҳот тушунмасам, Инобатхон? Майли, агар лозим бўлса йигитлар қишлоқда қолсин.

— Йўқ! — деди Инобат қатъий. — Сиз улардан фойдаланиб, эшак карвонни икки марта қатнайдиган қилинг. Агар шундай қила олсангиз ҳаммаси ўрнига тушади. Мен бўлсам... Мени қўяверинг, Комилжон. Аёл киши шунаقا бўлади ўзи...

Тўсатдан унинг офтобда куйган сарғиши киприкли-ри ғалати титраб кетди-ю, шошиб отига қамчи урди: чуҳ, жонивор!...

Йўқ, Инобат ранжиса, фақат ўзидан ранжийди. Комил киму, у ким? Иш юришса бўлди-да! Шунчаки... ҳадеб олти юз гектар ғаллани юзига солишгани оғир тегяпти унга! «Бошда кўрпангга қараб оёқ узатгин эди!» қабилидаги гаплар дилига озор беряпти. Ахир... осонга тушдими бу «Қатраобод» дашти? Ҳўқиз ва от етмаганда смоч ва плугга сигир қўшиб ер ҳайдаган нозик жувонлар, белларига дастурхон боғлаб кетмон чолган мўйсафидларнинг меҳнати билан бўлди-ку бу ғалла..

Бултур куз қаттиқ келди. Совуқ бўлди. Шунда ҳам бир киши нолимади. Ойлаб қамиш капаларда, захерларда тунаб, кунда фақат бир маҳал аталаю жўхон

ри тўқач еб ишлашди. Кимни деб — фронтни деб, урунда юрган севикли ёрларини, жигарбандларини деб бардош қилишди. Ҳа, ҳалиям бўлса боя Эртоев билан юмшоқ гаплашди. Оладигани раислик бўлса — олсин. Қўйиб беришса Иnobat ҳозир ҳам жон-жон деб ўз тенги жувонлар билан ўроқ ўради, кетмон чопади, бироқ бу аёлларнинг дилини оғритишга ҳеч кимга йўл бермайди. Ҳеч кимга!

Иnobat, гарчи «Қоровултепа»ни ён бағирлаб ўтиш мумкин бўлса ҳам, саман йўргани жўрттага тикка солди, тепага чиққандагина тўхтади ва чеҳраси бирдан ёришиб:

«— Қатраобод! — деди кулимсираб.

Дашт чиндан ҳам кўркам эди.

«Қоровултепа»нинг этагидан бошланиб, оч яшил денгиزادай нафис чайқалган буғдойзор олисларда осмон билан қўшилиб кетарди. Буғдой шундай ўсиқ ва бўлиқ әдики, бу масофадаги пастқам тепаликлар, сойликлар билинмас, фақат баландроқ адирларгина мавж урган тўлқиндай сал кўтарилиб турарди. Лекин энг яхшиси — уфққа тулашиб кетган бу азим денгиз тепадан чумоли уясини эслатар, қатор-қатор чайлашарга, қамиш капа ва ўтовларга, худди лаган-лаган паловдай ўюлган буғдой хирмонларига, тўп-тўп одамлар, от-арава, жуфт-жуфт ҳўқиз, туя ва эшакларга тўлиб кетганди.

Комил тандирдан янги узилган сўлқилдоқ нонни өслатувчи тотли ҳидни тўйиб-тўйиб ҳидларкан:

— Ҳа, ҳўп ажойиб бир буғдой бўпти! — деди кўнгли яйраб.

. Иnobat қўзини олислардан узиб унга қаради.
— Қўлимииздан келгани мана шу, укажон,— деди-ю, тўсатдан лаблари титраб стига бир қамчи урди-да, пастга қараб учиб кетди.

Комил унинг кетидан отининг бошини қўяркан, беихтиёр кўнгли эриб:

«— Кафа бўлманг, Иnobatхон,— деди ўзича,— мен сизни ҳеч қачон ранжитмайман, ҳеч қачон!»

* * *

Комил йигитларни «штаб» деб аталган капага бошлиб кириши биланоқ, сепкил юзида кулгичлари ўйнаб:

— Ҳамманг комсомолми? — деб сўради.

Машраб жавоб беролмади, чунки ёш бўлса ҳам кўкрагида Қизил Юлдуз ордени чақнаган бу йигитни кўргандай вужуди аллақандай жимирилаб кетган, унга ҳатто Комилнинг кўкрагига осилган ярадор қўли ҳам ўзига ярашиб тургандай туюлганди.

— Бизми? — деди Қўчқор. — Йўқ, мана девона комсомол, бизлар партиясиз большевиклардан.

— Жуда соз! — кулди Комил. — Демак, сенларга өшак карвонни топширамиз. Ҳарбийчасига айтганда... Сен икковинг, командиру, Машраб — комиссар! Карвонбоши Ёдгорбек ҳисобланса ҳам, юкнинг оғири сенларга тушади. Хўш, бунга нима дейсанлар, лочинлар?

— Нима ҳам дердик? — деди Қўчқор.— камбагалнинг қорни тўйса бас, у ёгини дўндириб ташлайди.

Комил тўсатдан хахолаб кулиб юборди.

— Тўғри, масаланинг энг муҳими эсдан чиқибди. Қани, бу ёққа юринглар-чи! — У йигитларни хирмоннинг орқасидаги соаликка бошлаб ўтди. Соаликнинг четидаги бир туп тол тагида юзлари лов-лов ёнган хотинлар, енгларини шимариб, ер тандирларда нон ёпишмоқда, қозонларда нимадир биқирлаб қайнамоқда эди.

— Ошпаз опа! — деди Комил. — Мана, яна учта азамат келди карвонга. Қоринларини бир тўйдириб қўйинг. Бугун роса иш кўрсатишади бу лочинлар!

Ошпаз опа — эллик-эллик беш ёшларга бориб қолган узун бўйли, юзи чўтири аёл, ёпилган нонларни даста-даста қилиб ўраркан, кулиб жавоб берди:

— Жоним билан, ўргилай. Булар иш кўрсатиша-ди-ю, мен қоринларини тўйга майманми? Қани, эшакларингни тушовлаб кела қолинглар, айланайлар. Ҳой, сен Гулсумнинг ўғлимисан? Опанг Мастура ҳам шу ерда, нариги бригадада ўроқ ўряпти. Кечқурун кўришасан-дә энди, болам.

Йигитлар эшакларини тушовлаб соаликка қўйиб юборишиди.

Даштдаги жазирамадан сўнг муздай булоқ сувини ҳовучлаб, ё кўкракни захга бериб, юзингни сувга ботириб тўйиб-тўйиб ичишга нима етсин!

Қўчқор устма-уст икки дўппи сув ичиб, ўзини ажриққа отди, худди ёш боладай ағанаб ўйнаркан, хушнуд қичқирди:

— Сургунингдан ўргилай бунақа бўлса, Эртоев ака!

Шу пайт уч коса арпа гўжа билан учта иссиқ нон кўтариб ошпаз опа ҳам келиб қолди.

— Олинглар, айланайлар, камбагалнинг бир тўйгани бой бўлгани, бир тўйинглар, айланайлар.

Нон, гарчанд арпа қўшилган бўлса ҳам, шундай иссиқ, сўлқилдоқ: ўзиям шундай қизариб пишганки, кўргандай тамшанади киши. Советилган арпа-гўжачи? Ундан ачиган айрон билан тагига олган қўфирмоҳ ҳидига ўхшаш сал нордон ва ширин ҳид келади, бу ҳид димоқни ёрворай дейди!

— Оҳ, оҳ, оҳ! — деди Қўчқор. — Кошкийди бунақа қийинчиликлар кўпроқ бўлса! Қани, мана шу қийинчиликдан ўтиб олайлик, кейин бир гап бўлар!

У билан Машраб нонларини гўжага тўғраб тушириб олишди. Акмал эса нонидан бир бурда синдириб олди-ю, қолганини белбогига ўраб, хуржунига солиб қўйди: дадаси меҳнат батальонига кетгандан бери жўжабирдек жон унинг қўлига қараб қолган, у, бирор қол нон орттириб кетиши керак бу ердан!

Машраб, қорнини силаб, ажриқа чўзиларкан: «Ишлар чакки эмас, ўртоқ комиссар!» — деди ўзига ўзи. Назарида, Комилнинг бу бир оғиз сўзида қандайдир бир ҳурмат, тўғрироғи, катта бир ишонч бор эди. Бу ишонч, Эртоевнинг ҳақоратларидан, наинки Эртоев, ҳатто Муяссарнинг ўша кеча: «Яшанг, ўртоқ комсомол!» деб отган пичингларидан кейин қалбига нур қуяётгандай бўларди.

Ҳа, ўша кеча Муяссар уни аямади: «Ахир... ҳандалак бўлсаям... Колхоз мулки-ю, нега буни ўйламадинг?» деган гапни такрорлайвериб, ўлганнинг устига чиқиб тепгандай қилди.

Машраб бир-икки марта кўнглидаги бор гапни айтиб юборишга жазм қилди-ю, яна юраги дов бермади.

Қизиқ: бу йил узун қиши оқпомлари Моҳира бувиникida йигилишиб бирга ҳар хил романлар ўқидиган бўлганларида ёки Машраб — Ғофир, Муяссар — Жамила бўлиб, «Бой ила хизматчи»да ўйнаган маҳалларида бунақа эмас эди. У доим Машрабнинг оғзига қарап, кўзларига термилар эди. Мана энди комсорг бўлди-ю... Майли!

Тўсатдан Қўчқор унинг биқинига бир туртди:

— Юзингни яшир, девона, қайнатанг келяпти.

Машраб унинг қўлини силтаб ташлади-ю, лекин катта йўлда келаётган Қурбон отани кўриб, аллақандай питирлаб қолди.

Қурбон ота ёки қишлоқ болаларининг тили билан айтганда «Ўртоқ Чапаев», қулоги кесик кул ранг хангисида худди аргумоқда ўтиргандай кеккайиб ўтирас, бошидаги катта кўк фурожкаси ва унга тақилган қизил юлдуз узоқдан ялтиллаб кўринарди.

«Ўртоқ Чапаев» шаҳардан, тўғри почтадан келаётган бўлса керак, катта хуржунининг икки кўзи газеталардан дўппайган, узун қалин қора қошлари туашган, сийракроқ мўйловининг учлари буралиб-буралиб кетган.

Иигитлар баравар ўринларидан туришди:

— Салом бердик, ота.

— Ҳорманг энди!

Учови баравар берган салом отага ҳуш ёқиб тушди чоги, у бир жилмайиб, эшагининг юганини торти, сўнг, кўзларини қисиб жиддий тикилди:

— Хўш, сенлар ҳам кепсанлар-да меҳнат фронтига!

— Келдик, ота!

— Тўғри қипсанлар,— деди ота. — Биз сенлардай пайтимиизда босмачилар билан олишганмиз! Россияда ўртоқ Чапаев, Ўрта Осиёда мана биз курашганмиз инқилоб душманлари билан. Ҳа! Между прочим, сенинг отанг Аъзам ячейка билан Қилич ҳам бор эди! — қўшиб қўйди у; ер тагидан бир Қўчқорга, бир Машрабга тикилиб.

Қўчқор бошини қуви солиб, яланг оёғи билан ер чизарди. У боя Қурбон ота: «Россияда ўртоқ Чапаев, Ўрта Осиёда мана биз» дегандаёқ товушсиз титраб кула бошлаган, энди бутун кучини тўплаб, ўзини босишга ҳаракат қилас, чунки ота сезиб қолса қаттиқ панд ейишини биларди. Хайрият, ота энгашиб хуржунидан газета ола бошлади-ю, унинг кулганини пайқамади.

— Мана, — деди у газетани Машрабга чўзиб. — Ҳа, тўхта, китобга ошиқсан-ку сен, мана буни ҳам ол! — Ота газетага қўшиб юпқагина бир китобча берди, кейин қаддини яна тик тутиб, эшагининг юганини юлқиркан, қўшимча қилди:

— Бошқаларга ҳам овоз чиқариб ўқиб бер, ўртоқ Ленин айтганда, газета-журнал ўқимаган одам сиёсий жиҳатдан кўрдир!

Чол беш-олти қадам узоқлашмаган ҳам әдики, Қўчқор ажриққа ағанаб, қорнини чангаллаб кула бошлиди:

— Зап ажойиб қайнатаң бор-да, девона!.. «Россияда ўртоқ Чапаеву, Урта Осиёда мана биз!» Ха-ха-ха!

Машраб «Қизил Ўзбекистон»ни ёзаркан:

— Бўлди-да энди!— деди жеркиб.

— О, — кулди Қўчқор.— Қизгинаси жигарингдан ургандан бери отасиям кўзингта иссиқ кўринадиган бўлди-я, девона!

— Қўйсанг-чи, бирорни қитирига тегавермай,— деди Акмал. Лекин Машраб бу гапларни эшифтади ҳам. У кўкрагини ажриққа бериб, газетага киришиб кетганди.

«Душман ҳужумга ўтди. Аҳвол яна жиддий!»— Иирик ҳарфлар билан терилган бош мақола сўнгги пайтлардаги бош мақолаларга ўхшамас, унда ўтган йили душман Сталинградга яқинлашганда вужудга келган бўлакча бир жиддийлик, таҳлика, ҳаяжон, айни замонда кишининг қалбини титратадиган бир куч бор:

Орёл — Курск райони!

Душман бу фронтта ўн бештадан танк дивизияси, ўн тўртта пиёда аскар дивизияси, икки мингдан ортиқроқ самолёт ва бошқа кучларини ташлаган, шиддатли жанглар бошланганди!

Машраб аъзойи бадани жимир-жимир қилиб, Информбюро ахборотини қайта-қайта ўқиб чиқди, кейин сарғиш жилдли китобчани очди. Таниш исмлар: Ҳамид Олимжон «Кўлингта қуролол», Ғафур Ғулом «Сен етим эмассан», Абдулла Қаджор «Барон фон Ринг», Борис Горбатов «Она тупроғининг ҳар бир қаричи»... Борис Горбатов... Ҳа, эсига тушди: «Оддий солдат Иван Куликов» деган ажойиб китобчани ёзган одам!

«Дўстим! Сен бирон марта «Она тупроғимизнинг ҳар бир қаричи» деган оддий сўзларни ўйлаб кўрганинг борми?»

Машраб, гўё китобчани бирор қўлидан тортиб оладигандай, унга қаттиқроқ ёпишди.

Шу пайт, рўпарадаги довон орқасидан эшакларнинг ҳанграши, «Ол-ол!», «Ур-ур!» деган шовқин-сурон эшитилди-ю, қамишлар чайқалиб, созликни эшак қоплади. Эшак эгаларининг кўпчилиги ўн уч-ўн тўрт яшар болалар — ҳаммасининг юзлари чўяндай қорайган, лаблари қуруқшаб ёрилиб кетган, ёқавайрон, оёқлари тимдаланган, қонаган, лекин ўзлари нимагадир хушнуд, гўё оламни сув босса тўпиқларидан келмайди!

Созлик гўё жанг майдонига айланди: тўқимлар, қоплар осмонга учди, бирорвнинг ҳангиси шаталоқ отиб, бирорвнинг ургочи эшагини қувиб кетди, орқасидан чопган болаларнинг сўкинган овози, таёқларнинг қарс-қарс синиши оламни тутди.

— Овқат тайёрми, ошпаз опа? “

— Нон-чи? Нон?

— Яшанг, холажон!

— Иссик нон дeng? Ваҳ-ваҳ-ваҳ!..

Ниҳоят, баъзиларининг кўзи Машрабларга тушди.

— Э, Қўчқор акамларми? Бормисиз оламда?

— Хом семизу, девоиаи Машраб ҳам кептилар-да! Қўчқор болалар билан қучоқлаша кетди. Акмал ҳам айиқдай олишиб ўйнаша кетди, ёлғиз Машраб ҳеч нарсани сезмас, у ҳамон кўзлари газетада эди.

Мақола шундай эҳтирос билан ёзилган эдики, ўзи азалдан кўнгли бўш Машраб кўзларига милт-милт ёш олиб ўқиди. Бир оздан кейин Комил пайдо бўлганда ўрнидан иргиб туриб олдига чопиб борди.

— Комил ака! Жон ака, мана буни бир ўқиб чиқинг!

— Нима гап ўзи? Тинчликми, дўстим?

— Тинчлик, буни бир ўқиб кўринг. Шунақа зўр ёзилганки, нақ титратади! — деди Машраб энтикиб.— Яна дeng, ўзбек жангчиси Сирожиддин Валиев тўғрисида.

Комил қошларини чимириб, юзида кулгичлари ўйнаб китобчани секин варақлади.

— Ҳа... ажойиб мақола!.. Тўхта! — У чеҳраси очи-либ кўзлари ялтиллаб кетди:

— Мен болаларни тўплайман. Ўзинг ўқиб берасан!

Бу ўртада болалар қопларини ҳар жой, ҳар жойга ёзиб ошхонадан гўжа билан нонларини таший бошла-

ган, баъзилари узала тупиб овқатга киришган эди. Шунинг учун бўлса керак, Комил уларни маҳола эшишишга таклиф қилганда истар-истамас йигилишиди.

Комил чап қўлинин ярадор қўлининг устига қўйиб, Фронтдаги аҳвол тўғрисида қисқагина гапириб бердида, Машрабга имо қилди.

— Энди сўзни бу ёқдан эшиtingлар.

Машраб юзига иссиқ қон уриб, чуқур тин олди, сўнг товуши қандайдир ёқимли титраб ўқишга киришиди:

«Дўстим! Ростов, ноябрь кунлари, Дон кечувларидаги музлар, Ростовдаги дорлар, йўлкалардаги дорларга осилган кишиларнинг кўкариб кетган оёқлари ёдингиздами?...»

Машраб бир секунд болаларга зидан кўз ташлади. Ёнбошлиб ётганлари қадларини тутиб, олдинга сурилиб ўтирганларини кўрди-ю, овози боягидан ҳам қаттиқроқ титраб давом этди:

«— Дўстим!.. Биз сен билан она тупроғимизда жанг қилмоқдамиз. Дон далалари ёшлигимизнинг ҳамроҳи, Шимолий Дон эса, болалигимизнинг дарёси эди...»

Кимдир йўталди. Шу заҳотиёқ «тсс», «жим» деган хитоблар эшитилди.

...«Фарғоналик ўзбек йигити разведкачи Сирожиддин Валиевдан ҳам ажойиброқ жангчи бутун фронтизда йўқ эди.

Унинг ватанида, олтин Фарғонада, муздай сувлар ариқчаларда жилдираб оқади, Валиев бўлса менинг тутун босган Донбассим учун жанг қилгани келди. Унинг ватанида, шамшод тераклар остида авлодлари тинч ётипти. Сирожиддин бўлса...— Сирожиддин бўлса... шахтанинг ёнидаги жангда ўлди ва шу ерда кўмилди...

Валиевни дафи қилаётганда бутун дивизия йиглади, таманлик, темир иродали жангчилар... кўз ёшларини... кўз ёшларини яшира олмадилар»...

Машрабнинг овози баланд пардаларга чиқсан дутор торларидай янгради-ю, узилди. У бошини эгип жим қолди. Шу пайт қаерданadir ён томондан, ғолларнинг орқасидан, Қурбон отанинг таниш, ҳоким товуши қатъий жаранглади:

«Ўртоқлар! Чапаев авлодининг содиги фарзанди ҳамда Ватан урушининг довюрак жангчиси ўртоқ Сирожиддин Валиевнинг хотираси учун ўриниларингдан туришларингни илтимос қиласман!..»

Қурбон ота оғир кўк фуражкасини бошидан олиб кўксига босганича ғоз турар, мунчоқ-мунчоқ терлаган дўйнг пешанаси, тақир боши мис лагандай ялтипар эди. Лекин ҳеч ким, ҳатто одатда отанинг гапларидан кулиб юрадиган болалар ҳам бу сафар индамас, бошларини қўйи солиб сукут сақлашарди.

Жимликни яна отанинг ўзи бузди, юлдузи ярқ-ярқ өтган катта фуражкасини тақир бошига қўндирапкан, деди:

— Между прочим, ўртоқ Чапаевнинг ёрқин хотирасини қалбимиизда қандай сақласак, ўртоқ Сирожиддин Валиевнинг хотирасини ҳам худди шундай сақлайлик ҳамда бунга лойиқ бўлайлик, ўртоқлар!

Отдан кейин Комил сўза олди:

— Фронтдаги аҳволни өшилдиларинг. Вазият оғир. Бундай пайтда бир қадоқ дон ҳам ҳалқимизга мадад. Чарчаб келдиларинг, кўриб турибмиз. Аммо илтимос: хирмонда анча ғалла тўпланиб қолди. Агар барвақтроқ йўлга тушсан яна бир қатнашга улгуромиз.

Негадир ҳамон бошини осилтириб турган Қўчкор биринчи бўлиб жавоб берди:

— Мана биз тайёр, кечаси ташийсанлар десангиз ҳам, йўқ демаймис!

— Раҳмат, дўстларим! — деди Комил. — Бўлмаса эшакларингни суғоринглар, ҳозир йўлга чиқамиз.

* * *

Бу жуда оғир, олатасир воқеаларга бой, галати бир сафар бўлди. Олдин хирмонларга ўтиб, панжалар орасидан шовиллаб оққан оппоқ буғдойни катта жун қопларга қоплашди, кейин өшакларни қувиб келишиди.

Эшаклар ҳар хил, бирорда айғирдай депсинган ҳангича бўлса, бирорда елкаси яғир бўлиб кетган қирчантити урғочи эшак, яна бирорларда хўтиқ. Бироқ ортилган юқ бир пуд-ярим пуд бўлмаса кўп фарқ қиласмайди — ҳангиям эшак, хўтиқ ҳам эшак!

Болаларнинг кўпчилиги ўн уч-ўн тўрт ёшдан ошмайди. Шунинг учунми, уларнинг хатти-ҳаракатларида болаларга хос бўлакча бир шўхлик ва бепарволик бор, гўё бу иш улар учун оғир меҳнат әмас, шунчаки бир ўйин.

Улар тинимсиз тегажаклик қилишади, бир-бирларининг эшакларини савалашади, суришади, ҳатто улоқ қилиб тортқилашади, аския ва мазах қилишиб сабабсиз хаолашади.

«Қатраобод» билан шаҳар ўртасидаги масофа ўн олти-ўн саккиз чақирим келади, бир-икки жойда кесиб ўтадиган сувсиз сойлар бўлмаса, бу масофанинг ҳаммаси ёнғоқ отса юмалайдиган теп-текис дашт. Фақат олис-олисларда, саратон қуёшида ёниб кетган тепаликлар, паст-баланд адирлар қорайиб кўринади... Қуёш гарбга ёнбошлиласа-да, ҳануз тафтидан тушмаган, аксинча, гўё баттар авжига чиқиб, дашт мисоли қизиган тандирга айланган. Бутун кенг далада бирорта жонли махлуқ кўринмайди, ҳатто одатда кўкда магрур сузиг юрадиган бургут ба калхатлар ҳам қаёққадир ғойиб бўлган, гўё осмон бағрига сингиб кетган.Faқат, сарғая бошлаган тўнғиз тароқлар орасида гоҳо юмонқозиқларнинг муғомбир тумшуғи бир кўриниб, яна йўқолади. Ўқтин-ўқтин бир парча жонли тилладай ялтиллаб бузоқбони ўтади, баъзан оёқ остидан хипчиндай тебраниб ингичка ўқилонлар чиқиб қолади.

Катта йўл арава қатнайвериб, тупроғи тиэзадан келади, шунинг учун «эшак карвон» йўл ёқасидан юришга мажбур. Бироқ бу ердан юриш ундан ҳам мушкул, чунки оёқ ости туршакдай ғадир-будур тошлилар ва тўнғиз тароқ билан қопланган. Шунинг учун йўлнинг учдан бирини ўтмасданоқ бояги хуррамликдан асар ҳам қолмади. Бу ҳам етмагандай чарчаган эшаклар тез-тез қоқила бошлади-ю, кўпчилик болалар пиёда чопқиллашга тушди.

Бир-бирига тегмай учган оёқлар қоп-қора бўлиб, шилиниб, тирналиб кетган, боя булоқ сувига ювинганда мис баркашдай товланган чекралар ҳозир чўяндай қорайган, лаблар қаттиқ қисилган, қизарган кўзлар олис-олисларга, адирлар ортида саробдай дам нишона берив, дам ғойиб бўлаётган шаҳар боғларига тикилган.

Машраб бу оёқлардан, бу чўян юзлардан кўзини узолмай, зипиллаб бораркан, юраги қандайдир или: акалик меҳрига тўлади, эсига негадир урушдан олдинги илиқ ёз оқшомлари тушади. У маҳалда, ҳар куни кечқурун бу ёшдаги болалар пода кутиб сойга йигилишар, қўш ёнгоқ пишганда кеча-ю кундуз ёнгоқ отишар, аксарият тўғон бўйидаги азим теракларни марра қилиб, тараф-тараф бўлиб беркимачоқ ўйнашар, негадир яқиндаги боғларга яширинмай, болохона ва сомонхоналарга бекинишиб, тоңг отгунча излашиб, қувлашиб чиқишарди. Булар бўлса... эҳ, уруш!

Машраб ўзи ҳам бундай оғир сафарга биринчи чиқиши эмасми, сувдай оққан тердан кийимларини сиқса бўлади, тиззалари қалтирайди, лекин тишини тишига қўйиб:

— «Яна бу киши комисsar эмиш!» — дейди ўзича.
— Сен бу норасидаларга, бу чўян юзларга бир қараб қўй, комисsar!

Эшакдан тушиб пиёда кетаётганлар орасида Акмал хом семиз ҳам бор. У, семизлиги етмагандай, маймоқ ҳам эмасми, пиёда чопқиллаш унга бошқалардан ҳам қийин: пешанасидан оққан тер юзидаги чангга қўшилиб қора лойга айланган. Ўзи ҳам ҳансирайди, гоҳо-гоҳо хўтигидан орқада қолмаслик учун оғир лўкиллаб, маймоқланиб югуради, шундай бўлса-да, Қўчкорнинг илтифотига кўнмайди, лабини ўжарлик билан қисиб боради.

Эшак карвон икки сойни ўтиб, шаҳарга олти-етти чақирим қолганда тўсатдан олдинги эшаклардан бири суриниб кетиб катта йўлга йиқилди-ю, қора булут орасида қолди. Унга қоқилиб яна бир-иккитаси гурс-гурс ағдарилди.

Қий-чув тўполон даштни тутиб кетди.

Кўтарилиган тўзон сал тарқалгач, ўртада эшагига суюниб қолган озғингина қора бола кўринди. У эшагининг қулоғига ниманидир пичирлаётгандай бўйнидан қучоқлаб турар, ағдарилган қоли ёнида ётарди.

Ён ёқдан дарҳол:

— Ие, «Информбюроми?»

— Нима бўлди, «Информбюро!» — деган хитоблар эшитилди.

Орқадан саман йўргасини қамчилаб етиб келган Едгорбек ўшқириб берди:

— Кўзингга қараб юрсанг ўласанми, дардисар?

Едгорбек «Қатраобод»дан чиққандан бери бир та-
розибонликдан бўшатиб, әшак карвонга юборгани учун
Комилдан ранжиб, бир болалар уни писанд қилмас-
дан олатасир боришлиридан ғижиниб келарди. Энди
ўзини кўрсатиб қўядиган пайт келганини сезиб, ав-
жига чиҳа бошлаган эди, Қўчқор эшагидан сакраб
тушиб йўлини тўсди:

— Кўп ўдағайлайверма! Кўриб турибсан-ку бола
бечоранинг аҳволини!

У «Информбюро»нинг ёнига ўтиб елкасига қўлинни
қўйди:

— Бир жойнинг оғриб қолдими, оғайни!

Қора бола секин бошини кўтарди. Еноқлари тур-
тиб чиққан озғин юзида аянчли ва айни маҳалда шўх
табассум жилва қилди:

— Йўқ, оғриқка бало борми? Шунчаки... Мас-
лаҳатлашиб турибман қора дулдулим билан!

Хушнуд қаҳқаҳа кўтарилиди.

— Хўш, нима дейди қора дулдулинг?

— Кечирасиз, мудроқ босиб билмай қопман дейди,
тентак!

Кулги босилар-босилмас кимдир қичқирди.

— Тағин қанақа янгилик бор оламда? Сўраб кўр-
гин дулдулингдан.

— Сўраганда қандоқ, Жўравой. Дулдулим айтди:
асти хафа бўлма, хўжайин, ошпаз опамлар бугун хўп
ажойиб угра оши қиляптилар, деди.

— Ростданми, Информбюро?

— Информбюро бўлади-ю, ёлғон ахборот берадими,
каллаварам?

Қора бола кулиб гапирса ҳам юра олмас — оёғи
қайрилиб қолган эди. Қўчқор унинг эътиrozларига
қулоқ солмасдан даст кўтариб ўз ҳангисига миндир-
ди, сўнг, камида тўрт пуд келадиган қопни бир сил-
ташда кўкрагига олиб, «қора дулдул»нинг белига
ташлади-да, қичқирди:

— Қани кетдик, жўралар!

Иссиқдан, чангдан, йўл изобидан толиқиб, мудроқ
боса бошлаган болаларга «Информбюро»нинг гаплари
бир сабаб бўлди-ю, яна сал жон кирди. Бу ўртада
шаҳар ҳам яқинлашиб қолди. Кўм-кўк боғлар ора-
сидан осмонга бўй чўзган машҳур водопровод башни.

си — у шунинг учун ҳам машҳур эдики, шаҳарда темир йўл станцияси билан бирга қурилган биринчи янгилик эди — кўринди. Сал юрмай, станция томондан паровоз гудоги эшилди, кейин туташ боғларни ёриб катта состав отилиб чиқди-да, уфқдаги қирларга томон йўналди. Эшиклари ёпиқ қизил вагонлардан, гумбаздай цистерналардан, брезент ёпилган сирли контейнерлардан иборат бу состав шундай узун эдики, сира орти кўринмасди!

— Бир, икки, уч, ўн олти, ўттиз тўрт!

Ниҳоят, узун состав тугади, кўй ва қизил фонарь осилган охирги вагон тепалик орқасида гойиб бўлди...

Темир йўлни, олис нотаниш ўлкаларга кетаётган поездни кўрганда кўзлари ўйнамаган, паровоз гудогини эшилганда дилида ажаб оразулар уйғонмаган, юраги жиз-жиз этмаган қишлоқ боласи бормикин?

Хозиргина боғлар орасидан чиқиб, қирлар ортида йўқолган бу поезд ҳам ҳамманинг юрагини ўйнатиб, хаёлларини ўзи билан олиб кетди, оғир меҳнат билан ўтаётган бир-бирига ўхшаш кунларда мисоли «ярқ» этган бир юлдуз бўлди...

Улар «сирли» поезд тўғрисида баҳслаша-баҳслаша «Заготзерно»га бориб қолганларини ҳам билмай қолишиди.

«Заготзерно» деганлари темир йўлнинг орқасида, семафорнинг рўпарасида эди. Бу — деворларига: «Ҳамма куч, ҳамма ғалла Фронт учун!» деб ёзилган, қизил гиштдан қурилган, катта дўнгалак бино бўлиб, атрофи баланд девор билан ўралган, деворнинг устидан тиканли сим тортилган.

Қўргоннинг учта катта дарвозасидан ташқари поезд кирадиган тўртинчи дарвозаси ҳам бор, бу дарвона уни айниқса салобатли қилиб кўрсатади.

Лекин ҳаммадан ҳам дарвозалар олдида йиғилган аросат от-улов ҳайратга солади кишини!. Бу ерда алмисоқдан қолган эски қўюн арава, ҳўқиз қўшилган бричка ва шотили аравалардан тортиб, эшак араваларгача бор, даштни бошларига кўтариб бақирган нортуюлардан тортиб, хачиргача топилади. Эшакнинг эса сонсаноғи йўқ.

Бу оломон, бу аросат, бақирган туя ва тўп-тўп эшак карвонлар орасида йўқолиб қолиш осон, зотан,

кимга учраш, ғаллани кимга топширишни ҳам англаб олиш қийин.

Карвонбоши Ёдгорбек ҳам биринчи келиши эмасми, кўзлари олазарак бўлиб, шошиб қолди. Лекин «эшак карвон» ҳали дарвозага етмаган ҳам эдик, қаердандир бақалоққина бир одам тарвуздай юмалаб чиқди-да, ҳарсиллаб югуриб келди. Нима қилишини билмай, саросимага тушиб қолган Ёдгорбек, уни кўриб:

— Э, бормисиз, Эшвой ака! Сиз йўқмикинсиз, деб қўрқиб кетибман! — деди қувониб.

— Биз шўтта бўлмай, қатта бўламиа, акаси?

— Карвонбоши ўзлари бўптилар-да? Балли, балли! Қани, йигитларни жадалланг, акаси. Тағин бир оз кечиксак, тунаб қолишга тўғри келади, акаси жонидан!

Эшвой ака карвоннинг олдида тарвуздай юмалаб, учинчи дарвозага бошлаб борди. Бу ерда оломон исбатан оз, навбат кутаётганлар ҳам тезроқ силжимоқда эди.

Эшвой ака Ёдгорбекни етаклаб от-аравалар орасига шўнгиди. Болалар ўзларини ерга таппа-таппа ташлаб чўзила кетишиди, баъзилар дўппиларидан игна олиб, товоонларини ковлашга киришиди.

Қаердандир «Информбюро» пайдо бўлди. қаттиқ оқсоқланса ҳам, хушвақт тиржайиб хабар берди:

— Ҳозир навбатсиз топширадиган бўлдик. Йўлини қилди, Эшвой акамлар!

Дарҳақиқат, лаҳза ўтмай, тарвуздай юмалаган бақалоқ билан Ёдгорбек етиб келди. Эшвой ака навбат талаб қилиб йўлни тўсганларга:

— Пландан ташқари Қизил Армия фондига топшириялти бу бугдой. Олдин планингни бажар, кейин йўл тўсасан, нодон! — деб ўшқириб берди ва тинимсиз «пўшт-пўштлаб», карвонни дарвозадан олиб ўтди.

— Ҳозир ер тарозига чиқамиз. Биласанлар-а, лочинлар?

— Биламиз, биламиз!

Машраб «ер тарози» деганларига тушунмай ҳайрон бўлди, фақат ликиллаб турган тахта полга чиқканларида ва ғуж бўлиб бир лаҳза тўхтаганларида гина фаҳмлаб қолди: ер тарози деганлари қимиirlаб турган шу тахта пол экан!

Заготпунктнинг одамлари эшакларни санашди:¹

— Қирқ саккизтами?

— Қирқ саккизта!

— Гатоп!

Эшак карвон баланд қизил бинонинг қўш тавақали дарвозасига бориб тўхтади.

— Қани, лочинлар, тагин бир эўр беринглар!—

Эшвой ака шўх чақнаган кўзларини Қўчқор билан Машрабга тикди:

— Келганларинг зап яхши иш бўлти-да, лочинлар.

Ёрдамлашиб юборинглар мана бу жўжахўроазларга!

Машраб бу гапларнинг маъносига тўрт пуд кела-диган бир қоп буғдойни елкалаб қалтис тахталардан юриб, тоғдай уйилиб ётган буғдойнинг устига чиқа бошлиганидагина тушуниди. Буғдойнинг баландлиги ик-ки қаватли бинога тенг, тахталар эса шундай тик қўйилганки, Машраб, ярмига бормасданоқ тизалари қалтираб қолди. У ҳар уч қадамда бир тўхтаб, нафасини ростлай-ростлай тепага зўрга етди, қопни ағдарди-ю, мувозанатини сақлай олмай ўтириб қолди. Лекин ўз қопимни тўндим деб, четта чиқиб туриш мумкин эмас, чунки «жўжахўроазлар»нинг кўпчилиги бу «тоққа» тўрт пуд тугул, бир пуд юкни ҳам кўтариб чиқолмасди.

Улимдан номус. кучли деганларидек, Машраб, гарчанд тизалари қалтираб, тўхтаб-тўхтаб бўлса ҳам, тагин уч-тўрт марта қатнади, кейин, юришгаям мадори қолмай дарвозанинг соясига чўзиларкан, истехзо билан кулиб қўйди:

«Яшанг, ўртоқ комиссар!»

Машрабдан кейин даврада фақат Қўчқор билан... Акмал хом семиз қолди!

Қўчқорнинг бундай пайтларда ишга жон-дили билан киришиши, айниқса одамлар мақтаб турган пайтларда пойгага тушган чопқир отдай ўзини аямаслиги маълум.

Мана, ҳозир ҳам, у шилта қўйлагини ечиб ташлаб, қип-қизил танаси мисдай ялтиллаб, жон-дили билаг берилиб ишлайяпти, тўрт пудлик қопларни бир силтап-да кифтига олиб, тик тахтадан чопқиллаб чиқиб, чопқиллаб тушади, шиг-шиғ терлаган пешанасини кафти билан сидириб ташлаб, елкасини «жўжахўроазларга» тутади:

— Қани, бир силташда қўйинглар!

Лекин қизиги шундаки, Акмал ҳам ундан қолиши-
мас эди. Рост, унинг айиқдай кучли эканини ҳамма
билиарди, бироқ оёғи маймоқ бўлгани учун бундай
пайтларда кўп жонбозлик кўрсатавермас, Қўчқорга
ўхшаб одамларнинг мақтовларига ҳам унча учавер-
мас, умуман, бир оз дангасалиги ҳам бор эди.

Ҳозир эса, у ҳам кўйлагини ечиб ташлаган, гўшт-
дор, бўлиқ гавдаси лорсиллаб, тўрт пудлик қопни
енгилгина кифтига олиб, оқсоқланса-да, ҳеч жойда
тўхтамасдан тўкиб тушяпти. Тағин Қўчқорга ўхшаб
мақтовлаға эътибор бермайди, танасидан сув бўлиб
оқаётган шиф-шиғ терларни ҳам артмайди, фақат го-
ҳо-гоҳо:

— Сув!— деб қўяди ҳансира. Сўнг, бир коса қу-
дуқ сувини бир шимиради-да, тагин қопга тарма-
шади.

Машраб бор кучини йигиб ўрнидан турганда кўп
бўлса ети-саккис қоп ғалла қолганди.

— Бормисан, девона! Комисsar деган мана бунз-
қа бўпти!— қичқирди Қўчкор.

Машраб бу сафар тепага кўп бўлса икки-уч мар-
та чиқиб тушди, лекин назарида, қолган бутун иши
бир бўлди-ю, шу икки-уч қоп буғдой бир бўлди, чун-
ки ғаллани тўкиб бўлиб, «Заготэрно»дан чиққанлари-
да ўвига нисбатан дилида ҳандайдир бир ишонч, ҳатто
ҳурмат уйғонганди.

* * *

Мастура!

Унинг қўлларидай майин, илиқ, меҳрибон қўллар
борми оламда? Унинг бармоқларидай нозик, кишининг
бошини силаганда қалбини нурга тўлдириб, дилини
равшан қиласиган бармоқлар бормикин дунёда?

Одатда опа-сингил, ака-укалар унча иноқ бўлавер-
майди, бироқ Машраб эсини танийдики, қулогида
Мастуранинг меҳрибон, мулоийим овози янграйди.

Илгари, Мастура турмушга чиқмасдан бурун, Гул-
сум опа ёки Аъзам аканинг тазиёки ўтган маҳал-
ларда ёки бирор гуноҳ килиб қўйиб калтак ейиш
жавфи туғилган пайтларда, Мастура билан Машраб

бирга бекинишар, ғазаб ва калтакни бирга баҳам кўришарди.

Аксарият Мастира орага тушиб, аччиқ калтаклардан қутқариб қолар, қутқара олмаганида эса, бирор холи бурчакда унинг бошини кўксига босиб, бирга йиглар, бирга кулар эди.

Машраб ўз сирларини, дард-ҳасратларини бемалол, бехавотир айта оладиган, мазах қилишидан қўрқмай ўртоқлаша оладиган биттаю битта одам... Мастира...

Машраб уни яхши кўришига яна бир сабаб — Мастиуранинг поччасига бўлган муҳаббати, садоқати.

Мастиуранинг севгиси, чидами, ҳижрон доғлари (мана уч ойдан ошдики Расулжондан ҳам хат йўқ) унинг ўзидаи пок, чиройли, самимий! Эҳтимол, шунинг учундир. Машраб вафосизлик тўғрисидаги китобларни ўқиша, ё эркаклар оғзидан хотин-қизлар ҳақида шалоқ гаплар эшитса эсига ҳамиша Мастира тушади-ю, бутун вужуди исён кўтаради, бундай гапларнинг биронтасига ишонмайди.

У Муяссар тўғрисида ўйлаганида ҳам хаёлига доим Мастира келади, Муяссар ҳам Мастирадай бўлишни орзу қилади.

Меҳрибон, жафокаш, заҳматкаш опа!

Кападаги мойчироқ шуъласида аллақандай тилла учқунлар сочган кўзларини Машибабнинг кўзларидан узолмайди, қорайиб дагаллашиб қолган кафтлари билан укасининг қўлларини сал ийманиб, гўё унинг капкatta йигит бўлиб қолганини эндигина сеэгандай, тортиниброқ силайди.

У озиб, қўлларини янтоқ тирнаб, лаблари ёрилиб кетган бўлса-да, чеҳраси тиник қорамагиз тусга кирган дудоқлари бурунгидай мулоим, ёқимтой. У Машибабнинг сўзларини аллақандай, яшнаб, меҳрибон сарғиши кўзлари пор-пор ёниб эшитади, қайта-қайта савол беради, сўнг бир энтикиб:

— Поччангдан... Хат йўқдир, албатта,— дейди сенин.

— Йўқ...

— Ашрафжондан-чи?

— Ундан ҳам.

Мастиуранинг киприклари титрайди, ёрилган лаблари қаттиқроқ қисилади.

Машрабга шундай туюладики, гўё Мастиуранинг

киприклари титраганда унинг дилидаги қандайдир но-
вик, нафис торларга тегиб, ҳазин куйлар янграйди. У
ўтирган жойида эгилиб, Мастуранинг дагал қўлини
ўпгиси келади, лекин шу пайт, Мастура секин «уҳ»
тортади-да, сўрайди:

- Фотима қалай? Яхши юриптими?
- Юрипти, дуруст.
- Зухра-чи?— деди Мастура ва кўзлари ялтиллаб
жилмайди. У ҳеч қачон «Фотима Зухра» деб гапир-
майди, ҳар бирини аҳолида-алоҳида айтади, афтидан,
унинг учун иккиси икки бошқа олам!
- У ҳам тузук... Ўйнаб юришишти бувимларни
қўлида!
- Бувижон!— деди Мастура ва бирдан тошқин-
дай ёпирилиб келган меҳр-муҳаббатдан юраги тўлиб,
хитоб қиласди:— Бувижонгинам! Қалай, яхши юрип-
тиларми? Ҳали-ҳали ўшандаймилар?
- Йўқ, жуда ўзгариб, ёшарид кетганилар!
- Сен кулма!— деди Мастура ва ўзи ҳам жил-
майди.— Баъзан шундай туюладики, худди қишлоғ-
дан кетганимизга бир ой эмас, бир йил бўлган. Рост-
рост!— деди у, кейин ниманидир эслагандай Машраб-
нинг қўлини ушлади:
- Барно-чи? Кўрдингми уни?
- Кўрдим,— деди Машраб.— Юрибди шекилли
ишлаб.

Мастура Машрабнинг кўзларига қадалиб қаради.

— Нега бундай дейсан?

— Нима дедим? Юрипти ишлаб. Шу...— Машраб
бўлган воқеаларни бир айтгиси келди-ю, яна ўзини
тутди. Гапни бошқа томонга буриш учун:

— Ўзинг-чи?— деди.— Аҳволинг қалай? Қийнал-
маялсанми?

— Йўқ, нега қийналаркайман? Ўрганиб кетдик...—
деди Мастура ва Машраб ҳадеб қўлига қараётганини
пайқаб қолиб, ёш боладай орқасига яширди.— Ҳадеб
қараайверма!— кулди у.— Дастребки кунлар тажриби-
сизлик қилиб тўнғизтароққа тирнатиб олдим. Ҳозир
шунаقا ҳам абжир бўлиб кетдимки, бир кунда чорак
гектар ўряпман. Рост, рост. Нега кулласан?

Лекин Машраб Мастуранинг гапларидан эмас,
унинг овозидаги ғурурдан, болаларга хос самимий қу-
вончдан жилмаярди. Мастура эса унинг илжайишини

бошқа маънода тушуниб, ўз бригадалари тўғрисида қизишиб ва фахрланиб гапира бошлиди.

Бригадалари, гарчанд «зиёлилар бригадаси» деб аталса ҳам, бошқа ҳеч бир бригададан қолишмас, балки ўзиб кетганимиш!

Мастуранинг айтишича, улар кундуз кунларигина эмас, баъзан ойдинда ҳам ўроқ ўришган, Мастура эса, амбулаториянинг фельдшери бўлгани учун врачлик ҳам қилган. Бугун Мастура унинг келганини эшитиб, сал олдин кетган, тўғрироги, бригадирлари Қурбон ота ўзи юборган, бошқалар ҳанузгача далада...

Мастура бунинг ҳаммасини қандайдир шошиб-пизишиб, ҳам севиниб, ҳам гуурланиб гапиаркан, кўзлари ёниб сўради:

— Жуда зўр нарса ўқиб бериб ҳаммани титратиб юборган эмишсан. Ростми?

— Ҳа, шу...— деди Машраб қизариб.— Кошки мен ёзган бўлсам! Битта катта ёзувчининг мақоласи.

— Қурбон ота шундай мақтадиларки, ўзинг ёзиссан, деб ўйлабмиз!— кулди Мастура.

Узоқдан жўр бўлиб айтилган ҳазин қўшиқ эшитилди.

— Қизлар қайтишяпти,— деди Мастура.— Чарчоқ нималигини билмай ишлашади бечоралар... Фронт, фронт дейишади, бироқ фронтдан осон бўлаётган йўқ бу ер!

Қўшиқ тобора яқинлашиб, бирдан шўх лапарга айланди:

«Ариқ бўйини ўйай,
Гулзорларга сув қуай.
«Қизсан» деманг, аяжон,
Аскарликка қўл қўйай!»

Капанинг ёнгинасига келганда қиз-жувонлар қандайдир шўх бир қайсарлик билан такрорлашиди:

«Қизсан» деманг, аяжон,
Аскарликка қўл қўйай!»

Сўнг, фигонга тўла бир овоз:

— Рост, айланай қизалар!— деди куюниб.— Агар Муроджонимнинг ёнига юборишадиган бўлса, сира

ўйланиб ўтирмасдим. Ҳозир кетардим ўша фронт деган балойи азимларига!

— Қўй, шукур қилгин, жонгинам! — деди бошқа бир босиқроқ товуш, лекин қизлар атрофдан унга ёпишиб кетишди:

— Нимасига шукур қилайлик!

— Рост айтади, дугонам! Ёридан айрилиб бу ерда юргунча, бирров дийдор кўришиб ўлган яхши!

— Сабр қилгин, сабр таги сариқ олтин, деганлар эскилар.

— Қўйинг опажон, «узоқдаги думба»дан яқиндаги ўпка яхши!

— Қани ўша ўпка ўлгир? Ўпка тугул талоқ ҳам йўқ-ку, дугонажон?

Қизлар даштни бошларига кўтариб қийқириб кулишди. Мастура кулимсираб ўрнидан тура бошлаган эди, капага кирган қизлардан бири тўсатдан:

— Вой, ўлмасам, бу ёқда кап-катта йигит бор демайсиз-а, Мастурахон опа! — деб кулди. Қизлар ёпирлиб капага киришди.

Машраб қафасга тушган мусичадай ўзини қаёққа уришни билмай қолди. У мойчироқ шуъласида оппоқ чақнаган тишларни, шўж қора кўзларни кўрар, назарида, қизлар тутиб олиб қитиқлаша бошлайдигандай аъзори бадани тотли жимиirlарди.

Ҳар ёндан илтимослар ёғилди:

— Яхши шеър ёзибсиз, деб эшиитдик, ўқиб беринг, Машрабжон!

— Ўқиб бермасалар чиқармаймиз кападан!

— Қаёқда дейсиз, бизни назарларига ҳам илмайдилар шоир акамлар!

Хайрият, Машрабнинг бахтига Мастура бор эди! У қизлар билан ҳазиллашиб, кулишиб, укасини уларнинг қуршовидан қутқариб олди.

Қоронгида ўнқир-чўнқир жойлардан өхтиёт билан юриб бораркан, Мастура секин деди:

— Нима қилишсин: ҳаммаси ёш, ҳижрон ўтида куйишади бечоралар!

Қизларнинг капасидан бошқа капаларда жинчироқлар ўчган, фақат хирмонларда қўш-қўш фонарлар ёниб турипти. Уларнинг хира нурида буғдой янчаётган одамларнинг «пўшт-пўшт» деган уйқули овозлари келади, гоҳо қамчининг заҳарли чарсиллаши, таёқнинг

«қарс» этиб синиши ва газабли ҳайқириқ эшитилади:

— Оқсамай ўл, аblaҳ, ким айтади сени эшак деб Их-их!

Опа-ука қоронғида тоғдай қорайиб турган буғдой ғарами ёнида тұхташди. Мастура Машрабнинг пешансидан ўпди:

— Ҳадемай тонг отади. Дамингни ол.

— Сен ҳам.

Машраб уйилиб ётган буғдой ғарамларини айланады. Айланада булоқ бүйиге зёрға етиб борди. Тагларидан похол, бошларыда түқим, жун копларга ёпиниб бужмайиб ётган болалар орасидан Құчқор билан Акмални топиб, юмшоқ похолга чүэзилди, күзиңде үйқуга кетаркан, үзича жилмайиб деди: «Даштдан құрқитмоқчы зәдилар. Үйладиларки бардоши етмай, дод деб юборади деб. Йүқ, кечирадилар, ўртоқ Эртоев, чидаймиз. Фронт учун чидаймиз, ака. Ҳа!»

Бешинчи боб

Мұяссар қабристондаги бойўғлининг ваҳимали «хувхув» лашидан уйғониб кетди-да, қайта ухлай олмади.

У йигитлар даштга кетгандан кейин Гулсум опа сувга одам тополмай қийналганини күрса ҳам, маңа шу ваҳималардан құрқиб индамай юрган зәдил. Бироқ кечаги мажлисдан кейин индамасликнинг иложи қолмади.

Мұяссар бу мажлисга бормоқчи эмас зәдил, кечқурун ишдан қайтаётганды Гулсум опа чақириб олди-да, идорага бошлаб борди.

Улар борганды бригадирлар йиғилған, Иnobат түрдеги катта столининг ёнида туриб гапирмоқда зәдил.

Мұлойим күзлари аллақандай қисилған, ёноқлары бүртиб чиққан, қорамағиз юзи ловиллаб ёнар, овози кескин янграрди. Құлида на бир қоғоз, на бир дафтар, уғызаларини ўт босған звено бошлиқларини, сув бостириб юборған сувчиларнинг номларини ёдаки айтты, шафқатсиз танқид қылар, бригадирларни ўриниларидан турғазиб қўйиб сўроққа тутар, ўзларини оқламоқчи бўлганларнинг гапларини бўлар, умуман фақат бир нарсани — гўза ўтдан қачон тозаланади — шуни билди.

лишни истар, холос... Ўзиям гап әшитмаган биттаю битта одам — Гулсум опа бўлди. Инобат негадир «зиёлилар бригадаси»ни тилга олмади, бироқ мажлис туғаб, Гулсум опа ўрнидан тура бошлаган эди, сиз қолинг, деган маънида имо қилди-да, келиб кўришди:

— Ҳорманг, опа, аҳволлар қалай?

Гулсум опа истеҳзоли кулимсиради:

— Ҳаммасини кўриб-билиб туриб аҳволимни сўраб нима қиласиз, жоним?

— Биламан... Билганим учун ҳам сизга бир нима дейишга тилим бормади. Бироқ, мен нима қилай, опажон?

Инобат кўэллари жавдираб, Муяссарга қаради. Шундан кейин Гулсум опа ҳам сал тушди-ю, икки аёл олдин одам стишмаслигидан шикоят қилиб кетишиди, кейин бу мушкулдан қутулишини ўйлаб, минг бир кўчага кириб чиқишиди. Бироқ қайси кўчага киришмасин, ҳам масининг боши берк, айниқса сувчилар масаласи ишқал эди.

Инобат билан Гулсум опа ўйлай-ўйлай, охири меҳмонларга мурожаат қилишга аҳд қилишиди. Лекин бу гапни уларга айтишдан олдин Гулсум опа Серафима Федоровна билан маслаҳатлашиб олишни лозим кўрди.

Серафима Федоровна кишлоққа келгандан бери анча ўзига келиб қолган, кечқурунлари каравотини айвонга чиқартириб, ён-верига ёстиқ қўйиб ўтирас, «ишимай нон ейишдан» эзилиб, кечаю кундуз русчабекча лугат ўқир, мактаб очилса дарс беришни оразу қиларди. Лариса эса Моҳира бувига қарашар, баъзан кечқурунлари пахтазорга чиқиб, Муяссарга ёрдамлашган бўларди.

Гулсум опа идорадан чиқиб, тўғри Моҳира бувиникига кетди. Муяссар эса, кўнгли бир хил бўлиб, ўйларига қайтди.

Гарчи, Инобат билан Гулсум опа унга қаттиқ тегадиган бир гап айтмаган бўлса-да, уларнинг ғамгин судбатлари қизни минг хил ўйга солиб қўйди: ахир, наҳот эл бошига иш тушган бу оғир кунларда у ақалли даштга кетган йигитларнинг ўрнини билдирамайдиган бир иш қилолмаса?.. Йўқ, Муяссар меҳнатдан қочмайди. Фақат кечалари бу кенг пахтазорда ёлғиз қолиш, қир ён бағридаги эски қабристоннинг ваҳиди

маси босиб сув суғориш... Ёлғиз шундан қўрқади Муяссар!

Қабристоннинг ваҳимаси эмиш! У тенг қизлар ҳозир фронт учун нималар қилмаяпти! Ана ўз опаси Зебо ўт ичидаги юрипти! У бўлса ўзиям бу йил қишида, Машраб қўйған пъесаларда гоҳ Жамила, гоҳ партизан қиз ролида чиқиб, оташин монологлар ўқиб юрмаганмиди? Бундан чиқди, саҳнада бошқа, турмушда бошқа экан-да у!

Муяссар ўйлай-ўйлай охири қизларни йигиб гаплашишга аҳд қилди.

Бугун эрталаб уни Гулсум опа уйғотди.

Муяссар шоша-пиша унга кечаси ўйлаган ўйла-рини гапира бошлаган эди, Гулсум опа:

— Раҳмат, жоним. Жуда яхши ўйлабсан буни,— деди. Кейин ҳаяжонланиб қўшимча қилди:

— Ҳозир ойимларникига меҳмонлар йигилишади, Ешлар ҳам бор. Юр, сен ҳам бирга бўлгин сухбатда.

Гулсум опанинг бунчалик ҳаяжонланиши бежиз эмас экан. У Моҳира бувининг боғига йигилган йигирма чоғли аёлларнинг орасига кириб, ишдан гап очган ҳам эдики, четроқдаги олманинг соясида ўтирган Святковская деган опа-сингилларнинг бири, чирシリлатиб писта чақаркан, луқма ташлади.

— Сиз нима деялсиз ўзи? Ўйлаб гапиряпсизми? Гулсум опа негадир шошиб:

— Нима қилди?— деган эди, опаси ўрнига синглиси жавоб берди:

— Сиз газета ўқийсизми ўзи? Бизларга ғамхўрлик қилиш тўғрисидаги гапларни эшитганимисиз?

— Ҳа, эшитганиман,— деди Гулсум опа.— Бироқ...

— Яна кўлчилик касалманд...

— Буниям биламан...

— Билсангиз енгилроқ иш топиб беринг!

— Енгилроқ иш бўлмаса илож қанча?

— Топиб беришга мажбурсиз!— Бу сафар опасингил баравар луқма ташлашди, кейин ёшроғи лабини сал буриб:

— Идорадаги гўзал ҳонимча келинингиз деб эшитдик,— деди ва кулди.— Келинингизга айтинг—бўшатиб берсин стулини. Биз ҳам уддасидан чиқамиз ўша ишнинг!

Гулсум опа бунақа гапларни жутмагани учунми, саросимага тушиб ёнида ўтирган Серафима Федоровнага кўз ташлади.

У ранги девор, қўлларини ўрикка тираб, қаддини ростлади, гўё икки опа-сингилга қарашга уялгандай:

— Бу оғир кунларда... ғамхўрлик бундан ортиқ кандай бўлади, ўртоқ... Святковская? — деди секин.— Мана бошпана беришди. Топган-тутганларини аямай...

— Ҳа, ўзингиз яхши жойга тушгандан кейин шундай дейсиз-да! — бошини ликиллатди опаси.— Биз турган жойни бир бориб кўринг. Ертўладан баттар. Зах, қоронғи. Яна шунақа кампирга топширишганки, хасисликда ягона!

— Майли, у ер тўғри келмаса, бошқа жой топайлик...

— Раҳмат, ойиси ёмон бўлсаем, ўғли билан тил топишдик!

Давраға ғалати сукут чўкди. Гарчи йигилганлар орасида бу луқмаларга битта-яримта кўз қисишиб ўтирганлар бўлса ҳам, кўпчилик бошлари эгик, ер чизиб колди.

— Ленинградликлар... илтимос қиласман, қўл кўтаринглар!.. — Серафима Федоровна ўзини босиб олди шекилли, овози босиқ, ҳатто қатъий эшитилди.

Бир четда ғуж бўлиб ўтирган ўн чоғлиқ аёл баравар қўл кўтарди.

— Азиз ҳамشاҳарларим... Агар мен соғ бўлганимда ҳозир нима дейнишимни ўзим билардим. Майли, опа-сингил Святковскаялар... билганларини қилсин. Лекин биз ленинградликлар — мен бўлмасам, мана, қизам бор, Лариса бор, биз ҳаммамиз бир ёқадан бош чиқариб колхозга ёрдам берайлик. Урушни унутиб бўладими ахир?..

Серафима Федорованинг сўзи оғзида қолди. Чунки бирдан ғовур-ғувур кўтарилиди:

— Ҳеч ким меҳнатдан қочмайди!

— Бу оғир кунларда иш танлаб ўтириш ўзи уят! Лариса эса, секин Муяссарнинг ёнига ўтди, ҳаяжондан ранги ўчиб:

— Мен,— деди,— мана шу қиз... Муяссар нима иш қилса, мен ҳам шу ишни қилишга тайёрман!

Лариса «биз ленинградликлар...» деб ғуурланиб гапирганича бор экан! Үмрида ғўза нималигини кўр-

маган қиз, боя кечқурун жўякларга чим босиб, сувни тақсим қилаётганларида, кийимлари шилта бўлиб кетса ҳам, бир оғиз нолимади. Кейин Гулчеҳра бойўғлиниг совуқ ҳув-ҳувлашини эшитиб, ҳиқиллай бошланган эди, уришиб берди. Сўнг тагларига пичан тўшаб, кўрпага ўраниб ётганларидан кейин, дам Ленинградни эслаб (бомба билан замбаракдан қўрқмаган одам қабристондаги бойўғлидан қўрқадими?), дам Қўчкорнинг тунов кунги қилиқларини гапириб бериб, кулдириб ётди.

Муяссар сезди: Лариса буни уларнинг хаёlinи бошқа ёқса буриш учун жўрттага гапирди. Шу-шу гап чиндан ҳам йигитларга кўчди-ю, уларни эслаб, осмонда ёнган ғуж-ғуж юлдузларга тикилиб ётиб ухлаб қолишиди...

Мана, ҳозир ҳам Муяссар бойўғлининг ваҳимали «ҳув-ҳув» лашидан уйғониб кетиши билан қоронғида Ларисанинг қўлини топиб, маҳкам ушлаб олди.

Ҳар бир нарсани бошлаш мушкул. Бу ишда ҳам мана шу биринчи кеча қийин. Шу кечадан эсон-омон ўтиб олишса, у ёғига ўрганиб кетишади...

Муяссар кўнглидаги ваҳимадан қутулиш учун яна жўрттага Машрабни ўйлай бошлади. Одатда, у кечалари Машрабни ўйлаганда эсига мактаб сажнасида бирга ўйнаган пъесалари, бирга ўқиган китоблари ёки сойда, булоқ бўйнда ўтириб ёнгоқ чақиб еган пайтлари тушиб, ичи чироқ ёққандай ёришиб кетарди. Лекин бу сафар негадир нурга йўғрилган бу ёруғ эсдаликлар эмас, йигитлар даштга жўнайдиган кечаси бўлган учрашув, Машрабга айтган аччиқ гаплари хотирасида жонланиб, ўзидан ранжиди. Лекин... Машраб-чи! У нега ўшанда ҳандалак ўғирлашга борди? У шундай қилмаганда-ку, эҳтимол ҳозиргача Муяссарлар госпиталь билан алоқа боғлашарди? Е... ҳалиям бўлса Иnobat опанинг эсига солиши керакмикин бу ишни?

Тўсатдан, катта ариқда нимадир шалоплаб қулагандай бўлди-ю, Муяссар беихтиёр «вой» деб юборди. Чўчиб уйғонган Гулчеҳра ҳам «ойижон» деб унинг пинжига суқулди, ёлғиз Лариса бошини кўтариб:

— Бу ким ўзи? — деди қоронғига тикилиб. Унинг овозига жавобан олдин кимдир: «Қокилмай ўл, лаънати!» — деб сўқинди. Кейин от туёқларининг тасир-

тусури ва ниҳоят эркак кишининг «Қўрқитиб юбордимми, жонон қизлар?»—деган товуши эшитилди.

— И, Ёдгорбек акамлар-ку!— деди Гулчеҳра. Муяссар титроқ босиб ўринидан сакраб турди:

— Тун ярмида нима қилиб юрибсиз бу ерда?

Ёдгорбек ариқнинг у томонига келиб тўхтади. Фирашира қоронгиликда остида ўйнаб турган оти ҳам, ўзи ҳам жуда катта ва кандаидир ваҳимали кўринарди.

— Авваламбор тун ярми эмас, тонг отиб қолди, Муяссархон,—кулди у.—Қолаверса, даштга кетаётиб мана шу арзимас совғани бериб кетай девдим...—Ёдгорбек эгилиб катта бир тугунни чўзди.— Жиндай узум. Олинг буни, Гулчеҳрахон!— деди ёлворгансимон.

Гулчеҳра «ниқ» этиб кулди-да, чўзилиб тугунни олди. Қиз тугунни олиши билан Ёдгорбек ҳам қаддини ростлади.

— Жаҳлингиз чиқмасин, Муяссархон, чин юракдан бу.

У шундай деди-да, отига қамчи уриб, қирга ўрлаб кетди.

Муяссар ҳамон жаҳлидан тушмай, Гулчеҳрага юзланди:

— Бу нега бунақа жонкуяр бўлиб қолди сенга? Нега оласан узумини?

— Вой, нима қилай берганларидан кейин?— деди Гулчеҳра чўзиб.

Муяссар уни гап билан яна узиб-узиб олмоқчи эди, Лариса кулиб таклиф қилди:

— Еч тугунингни! Ейлик яхши узум бўлса. Ана, ўзиям тонг отиб қолди...

Гўё унинг гапини таъкидлагандай сойда эшак ҳангари, олисда жўроz қичқирди, ғўза баргларини шитирлатиб тонг шабадаси эса бошлади...

Қизлар кулиша-кулиша узумни еб бўлиб, ўринларидан турганларида Гулсум опа ҳам етиб келди. У Муяссар билан Гулчеҳрахониг ҳаяжонли гапларини, «Лариса бўлмаганда билмадим нима қилардик?» деган хитобларини эшитиб, Ларисанинг елкасини силаб қўйди, кейин:

— Эртага бошқа меҳмонлар ҳам ишга чиқишади,— деди ўйчан товушда.— Билмадим, сенга ўхшаб улар ҳам ўрганиб кетишармикиш, ё?..

— Ўрганиб кетишади,— деди Лариса.

Қизлар жўяклардаги чимларни кўриб, пайкални бир айланиб чиққунча уфқ қизариб, қушларнинг чуғур-чуғури эшитилди. Муяссар айтган энг қийин кечади — тонг отди.

* * *

Эрталаб меҳмонларнинг кўпчилиги, жумладан, опа-сингил Святковскаялар ҳам Гулсум опанинг бригадасига чиқди.

Марина деган кичик Святковская ўз ихтиёри билан Муяссарларга қўшилди. Опаси Катерина эса табелчиликни олди. Бошқалари кетмонга тушди.

Гулсум опа биринчи кунданоқ меҳмонларни шогирдликка олиб, ўзбек аёлларига қўшиб қўйди. Шу билан кетмон кўрмаган рус аёлларининг кетмонга ўрганиши анча осонлашди. Дастробки кунлари оғиз-бурунларини рўмоли билан ўраб, белларини дастурхон билан боғлаб олган ўзбек аёлларига ётсираб қараган меҳмонлар сал кундан кейин ўзлари ҳам юзларини ўраб, белларини боғлайдиган бўлишди. Бир ҳафта ўтар-ўтмасданоқ, юзлари, бўйинлари кунда куйиб, олдин териси шилинди, кейин мис лагандай қизариб, баъзилари ҳатто қорайиб кетди. Фақат тилла ранг соchlари ва мовий кўзларигина аслидай қолди. Улар ўзлари ҳам, гоҳо бир-бирларига таажжуб билан тикилишар ва:

— Мана, биз ҳам ўзбечка бўлдик! — деб кулишарди. Марина эса негадир Муяссарга кўса қисиб:

— Ўзбечка бўлдигу, бироқ ўзбек йигитлари олармикинлар бизларни? — деб куларди.

Муяссар лоладай ёниб, юзини четга буар, Гулчеҳра билан Лариса қотиб-қотиб кулишар, Марина эса баттар тегажаклик қиласарди:

— Яхши кўрган йигитинг борга ўхшайди-я, Муяссархон, галим ёқмаяпти. Эҳтиёт бўл, тортиб оламан йигитингни!

Бу кулги ва ҳазиллар аксарият яна ўша эски дардни — ҳижрон доғи, висол орзусини қўзгайди. Кексалар урушни ўйлаб сабр қилишса ҳам, ёшлар гоҳо тўлиб кетар: «Ахир қачонгача давом этади бу фалокат, қачон бу мусибатдан қутуламиза, қачон қайтади йигитлар», — деб нола қилишади-ю, кексаларнинг: «Бу ҳам

фронт, фронтча ишлайдиган бригада бу!» деган гапларини эшишиб, индамай қолишиади. Чунки, ишнинг оғирлиги кечаю кундуз фронтни ўйлаган одамларни олис-олисларда қон кечиб юрган жигарбандларига алланечук яқинлаштиради, гўё улар билан жипслаштиради.

Хуллас, меҳмонларнинг далага чиқиши ишга анча ёрдам берди. Бир ҳафта — ўн кун ичидаги юз гектар ғўза учинчи чопиқдан чиқиб, текис гуллади. Гулсум опа ҳам кўнгли бир оз тинчиди. Ғўзадан тинчиди-ю, бироқ бошқа бир ташвиш кўнглига ғулгула сола бошлади.

* * *

Бу ташвиш — мактабга боғлиқ эди.

Мактаб очиладими, йўқми, башарти очиладиган бўлса... ўқитувчиларнинг етишмаслигини айтишининг ҳам ҳожати йўқ, бор муаллим ва муаллималар билан бир амаллашга тўғри келади. Бироқ ремонт ишлари нима бўлади? Қишига ўтин-чи?

Гулсум опа, гарчи ўзини «вақтинча директор» деб ҳисобласа ҳам, фурсат ўтган сайин ташвиши ортиб, ахийри Чавандозга учрашишга аҳд қилди. Учрашишдан олдин Азиз домла билан мактабга кирди.

Урушдан аввал бундай пайтларда усталар ва ҳашарчилар тўлиб кетадиган катта ҳовли бўм-бўш, рўпарама-рўпара қурилган иккита катта бино ҳувиллаб ётарди.

Гулсум опа билан Азиз домла кимсасиз синфларни айланиб, синган ойналарни, эшик ва парталарни битта-битта санаб чиқишиди. Уруш бошлангандан бўён мактаб ремонт қилинмагани учун анча иш йиғилган, бу тўғрида гаплашмасдан илож йўқ эди.

Гулсум опа ҳамма гапни бир қоғозга ёзиб олди-да, Чавандознинг олдига кетди.

Қишлоқ совети ҳам колхоз идорасидай катта бойнинг уйида, гузарнинг қаршисида эди.

Гулсум опа икки тавақали дарвоздадан кенг ҳовлига кирганда Чавандоз рўпарадаги бостиurmанинг олдида қора айғирини эгарлаётган қоровул чолга гап уқтириб туради.

Гулсум опани кўриб нимагадир кулимсиради, янги чуст дўпписини пешанасига суреб ва қамчиси билан этигини «чарс-чарс» уриб пешвоз чиқди:

— Э, келинг, Гулсумхон! Аҳволлар қалай?

— Раҳмат, юрибмиз тупроқдан ташқарида,— деди Гулсум опа.— Сиз билан гаплашадиган бир маслаҳатли иш чиқиб қолди.

— Қуллуқ! Мен ҳам сиз билан бир гаплашсам деб юрувдим,— Чавандоз ўзига ярашиб тушган ўсиқ мўйловини силаб, идорага бошлади.— Қани, марҳамат!

Улар олдинма-кетин юриб, қўш деразали катта хонага киришди. Хонанинг шифти ва деворлари кўхсиз, лекин ялтироқ бўёқлар билан бўялган. Ўзиям сертокча, тўрда кўрпа йиғадиган тахмони ҳам бор, фақат ўртадаги катта стол ва граммофонга ўхшаш телефонгина идорани эслатарди.

Чавандоз ҳамон мийигида кулимсираб, тўрдаги чарм қопланган, салобатли креслога ўтиб ўтириди, қамчисини столнинг четига қўйиб, Гулсум опага қаради:

— Хўш, хизмат, Гулсумхон?

— Олдин ўзларидан эшитайлик,— деди Гулсум опа.

— Шунақами?—Чавандоз дўпписини тўғрилаб ва кўзларини аллақандай сузиб:

— Ҳа, битта нозик гап бор эди,— деди ва кулди.— Мабодо гапимизни ерда қолдирмасалар... қуда бўлсанк девдик ўзлари билан!

— Қанақа қуда?—Гулсум опа қошларини чи-мирди.—Бундан чиқди, ўзим билмаган қизим бор эканда?

Чавандоз дўпписини кафтига «чарс» уриб ҳаҳолаб кулди.

— Ҳалиям соддасиз-да, Гулсумхон. Ўзларида бўлмаса, мактаб тўла қиз! Олма отса — қизга тегади. Ўшаларнинг биттасига ўғлимида Ёдгорбекнинг ишқи тушиб қопти, Гулсумхон!

— Ким экан у қиз?

— У қиз... бир томони ўзимиага жиян ҳам бўлади. Фазлиддин оқсоқолнинг қизи... Гулчеҳрамикин исми?

— Гулчеҳра? Ҳали ёш бола-ку?—Гулсум опа бу гап оғзидан қандай чиқиб кетганини ўзиям пайқамай қолди.

Чавандоз дўпписини бошига қўндирапкан:

— Бе,— деди чўзиб.— Нимаси ёш! Баайни етилиб чирсиллаб турибди-ку!

Чавандоз Гулсум опанинг ёш қизлардай «дув» қизарганини кўриб, хуррам жилмайди.

— Билмадим энди. Бир суринтириб кўриш керак, ёши нечада экан? Энди ўзи тўққизинчни битирди...

Чавандоз лабидаги истеҳзали табассуми сўниб, кўзлари қисилди, бурун катаклари пирпираб учди.

— Ёши ўзига етади!— деди қатъий.— Отаси ҳам рози. У ёгини сўрасангиз... Қизингиз ўзиям гаҳ деса учади.— Чавандоз мўйловини силаб кулди.— Ўқиш бўлса ўқийверади-да, мактаб қочиб кетмас ахир!

— Биз турмушга чиқсан қизни ўқита олмаймиз,— деди Гулсум опа.

— Ўқимаса ўқимас!— Чавандоз қовоғини солди.— Гоҳо қизиқ гапларни гапирасиз-а, Гулсумхон. Шу даврда ўқиш кимга керак ўзи? Беш кунлик дунё, ўйнаб қолишин-да ёшлар! Кўриб турибсизки — бугун бор йигит— эртага йўқ. Дилга тупибдими — ўйнаб-кулишсин!

Гулсум опа кўкрагида мавж урган түғённи ичига ютиб, секин хўрсинди:

— Ўзлари топишган бўлса мен нима ҳам дердим. Фақат ёшини айтаман...

— Ҳмм... Чавандознинг дўиг пешанаси бир тиришиб, яна ёзилди.— Ҳўп. Яхши. Ўзларидан эшитайлик? Хизмат?

Гулсум опа столдаги матони тўғрилаб қўйди. Кўнглига тугиб келган гапларини айтиш истаги қолмаган, фақат бу одамсиз иш битмаслигига кўзи етиб тургани учунгина гапиришга мажбур эди.

Бу сафар, Чавандоз қовоғини солиб бўлса ҳам, унинг гапларини бўлмасдан, сукут сақлаб эшитди, кейин:

— Ҳўп, майли, ўйлаб кўрамиз!— деди.

— Ўйлаганингиз яхши-ю, бироқ... ўзингиз биласиз, фурсат кетялти.

Чавандоз қаламни столга ғилдиратиб юборди-да, ўрнидан турди.

— Фурсат кетаётганини мен ҳам биламан, Гулсумхон.— Аммо лекин шунга аминманки, ҳозир ўқиш эмас, фронтни ўйлайдиган маврид. Фронтни ўйлаш

деган сўз — ғаллани ўйлаш деган сўз, пахтани, картошка, пиёз, гўпіт, тухум-сутни ўйлаш деган сўз.

Чавандоз «Гап тамом!» деган маънода қамчисини қўлига олди.

Гулсум опа ҳам секин ўрнидан турди:

— Муносабат бунақа бўлса... мени директор қилиб нима қиласизлар? Ундан кўра бўшата қелинглар!..

Қамчисини қўлида ўйнаб, эшикка томон йўналган Чавандоз бирдан тўхтади.

У Гулсум опани қизлик чоғидан, Аъзам ячейка ошиқ бўлиб юрган даврлардан бери билар, гарчи кўпдан буён суҳбатлашмаган бўлса ҳам, илгаригидан бир поғона тушгандир, деб ўйларди. Йўқ, ўша-ўшалигича қолибди!

— Менга қаранг, Гулсумхон,— деди Чавандоз.— Ячейканинг бошига иш тусишига мана шунақа димоғдорлигу, манманлик сабаб бўлувди.

Гулсум опа, рангидан қояи қочиб, лаблари ингичка қизиққа айланди:

— Мен нима дедим сизга шунчалик ботадиган?

— Нима деганингиз эсингидан чиқдими?

— Бўлмаса нима қилай ахир? Мактабни очамизми, йўқми? Очмасак нима қиласиз мени овора қилиб? Ундан кўра бўшата қолинг!

— Сизни бўшатишадими, йўқми — сизни бу ишга ким тайинлаган бўлса, ўшандан сўранг! Мен ҳозир бу гапларга тобим йўқ. Мен фақат Фронтни ўйлайман. Фронт учун хизмат қиладиган одамман. Вассалом!

— Биз ҳам фронтни ўйламасак, кўкламдан бери пахтазордан чиқмай, бундай қилиб юрмасдик.

— Ҳалиям бўлса шу ишни қилаверинг!

Чавандоз полни гарча-турса босиб чиқиб кетди.

Гулсум опа анчагача турган жойида қозиқ бўлиб қотиб қолди.

Бу «суҳбатдан» кейин Гулсум опа мактабни йиғишириб қўя қолсаммикин, деган фикргача борди-ю, тагин «Бургага аччиқ қилиб кўрпага ўт қўйишдан» бўлмасин деб, Эртоевга учрашишга аҳд қилди.

Эртоевни топиш осон эмас — дам даштта кетиб қолар, дам қўшни колхоз ва қишлоқларда юради.

Ниҳоят, учинчи куни оқшом уни идорадан топди.

Эртоев Инобатнинг кабинетида бир ўзи тик туриб, телефонда гаплашмоқда, тўғрироғи, гаплашиб бўлган эди. Гулсум опа эшикни очганда у қандайдир жуда ҳаяжонланган, шошган бир қиёфада:

— Хўп, хўп, ҳозир етиб бораман,— деди-да, трубкани илди.

Гулсум опа ўтиришини ҳам, чиқиб кетишини ҳам билмай, лол бўлиб турган эди, Эртоев уни кўриб тўсатдан жилмайди:

— Салом, опа, келинг, келинг. Ишингиз борми менда?

— Ҳа, икки оғиз гапим бор эди. Шошиб турганга ўхшайсиз...

— Ҳа, шу... Нима гап эди ўзи?

— Мактаб ишлари. Майда-чуйда бўлса ҳам ремонт қилмай илож йўқ. Энг муҳими — ўтин керак, лампа мой керак.

— Чавандозга учрашдингизми?

— У кишининг эшитгисиям келмади бу гапларни.

— Ноо!— деди Эртоев ва йўғон қора қошларини чимириб, яна жилмайди. Жилмайганда тўладан келган силлиқ юзининг ўнг томонида чуқурча пайдо бўлиб, чеҳрасида болаларга хос ғалати бир маъсумлик бахш этди: Гулсум опа қанча марта кўрган таниш табассум!..

Эртоев қайиш камарига қўлинни суқиб, оқ шоҳи кўйлагининг ғижимини тўғрилади, хром этигини гарчиллатиб столнинг орқасидан чиқди.

— Хў-ўш... шу гапларни эрта-индин гаплашсак қандоқ бўларкин, опажон?

— Шошиб турган бўлсангиз, майли. Шунчаки... фурсат ўтиб кетаётгани учун...

— Бўлмаса бундоқ қиласилик...— Эртоев стол тортмасидан бир варақ қофоз олиб нималарнидир тез ёэди.— Буни Чавандозга беринг. Мен ўзим ҳам айтиб қўяман! Хўп!..— Эртоев қўлинни чўзиб, тагин кулди-да, тез юриб чиқиб кетди.

Гулсум опа унинг фавқулодда яхши муомаласидан кўнгли ёришиб, берган хатини очди:

«Ҳур. Хол. ака!

Бу кишига мактаб масаласида ёрдам беринг. Ҳозир фурсати эмасу, аммо иложи йўқ. Сиёсий масала. Йўлини топинг.

Эҳтр. ила — Эр-ев».

Гулсум опа Барнони бир кўрай деб бухгалтерияга кирди. Барно йўқ экан, бир оз кутди, келавермагач, ўтиришга сабри чидамай, идорадан чиқди.

Қишлоқ ипакдай майин қоронғиликка чўмган. Беғларда, қоп-қора дараҳтлар орасида чироқлар милт-милт қиласди. Терак учидан осилиб турган уч кунлик ой нафис тилла камондай ялтиллайди.

Гулсум опа, ўа ўйлари билан банд, бир-бир босиб борар. Муюлишда хурпайиб турган мажнунтолларга етганда от туёқларининг дупурини эшишиб, ўзини четга олди, тўхтаб қайрилиб қаради.

Ундан йигирма беш-ўттиз қадам нарида от қўшилган извош кўринди. Извошда оқ кийимли иккита одам ўтиради.

Извош муюлишга яқинлашиб қолганда йўртиб келаётган от тўсатдан қадамлаб юра бошлади-да, извошдагилар—уларнинг бири аёл, бири эркак эди—қовушгандай бўлди.

Гулсум опа ижирғаниб юзини тескари бурган ҳам эдики, ёнгинасидан ўтган извошдан Барнонинг:

— Вой, мунча бесабр экансиз, хафа бўламан,— деган сал бўғиқ овози эшитилди-ю, вужудидан ўтчиқиб кетди.

— Сабр қилсак... орзумиз пучга чиқмайдими?— Буниси... Эртоев эди!

— Орзулари нима экан?

— О, нима бўларди, латиф лабларидан битта бўса, холос!

— Ҳоо! Олдин хулқ-авторингизни кўрайлик-чи?..

— Бунақа экан... қўйдан ювоща бўламан, жонгинам!..

Ҳар биридан заҳар томчилаган гаплар секинлашиб бориб эшитилмай қолди. Извош қоронғиликка сингиб кетди...

Гулсум опа бирор бошига тўқмоқ билан ургандай анчагача караҳт бўлиб қолди.

Боя Эртоевнинг бунчалик хушмуомала бўлиши сабабини у эндиғина тушунди-ю, ёзиб берган қоғозини тижимлади. Бутун аламини шу қоғоздан олаётгандай уни майда-майда қилиб йиртиб ташлади. У: «Баттар бўлсин. Куюнишга ҳам аразимайди!» деб дилида Бар-

нога қарши ғазаб уйготишга уринса ҳам, эсига яна Ашрафжон тупшиб, ярасига туз сепилгандай тўлғанди, ўпкаси тўлиб кўзига ёпи келди.

Гулсум опа кечаси билан тўлғаниб чиқди. У ўғлини эслаб бир эзилса, бир Эртоев билан шафқатсиз юлишгиси келар, лекин Барнонинг гапларини эслали билан қалбидаги тугён сув септандай сўнарди қоларди.

* * *

Чавандозга ёзилган буйруқ йиртилган, унга боришининг ҳам ҳожати қолмаган, бир ҳафтадай бери куюниб, талашиб-тортишиб юрган ишлари энди илгариги маъносини йўқотгандай туюлар эди. Бироқ, биринки кундан кейин қишлоқ советидан одам чиқиб, Чавандоз чақираётганини айтганда Гулсум опа яна чидаб туролмади. Ахир, битта Барнони деб, мактаб ёпилсинми? Бу фикр кўнглидаги аламдан устун чиқиб, киришга мажбур этди.

Бу сафар, Чавандоз уни аллақандай маъюс бир қиёфада кутиб олди, кўришар-кўришмас қўзини ундан узиб, қўлидаги қаламини айлантира бошлиди.

— Ўртоқ Эртоевга арз қилган экансиз? — деди сенин.

— Агар буни арз, деб тушунсангиа... билмадим энди...

— Ҳўп, майли! — Чавандоз кўкрагини тўлдириб чуқур нафас олди. — Бу дунёning ишлари ҳеч қаёқча қочиб кетмайди, Гулсумхон, — деди. — Ёлгон дунё депти буни!..

У шошмасдан столнинг тортмасини очди, икки букланган сарғиш қоғозни олиб Гулсум опанинг олдига ташлади.

— Дунёнинг иши шу экан. Военкоматдан юборишибди, на чора?

Гулсум опа юраги шув этиб, қоғозни олишга ҳам мажоли қолмади, фақат аллақандай жавдираф қолган кўзлари кўк сиёҳ билан ёзилган:

«С/с Каря Буляк... Мастуре Рустамовой» деган сўзларга тушгандагина миясида гўё яшин чақнади: «Расулжон!»

Бу фикр, тўғрироги, бу фикрнинг тагида ётган маъно шу қадар даҳшатли ва адолатсиз адики, Гулсум опа азэойи бадани музлаб кетди. Фақат миясининг бир четида нимадир шамчироқдай милт-милт қиласи, ҳамма ўйлари шу ерда «ялт» этиб, шу ерда сўнади. Бу ўйлар негадир Расулжондан ҳам кўра, кўпроқ Мастурага кетар, кўз олдига ҳадеб жазирама дашт, юзини рўмолига ўраб, белини боғлаб олган қизининг ҳорғини чеҳраси, ғам чўккан нигоҳи келади. Тўсатдан, кўз олдига набиралари Фотима-Зуҳра келди-ю, ўпкаси тўлиб, йиғлаб юборди... У рўмолининг учини лабига босиб, товушсиз йигълар, лекин бу йигъи шундай чуқур аламга, шундай ва... ва сокин бир қайғуга тўла эдики, ўзини полга отиб, фарёд чекиб йиғлаганларни ҳам кўрган Чавандоз, бадани жимирилаб кетди.

— Бандалик экан, иложи қанча? Ҳаммага баравар келган улуғ тўй бу, қаддингизни тутиңг, Гулсумхон!..

Гулсум опа, гўё шу гапни кутиб тургандай, шошиб қўзини артди; қўрқибгина қоғозни олди-да, Чавандозга қарамасдан бир-бир босиб чиқиб кетди.

У жўрттага камқатнов кўчалардан, боғлар, экинзорларни оралаб кетди. Моҳира бувининг уйига яқинлашиб қолгандагина ҳозир ойисини кўрса фарёд кўтаришидан қўрқиб, шийпонга бурилди.

Хайрият, одамлар ҳали онқатга чиқмагон, шийпонда эски газеталарни варақлаб ёлғиз Серафима Фёдоровна ўтиради.

Софдил, меҳнаткаш аёл, у уйда ётишга виждони ёр бермай, уч-тўрт кундан бери далага чиқа бошлаган, кетмонга ярамаса ҳам, қизига ёрдамлашишта ҳаракат қиласи, тушки дам олиш пайтларида ҳамшаҳарлари билан суҳбатлашиб ўтиради.

Афтидан, Гулсум опанинг ранги рўйи жуда ўзгариб кетган бўлса керак, Серафима Фёдоровна уни кўриши билан безовталаниб сўради:

— Сиага нима бўлди, Гулсумхон?

Гулсум опа индамасдан қўлидаги қоғозни унга чўзида, ҳолсиаланиб толга суюнди ва қўзини юмди.

У бир неча дақиқа шу вазиятда ўтиргач, қўзини очди, қўлларини тиззаларига ташлаб, ўйланиб қолган аёлни кўрди-да, қўзига ёш олди.

— Нима қилишимни билмай бошим қотиб қолди,

Серафима Фёдоровна, қизимга кандай кўрсатаман буни? Унинг ҳоли нима бўлади?

— Ҳа, ҳа...—деди Серафима Фёдоровна, кейин бир нима эсига тушгандай Гулсум опанинг қўлини ушлади.

— Буни кўрсатиб нима қиласиз, Гулсумхон? Кўрсатманг... Ҳа, ҳа, сира кўрсата кўрманг!— деди у.— Нима керак умидини узиб?

Гулсум опа энтикли.

— Шундоқ қилсаммикин, а? Айтмай қўя қолсаммикин?

— Албатта, шундоқ қилинг. Бу ўзи чалкаш бўлишиям мумкин. Фронтда нималар бўлмайди дейсиз, жонгинам?— деди Серафима Фёдоровна.— Мен ҳам масини кўрганман. Баъзан дом-дараксиз кетганларга ҳам шунаقا чалкаш хабар юборишади. Мана мени олинг. Эрим бедарак кетганига бир йил бўп қолди-ю, ҳали-ҳали умидимни узганим йўқ, жонгинам!

— Тўғри, тўғри. Мен ҳам эшитганиман!..— Гулсум опа шундай қилиш кераклигигагина эмас, бу хабар, Серафима Фёдоровна айтгандек, хато эканига ҳам ишона бошлади.

— Тўхтанг,— деди у яна алаҳсиб,— Чавандозни нима қиласиз? Гап тарқатиб юбормаса эди у!

— Бориб айтинг, овоза қилмай қўя қолсин.

— Тўғри, тўғри, шундоқ қиламан.— Гулсум опа шошиб ўрнидан турди.— Мен ҳозир,— деди у ва кўз ёши аралаш жилмайди.— Раҳмат сизга!— У шошганидан текис ерда қоқилиб-сурилиб югуриб кетди.

Олтинчи боб

Акмал пешана терини сидириб ташлаб, даштга кўз югуртириди.

Кун ботай деб қолган, «Қоронултепа»нинг кўланкаси пастдаги сойни тамом эгаллаган, фақат олисадаги капалар, ўнг қўлдаги ҳали ўроқ тегмаган қизиши буғдой денгизи ипакдай майин товланиб ётипти...

Қўчқор кўринмайди, Машраб эса Акмалдан бир оз нарироқда, қизларга ёрдамлашиш учун бўлса керак, анча жойни эгаллаб, қўли қўлига тегмай ўрялти.

Йигитлар, Комилнинг илтимоси билан ўроққа ўтган кунлари Машраб анча заҳмат чеккан эди. Илгари ўроқ ўриб кўрмаган одам, сира қўли келишмас, буғдойни яхши қамраёлмас, буғдойга қўшилиб янтоқ ва тўнғизатароқ илинар, қўли бир лаҳзада қоп-қора қон бўларди. Мана энди Қўчқор билан Акмалдан қолишмайдиган, ҳатто қизларнинг ўртасига тушиб ёрдамлашадиган бўлиб қолди.

Акмал бир жилмайиб, яна ўроққа киришди. Ўзи қайраб ўткирлаб олган ўроқ унинг қўлида худди сартарошнинг устарасидай ўйнайди. У фир-фир шабадага кўксини тутиб, доим анқиб турадиган иссиқ нон ҳиддини тўйиб-тўйиб ҳидларкан, бутун вужуди яйраб кетади, гўё оғир қўл меҳнати эмас, кишига илҳом баҳш этадиган бир иш қилаётгандай завқ олади.

Аммо буғдой ҳам бўлиб берган: бўйи кўкракка келади, ўзиям, деҳқон таъбири билан айтганда, «тиралиб» қолган, ўрган сайин ўргинг келади... Ўқтин-ўқтинда оёқ остидан, буғдой орасидаги янтоқлар тагидан катта-катта тарвузлар, пичоқ тегмасдан тарс-тарс ёрилиб кетадиган кўкчалар чиқиб қолади.

Бундай пайтларда, илгаридан ҳукм сурган одат бўйича, қовун-тарвузни ким топса дарҳол ҳаммани чақиради, шу заҳотиёқ қиз-жувонлар жўрттага қий-чув кўтаришиб, ёнирилиб келишади, кейин ўроқ билан сўйилган тарвуз-қовунни талашиб-тортишиб ейишади.

Иш шундай шиддатли тус олганки, тушки овқатни Қурбон ота ўзи чеълакларда ташиб беради. О, айрон қўшилган муздай гўжага нон бўктириб ейиш, суюғини шимириб-шимириб ичиш, кейин, оғриқдан без-без қилган оёқларни чўзиб хиёл дам олиш... бунинг гаштига не етсин!. Ҳар куни намозшомда қиз-жувонлар даврасида даладан қайтишлар-чи?

Кундузги оғир меҳнатдан ва жазирама иссиқдан сўнг майин дашт оқшоми тоғ ҳавосидан ҳам хуш ёқим туюлади, қизларнинг маъюс қуйлари эса муҳаббат қўмсаган қалбларни шундай нафис қитиқлайдики, чайлагача бўлган масофа чексиз-чегарасиз бўлса дейди киши, бу ҳазин ва хушоҳанг қуйлар, дам қувноқ, дам мунгли лапарлар тонг отгунча давом этишини истайди.

Фақат ўқтин-ўқтин уруш совуқ нафасини пуркаган кунларда, шўх кулгилар фарёд билан алмасиб, дашт-

ни зир титратади-ю, бу кичик бахтни ҳам кўп кўриб, юракларни минг пора қилиб кетади. Бир-икки кун дашт гўё қора кийиб мотамга чўмади, кейин ҳаёт яна ўз изига тушади — жозибали қўшиқлар, ғамгин ва ўйноқи лапарлар аста-секин даврага қайта бошлади.

Кечалари эса, Комил штабга бригадирларни йиқ-қанда, Қўчкорларни ҳам чақиради. Бригада бошлиқларининг ахбороти эшитидиб, топшириқлар берилиб бўлгач, Комил четлари йиртилиб кетган харитани Машрабга чўзади, ўзи янги газеталарни олиб, «Информбюро» ахборотларини ўқишга киришди.

Энг қаттиқ жанглар ҳамон Курск — Белгород раёнларида давом этади. Лекин душман ҳужумга ўтган дастлабки пайтлардаги таҳлика босилган, энди қайтага Қизил Армия зарба бера бошлаган. Комил «Информбюро» ахборотини ўқиркан, Машраб картадан кичик станицяларгача топиб, қизил қалам билан тагига чизади, Қўчкор билан Акмал эса, қўлга тушган асиirlар ва қурол-аслаҳаларни ҳисоблашади, кейин бу тўғрида мулоҳаза юритишиб, фронтга кетган йигитларни эслалишиб, алламаҳалгача ўтиришади... Эртасига тушки овқат маҳалдами, кечқурумни, Машраб қизларни йиғиб, қисқа ахборот беради, овози ёқимли титраб, Олий Бош Қўмондоннинг озод бўлган шаҳарлар шарафига салют берип ҳақидаги буйруғини ўқиуди...

Умуман, инсоф билан айтганди, ишлар ёмон эмас. Акмал яқинда уйларига ярим қоп қотган нон юборди, энди меҳнат кунига ҳам оз-моз дон тегса керак, ҳар нечук, дадасининг йўқлигини билдирамасликка ҳаракат қиляпти. Фақат бир нарса сал қийнайди, у ҳам бўлса қишлоқни, тўғрироғи, қизларни соғинишади.

Рост, Қўчкор унча парво қилмайди. У даштдаги қизлар билан апоқ-чапоқ бўлиб кетган. Ўзиям кечаю кундуза қиз-келинчакларнинг даврасидан чиқмайди, билса-билмаса қўшилишиб ашула айтади, ҳазиллашади, баъзан уч-тўртласини бирдан қучоқлаб гарамга отади-ю, даштни бошига кўтариб олиша кетади. Ҳатто Машраб ҳам ўқтин-ўқтинда қизларга шеърлар ўқиб берив, уларнинг раҳматларини эшитади. Ёлғиз Акмал қизларга сира яқинлашолмайди. Уларнинг қўшиқларини, шўх қочириқларини эшитганда яйраб кетади-ю, бироқ ўзи тузуукроқ бир гап топиб айтольмайди. Эҳти-

мол, шунинг учундир, Гулчекрани кўп эслайди, чунки бутун қишлоқда у билан илиқ муомала қила-диган биттаю битта қиз... шўх бўлсаям, шу Гулчекра!

Уларниг ғалати муҳаббати бултур ёзда, шаҳар бозорига ўрик олиб кетаётганларида бошланган.

Йўлда, шаҳар яқинидаги сойликка борганларида Гулчекранинг эшаги тўсатдан ётиб қолди.

Хўтигини савалаб пиёда кетаётган Акмал чопиб бориб, қизга ёрдам қилди, кейин бир тепиб, эшагини турғизди-да, юкини ортиб берди. Лекин эшагини тенгандা чап сёғининг бош бармоғи чиқиб кетган экан, қаттиқ оқсаб қолди. Шу-шу Гулчекра ҳам унга жони ачиб, жуда меҳрибон бўлиб қолди. Ҳатто бозордан тужум олиб кечқурун қайтаётганларида тухумнинг сариги билан бармоғини силаб, рўмоли билан боғлаб қўйди. Шундан кейин қизлардан кулгидан бошқа нарса эшитмай юрган Акмал... адойи тамом бўлди-қолди!..

Йўқ, Қўчқор бекорларни айтитти! Гулчекра сал енгилтак ва шўх бўлса-да, ўзи жуда... меҳр-оқибатли қиза. Тунов куни, йигитлар даштга кетаётганларида Гулчекра уни уйларига бошлаб борди, хайрлашаётганларида йўлда ейсиз деб, рўмолчасига иккита зотора нон билан бир пиёла сузма туғиб берди.

— Э, ҳорманглар, йигитлар, ҳорманглар!..

Акмал қаддини ростлаб, овоз келгаян томонга қаради. Ундан беш-олти қадам нарида Эртоев билан Комил турар, уларниг кетида Қурбон ота билан Қўчқор кўринарди.

— Қани, яқинроқ келинглар-чи, азаматлар...

Акмал Машрабга қаради. Машраб ўроғини камарига қистириб истар-истамас Эртоевга томон юрди. Қўчқор ҳам бошини қашиб олдинга ўтди.

Эртоев уларга кулимсираб тикилиб турарди:

— Балли, йигитлар! Мен ҳаммасини эшитдим. Даштга келиб кўп азаматлик қилибсанлар.

— Азамат деб аста айтасизми? Маладес денг буларни, маладес!— Қурбон ота фуражкасини тўғрилаб йигитларга қийғир қараш қилди.

— Тўғри айтасиз, ота, йигитлар ҳам маладес, бу ишларни ташкил қилган Комилжон ҳам. Асти Комилжон раис бўлиши керак эди-я..

— Қўйинг! Кимга керак шу гап? — Комил буни шундай кескин гапирдики, Эртоев сўз тополмай биринки марта томок қириб олди.

У Инобатнинг тунов кунги таъналаридан кейин өндиликда одамларга нисбатан қўйполлик қилмасликка аҳд қилган, бу ерга ҳам йигитлар билан «ярашиш», қолаверса, Комилнинг кўнглига қўл солиб кўриш учун атайин келган эди. Энди маълум бўлишича, ошириб юборганга ўхшайди...

— Камтарлигингиизга қойилман, Комилжон! — Эртоев ясама хушнуд кулди-да, яна жиддийлашди:

— Хулласи калом, раҳмат йигитлар! Райком ва район ижроия комитети номидан, агар истасанглар... Фронтда фашист билан олишаётган қаҳрамон жангчиларимиз номидан катта раҳмат!

У опроқ кафтини чўзиб йигитлар билан битта-битта хайрлашди, навбат Акмалга келганда, тўсатдан Эшмат ака воқеаси эсига тушиб, юраги «шув» этди, кейин:

— Дадангдан... хат келиб турибдими? — деб сўради.

— Келиб турибди.

— Ойинг, укаларинг... тузукми?

— Раҳмат... — деди Акмал.

— Жуда содда, жуда ажойиб одам эди-да, Эшмат ака! — Эртоев оғир хўрсиниб, Комилга юзланди. — Бу йигитга бирор пуд буғдой тўғрилаб бериш керак. Нима дейсиз, ота?

— Зап тўғри иш бўлади-да, ўртоқ Эртоев! Негаким, бой-қулоклар билан олишган пайтларимизда ҳам кўп жонбозлик кўрсатган бунинг отаси Эшматбой!

— Яхши, — деди Комил, — бир пуд-ярим пуд ғалланинг иложини толамиш.

Улар капага қараб кетишли. Қўчқор бошини чайқаб:

— Ие, бу одамгаям инсоф кирибди-ю! — деди ва кулди. — Қани, ўртоқ Эртоевнинг раҳматларини оқлаш учун яна пича ишлайлик!

Машраб индамай ўроқ ўраётган жойига қараб кетди. Акмал ғалати жилмайиб, бирпас хаёл суринг турди!

«Агар... Эртоев айтган бир пуд-ярим пуд ғалла тегса... у ҳам Гулчеҳрага чиройли бир нарса олиб

совға қилади...» Ақмал кўнгли сув ичгандай бўлиб, ўроққа киришаркан, асига дадасининг доим айтадиган гаплари тушди:

— Мехнат қилган хор бўлмайди. Мехнат қил, болам, меҳнат!

* * *

«Ажабо, бу одам... нега тўсатдан бунчалик ўзгариб қолдийкин. Ё қишлоқда бир гап ўтдимикин? Ёки бўлмаса... у аслида ёмон одам эмасу, Машраб уни илгаридан хушламагани учун ёмон одам, деб юрганмикин?»

Машраб энди ўроққа киришган ҳам әдики, олисроқдан:

— Ҳой, қизлар, Барнолар келди, Барнолар! — деган овоз эшитилди.

Машраб тўхтади; Барно... Ү нима қилиб юрибди бу ерда. Э... Эртоев билан бирга келдимикин?»

У ҳайрон бўлиб, яқиндаги гарамга томон бурилди, лекин шу пайт, қаёқдандир ёпирилиб келган бир тўда қиз-келинчаклар уни қуршаб олишди.

— Жон Машрабжон! Сувдан сулуви учрасин — битта шеър ўқиб беринг.

— Битта бўлса бўлди — бошқа сўрамаймиз!

Машраб кийик боласидай кўвлари жавдираб, атрофга қараган эди, нарироқда қўлларини белига тираб турган Кўчкор:

— Ҳой, менга ҳара, шоир,— деди.— Ҳар қалай, девонаи Машраб деган номинг бор, кўп керилавермай, бундоқ бир нима деб юбор ахир!

Одатда гапга аралашмайдиган хом семиз ҳам бу сафар:

— Битта ўқиб берсанг бир жойинг камиб қоладими? — деди хушнуд жилмайиб.

Машраб хижолат чекиб бошини қашиди, кейин, шеър ўқишдан ҳам бурун, Барнони кўриш учун, тuya бўйи келадиган гарамга тармашиб ошиди. Ошди-ю, гарамнинг шундоқ ён томонида турган бричкага кўзи тушиб, юраги ўйнаб кетди.

Бричкада, кўндаланг қўйилган иккита тахтанинг бирида... Муяссар билан Барно, иккинчисида Лариса билан Гулчеҳра ўтирав, улар атрофларини қуршаб олган қизларга шафтоли улашарди.

«Қизиқ: қизаларнинг тўртсави ҳам эгниларида атлас кўйлак, болиларида чуст дўиппя, гўё, даштга эмас, тўйга келгандай ясаниб олишган. Булар нима қилиб юрибди ўзи? Ё Барно билан Эртоев бошлаб келдими-кан?»

Муяссарни кўрганда юраги «жаз» этган Машраб, энди бошига союқ сув қуйилган одамдай ҳушёр тортди, ўқийдиган шеъри эса, гўё аввалдан ўйлаб қўйгандай хаёлига ўзи келди.

— Хўп, қизлар, бўлмаса мени сизларга... шоир Уйғуннинг фронтда юрган жаангчиларнинг орзу-истакларини ифода этиб ёзган «Жафо қилма» деган бир шеърини ўқиб бераман...

Машраб нафасини ростлаб томоқ қирапкан, Барно «ялт» этиб қараганини, Муяссар эса қоплари майин чимирилиб тикилиб қолганини кўрди, овози беихтиёр титраб, бошлади:

«Тарқ этма қадоқатни, хулқингга жафо қилма,
Иzzатни бериб елга, беҳуда сафо қилма,
Умрангни хароб этма ўткувчи ҳавас бирлан,
Ишқ башқа, ҳавас башқа — бу йўлда хато қилма.

Фовур-ғувур бирдан тиниб шундай майин ва осуда бир жимлик чўқдики, гўё гарам атрофидаги қизларгина эмас, бутун бепоён данит Машрабга қулоқ соларди.

Сен сози мудаббатсан, гулшонда гули раъно,
Ишқингни кўча-кўйда юргувчи гадо қилма...
Ноз этма, садоқатли ошиқда тараҳдўум қил,
Кўнглига гараз тўлган номардга имо қилма...

Машраб ҳар тўртликдан кейин бричкага бир қараб қўярди. Муяссар ҳамон қошлари чимирилиб мулоҳим тикилиб туарар. Гулчехра билан Лариса ҳам ундан кўзларини узишмас, Барно эса, биринчи тўртликдан кейинроқ бурун катаклари пирпираб ерга қараб қолган, бир ўрим қўнгир сочини ўйнаган қўллари асабий титрарди. Шу ҳам сабаб бўлдими, бошқами, Машраб башқа шеърга ўтиб кеттанини ўзиям пайқамай қолди:

Ҳижрон тунида дилбар бедуда тўқмагин ёп,
Сабр айлагин, топилгай дардимга чора, ёrim,
Фолиб бўлиб борурман, Уйғун бўлур гувоҳим,
Наҳра ажал фашистин олтак капора, ёrim...

Машраб сўнги мисраларни ўқиркан, Барно эси¹ дан чиққан, назарида бу мисраларни ёлғиз Муяссар учун, унинг кулимсираб турган мулоийим кўзлари, илиқ табассуми учун ўқир, бу билан гўё қалбидаги бутун севгисини, айтмоқчи бўлиб юрган бутун дардҳасратларни гапирав, назарида, қиз ҳам унинг гапларига тушунар, юрак уришини дил-дилидан ҳис этар эди.

У шеърни ўқиб бўлиш билан Муяссарга қараб отилмоқчи эди, бироқ аллақандай ҳазин ўйчанликка чўмиб, қилт-қилт ютиниб қолган ўроқчи қизлар даврасида хиёл тутилиб қолди. Ниҳоят, даврани ёриб ўтиб, бричкага яқинлашганда эса, ғарамнинг орқасига ўтган Барно:

— Бу ёқса қаранг, Машрабжон,— деб қолди.

Машраб нима қилишиби билмай Муяссарга қараганди, аллақачон бричкага чиқиб, отнинг жиловини ўз қўлига олган Қўчқор, кўзини қисди:

— Тезроқ бор, булоқ бўйида кутиб турамиз!— У отнинг бошини чайлага буаркан, Акмалга пўнгиллади:

— Мен еб, сен қуруқ қолгандай нима қилиб турибсан бир четда? Чиқ аравага? Гулчеҳрахон кутиб қолди-я, каллаварам!

...Барно ғарамнинг орқасида олисларга тикилиб турар, нафис қайрилма қошлари чимирилган, кўзлари қисилган эди.

— У куни ундан қилдингиз, бугун бундай... Нима, мендан ололмай юрган қасдингиз борми?

Машраб қути ўчиб:

— Мен нима қилдим сизга шунча тегиб кетадиган?— деди секин.

— Тағин нима қилдим дейсиз... Агар билсангиз... бусиз ҳам ўз дардим ўзимга етади. Тушундингизми?— Барнонинг лаблари титраб кетди— Менга ҳеч ким хўжайин бўлолмайди. Вилдингизми?

— Ҳалиям сизга ҳеч ким хўжайин бўлаётган йўқ...

— Биламан!

— Агар бояги шеър учун шу хаёлга борган бўлсан-гиз... уни шунча қиз-келинчаклар эшилди, бироқ ҳеч кимнинг хаёлига бу гап келгани йўқ. Чунки уларнинг фикр-хаёллари фронтда, урушда юрган ёрла-рида.

Барно, кўзлари совуқ чақнаб, олдинга эгилди.

— Мен фронтни эсимдан чиқариб қўйганимни қа-еъдан биласиз? Уша одам билан... гаплашиб юрганим учуми? Балки биз беғараз, шунчаки дўстларча гаплашиб юргандирмиз?

Машраб бошини эгди.

— Мен акамни ўйладим. Акам... урушда юрган ҳар бир йигитнинг хаёли бу ёқда, ўз севгилисида. Улар ўз ёрларининг илиқ сўзларига муҳтож...

— Мен-чи? Мен ҳам ёшман. Мен ҳам...— Барно бир икки марта ҳиқиллади-да, овози яна кескин янгради:

— Акангиз яхши бўлса... кетимдан айгоқчи қўйма-син!

— Сиз... акамни билмас экансиз! У ҳеч қачон...

— Майли. Билсам билмасам — шу! Ҳеч ким мен-га ҳўжайин бўлолмайди.

Барно шаҳд билан бурилиб, олисда мойчироқлар милт-милт ёнган капаларга қараб кетди.

Машраб хаёлида бир Барно билан баҳслашиб, бир юраги ачишиб, узоқ турди.

Тўсатдан, шундоқ ёнгинасидан:

— Машраб...— деган майин товуш эшитилди.

— Муяссар?

— Ҳа, нима қилди?— деди қиз.

— Йўқ, ҳеч нима...

— Мен кутдим, кутдим — бормадинг....— Муяссар оҳиста кулиб капаларга томон бурилди.

Машраб оғир туш кўриб уйғонган одамдай, бирдан енгил тортиб, қиз билан ёнма-ён кетди.

Ҳали даштга қоронгилик чўқмаган бўлса-да, осмонда илк юлдузлар милтираган, уларни гўё кимдир бирор битта-битта артиб қўймоқда эди.

Машраб қизнинг офтобда куйган мулойим чеҳра-сига тикилиб бораркан, Барно тамом эсидан чиққан, у ҳозир фақат бир нарсани — Муяссарни қўлидан ушлаб ўзига қаратгиси, унинг майин товушини эшигиси ке-ларди.

Лекин қиз кўзларини олис-олислардан узолмай жим бораиди.

У кўпдан бери, айниқса севикли опаси Зебо фронтга кетганидан бери ўзидан аллақандай норози эди. Қишлоқда қилинаётган ишлар қандайдир майда, фронтга нисбатан аразимаган бир нарса бўлиб кўринарди. Бугун биринчи марта бу фикри ўзгарди. Ўнларча қамиш капаларга, от-араваларга, чумолидай қимирланган одамларга тўлган, тўп ҳайдаган болаларнинг қийқириқларидан ларзага келган бу кенг дашт, назарида, катта жанг майдонига ўхшаб кетди-ю, қизни ҳайратда қолдирди.

Ана олисроқда, қандайдир ҳарир қора пардага ўралган капаларда мойчироқлар милтиради, хирмон ёнидаги ўчоқлардан қизгиш аланга кўтарилиди, узоқдан қизларнинг ҳазин хиргойиси эши билди.

— Менга бу дашт, бу буғдор... ҳу анави капалар... жуда ғалати кўриняпти... — Муяссар секин кулди. — Кичкиналигимда, дадамлар билан отга мингашиб, қовун сайилга чиқардик. Ўшанда ҳам шунаقا қамиши капалар бўларди, одамлар кечалари гулхан ёқишиб, сұхбат қуришарди. Мен бўлсан эски жангномаларни эслардим...

— Ҳа, ҳа, мен ҳам эслайман қовун сайлини,— деди Машраб қувониб.— Урушдан олдин... Эшакларга, туяларга миниб чиқардик. Тонг палла уйғониб, дирдир титраб, полизга тушардик... — У чеҳраси ёришиб, Муяссарга қаради ва секин қўшимча қилди.— Бу ер, қовун сайли эмас албатта...

— Биламан, қийин,— деди Муяссар, сўнг овози ўзгариб давом этди.— Болаларга бош бўлиб яхши исплар қиляпган эмишсанлар, эшидик...

— Бизни қўявер,— деди Машраб, яйраб.— Ўзингдан гапир. Қаёқдан келяпсанлар? Даشتга шунаقا ясаниб келдиларингми?

Муяссар кулди.

— Ҳалиям тушунмадингми биз қаёқларга борганимизни? Биз... Госпиталга, ярадорларга бир арава қовун олиб бориб бердик!

Муяссар қоронғида кўзлари ялт-ялт чақнаб госпиталга қандай кириб борганларини, севиниб кетган ярадорлар, ҳамшира қизлар, врачлар ўз қовунлари

билин ўзларини меҳмон қилганинни ҳикоя қилиб берди.

— Мана, ҳандалак бўлмасаям, ишқилиб...— Муяссар шундай деди-ю, бирдан дудуқланиб қолди.— Ушанда, нега шундай қилдинг-а?— сўради у.

Машраб юраги бир ҳаприқиб тўхтади.

— Наҳот... Наҳот мен бу ишни нима мақсадда қилганимни билмасанг?

Қиз жавоб бермади. Лекин у ҳам кутилмаган бир нарсани сезгандай, нафас олишга қўрқиб индамай қолди.

— Мен ахир... сени деб, сени бир хурсанд бўлсин деб қилувдим бу ишни! Нега десанг, ўша куни эрталаб, боғларингнинг ёнидан ўтаётиб әшитиб қолувдим. Сен...

— Қўй... индама!— деди Муяссар.

У бутун ҳақиқатни эндигина тушунган, тушунгани ҳам қўрқиб, ҳам севиниб кетганди.

Машраб юрагида кутилмаган бир журъат сезиб, Муяссарни секин ўзига тортди.

Бир секунд лабида қизнинг чўғдай иссиқ, лола баргидай майин лабларини сезиб, уни қаттиқроқ қу-чақламоқчи бўлди, бироқ қиз тўсатдан қушдай ти-пирлаб оғушидан чиқди-да, тескари бурилиб пиқ-пиқ йиглаб юборди.

Машраб ҳушёр тортди, эсанкираб:

— Муяссар,— деди.— Менга қара, Муяс...

Қиз жавоб бермади. Кафтларини юзига босганича олисроқда қорайиб кўринган капаларга томон чоп-қиллаб кетди.

Машраб тиззалари қалтираб гарамга чўзилди. У, гарчанд дағаллиги учун ўзидан ижирғанса ҳам, бир нарсани аниқ сезди — Муяссар ҳам уни севади!..

Қаёқдадир яқиндан, гарамнинг шундоқ орқасидан Қўчқорнинг овози келди:

— Нима бўлди, гаплашдингми Гулчеҳра билан?

— Қандоқ гаплашаман?— деди Акмал.— Атро-фифа парвона бўп қолди-ю аканг Ёдгорбек!

— Э-э, латта!— деди Қўчқор.

Улар Mashrabning ёнгинасидан капага қараб ўтиб кетишди.

«Ёдгорбек? Парвона?»— деди Mashrab, лекин бу гапнинг маъносига тушунмади.

Муяссар, жонгинам!

Унинг хаёлига ҳеч нарса кирмас, шу топда бутун даштни қучишігі тайёр, ўзиям жағонда әнг бахтли йигит әди.

* * *

Қалам билан ёэилган бир варақ хат қайта-қайта үқилавериб, ёд бўлиб кетди.

«Азиз ўғлим Қўчқоржон!»

Хат ёзган экансан, олдим. Сендан хат келган кун мен учун мисоли бир байрам бўлди. Раҳмат, болам.

Шу кунларда мен бир юмуш билан бир ёқларга кетялман, қачон қайтаман — буни ҳеч ким билмайди.

Азиз фарзандим! Мен сендан кечирим сўрашим керак әди. Лекин бўлари бўлиб, бўёғи сингандан ке-йин энди гуноҳимга иқрор бўлиб, ё аксинча, айни бошқаларга тўнкаб, сендан кечирим сўраб ўтиришни эп кўрмадим. Ўйлайманки, ҳамма нарсага вўлинг етади... Фотима ёшлик қилди. Мен бўлсан... Мен уни жуда яхши кўрардим. Хуллас, шу иш бўлди.

Хатингнинг бир жойида: «Мен Сиздан фахрланаман, дада!» дебсан. Қайдам, бирорларга зарда қилиб ўз фарзандининг бошини силамаган ота... фахрла-нишга лойиқми, йўқми — буни ўзинг биласан, болам. Менинг сендан битта-ю битта тилагим — доим пок бўлишингни истардим. Шу юртим деб, ҳалқим деб, унинг бахт-саодати деб яшаингни хоҳлардим, чунки инсониятнинг энг яхши фарзандлари шу мақсад билан яшаган, шу мақсад деб, мана, не-не, одамлар ҳатто жонини ҳам аямаялти...

Хайр, саломат бўл, ўғлим, дийдор кўришиш умидида

отанг Қилич.»

10 август, полевая почта 92625 «Р».

Кечадан бери Қўчқор камида ўн марта ўқиб чиқ-қандир бу катни. Ахири сўзлар тугул нуқталаригача ёд бўлиб кетди. Лекин ажабо: ҳар ўқиганда янги бир нарса топгандай бўлиб, кўнгли аллақандай ёришиб кетади. Фақат бир нарса — «Шу кунларда мен бир

юмушга кетяпман. Бу юмушдан қачон қайтаман — буни ҳеч ким билмайди, ўғлим...» деган жойларигина кўнглига ғулгула солади, хаёлида ғамгин ўйлар уйғотади.

Оқшом Комил тушунтириб берди: отлиқ қўшинлар кўпинча душманинг орқасига ўтиб, ўша ерда ҳаратат қиласди. Афтидан, Қилич аканинг «юмушга кетяпмиз» дегани ҳам фронт орқасига ўтиб жанг қиласмиш дегани бўлади...

Шу-шу, Машраб иккиси ярим кечагача минг хил хаёлларга бориб, гаплашиб ётишди. Хом семиз одатдагидай пишиллаб ухлаб қолди. Машраб эса худди ўз отасидан фахрлангандай фахрланиб, Қўчқор севинса севиниб, қайғурса қайғуриб ётди.

Қўчқорга энг оғир ботгани — ҳар сафар хатни ўқиганида отасини совуқ қарши олгани эсига тушарди. Тушарди-ю, ич-ичидан эзилиб кетарди.

Мана бугун ҳам Қўчқор кўнглига қил сиғмай, ишдан қайтган заҳоти ётиб қолмоқчи эди, лекин капага қайтиб гўжаларини ичар-ичмас, уларни штабга чақириб қолишиди.

«Штаб», деб аталган таниш капада Комил ўнг қўли билан ярадор қўлинни оҳиста силаб, фонарь ёргугида ғиманидир ўқиб ўтирас, «Информбюро» Сайд пакана ҳам негадир шу ерда эди.

— Э, келинглар, келинглар,— деди Комил ва дабдурустдан:— Қалай, лочинлар, разведкага юборсан борасанларми?— деб сўради.

Машраб «разведка» сўзини эшитиб юраги ўйнаб кетди:

— Сиз юборасиау, биз йўқ деймизми, Комил ака!

Акмал хом семиз ҳам узун қийғир бурнини бир томонга қийшайтириб кулимсиради. Ёлғиз Қўчқор бир Комилга, бир «Информбюро»га қараб:

— Қанақа «разведка» ўзи?— деб сўради.

— Разведка деганим шуки... Эшак карвондан талон-торожнинг ҳиди келяпти. Ҳар куни бир қоп буғдой гумдон бўлаётган эмиш.

— Ҳар куни бир қоп буғдой?— Қўчқор сапчиб тушди.— Ким қиляпти бу ишларни?

— Ким бўларди?— бурчакда ўтирган «Информбюро» сакраб турди.— Ўша карвон боши Ёдгорбек акам-

лар билан Эшвой акамларнинг иши-да! Дадавой шил-қимни йўлдан уришган. Ҳар куни шаҳарга яқинлашдик дегунимча у киши орқада қоладилару, ўзларини тор кўчага урадилар. Узоқ куни у ёқ-бу ёғини суриштириб қолувдик: ўзларингга ҳар куни биттадан нон ёптириб берамиз, деб жавоб қилдилар. Биз: нонни хирмондан оляпмизу, буниси қанақа нон, деб суриштирувдик, Ёдгорбек акамлар:

— Ўзларингни билларингу, бошқаларни ишига суқилавермаларинг! — деб силтаб ташладилар.

— Аблаҳлар! — деди Машраб.

Қўчқор қўлини силтади:

— Эҳ! Ўртада ойим бўлмаганда-ку, ўзим билардим нима қилишимни!

— Демак, сен бормайсан разведкага? — деди Комил. — Бир жиҳатдан бормаганинг ҳам маъқул.

Қўчқор индамади. Комил тузган «жанговор план» бўйича йигитлар тун ярмида йўлга чиқишадиган, «Информбюро» айтган ҳовлини топиб, «эшак карвон» боришини пойлаб ётишадиган бўлди. Қўчқор Машраб билан Ақмалга оқ йўл тиларкан, қўли киссасидаги хатга тегиб кетди-да, чидаб туролмади:

— Тўхтанглар. Унақа қариндош керак эмас менга. — деди тўсатдан ва кулди. — Мен бормасам адашим Қўчқор Турдиевнинг юзига қандай қарайман?

Разведка!..

Уруш йиллари бу бир оғиз сўзни эшитганда юраги жизилламаган, вужудини титроқ босиб, кўзлари чақнамаган бирорта ўспирин бўлганмикин оламда? Партизан қиз Таня билан Аҳмаджон Шукуронинг ажойиб ишларини эшитиб ҳаяжонга тушмаган, ўшалардай бўлишни орзу қилмаган бирорта ёш йигит бўлганмикин Машраблар авлодида?.. Бу пок, ажойиб ўспиринлардан, уларнинг соддалигидан, қаҳрамон бўлиш истагидан кулиш мумкин бўлса мумкинdir, лекин уларга қойил қолмасдан илож йўқ!

Шаҳар боғлари элас-элас кўзага чалинганда осмон ҳали юлдузга тўла, дашт қоронғи эди.

Улар эшакларини шаҳар четидаги сойда қолдиришиди-да, у ёғига пиёда кетишиди.

Информбюронинг тасвирилашича «ўғрилар макони» биринчи тор кўчадаги учинчи ҳовли бўлиб, олдидан

бир ариқ сув оқиб ўтади, ариқ бўйида катта чинор ўсади.

Мана, ўша тор кўча. Мана, ҳовлидан оқиб чиққан бир ариқ сув, сув бўйида юлдузларга қўл чўзган азим чинор! Унинг шохлари шундай тарвақайлаб кетганики, кўча тугул, ҳовлини ҳам ўз қанотлари остига олган!

— Ҳозир!.. — Қўчкор майин тупроқда мушукдай товушсиз одимлаб бориб пахса девордан мўралаб қарди, кейин Машраб билан Акмални четга тортиб шивирлади:

— Ҳовлининг ярми бедазор экан — иккита катта гарам турипти. Айвоннинг олдида қулинг ўргилсин пашшахона, пашшахонада хурракни отиб ётишипти хумпарлар!

— Хўш? — деди жом семиз тоқатсизланиб. — Кўп валдирамасдан лўнда қил гапни: бу ёги қандоқ бўлади?

— Бу ёги... Мен пашшахонанинг ёнгинасидаги гарамга кириб ётаман. Сен... хоҳлассанг чинорга чиқ, хоҳлассанг нариги гарамга бекин, Машраб...

— Чинорга мен чиқа қолай, — деди Машраб.

— Бўлти!..

Қўчкор бир сакрашда деворга миниб, кўздан ғойиб бўлди. Машраб Акмалга елкасини тутиб берди, сўнг унинг ҳовлига «урс» этиб йиқилганини эшишиб бир сапчиб тушди: «Уйготиб юбормаса эди қўпол!»

Йўқ, хайрият, ҳеч ким сезмади шекилли, шитиршитирлар тиниб, ҳамма ёқ тагин сукутга чўмди.

Машраб ерга тегиб турган йўғон шохга тармашиб юқори чиқди. Баландроқдаги айри шохга чиқиб ўтишаркан, беихтиёр жилмайиб қўйди: «Мана бунаقا бўпти разведкачи деган!»

Улар айни пайтида келишибди. Юлдузлар биттабитта сўниб, уфқ оқара бошлади...

Машраб ўтирган жойдан, агар тўсиб турган шохлар сал очилса, бутун ҳовли кафтдай кўринади. Гарамлардан «шитир» этган товуш эшитилмайди, фақат бостирма томонда ёнбошлаб ётган тарғил сигирнинг кавш қайтариши қулоқка чалинади.

Ариқ бўйидаги пашшахонада кўрпага ўранган иккодам гумбаздай дўппайиб ётипти.

Сал ўтмай ҳовли тагин ҳам ёришиб қолди. Пашша-

хонадаги «гумбаз»ларнинг бири қимирлади, кўрпа очилиб аёл кишининг ярим яланғоч танаси кўринди.

Машраб юзига аланга ургандай кўзини бир юмиб қайта очди. Қараса, аёл эгнида атлас кўйлак, оёғида амиркон кавуш, енгларини билакларигача шимариб юзини ювияти.

Ювиниб бўлгач, жувон пақирни тиазалари орасига олиб, «шиғ-шиғ» сигир соғди, кейин уйдан катта оқ самовар олиб чиқиб олов ташлади, ниҳоят, айвондаги кўзгунинг олдида тўхтаб, гажакларини тўғрила-гач, пашшахонага келиб, ҳарир парданинг четини кў-тарди.

— Нима бало, бугун девдай ухладиягиз? Тура қо-линг, жонгинам!

Жувон әркаланиб, иккинчи «гумбаз»нинг кўрпаси-ни тортувди, тўсатдан юм-юмaloқ, қип-яланғоч бир одам тез ағдарилди да, аёлни белидан қучоқлаб олди:

— Бирлас кўрпага киринг, акаси гажагидан!

Гажакдорни қучоқлаб олган яланғоч одам — тар-вуздай юмалаб юрадиган Эшвой бақалоқ эди!

Аёл қийқириб кулиб, унинг қучогидан чиқишига ин-тилиб кўрди, лекин Эшвой бақалоқ қўйиб юбориш у ёқ-да турсин, уни ёстиққа ағанатиб, лабларидан, юзла-ридан «чўлп-чўлп» ўпа бошлади.

— Вой ўлай, эзвордингиз! Хотинчангиз бир кўрса эди бу қилиғингизни! — гажакдор шундай деб кулди-да, тўсатдан бир толпиниб, бақалоқнинг қучогидан чи-қиб олди.— Пашшадай ёпишавермасдан ўрнигиздан туринг, ҳозир эшак карвонингиз ҳам етиб келади.

Аёл этакларини тўғриларкан, сўради:

— Айтмоқчи, ўрани нима қиласиз? Молхонадагиси тўлиб қолди-ку, ёндан ковлайсизми?

Бақалоқ бўйини қапиб эснади:

— Қўйинг шу гапни, акаси гажагидан! Бугун қўл-ларидан бир пиёла май ичиб, пича яйрайлик энди!

— Яйрайман деб, келадиган буғдоини қаёққа тўка-сиз, жоним?

— Э, бир қоп буғдоига жой топилар бу ҳовлидан!— Бақалоқ ён-верига қаради,— бугунча ана у гарамнинг тагида турса ҳам бўлади!

— Ҳеч қўрқмайсиз-а, тавба қилдим!— деди гажак-дор ва кўзларини қисиб, муғамбirona кулди.— Менга қаранг, Эшмат ака!

Илжайиб турган бақалоқ бирдан қовоғини солди.

— Ҳа! Эшмат акани эсга солсам дод дейсиз-а? У бечора...

— Бас!

— Тавба қилдим, Эшвой ака.

— Ҳа, гап бунақа бўпти! Ишқилиб, хўжайин омон бўлсинлар!

— Хўжайин эмиш! — жувон сурма қўйилган кўзларини нозли сузиб, қиё боқди.—Шу ошнангиз бирам ёмон, бирам ёмонки!..

— Уртоқ Эртоевми? Ҳа, дўндиқча кўрса қўймайдиган хилидан, аплаҳ.

— Қуриб кетсин! — деди жувон.— Кўзлари бирам суқ, бирам суқки, кирсам ҳам қадалади, чиқсан ҳам!

Бақалоқ хурсандлигини ҳам, аччиқланганини ҳам тушуниб бўлмайдиган бир товушда:

— Аммо лекин, ўзлариям ҳадеб қиё боқавермасинлар,— деди.— У киши кетворган битта жононни қўлга олганлар. Тайёргарлигинизни қўриб қўйинг — шу кунларда ўшани етаклаб кеп қоладилар... Битта айш қиласиз жуфт-жуфт бўлиб!..

Машраб бу иккисининг бепарда қочириқларини вшитаркан, бир совуқ терга тушар, бир иссиқ аланга уриб, вужудини ловиллатарди. Фақат Эшвойнинг сўнгти сўзларини эшитгандагина юрагига бир нима қадалгандай бўлиб, ачишиб кетди.

— «Наҳот Барнони айтаётган бўлса?.. Наҳот Эртоев бу муттаҳам билан алоқада бўлса?..»

Машраб Эртоевнинг тунов кунги меҳрибонликлари эсига тushiб, хаёли тўстўполон бўлиб кетди.

Бақалоқ ювинди, артинди ва сержун кўкрагини ишқалай-ишқалай қаршидаги меҳмонхонага кириб кетди, унинг кетидан самовар кўтариб гажакдор ҳам ўтди-ю, ҳовли сукутга чўмди.

Уфқдан балқиб, чараклаб чиққан ёз қуёши бир зумда найза бўйи кўтарилиб, ҳовлига гўё иссиқ симоб бўлиб қуийилди. Яхшиям ўйнашлар меҳмонхонага кириб кетишид-ю, Қўчқорларга личанни очиб нафас олиш имконияти туғилди.

Эшак карвонни, табиий, биринчи бўлиб Машраб кўрди.

Карвон шаҳар четидаги боғларга яқинлашганда олдинда келаётган отлиқ (у Ёдгорбек эканини Машраб

узоқданоқ таниди) йўлни чангитиб бошқалардан ўзиди кетди.

Эшвой карвонни барвақт келади, деб ўйламаган бўлса керак, Ёдгорбек чинор тагида тўхтаб, эшикни ҳоқиқиши билан ичкаридан югуриб чиқди, энтикиб сўради:

— Ҳа, тинчликми, намунча кўзларинг бежо?

Ёдгорбек пешанасидаги терларини сидириб ташлаб илжайди:

— Тинчлик, ака, тинчлик. Парткомимиз барвақт ҳайдади, икки марта қатнайсанлар, деб!

— Жуда соз!— деди бақалоқ.— Ҳўш, сен отни чинорга қантаргину, карвоннинг олдига тушиб кетавер. Аммо лекин, маладес йигитсан! Ўзиям тўйингни жа гуллатадиган бўлдик-да, акаси!

Уйдан чиққан гажакдор кўзини сузуб кулди:

— Базмини ўзим қизитаман худо хоҳласа!

Ёдгорбек бу гаплардан сарёғдек эриб, ҳадеб жилмаярди.

Афтидан, Машрабларнинг разведкага чиққанини ҳеч ким билмаса керак, эшак карвон одатдагидай кўча чангитиб, шовқин-сурон билан чинор ёнидан ўтиб кетди. Ёлғиз «Информбюро» у ёқ-бу ёққа аланглаб, кўзлари жавдираб кимнидир қидиради.

Эшак карвон ўз тўзонига ўзи кўмилиб муюлишда ғойиб бўлганда дашт томондан эшагини «қиҳ-қиҳлаб» яна бир бола кўринди. Эшикда дарҳол яна Эшвой пайдо бўлди.

— Кўп ағраявермасдан тезроқ бўл, такасалтанг!— деди-ю, эшак ҳовлига кириши билан эшикни шартта ёпиб олди.

Ундан кейинги воқеа шу қадар тез содир бўлди, Машраб ҳатто чинордан тушишга ҳам улгурмай қолди.

Эшак ҳовлига кириши билан Эшвой тўрт ярим, балки беш пуд келадиган қопни даст кўтариб кўксига олди-да, тиззалари қалтираса ҳам тўхтамай, Қўчқор ётган гарамга қараб зипиллаб кетди. Гарамга ундан олдин етиб борган гажакдор беданинг орасини оча бошлигар ҳам эдики, тўсатдан:

— Тўхта, муттаҳам,— деган бўғиқ овоз эшитилдида беш-олти боғ бедани бошига кўтариб, Қўчқор чиқиб келди. Унинг овози ҳали босилмасданоқ, иккинчи гарамда худди шу йўсинда Акмал отилиб чиқди. Иккиси ҳам афт-англорлари чанг-тўзон, уст-бошлари беда

япроқлари билан қопланыб, шундай ваҳимали кўринардиларки, ўйнашлар баравар «дод» солиб йиқилиб тушишди. Эшакни ҳайдаб келган бола эса ўзини кўчага отди.

Маҳалладан уч-тўртта гувоҳ тўплаб «акт» тузишга ҳаммаси бўлиб ярим соат фурсат кетди. Бу ўртада Акмал сойга бориб эшакларни ҳайдаб келди. Яна чорак соатдан кейин, ўрадан топилган тўрт қоп бугдойни ёшакларга юклаб ва «асир тушган» бақалоқнинг қўлларини орқасига боғлаб, Қатраободга равона бўлишди.

* * *

Йигитлар Қатраободга пешинда етиб боришди.

Штабда ҳеч ким йўқ. Комил қишлоқдан келган бошлиқларни ўроқчилар томонга бошлаб кетипти.

Йигитлар Эшвойни қоровулларга топшириб, гарамнинг панасида овқатга киришдилар.

Қўчқор гўжани косаси билан кўтараркан, одатдагидай Машрабга тегишди:

— Ву дейман... севикли кеннойинг ўртоқ Эртоен билан дон олишиб юрганга ўхшайди-ю, девона, боя пай-қадингми?

Машраб, чайнаб турган нони томогига тиқилди, сўнг Барнонинг гаплари эсига тушиб:

— Нима ишинг бор сенинг? — деди қалтироқ босиб. — Билганини қилсин! Тушундингми? Бу гапни бир айтдинг бўлди! Агар яна айтадиган бўлсанг...

У, хирмон томондан келаётган Мастиурини кўриб, жим қолди.

Мастиура, ёнбошида таниш аптечка, Йигитларнинг ёнига келиб ўтирди, бир Машрабга, бир Қўчқорга қараб:

— Ҳа, тинчликми? — деб сўради.

— Тинчлик... — Машраб кўзини олиб қочди. — Қабидан келяпсан?..

— Учинчи бригададан. Биттасининг қўлини ўроқ кесиб кетган экан, ўшанга борувдим. — Мастиура укасиға аллақандай термилиб қаради-да, секин қўшимча ҳилди:

— Бугун кечаси... ғалати туш кўрибман. Поччанг бир оёғидан айрилиб, қайтиб келганимish. Қайтиб кел-

ганмишу, менинг даштга кетганимни эшитиб, аччиғи чиққанмиш...

Муяссар қизариб кулди.

— Е хат-пат келдимикин қишлоқقا?

Унинг сўзи оғзида қолди, чунки шу пайт, ўз гўжасини ичиб бўлиб, яна бир коса сўрайман, деб ошпаз опанинг олдига кетган Қўчқор чопиб келди.

— Ҳани, юр, девона, келишапти!

Қўчқор бунчалик талвасага тушиб қолганининг сабабини Машраб ғарамга боргандагина тушунди.

Ғарамга томон келаётган Комил билан Қурбон отанинг ёнида... Чавандоз ҳам бор эди!

Чавандоз қишлоқ советининг машҳур қора айририда бир томонга қийшайиб «Ўртоқ Чапаев»га гап уқтириб келарди.

Комил йигитларни узоқдан кўрганидаёқ юмалоқ юзидағи кулгичлари ўйнаб сўради:

— Қалай? Буйруқ бажарилдими, ўртоқ разведкачилар?

Машраб, юраги турс-турс уриб, Қўчқор билан Акмалга юзланди. Ҳом семиз оғзи қулоғида, жилмайиб турар, Қўчқор эса, ранги девор, ер остидан Чавандозга тикилиб қолганди. Машраб, четдан қараганларга галати туюлишини сезмасдан, қаддини роз тутиб олдинга ўтди, қўлини чаккасига қўйиб рапорт берди:

— Ўртоқ командир! Разведкачилар буйруғингизни шараф билан бажаришди! Үгрилар қўлга олинди...— У нафаси етмай, энтикли.— Тўрт қоп бўғдой ўлжа бўлди. Үгриларнинг биттасини асир олдик ва штабга топширдик!

Комил, ярадор қўли кўксида, мулоим кулимсираб турилти, «Ўртоқ Чапаев» қўлини катта фуражкасига қадаб қотиб қолган, Чавандоз ҳайрон.

— Яшанглар, азаматлар! Ниҳоят,—деди Комил ва қўзини қисиб сўради:

— Ўгриларнинг яна бири қаёқда? Тутқич бермадими?

— Яна бири...— Машраб Чавандозга кўз қирини ташлади.— Яна бирори, ўзингиз биласиа,— Ёдгорбек акамлар Заготзернога кетганлар,— деди беихтиёр дудугланиб.— Бўғдойни топшириб келсинлар, кейин...

Эгарда чапаниларча қийшайиб ўтирган Чавандоз бирдан қаддини ростлади.

— Нима? — деди қўалари ўйнаб.— Ёдгорбекка ни-
ма бўпти?

Машраб беихтиёр бошини эгиб:

— Ўғлингиз Ёдгорбек... буғдой ўғирлаётган жойи-
да қўлга тушди,— деди секин.

— Қўлга туширган ким? Сенми?

— Мен!— Машраб билмай қолди: бу гапни жўрт-
тага айтдими ё бехосдан оғзидан чиқиб кетдими.

— Тўхта, тўхта, нима дединг? Ҳали сен... ёт ун-
сур... Менинг ўғлимни ўғриликада айблайдиган бўл-
дингми? Сен-а?

Устма-уст қамчи еган айғир бирдан аччиқ кишинаб
осмонга сакради, икки оёғи билан ер ковлаб жойида
ўйнаб қолди.

— Тўхта!— Машраб яна билмай қолди: буни Қўч-
қор қичқирдими ё Комилми, ёки бўлмаса иккаласи
бараварми. Фақат шунисини аниқ биладики, осмонга
сакраган отга биринчи бўлиб Комил ёпишди. У ҳатто
отнинг жиловини ушлаб, осилиб қолди, бироқ тагин
қамчи еган айғир ўзини орқага ташлади-ю, Комилни
четга отди. Бу сафар жиловга Қўчқор ёпишди.

— Тўхтанг, дада! Урсангиз мени уринг!

— Йўқол кўзимдан! Сендақа ўғлим йўқ, дайюс!
Оқ қилдим, сендақа муттаҳамни, оқ!

Биринчи қамчи Қўчқорнинг елкасига тушиб, кўйла-
гини «чарс» йиртиб юборди. Бироқ иккинчи ва учинчи
қамчилар яна отнинг бошига тегиб, у қайта осмонга
сапчиди-ю, Қўчқорнинг қўлида узилган нўхта қолди.

Лекин Холматни бекорга «чавандоз» демаганлар.
Гарчи айғир, нўхтаси уэилиб, югани оғзидан чиқиб кет-
ган бўлса ҳам, капа атрофини гир айланиб, бошини
уриб келди, кейин узангига сёқларини тираб, қамчиси-
ни ҳавода ўйнатди.

— Менинг ўғлимга осилганча, бориб поччангнинг
азасини оч! Қорахат келганига бир ҳафтадан ошди-ю,
тарала ўедод қилиб юрибсанлар бу ёқда!

— Бас! Мунча тош меҳр бўлма, бас!

Машраб «ялт» этиб қаради. Қурбон ота катта фу-
ражкаси бошида қалтираб айғирга томон тўғри юриб
борарди.

— Тўхтанг, ота! Агар... шунинг қўлида ўлсам...
мен ўлай!— Машраб, икки қўли мушт, отга томон
ташланди. Аммо Маствуранинг:

— Машраб... Машраб... жон! — дея инграганини ёшитиб яна тўхтади.

Мастура кўзлари юмуқ, юзи ганчдан ясалгандай оппоқ толнинг тагида, ошпаз хотиннинг қўлида беҳуш ётарди.

Машраб, аъзойи бадани муалаб, орқасига чопди.

— Мастура ола!

Мастура кўзини очди, бир секунд, балки бир секунднинг ўндан бирида, нима бўлаётганига тушунолмагандай гарангсиб қолди, сўнг қорахатни эслаб, кўзлари кечаси ёнган гулхандай қуруқ ялтиллади.

— Расулжон ака!.. — деди-да, яна ҳушидан кетди.

Машраб жонҳолатда уни қучоқларкан, қулогига кимнингдир:

— Сув, сув! — деб қичқиргани ёшитилди, назарида, бутун даштни ўт олгандай туюлди: — Сув, сув!..

* * *

Райком бюросига одам шунчалик кўп келдики, биринчи секретарнинг хонасига сиғмасдан, катта залга кўчишга мажбур бўлишди.

Бюронинг кун тартибида битта масала — давлатга ғалла топшириш бўйича қўшимча мажбурият олиш эди. Сўнги бир-икки ҳафтада аксарият колхозлар учинчи бор қўшимча мажбурият олишди. Шунинг учун биринчи секретарь бюро бошланишидан олдин Эртоевни ўз кабинетига чақириб гаплашди, қўшимча мажбурият олиш тўғрисида биринчи бўлиб гапиришни, умуман шу масалада ташаббус кўрсатишни зиммасига юклади.

Эртоев унинг топширигини бошини бир томонга сал эгиб, солдатчасига ғоз туриб ёшитди: модомики, биринчи секретарь бу мастьулиятли ишни унга юкламоқчи экан, демак у ҳақда фикри чакки әмас, демак, чеккан машаққатлари, жон куйдиришлари беҳуда кетмаган!

Эртоев биринчи секретарнинг олдидан чиқди-да, шу заҳотиёқ ўз қарамоғидаги колхоз раҳбарларини бошқа хонага таклиф қилиб, агитацияни бошлаб юборди.

Эртоев кутгандай, бу гап, гарчанд ҳеч кимни хушнуд қилмаса-да, ортиқча эътироҳ ҳам түғдирмади. Фақат битта нарса — буни кутилмаганда Қомил ўртага

ташлади-ю, Иnobат ҳам қўллаб чиқди — уруғлик масаласи сал ўйлантириб қўйди, чунки талаб қилинаётган қўшимча мажбурият топширилган тақдирда, колхозлар меҳнат кунига бир нима бериш у ёқда турсин, уруғликсиз қолиш хавфи муқаррар эди.

Бу гапнинг учи чиқар-чиқмас қолган раислар ҳам илиб кета бошлаган эди, Эртоев шартта бўлди:

— Бўлмаган гап! Ким айтди давлат колхозларни уруғликсиз қолдиради деб? Бу тўғрида сўз ҳам бўлиши мумкин эмас!

Шу билан маслаҳат тугади-ю, бурио бошланиши билан биринчи бўлиб Эртоев сўзга чиқди. У жуда ёниб, қайнаб гапирди ва сўзининг охирида ўз ихтиёридаги колхозлар номидан қўшимча қарийб бир ярим минг пуд галла топшириш мажбуриятини олди.

У, ўз нутқидан мамнун, биринчи секретарнинг ўнг томонидаги бўш стулга бориб ўтирди. Энди фақат бошқалар чиқиб унинг нутқини қизғин қувватлаши, ҳар сўзда бир «ўртоқ Эртоев жуда тўғри таклиф киритганларини» қайд этиб, қўшимча мажбурият олишлари ѹолди, холос. Лекин бу сафар нима бўлди-ю, мажлис Эртоев чизган чизиқдан бормай, кутилмагандан бошқа томонга бурилиб кетди.

Биринчидан, сира кутилмаган жойдан Комил ўртага ташлаган масала келиб чиқди. Гарчанд, бирорта раис Эртоевнинг таклифига қарши гапирмаган ва ҳозир фронт талабларига бўйсуниш кераклигини инкор этмаган бўлса-да, уруғлик масаласини дангал айтишиди. Яна шундай усталик билан, имо-ишора билан айтишиди, ҳамма гапнинг бир чети Эртоевга бориб тегар, «унинг жонбозлиги аслида бўрк олиш ўрнига бош олиш бўляпти», деган маъно чиқар эди. Бу ҳам етмандай, кутилмаган жойда бу гапни ҳарбий комиссар Абубакиров ёқлаб чиқди.

Рост, Абубакиров ҳам қўшимча мажбурият олишга рўйи рост эътироz қилмади, бироқ буни уруғлик ҳисобига бажариш зарурлигига шубҳа билдириди.

Яхшиям биринчи секретарь дарҳол гап олиб, қалтис вазиятни бир оз тўғрилаб кетди. У биринчи навбатда фронтни унумаслик кераклигини; кечаю кундуз давом этаётган уруш ҳамма куч, ҳамма маблағни сафарбар қилишни талаб этаётганини яна бир уқтириб ўтди. Айни замонда уруғлик ҳақидаги гапларни

инкор этмаган ҳолда битта таклиф — бу таклифни! аслида обком ўртага ташлаган эди — киритди. Бу таклиф бўйича, район колхозлари ўзларидан бор галлани давлатга топширишади-ю, қўшимча мажбурият ҳисобига ўтказган уруғлик галлани кейинчалик төғ орқасида жойлашган даштлардан ташиб олади.

Шундай қилингандан ҳам колхозлар оғир аҳволдан чиқади, яъни уруғлик билан таъминланади, ҳам давлат катта фойда кўради, чунки төғ орқасидаги колхозлар ҳозир ўз галлаларини бу ерга ташиб беришга кучлари етмас эди.

Шундай узоқ жойдан галла ташиб олиш бу ердаги колхозчиларга ҳам осон эмас! Мунозара чўзилди-ю, бошда бир соатга мўлжалланган мажлис силлиқ ўтмаганидан ташқари, бир неча соатга чўзилиб, Эртоевнинг кўнглини хуфтон қилди. Хуфтон қилишга яна бир сабаб — биринчи секретарнинг қабулхонасида уни... Барно кутиб ўтиради.

Эртоев бошда Барнони райкомга олиб келмоқчи ёмас эди. Бироқ Эшвой айтган ҳовли негадир берк бўлиб чиқди-да, бошқа иложи қолмади.

Райкомга келганларидан кейин, Эртоев Барнони ижрокомга олиб киришга журъат этмасдан, биринчи секретарнинг қабулхонасидаги машинистка қизанинг ёнида қолдирди, қолдирди-ю, бундан ўзиям курсанд бўлмади. Мажлис бошлангунча идорага ким кирмасин — ҳамманинг кўзи Барнода бўлиб қолди. Баъзилар ҳатто илмоқ ташлаб кўришди:

— Ие, иккита бўлти-да қизчаларимиз!

— Секретарларимиз ҳам бало: билишади қанақа қизларни ишга олишни!

Эртоев Барнони бошлаб келганидан минг пушаймон, қабулхонага дам кириб, дам чиқар, Барно ошкора хушомадлардан кўзлари нозли сузилиб, оҳиста жилмайиб ҳўяётганини кўрар ва ўзидан баттар гижинарди.

Бу ҳам майли, Комил билан Ииобатнинг ўтирганини айтинг пойлоқчи бўлиб!

Мажлис эртароқ тугаганда-ку бирор йўли топиларди. Улар қишлоққа боришадиган бўлса шаҳарда қолиш мумкин. Қатраободга кетишса, қишлоққа кетиш баҳосида өжраси мумкин. Кейин...

Эртоев кейин нима бўлишини ҳар ўйлаганда бор ву-

жуди ловиллаб, учқун теккан қуруқ бутадай ўт чиқиб кетар, тоқатсиазликда папирос устига папирос чекарди.

Ниҳоят, соат чорак кам тўйқизларга боргандা мажлис тугади. Биринчи секретарнинг таклифи ўғди. Эртоевнинг бахтига, иккинчи секретарь ҳам кичик мажлис чақирган экан, ҳамма парторглар, шу жумладан, Комил ҳам райкомда қоладиган бўлди.

Эртоев ташқарига чиққанда раислар тарқаб кетишган, извош олдиди Барно билан Инобатдан бошқа ҳеч ким қолмаганди.

Эртоев Барононинг қош-қовоғи осилиб турганини пайқади-да, жўрттага:

— Хўш, бу ёғи қандоқ бўлди, Инобатхон? — деди ясама лоқайд бир овозда.

Инобат елкасини учирди.

— Билмадим энди. Барнохонга айтяпман синглимникига бора қолайлик, деб. Уч ойдан бери кўрмовдим, баҳона билан бир кўриб, сахарлаб чиқиб кетамиз.

Эртоев Барно рози бўлиб қолмаса, деб бир сеска-ниб тушди, йўқ, қиз ноз билан бошини чайқади:

— Раҳмат, опа, мен қишлоққа кетаман!

— Қандоқ кетасиз? — деди Инобат. — Ўртоқ Эртоев ҳам уйларида қолсалар керак...

— Ўртоқ Эртоев қолаверсинглар, ўзим кетавераман!

«Куттириб қўйганим учун аразлаб қопти-да!» хаёлида деди Эртоев. У вазият жуда қалтис эканини сенаб, бир дақиқа иккиланиб қолди, лекин Эшвойницида кутаётган гулгун ўтириш эсига тушди-да:

— Майли опа, нима ҳам қиласмиш,— деб кулди.— Мен Қатраободга бормасам бўлмайди. Сиз қолаверинг. Мен бу кишини Қатраободгача кузатиб қўяй, нарёғига яна бир ҳамроҳ топилиб қолар.

— Шу яхшими, Барнохон? Ўртоқ Эртоев ҳам бир кеча бола-чақаси билан бўлсин-да энди! Қишлоқда эмизикли болангиз йиглаб қолсаям бир сари. Ярим кечада нима бор шунча жойдан овора бўлиб?

Инобатхон Эртоевнинг ниятларини сезиб, жўрттага ёпишиб олдими, ё умрида қувлик нималигини билмаган содда аёл, ҳалиям ҳеч нарсага тушунмадими — буни билиш қийин, лекин энди чекиниш ҳам мумкин ёмас! Эртоев: «Бор, бўлганича бўлар!» деган фикрни кўнглидан кечирди-да, яна кулгига олди:

— Нима ҳам деймиз, Инобатхон, бир кечадам олмасак олмабмизда, ишқилиб бугунги мажбуриятни одамларга тезроқ бориб тушунтирайлик.

Инобат елкасини қисди.

У «Заготзерно»га буриладиган күчагача бирга борди, сўнг совуққина хайрлашиб синглисеникига кетди.

Эртоев биринчи марта ер остидан Барнога қаради.

У елкасига ташлаб олган оқғижим рўмолига ўрагиб, совуқ ва виқорли бир қиёфада қоронгиликка тикилиб ўтирас, қошларининг чимиришидан, сал сузук кўзларининг қисилишидан кайфи бузуқлиги шундоқ билиниб туради.

— Хафага ўҳшайсиэми, Барнохон?

Барно вазиятни ўзгартирмасдан:

— Йўқ, жуда хурсандман!— деди виқор билан.

Эртоев: «Қўйинг энди, бир сафар кечиринг, жонгинам!» деб кулмоқчи бўлди-ю, журъат қилолмади,— тўлиқ чиройли юзида гуноҳкор болаларнинг юзида бўладиган саросималик ифодаси пайдо бўлди.

У ўз умрида қанча хотинларни, не-не қизларни кўрган, аммо биринчи дафъа шундай журъатсиэлик қиласяпти. Барно билан уч-тўрт марта сухбатлашган бўлса ҳам, ҳамон унинг олдида довдирайди, аксарият ўзини қандай тутишни билмайди. Ё бунга Барононинг «қизиқ» лигимикин? У ҳакиқатан ҳам қандайдир галати! Баъзан жуда очиқ-ёруғ бўлиб, ёзилиб, яйраб-яшнаб гаплашади, ўзи ҳам эркаланиб, уни ҳам унча-мунча эркалайди. Баъзан эса, тўсатдан бунинг аксими қилади. Эртоев эркаламоқчи ё ҳазиллашмоқчи бўлса кутилмаганда бир гап билан шундай силтаб ташлайдики, у беихтиёр эсанкираб қолади...

Майли, «бузоқнинг юргани сомонхонагача...» Кўлга бир тушсин, кейин... Эртоев ўзи билади нима қилишини!

Извош вокзал ёнидаги таниш тор кўчага яқинлашаркан, Эртоевнинг овози беихтиёр ўзгариб:

— Бир жойга кириб жиндай дам олсак, Барнохон,— деди, сўнг Барононинг эътирооз билдиришидан қўрқиб тез қўшимча қилди.— Жуда яхши, ишончли одам, меҳмондўст, очиқ-ёруғ.

— Қўйинг бу гапни,— деди Барно ва истеҳзоли кулимсиради,— ҳалиям бўлса... оиласангизга қайтинг, Хотинчангиз билиб қолса балога қоларсиз тағин!

«О, бояги гап суюк-суюгидан ўтиб кетипти-да!» деди Эртоев ичида севиниб.

— Қўйинг энди, Барнохон. Шу бугундан бошлаб менинг ҳеч қанақа хотиним йўқ. Мен учун энди бу жаҳонда ёлғиз сиз борсиз, холос!

— О,— деди Барно ва ясама кулди.— Бола-чақам ҳам йўқ, дерсиз ҳали!

— Йўқ, Барнохон, худо ҳаққи, йўқ! Сиз бир оғиз «хўп» дессангиз бас, бола-чақа тугул жонимдан ҳам воз кечишга тайёрман!— Эртоев чиндан ҳаяжонланиб, нафаси бўғилиб гапиракан, гарчанд Барно ҳамон, истеҳзоли кулимсираётган бўлса ҳам, сал тушганини сезди-ю қизнинг майин кафтини ушлади.

— Гапимга ишонинг, Барнохон. Сиз нима дессангиз ҳаммасини бажо келтираман. Ҳозир бир ажойиб жойга борамиз, йўқ деманг, жонгинам!

Барно унинг илтимосига рози бўлганини ҳам, бўлмаганини ҳам билдирамади.

У ўзини суяччиққа ташлаб кўзини юмди. Аллақандай қизиб кетган бошида тўс-тўполон фикрлар қуюнданай айланарди.

Йўқ. Барно унчалик ёмон, унчалик беҳаё қиз эмас. Бироқ... Нима қилсин ахир? Бутун бир институтда ундан чиройли қиз йўқ эди. Тошкентнинг манман деган йигитлари босган изларини ўпишга зор эди. У шундай йигитларни рад этиб, Ашрафжонни деганди. Мана икки йилдан ошдики — кутади. Бироқ қани у? Қани? У шундай зориқиб кутганда омон қайтадими, йўқми?

Бу ёқда эса умрининг энг яхши мавсуми, ёшлиқ баҳори ўтиб кетяпти, бироқ бу билан ҳеч кимнинг иши йўқ. Эртоев билан бир-икки учрапшанидаёқ ҳаммаси тўнларини тескари кийиб олишди, ҳатто ҳақорат қилишди... Улар нимани билишади? Эртоев унинг олдида маймундай ўйнайди, ёт деса ётади, тур деса туради. Барно йўқ деса, тегиб кўрсинчи қани?.. Наҳот шундай йигит оёғига йиқилса-ю, бир оғиз сұҳбатлашиб ўтириш ҳам айб бўлса? Йўқ, Барнога ҳеч ким хўжайин бўлломайди, на Ашрафжоннинг қариндошлари, на Эртоев!..

Извош қаергадир келиб бир силкиниб тўхтади. Барнога шундай туюлдики, гўё уни зим-зиё бир ўтовга қамаб қўйишганди. У бир неча дақиқадан кейингина— ўшанда ҳам япроқларнинг шитир-шитиридан ўтов деб

ўйлагани катта чинор эканини, извоши кўприкдан ўтиб, шу чинор тагида тўхтаганини фаҳмлади.

Извош тўхтаган ҳамон сакраб тушган Эртоев оқарип кўринган қўш тавақали эшикнинг ҳалқаларини сенкин қоқди.

У Эшвой кутиб олмаганидан сал безовталанган, сал тажанглашган, айни маҳалда унинг йўқлигини ўзининг кечикканига йўйганди.

Лаҳза ўтмай, эшик тирқишидан кимдир кўринди:

— Вой, бу ким?

— Мен, кутиб оласизми меҳмонни?

— Эркин ака, сизмисиз? Вой ўлай, танимапман-а?

— Аёлнинг боши девор орқасида гойиб бўлди, шу заҳотиёқ уйнинг айвонида нимадир «ярқ» этиб, ҳовлиниңг бир қисмига шуъла тушди, кейин эшикнинг иккала тавақаси баравар очилди.

Эртоев отнинг жиловидан ушлаб, ҳовлига етаклаб киаркан:

— Хўш, хўжайин кўринмайдилар, янга? — деб сўради секин.

Жувон Эртоевнинг атрофида парвона бўларкан, шилшиб жавоб берди:

— Хўжайниннинг ишлари чатоқ, Эркин ака, ҳали гапириб бераман!..

Жувон уни қўйиб, Барнонинг ёнига ўтди.

— Хуш келибсиз, азиз меҳмон... Қани, туша қолинг, ўргилай...

Барно айвондаги осма чироқ шуъласида қош-кўзилари ўсма-сурмадан коп-қора, бир оз тўладан келган, ҳали ҳуснини ўқотмаган, диркиллама жувонни кўриб, аллақандай ижирғаниб кетди:

«Ҳали яхши ошилари шу киши бўлдими?»

У ҳар бир ҳаракатидан виқор ёғилиб турган бир қиёфада елкасини учирив, гижим рўмолини тўгрилади, сўнг, извошдан енгилгина сакраб тушди-да, жувоннинг саломига жавоб ҳам бермасдан, қаршидаги ёруг меҳмонхонага тикилди.

— Қани, яхши қиз... Қадамларингизга ҳасапот, ўргилай.

Эртоев отини чиқарип, бедазорга боғларкан, бўйни чўзиб ичкарига қаради. Меҳмонхона тузуккина ясатилган — ҳамма ёққа шоҳи кўрпачалар ёзилиб, оқ ёстиклар қўйилган, ўртадаги хонтахта мева-чевага тўкин.

Эртоев бу жиҳатдан кўнгли сал тинчиса-да, Барно тўсатдан айнаб, ё ғалати қилиқларидан бирортасини «кўрсатиб» қолишидан шунчалик қўрқардик, агар жувоннинг бояги гаплари бўлмаганда, уни бир дақиқа ҳам ёлғиз қолдирмас эди.

♦Хўжайиннинг ишлари чатоқ! Бу сўзлар юрагини така-пука қилиб юборди. Шунинг учун ҳам жувон эшикдан чиқаётганда жўрттага Барно эшитсин деб, баланд товушда:

— Қани, кеннойи, ёрдам керакми сизага?— деб сўради ва пашшахона ёнида турган бўш челакни шарақлатди.— Келинг, ақалли бир челак сув олиб берай қудуқдан!

Аёл ҳам унинг мақсадига тушунди шекилли, «шипшип» юриб ёнига келди. Эртоев қудуққа челакни тушиаркан, энгашиб сўради:

— Хўш, гапиринг тезроқ: Эшвойга нима бўлди?

Жувон бир энтикиб:

— Иш чатоқ, Эркин ака,— деди.— Эшвой акамлар қўлга тушдилар!

Эртоев олдидан илон чиқсан одамдай бир сапчиб тушди.

— Нима, нима? Қанақа қилиб қўлга тушади?

Жувон ҳиқиллай-ҳиқиллай воқеани гапириб берди.

— Ҳмм.— Эртоев, қалин қора қошлири туташиб ўйланиб қолди.

У Эшвойнинг қўли әгрилигини сезарди, албатта, ҳар ҳолда Эшвой унинг уйига олиб келадиган арава-арава қовунлар, яшик-яшик узумлар, қоп-қоп унлар осмондан тушмаслигини биларди, Эшвой унинг мансаби-ю, райондаги обрўсидан фойдаланишини пайқарди. Лекин уни бунчаликка боради, ошкора ўғирлик йўлига ўтиб олади, деб сира ўйламаганди.

Рост, «бу яхшиликлари» учун Эртоев унга тилхат берган эмас, албатта, у билан оғайни тутинганини бирорвга ошкор ҳам қилган эмас. Шундай бўлса ҳам, бугун Эшвой қўлга тушган бир пайтда унинг уйида, уйида ҳам эмас, ўйнашининг уйида кайф-сафо қилиб ўтириши қандоқ бўларкин?

Эртоев айш-ишратни қанча яхши кўрмасин, мансабига, шунча меҳнат билан ортирган мавқеинга сўз тегадиган жойда ўзини тийиб олишга қурби етарди. Жононлар ҳамиша топилади, лекин мавқе...

— Энди ўзингиз бир нима қилмасангиз бўлмайди, жон Эркинжон ака...— жувоннинг овоzi бу сафар аллақандай сирли эшитилди.— Мен биламан, сизнинг қўлингиздан ҳар нарса келади...

«Фронтга жўнатиш керак!»

Эртоев тўсатдан елкасини босиб турган оғир юкни ағдариб ташлаган одамдай енгил тин олди.

«Дарҳол, эрта-индиндан қолдирмай жўнатиш керак! уни фронтга! Штрафной батальонга жўнатиш керак!»

Ногаҳон унинг кўзи меҳмонхонага тушди. Барно кафтини пешанасига қўйиб ҳовлига тикилмоқда, афтидан, уларнинг жим бўлиб қолишидан шубҳаланмоқда эди.

— Хўп,— деди Эртоев.— Кейин гаплашармиз, бир йўли топилиб қолар... Челакдаги сувни ағдаринг бошимга...

У оқ шоҳи кўйлагининг ёқасини чапаниларча очиб, ювилган сочлири баттар ҳурпайиб, меҳмонхонага кирганида Барно тўрдаги тошойнанинг олдига ўтган, аразлагандай тескари ўғирилиб турарди.

Битта қилиб ўрилган майин соchlари бу сафар орқасига ташланган, учлари ечилиб, белини қоплаб ётипти!

Эртоев вужуди жазиллаб олдинга толпинди.

— Барно, Барнохон!— деди овози титраб.

Барно қайрилиб ҳам қарамасдан ўша босиқ ва совуқ товушда:

— Қаёқларда юрибсиз, ўртоқ Эртоев?— деб сўради.

— Сизга чой-пой деб...

— Мен сизга чой девдимми!..— Барно ўзига хос виқор билан бошини сал буриб қаради.— Меҳмондўстлигингиж учун... Раҳмат. Кетайлик.

— Кетайлик? Қаёққа?

— Қаёққа бўларди? Уйга, қишлоққа!

Эртоев унинг қаршисида тўхтаб, бир зум бошини сал эгиб тикилиб қолди.

— Мен сизга тушунолмай қолдим, Барнохон. Ё мени аҳмоқ қилмоқчимисиз?

Барнони унинг совуқ чақнаган кўзларидан ҳам сноздаги кескинлик қўрқитиб юборди.

— Вой, нега аҳмоқ қиларканман?

— Чунки... келишга келиб энди кетаман дейсиз, Тун яrimдан ошди. От ярамайди. Қаёққа борамиш?

«Нега бу одам бундай дағал гапиради? Боя тамом бошқача эди-ю! Нима ҳаққи бор мен билан бундай гаплашишга?»

— Ыўқ, мен кетаман!

— Ҳеч қаёққа кетмайсиз. Кетолмайсиз! — Эртоев кескин гапирганини сезиб қолди шекилли, бирдан юмшаб:

— Барнохон, жоним! — деди-ю, қўлида бир шиша вино, эшикда пайдо бўлган гажакдорни кўриб, сўзида тўхтади.

Гажакдорни кўрганда Барно ҳам, назарида, кўнглида милтираб турган бир чироқ «лип» этиб сўнгандай бўлди.

Эртоев эса, аксинча, ўзида янги бир журъат сезиб, қизнинг билагидан ушлаб кўрпачага тортиди.

— Энди ҳеч қаёққа кетолмаймиз. Ўтиринг. Бирпас яйрайлик, жоним!

Еттинчи боб

Эшвойни қишлоққа олиб кетган куни эртасига даштга от чоптириб келган Эртоев, икки-уч кун ўтмасдан яна қайтиб келди. Машҳур қора қашқа айғирининг чилвирини хирмондаги болаларга тутқазди-да, дабдурустдан чоллар билан гаплашиб турган Комилга юзланиб:

— Эшвой муттаҳамни тутган азаматларни чақиртириб беринг, дўстим,— деди.— Райижроком номидан бир ташаккур билдириб қўяй...— у қўлларини биқинига тираб, чолларга ҳаради:

— Нима дейсизлар, бобойлар?

— Жуда тўғри қиласиз-да, ўртоқ Эртоев!

Комил ошпаз опани йигитларга юбориш учун ошхонага томон кетаркан, ҳамон жилмайиб турган Эртоева ер остидаи кўз ташлаб, ўзича ажабланди:

Олдинги келишида, у, қовоғи қора булут, ҳеч ким билан гаплашмаган, ҳатто Комилнинг машоққа рухсат берини тўғрисидаги илтимосига ҳам қулоқ солмаган, Эшвой қишлоққа жўнатилганини эшитиши билан бир сўқиниб, от чоптириб кетган эди. Бугун жуда вақти чоғ?..

Комилнинг эсига тўсатдан Эшвойнинг гаплари тушди:

— Сизга айтадиган бир гапим бор, Комилжон.

Аммо ҳозир қийнамайсиз, ука. Бир кун пайт келади—
ҳаммасини ўзим айтиб бераман...

«Эшвой нега ундаи деди-ю, бу нега бундай хур-
санд?...»

Комил ошпаз опани йигитларга юбориб, хирмонга
қайтганида, Эртоев, қўллари орқасида, «штаб»нинг ол-
дидиа айланаб юарди.

У Комилни кўриб, мийигида кулимсиради.

Тунов куни Эшвой қўлга тушганини эшитганида
Эртоев ҳаммадан бурун Комил унинг сирларини сезиб
қолишидан хавфсираган эди. Хайрият, ўша куни Чавандоз
усталик қилиб Эшвойни қишлоққа жўнатибди! Эртасига Эртоев етиб борганида у ҳали шаҳарга кетмаган,
қишлоқ советининг қоровулхонасида ётарди!

Бечора Эшвой! Бир кундаёқ кўзлари ичига ботиб,
таранг бақбақалари суви тўкилган мешдай осилиб қо-
либди. Ўзиям Эртоевни кўриб ёш боладай пиқ-пиқ йиғ-
лаб юорди.

Лекин Эртоев гапни калта қилди: «Белингда бел-
боғинг бор йигитмисан, ё хотин?» деб бир ўшқиришда-
ёқ ҳушига келтирди-да дарҳол ариза ёзиб фронтга ке-
тишни маслаҳат қилди.

Эшвой ияги қалтираб:

— Жон Эркинжон ака, бир иложини қилинг, бола-
чақам кўчада қолмасин...— деб ҳиқиллай бошлаган
эди, Эртоев ёқасидан ушлаб қаттиқ силкиди:

— Бола-чақангни ўйлаганим учун шу гапни айтп-
ман, каллаварам! Сен фронтга етиб боргунча уруш та-
мом бўлишиям мумкин!.. Ё ўн йил олиб бир жойда чи-
риб кетишни афзал кўрасамми, нодон?

Шу гапдан кейин Эшвой қўллари титраб «аризага»
қўл қўйиб берди, қолганини Эртоев ўзи тўғрилади. Тўғ-
рилади-ю, елкасидаги бир тоғни ағдариб ташлагандай
бўлди.

Эртоев Комилни очиқ чеҳра билан қарши олди:

— Оббо Комилжон-эй! Шундай қилиб, машоққа
руҳсат бермоқчиман денг?

— Рухсат бермаганимиздан кимга фойда? Бари
бир ерда қолади.

Эртоев «ҳайронман» деган маънода елкасини учир-
ди, сўнг овозини сал кўтариб деди:

— Олдин мажбуриятни бажаринг, ука, кейин бил-
ганингизни қиласиз!— Комил ҳам овозини кўтариб:

- Нечанчи мажбуриятни айтяпсиз? — деди.
- Бунинг аҳамияти йўқ. Олдин бажаринг, кейин гаплашамиз!
- Бундан чиқди... ишлаган одамлар ишёқмасларнинг кафилини олар экан-да!
- Кафилини олиш керакми, йўқми, аммо район ўз мажбуриятини бажариши керак, вассалом!
- Мажбуриятни ўйлаган раҳбарлар ҳамма оғирликни тўртта илғор хўжаликка юкламасдан, ҳамма колхозларни кўтарсин, қойил қолайлик!
- Хўп, бу фикрингизни раҳбарларга етказаман! — деди Эртоев, лекин Комилни титроқ босаётганини кўриб, сал тушди:
- Ўзингиз фронтовик бўлсангиз ҳам, фронт эсин-гиздан чиқибди, ука.
- Фронт ҳам халқ билан, шу қора кўзларнинг меҳнати билан фронт. Шунча ғалла топширган халқни оч қолдиролмайман. Машоққа рухсат бермасдан иложим йўқ.
- Марҳамат, лекин масъулиятиниям бир ўйлаб қўйинг!
- Мен масъулиятни бирорга ағдармайман!
- Эртоев пешанаси тиришиб, бир зум сукут сақлади. Хаёлидан:
- «Бу нега бундай чўрткесарлик қиляпти? Ё Эшвойдан бир гап эшитдимикин? — деган фикр ўтди. Лекин шу заҳотиёқ ўзини тинчитди. — Йўқ, Эшвой сирни очиши мумкин эмас, очолмайди...»
- Қолган гапни ичкарига кириб гаплашайлик,— таклиф қилди у. Ичкарига киргач, бошини маъюс чайқаб:
- Хўп, нима ҳам дердим, — деди. — Факат... ёшлиқ қиляпсиз, ука. Очирини айтсам... мен сиздан умидим бошка әди, Комилжон.
- Раҳмат!
- Эртоев индамай «стол»да турган нонни олиб ея бошлиди. У Комилнинг олдига сабабсиз довдираб қолганидан норози әди. Бу хатосини қандай тўғрилашни ўйлаб турган әди, капага Акмал билан Қўчқор кириб келишиди. Эртоев нон чайнашдан тўхтамаган ҳолда, йигитларга ер остидан бир қаради-ю, пешана-сидаги ажинлари ёзилиб, кутилмаганда хушнуд жилмайди.

— Э, ўзимнинг оғайниларим-ку булар! Қалай, ўшандан кейин қайта полизга тушмадиларингми?

Эртоев тўсатдан шундай самимий хаҳолаб кула бошлиди, унга қараб Қўчқор билан Акмал ҳам кулиб юборди, ҳатто Комил ҳам чеҳраси очилиб, тишининг оқини кўрсатди.

— Оббо сенлар-эй,— деди Эртоев, кўз ёшларини артиб.— Ҳандалак ўғирлашда орттирган тажрибаларидан фойдалакиб, бу ёқдаги ўгрини тутибдилар-да, лаббай?

— У ҳандалак эди-да,— деди Қўчқор хўмрайиб.— Бу бўлса... ғалла! Қулинг ўргилсин оқ буғдой!

— Ҳа, албатта!— Эртоев яна хаҳолаб кулди.— Ҳандалак полизда ўсади, буғдой — даштда!..

Сўнг, бир томоқ қириб:

— Умуман олганда... жуда қойил иш бўпти. Молодцы!— деди.— Ҳандалак тўғрисидаги гаплар шунчаки ҳазил! Зап қойилмақом иш бўлган. Унақа муттаҳамнинг додини бериб қўйиш керак эди! Мен ҳам уни бир боплай деб, қидириб борсам... шартта фронтга жўнаб қопти, гирром!

«Стол»нинг бир четида ярадор қўлини силаб ўтирган Комил тўсатдан ўрнидан туриб кетди.

— Нима? Нима? Қандай қилиб фронтга жўнайди?

Эртоев қўлларини ёзди:

— Мен ҳам ҳайрон бўп қолдим, дўстим. Военкомимиз областга кетган экан, ўшандан фойдаланиб, ихтиёрий суратда урушга бораман, деб ариза берибди-да, жўнаб қопти,— кўкрак чўнтағидан тўрт буқланган қоғоз олиб Комилга чўзди.

— Ихтиёрий суратда эмиш! Оббо тулки-е!— Эртоев бир жилмайди-да, яна жиддийлашди.— Аммо лекин, сенинг аканг...— у Қўчқорга маънодор қараб қўйди.— Аканг Ёдгорбекда айб йўқ. Ёшлиқ қилганга ўхшайди...

Комил қоғоздан кўзини узиб, ялт этиб қаради:

— У тенги ёшлар тиззадан қон кечиб юрибди. Умуман... мен унинг бу ишда ишлашига қаршиман. Фронтовикларга бериш керак бунақа енгил ишларни!

— Бу анди бошқа масала, дўстим. Ўзаро ҳал бўладиган гап. Ҳозирча...— Эртоев йигитларга юзланди.— Гап шу. Саломатликлари керак!

Акмал билан Қўчқор кападан чиқиб сал юрмай кетларидан Комил қувиб етди.

— Қани, бир косадан гўжа ичайлик,—таклиф қилиди у.

Фақат кенг даштда, адирадагина бўладиган осуда, серюлдуа бир оқшом эди. Терак бўйи кўтарилиган ярим ой артилган тилла сиргадай ялтиллайди, узоқ-яқин қапалар, хирмонлар, у ер-бу ерда ўтлаб юрган эшак ва отлар, олисдаги қирлар аллақандай сирли кўринади. Тоғдан зсан гир-гир шабада кучли бўлмаса-да, этни жунжиктиради.

Комил бўшаган косасини четга суреб, ажриқча чал-қанча ётиб осмонга тикиларкан, худди юраги куйиб кетаётгандай қаттиқ уф тортиди.

— Аттанг! Эшвойнинг фронтга жўнаб қолганини қаранглар! Бу ерда бир сир борга ўхшайди.

Суҳбатга аралашмай жим ётган Акмал бирдан:

— Э, сиз ҳали кўп нарсани билмайсиз!— деди.— Уша Эшвойнинг уйида ўйнашлиқ қиласи бу одам!

Комил соғ қўлини ерга тираб, қаддини ростлаб ўтириди.

— Қанақа ўйнаш?

— Қанақа бўларди, ўйнаш-да!— деди Акмал ва Қўчқорни туртди:

— Айтиб бер тунов кунги гапни!

Қўчқор қула-кула Эшвой билан гажакдорнинг гапларини айтиб берди. Комил унинг ҳикоясини тоқатсизлик билан эшитаркан, яна Эшвойнинг гаплари эсига тушиб:

— Нега шунчадан бери индамадиларинг?— деди қайнаб.

— Бунга Машраб айбдор,— деди Акмал.— Бу ёғини айтмай қўя қолайлик, деган у.

— Нега?

— Нега бўларди, Барно кенойиси бор-да ўртада!

Комил лабини тишлаб:

«Э, ҳамма гап бу ёқда экан-да!— деди ичида.— Аттанг! Қўлга тушган жойида қутулиб кетибди-да бу тулки?»— Комил соғ қўлини бошининг орқасига қўйиб чалқанча ётди. У аллақачон сеаиб юрган шубҳаларигина змас, Эртоев ўзини унга яқин олишга уринаётганинг сабабларини ҳам эндиғина тушунди.

Тунов куни, Барно билан келганда, Эртоев уни четга чиқариб тоза мақтади: Комил даштда чинакам ҳарбийларча иш қилганини қайта-қайта таъкидлади, сўнг,

сўз орасида уни раисликка тавсия қилмоқчи эканини қистириб ўтди.

Комил бу гапни эшитишни ҳам истамай, аътиroz билдирган эди, Эртоев:

— Майли, майли, буни кейин гаплашамиз,— деб кулиб қўя қолди. У ҳатто бугун, Комил кескин гапирганида ҳам баланд келмади, сал дўқ қилиб кўрди-ю, дарҳол паст тушди. Тўғри, агар у овозини кўтарганда Комил ҳам аяmas эди, чунки ҳалқа рухсат бермаса машоқ ерда қолишига кўзи етиб туради. Лекин энди ўйлаб қараса, Эртоев унга қаттиқ гапирадиган ҳолиям йўқ, тили ҳисиқ экан!

Эҳ, Барно!

Эҳтимол, у Ашрафжонни яхши танигани учундир, эҳтимол, бир маҳаллар уларнинг севгисига, пок ва шоирона муносабатларига ҳавас қилгани учундир, Акмалнинг гапи юрагини зирқиратиб юборди. Барно-ку ёш қиз, балки янгишгандир, бироқ бу ифлос-чи? Хотин, бола-чақаси бўла туриб, урушда юрган ажойиб бир йигитнинг севгилисини йўлдан уриши... Бу қандай разиллик, қандай пасткашлик ахир?

— Майли!— Комил кўкрагини тўлдириб нафас олди.— Бир суриштириб кўрайлик-чи? Ахир шу гаплар рост бўлса... Битта ташлашамиз булар билан!

— Ҳа, яшанг! Гап мана бунаقا бўпти!— Қўчқор, азбаройи қойил қолганидан, ўрнидан туриб кетди.

— Буюринг буйруғингизни! Бошимиз кетсаям қайтмаймиз бу йўлдан! Тўғрими Акмал?

— Бўлмаса-чи?— деди Акмал.— Ўшалардан қўрқан жонимни итга ташлай!

— О!— Комил ўзича жилмайди. Йигитчаларнинг қандайдир бўлакча поклиги, курашга тайёрлиги унинг ўзини ҳам жуда тўлқинлантириб юборди.

— Хўп,—деди Комил.—Ҳали-ҳозир Ѫшшманлар. Керак бўлганда ўзим айтаман. Энди тагин бир гап бор. Қулоғингга қўйиб ол, Акмал, эшитяпсанми?

— Эшитяпман.

— Сенга бир пуд-ярим пуд ғалла тўғрилаб беришга ҳаракат қиласмиз. Лекин ўзинг ҳам ҳаракат қил, ука, әрта-индин ўроқ тамом бўлади. Кейин бир ҳафта ҳалқни машоққа қўйиб юбормоқчимиз. Шундоқ қилмасак берадиган бир дон йўқ. Машоқдан фойдаланиб қолиши керак. Уқдиларингми? Хўп бўлмаса!..

Комил штабга, йигитлар олисроқда қорайиб кўринган капаларга қараб кетишиди. Йигитлар хушнуд, улар қоронгидан жилмайишар, Машраб кетгандан бери юраларини хуфтон қилган губорлар тўзгиб, ўрнини Комилга нисбатан аллақандай илиқ, укалик меҳри эгалланди.

* * *

Машраб қандайдир ўзгарган, вазминлашган, чеҳрасида худди Гулсум опанинг юзидағидай маъюс бир ўйчанлик пайдо бўлган, ўзиям камсухан бўлиб қолганди.

Чавандоз Расулжондан қорахат келганини Маствурага эшиттириб айтиб, Машрабдан қасд олган куни опа-ука Комилнинг отига мингашиб йўлга чиқишиди-ю, қишлоққа ярим кечада кириб боришиди.

Машраб орқасида ўтирган Маствурунинг йўл бўйи безтак тутган одамдай титраб, товушсиз йиғлаганини пайқаб, ич-ичидан эзилиб борди.

Қишлоқ чуқур сукутга чўманди. Гулсум опа уйда йўқ экан, опа-ука Моҳира бувиникига кетишиди.

Бувининг боғ эшигига тўхташлари билан Маствура отдан сидирилиб тушди-да, худди нимагадир шошаётгандай, қоқиниб-суриниб зим-зиёй уйга кириб кетди.

Машраб отни етаклаб бостирмаға ўтаркан, бутун вужуди билан қоронгилликка қулоқ солди. Бир вақт уйчанинг кичик деразасида «милт» этиб чироқ ёнди-ю, Машраб шу маҳалгача эшитмаган, наҳимали бир фарёд борлиқни зир титратди.

Машраб ушлаб турган эгар-жабдуқлари қўлидан тушиб, уйга қараб югорди. У кирганда Маствура Гулсум опанинг қўлида чалқанча ётарди.

Буви, боши сарак-сарак, оқ дока рўмоли елкасига тушган, қўлида чойнак, ниманидир қидириб:

— Вой, бувигинанг ўргилсин болагиинам-эй,вой ўла қолай, описоқинам-эй,— деб қидирган нарсасини тополмас эди.

Қизиқ. Маствурунинг чеҳраси шундай осойишта ва ҳоргин эдики, гўё уйқуга кетганга ўхшарди. Унинг ёнидаги Гулсум опанинг юзига қараб бўлмас, рангида қон йўқ, жавдираган кўзлари шундай чуқур бир изтиробга тўлган, гўё ҳамма алам, ҳамма оғриқ беҳуш Маствурадан унга ўтганди.

Ниҳоят, буви пиёла топиб келди. Маствурага бир

амаллаб сув ичиришди, юэига сув сепишиди. У секин кўзини очди. Катта қўй кўзлари тағин ҳам улканлашган, худди бир йил тўшакда ётган хастанинг кўзларидай ичига ботган.

Мастура бир дақиқа нима бўлганини билмагандай, ёнидагиларга бир-бир тикилиб қаради, сўнг ҳамма воқеа эсига тушди шекилли, кўзлари чақмоқ чақнагандай ялтиллаб кетди. Машраб уни яна боягидай фарёд чекармикан деб ўйлаганди, бироқ Mastura тўсатдан унга кўзи тушди-ю, титраб, қушдай толпиниб:

— Машраб,— деди аянчли ва ожиз бир товушда.—
Машраб ука, укажоним...

Машраб бунга чидай олмай уйдан ўқдай отилиб чиқди-да, ўзини боқقا урди, қоронғида беда ғарамига юз тубан тушиб, ўша ерда тонг оттирди.

Эрталабгача уйчадан йиги овози, атрофдан бир лаҳзада тўпланган хотин-халажининг ғала-ғовури тинмади. Эрталаб Шириной келиб Mashrabni Mastura чақираётганини айтди. Кирса, кечаси тўпланган хотин-халаж тарқаб кетган, торгина пастқам хонада бувиси, ойиси ва Серафима Федоровна ўтиради.

Мастура тўрда тўшакда ёнбошлаб ётар, чуқур ботган кўзлари аллакандай мўлтирас, лекин сўлғин юзи иситмаси баланд одамнинг юзида ловиллаб ёнарди.

— Mashrabjon!— У иссиқ қўлларини Mashrabning қўлларига қўйди.— Mashrabjon, мана Серафима Федоровна, ойим, бувимлар ҳаммаси... Ҳаммаси мени уришяпти. Урушда бунақа англашмовчиликлар жуда кўп бўлади, дейишяпти. Оғир ярадор бўлиб госпиталга тушса ё бир жойда қолиб кетса ҳам... чалкаш хабар беришлари мумкин дейишяпти. Шунақа бўлиши мумкини, Mashrabjon?

Унинг мўлтиллаган кўзларидаги, овозида, бутун вужудида зўр бир умид бор, кимдир ўйлаб топган бу афсонага ишониш истаги шундоқ акс этиб турар, энди гап фақат Mashrabda қолган, агар у ҳам таъкидласа бас—бу афсонанинг муқаррарлигига шубҳа қолмайди!

— Албатта,— деди Mashrab.— Фронтда нималар бўлмайди! Мен бунақа воқеалар тўғрисида қанча-қанча китоблар ўқиганман.

Ўйдагиларнинг ҳаммаси бирдан чуқур тин олишиди.

Мастуранинг ёнгинасида ўтирган Серафима Федоровна уни қучоқлаб:

— Мастура, жонгинам,— деди.— Мен ўзим бунақа воқеаларниңг нечтасига шоқид бўлганман. Ҳар куни бўлиб турадиган нарса бўл

— Ҳа, ҳа,— деди Мастура ва кўз ёшлари аралаш жилмайди.— Илгари ўзим ҳам эшитганман, эшитгани... аҳмоқ эканман-да бундан чиқди!

Машраб унинг аянчли табассумига қараб туролмай ўзини эшикка урди, йиғлаб юбормаслик учун кафтини тишлаб, кўчага чиқди, кейин бир поччасини эслаб, бир Чавандозни ўйлаб, боғда узоқ ётди... Бунчалик бемеҳр, бунчалик бағритош экан бу Чавандоз! Усиз ҳам ёстиқ-дошидан хат келмайди, хунибийрон бўлиб юрган бир бечораниңг юрагини баттар қон қилишдан нима манфаат кўрар экан бу одам, ўйларди Машраб. Лекин ёмонлик нималиг'ини билмаган, умрида бирорга ёмонликни раво кўрмаган пок йигит, у қанчалик ўйламасин, бу ўйларниңг тагига етолмади.

* * *

Машоқ теришга бутун қишлоқ кўчиб чиқди деса бўлади. Бепоёни даштда одам чумоли бўлиб кетди. Бу оломон орасида Машраб ҳам бор әди. Йигитлар даштни кезиб юриб, капа томондаги қамишзорга яқин бориб қолишиди. Қўчқор ўрилган қамишга қопини ташлаб, ёнбошлади.

— Қани бери кел,— деди у Машрабга.— Томоқлар қақраб кетди-ю, бир қултумдан сув ичиб, бир бурдадан нон еб олайлик, оғайни.

— Акмал қани?

— Ҳом семизми?— деди Қўчқор.— Дўндиқча ма-шоққа чиқмаганидан хунибийрон бўлиб юргандир. Нариги иккитаси кўринмайдими?

«Нариги иккитаси»— Муяссар билан Лариса — анча олисда, хирмон томонда машоқ териб юрарди.

— Майли,— деди Қўчқор.— Қизнинг жони қирқта. Утир, ўзимиз бирпас дам олайлик, ўлиб бўлдигу, оғайни!

У қопнинг тагидан бир шиша сув ва қотиб қолган нон олиб, ўртага қўйди. Машраб унинг ёнига ёнбошлаб, нонга қўлини чўзган ҳам эдики, худди ернинг остидан чиққандай, қаердандир «Информбюро» пайдо бўлди.

Елкасида ярим қоп машоқ, юзи, қўллари ҳабашдай қопқора, у нон билан сувни кўриб, жилмайди.

— Иштаҳалар карнай бўлсин, акалар!

— Балли. Сен айтмасанг сурнай эди,— деди Қўчкор.— Шу битта ионниям ҳидини олибсан да. Майли ганди, ке ўтири.

«Информбюро» Машрабнинг ёнига чўккаларкан:

— Биз бир қултум сувниям текин ичмаймиз,— деди муғамбирона кулиб.— Хизматимизга ичамиш. Ноанк бир гап чиқиб қолди, ака.

— Қанақа гап? Яхшиликми ишқилиб?

— Яхшиликми, ёмонликми, аммо нозик бир гап, ака.

— Хўш?— деди Қўчкор тоқатсиаланиб.

«Информбюро» шундай «нозик» гапни биринчи бўлиб топиб келганидан ўзиям мамнун бўлса керак, мунчоқ кўзлари садафдек ўйнаб жилмайди.

— Балки эшитгандирсизлар, хом семизнинг читтаги... калхат билан топишармиш? Эшитдиларингми?

— Қанақа читтак?— Тушунмади Қўчкор.— Нималар деяпсан ўзинг!

— Қанақа бўларди, ўша Дўндиқчани айтаман да! Акангиз Ёдгорбекка тегармиш. Яқинда тўй бўлармиш!— Истеҳзоли жилмайди «Информбюро».

— Топиб келган янгилинг шуми?

— Озми?— саволга савол билан жавоб берди «информбюро» ва кулди.— Ё биратўла тўйга чақириб келганимда хурсанд бўлармидилар??

— Бор, бор! Топиб келган гапини қара-ю, тагин уялмасдан нон ейди-я! Бор, бор, тошингни тер!— Қўчкор, фигони чиқиб, «Информбюро»нинг қўлидаги ноини ҳам тортиб олди.— Тунов куни иккаласи кўз қисишиб, жилланглашиб қолгандаёқ билувдим-а бир балолари борлигини!

— Булар нима қилишяпти ўзи? Индамаган сайин бошимизга чиқиб кетишияпти-ю!— Машраб тишлиган иони томогидан ўтмай, ўрнидан сакраб турди.— Тўхта, мен ҳозир қизларни чақириб келаман! Улар билишлари керак!— У хирмонга қараб кетди. Қўчкор қамишга чўзилиб осмонга тикилди.

Ҳа, у тунов куни Ёдгорбек билан Гулчеҳра бир-бirlariga жилланглашиб, муқом қилишларини кўргандаёқ юраги «шув» этувди!

Аҳмоқ киз!

Акмалнинг ўрнида бўлса Қўчқор бу гап учун дўп-писини осмонга отарди. Лекин, биринчидан, Қўчқор дили сўймаган бу қизни хом семиз жонидан ҳам яхши кўради. Иккинчидан, илгари дўстларидан кулиб юрган Қўчқор ўзи ҳам, Лариса билан танишганидан бери кўп нарсага тушуниб қолди.

Бечора хом семиз!.. Қаёқдан учрай қолди бу субутсиз читтакка?

Гулчеҳра-чи? Бунаقا субутсизлиги бор экан, нима қиларди бошини айлантириб бу бечоранинг!

Капа томондан Лариса билан Муяссарни бошлаб Машраб келди. Лекин, маълум бўлишича, қизлар ҳам бу гапдан бежабар экан, эшлиб ҳайратда қолишди.

— Одам ишонгиси келмайди-ю, бироқ... Жуда талати бўлиб юрувди шу кунларда,— деди Муяссар.

— Ҳа, мен ҳам сезувдим,— деб Лариса бўйнида кўпириб ётган соchlарини тузатиб, бош иргади.

Дашт офтоби уни шафқатсиз куйдирган, лекин у Муяссардай қораймаган, узунчоқ юзи, бўйинлари, қўллари қандайдир қизгиш-жигар ранг тусга кирган, шунинг учунми, баҳор осмонидай кўм-кўк кўзлари бурунгидан ҳам мовийроқ туюларди.

— Ўзи комсомол аъзоси... Яна мактабни битирмаган бўлса...— Муяссар одатдагидай куйиб гапира бошлади.— Йўқ, мен ишонмайман!..

Унинг сўзига Қўчқор истеҳзоли жилмайди-да, қўлини силтади.

— Ишонмайман дейди-я! Ҳамма қизлар шунаقا! Лафа йўқ уларда!

Машраб Қўчқорга ўқрайди:

— Нимага керак шунаقا гап? Биринчидан... Ҳамма қизлар ўшанаقا эмас!

Муяссар «ялт» этиб Mashrabga қаради. Ёниб турган коп-қора кўзларида чуқур миннатдорлик ифодаси жилва қилди.

— Хўш, иккинчидан?— деди Қўчқор.

У Marshabning нима учун асабийлашганини ҳам, Muяссарнинг кўзларидаги миннатдорлик ифодасини пайқаб, ўзича кулимсиради.

— Иккинчидан...— деди Mashrab.— Агар бу мишишлар рост бўлса... Бир гаплашиб қўйиш керак Гулчеҳра билан!

Тўсатдан Лариса сўраб қолди:

— Агар уни эрга чиқишига мажбур қилишаётган бўлсанчи! Шунақа воқеалар ҳам бўлармишу бу ерларда?

— Агар унақа бўлса...— Машраб сўз қидириб Мұжассарга қаради-ю, қалбида зўр бир илҳом жўш уриб:

— Унақа бўлса... қутқариб оламиз!— деди энтикиб.— Агар бошимиз кетса ҳам қутқариб оламиз! Акмал учун, уларнинг соғ муҳаббати учун жонимизни ҳам аямаймиз. Менинг таклифим шу!

Машрабнинг гаплари ғалати эшитилса ҳам, ҳеч ким кулмади.

— Бўпти, машоқ битсин, бир олишиб кўрайлик булар билан!— Қўйчор шундай деди-да, ўрнидан турди.

— Бас. Мажлис тугади. Бир оғиздан қарор қабул қилинди. Энди машоққа борайлик!

* * *

Даштдаги буғдор асосан ўроқ билан ўрилгани учун машоқ сийрак, фақат тўнғизтароқ ва янтоқ қалин жойлардагина кўпроқ учарди. Шундай бўлсада, тома-тома кўл бўлар дегандек, биринчи куни баъзилар бир қопгача машоқ терди.

Лекин кун ботиб, қош қорая бошлаганда тўсатдан машоқчилар орасида Ёдгорбек билан Кўр Шермат пайдо бўлди.

Иккиси икки отда, одамларни олдиларига солиб, хирмонга томон ҳайдашди.

Тарози олдида негадир Қурбон ота туарди. У, янги лавозимидан хушнуд ва мағрур, қулоғида қисил қалам, ёнбошида чарм сумка, ҳар бир қопни қайта-қайта тортириар ва ярмини хирмонга тўқтиарди. Навбат Машрабларга келди.

У йигитларнинг қопларини тортаркан, олдич: «Маладес-маладес; қани, ярми сизга, ярми бизга» деб турди-ю, исмларини ёзаётуб тўсатдан:

— Между прочим, хирмонга яна беш килодан ташаб қўйилсин, маладеслар!— деб қолди.

— Сабаб, отахон?

— Сабаб шуки, сенлар комсомолсанлар! Сенлардака пайтимида, биз наинки, машоқ, оғзимиздаги нонимизни ҳам эл дастурхонига қўйганмиз, ҳа!

Ота шундай деб навбат кутиб турган қизига юзланди:

— Қани, қизим, сен беш кило әмас, етти кило ташла хирмонга!

Муяссар отасини чин дилдан яхши кўрса ҳам, негадир, эҳтимол, тенгдошлари у ҳақда кулиб гапиришгани учундир, уяларди.

У қопини хирмонга тез ағдарди-да, Ларисанинг қўйлидан тортиб, ўзини қоронғиликка урди. Шу пайт, қаёқдандир пайдо бўлган Комил:

— Майли ота, бу ёги ихтиёрий бўлсан! — деди кулиб.

Ота қўйидаги фонарини баланд кўтариб, товуш келган томонга тикилди. Бошқа одам бўлганда у жеркиб ташларди, албатта, лекин Комилни таниб:

— Ҳалиям ихтиёрий бўляпти, ўртоқ комсомоллар айта қолсин,— деди Машрабларга ишора қилиб.

Комил Қурбон отанинг гапларига жавоб бермасдан сакраб ғарамга чиқди.

— Эшитишумча, бугун коровуллар жонбозлик кўрсатиб одамларга йўл беришмаганга ўхшайди,— деди у.— Эртадан бошлаб истаган жойда теришларингиз мумкин, чунки машоқ кўп терилса сизларга ҳам фойда, колхозга ҳам!

Хирмонни ўраб олган оломон бирдан «гув» этиб, шов-шув кўтарилди.

— Раҳмат, Комилжон!

— Умрингдан барака топ!

— Бу қоровулларга қўйиб берсаларинг... хор қилишадиганга ўхшайди, болам.

Четроқда от ўйнатиб турган Ёдгорбек оёғини узангига тираб бўйини чўзди.

— Биз район каттаконларининг буйругини бажардик, холос! Мана!— У камзулининг ён чўнтагидан бир қоғоз олиб, Комилга чўзди.— Бу ишда ўзбошимчалик қилганингиз учун райком бюросида масалангиз кўрилар әмиш. Бизга кўп ўдағайлайвермасдан тезроқ йўлга чиқинг! Кутуб қолишмасин тагин!

Комил хатни олиб, фанаръ ёруғида ўқишга киришди.

Атрофини қуршаган оломон бирдан жимиб, унга тикилиб қолди.

Комил хатни ўқиб бўлгач, бир лаҳза ўйланиб турди, кейин соғ қўлини кўтарди.

— Хўп, бунга ўзим жавоб бераман, аммо ҳалиги гап — гап, машоқ тўхтамасин!

Оломон яна «гув» әтиб, «Балли, азамат», «Умринг узоқ бўлсин, болам!» деган хитоблар эшишилди, одамларнинг табассумидан, шодлигидан кенг дашт ёришиб кетгандай бўлди.

Олдин йигитлар ҳам, оғизлари қулоқларида, мамнун жилмайишиб турдилару, кейин, Комил аллақандай ғамгин одим ташлаб «штаб»га томон кетганини кўриб, бир-бирига қараб олиши.

— Юринглар,— деди Машраб.— Балки у кишига бирор ёрдам керакдир.

— Тўгри, у кишининг масаласи бюрга қўйилади-ю, биз қараб турамизми?— деди Қўчкор.

Одатда бундай гапларни эшигандага бурнини ғалати қимирлатиб пўнгиллаб қўя қоладиган Акмал бу сафар, ҳопини елкасига ташлади-да, индамай капага томон ӯйналди.

Бироқ «штаб»да ҳеч ким йўқ, ҳатто фонаръ ҳам ёқилмаган, ичкари қоп-қоронги эди.

Машраб Комил кетиб қолишидан қўрқиб, Қоровултепага чиқиб, пойлаб ўтиришни таклиф қилди.

Комил улар Қоровултепанинг ярмига чиқмасданоқ кетларидан қувиб етди. Қоронғида уч одам баравар йўлини тўсганини кўриб, олдин шошиб қолди, кейин йигитларни таниб отдан сакраб тушди.

— Ие, тинчликми, йигитлар?

— Тинчликми дейди-я!— деди Қўчкор.— Масалангизни райком бюросида кўришади-ю, тинчлик бўладими, ака?

Комил кулиб юборди. У гарчи йигитларнинг гапларига ҳазил билан жавоб берса ҳам, аллақандай дўстлик туйгуси кўнглини эритиб юборди.

У қоронғида йигитларнинг қўлларини топиб, битта-битта сиқди.

— Мен виждснимга қарши, ҳалқимга қарши ҳеч иш қилганим йўқ, наҳотки танбеҳ эшиксам! Бўлмаган гап! Бюро эмас, Эртоевнинг иши бу. Аммо лекин... мени деб бу ерга келганларинг учун, яхши ниятларинг учун катта раҳмат, дўстларим!

Комил саман йўргасига қамчи урди.

Йигитлар эса, юраклари баҳор қуёшидай илиқ бир меҳрга тўлиб, от туёқлари узоқлашиб кетгунча кутиб туришди, сўнг, нотинч ўйларга чўмиб, орқага қайтишди.

Биринчи боб

Даштда ўрим-йигим тугаши билан қишлоқда терим бошланди.

Гулсум опа бригадасининг шийпонида қизил бүёк билан ёзилган катта шиорлар пайдо бўлди:

«Пахта — бу ўқ-дори!»

«Пахта — бу жангчига кийим!»

«Азиз ўртоқ, сен фронт хирмонига қаинча пахта тўқдинг?..»

Терим бошланадиган куни пахтазорга бутун қишлоқ зиёлилари—колхоз идораси, сельпо, амбулатория ходимлари, юқори синф ўқувчилари ва ўқитувчилар йиғилиб, хийла тантана бўлди. Бригада аҳлини табриклагани Комил билан Иnobат, кейинроқ Холмат Чавандоз келди. Одамларда шундай бир кайфият ҳукм сурардики, гўё ҳозиргача қилинган ишлар — тошлирилган минг-минг пуд ғалла, сабзавот, мева-чева — бунинг ҳаммаси шунчаки бир гап, гўё «фронт» деган улуғ сўзга лойиқ иш мана энди бошланади!..

Терим бошланган куни йигитлар Қурбон ота бошлиқ қизил карвоннинг араваларида пахта тошлириб келишди. Шу кундан бошлаб уч киши иккита шотили аравани ҳайдайдиган бўлишди.

Иш оғир. Улар ҳар куни тонг пайти йўлга чиқиб, кун ботиш олдида қайтишади. Кейин отларини сойга тушовлаб, хирмондаги пахтани қоп-қанорларга тикишади, тоғдай қилиб араваларга ортишади. Шундан кейингина сойга тушиб дам олишади. Пахтани барвақтроқ тошлириб, эртароқ қайтганларида эса, дам олиш ҳам эсларидан чиқиб, қизларга ёрдамга шошилишади: пахта теришади, қопларини хирмонга ташиб беришади. Кечқурунлари сойдаги ажриқэорларга чў-

зилиб, белбогларига тугиб келинган қовоқ соғсалару, қўрга кўмиллан жўхори думбулларини ейишади. Кечалари эса йигитларнинг ёнига Муяссар билан Лариса чиқиб келишиади, тўғон бўйида, лайлак уя қўйган оқ теракнинг тагида узоқ сұҳбатлашиб ўтиришиади.

Умуман, меҳнат қаинчалик оғир бўлмасин — Машраблар турмушдан нолишмайди. Чунки иш оғирлашган сайин улар ўзларини фронтга, урупда юрган йигитларга якироқ ҳис этишади-ю, виждонлари қийналмайди. Ҳатто ёздаги кўнгилсиз воқеалар. Эртоевлар билан бўлган тўқиашувлар ҳам эсларидан чиқсан, чунки фронт деган улуғ сўз олдида бунинг ҳаммаси қандайдир жуда майда кўринади. Фақат бир нарса йигитларни сал қийнайди, у ҳам бўлса... Гулчехра!

Субутсиж киз!.. Бир қарасангиз Акмал билан бурунгидай илиқ гаплашиб, йигитнинг сўнган умидини қайта ёқади, бир қарасангиз Ёдгорбекка кўзларини сузиз, юрагини ўртайди.

Ёдгорбек эса даштдан қайтгандан кейин почталъон бўлиб олди-ю, Гулчехранинг атрофифда ўралашиб қолди.

Ёдгорбекнинг бу хатти-ҳаракатлари негадир Акмалдан ҳам кўпроқ Қўчкорни хуноб қиласди.

— Айб ўзингда! Латта бўлмасанг... бундок бир танобларини тортиб қўймайсанми, сўтак? — дейди у жигибийрон бўлиб.

Бу гаплар Акмалнинг усиз ҳам ачишиб турган ярасига туз сепгандай бўлди-ю, ахийри Гулчехра билан бир гаплашишга аҳд қиласди.

Бугун улар пахтани заготпунктга топшириб бўлиб, бир пиёла чой ичгани чойхонага кирганларида Акмал «лип» этиб, йўл бўйидаги бозорчага ўтди. У бир-икки кундан берн белбогига тугиб юрган уч-тўртта зоғорасига чиройлироқ бир шоҳи рўмолча олмоқчи эди, бироқ рўмолчага пули етмади-да, зоғорани эскироқ бир ипак қўлқопга алмаштириди. Мана энди белбогида шу қўлқоп, тагида қоп-қанорлар, шотили аравада осмонга тикилиб чалқанча ётиби.

Олис йўлга ўрганган отлар, бошларини секин чай-қаб бир-бир босиб бормоқда. Олдинда кетаётган араваларнинг биридан Қўчкорнинг беўхшов хиргойиси эшитилади:

Ул париваш қадрим билмас,
то камолга етмагунча...

Акмал боя қўлқопни белига туғиб бозордан чиқаёт-
ганда кўнгли жуда равшан эди, энди қишлоққа яқин-
лашган сайин уни гўё совуқ хабар кутаётгандай юра-
ги сиқилиб борарди.

Қиз билан учрашганда нима дейди? Совғасини қан-
дай қилиб беради? Сўнги пайтларда пахтазорга бошига
янги-янги шоҳи рўмолчалар ўраб, қулогига бежирим
сирғачалар тақиб чиқаётган Гулчеҳра унинг арзимаган
ҳадясини қабул қиладими, йўқми?

Акмал шундай хаёллардан боши ғовлаб ахийри
кўзи илингани акан, бир пайт, Қўчқор елкасидан қат-
тиқ туртди:

— Хурракни отиб ётишини қара бунинг! Ўргилиб
кетай сендақа куёв йигитдан!.. Тур, пайтни бой бер-
май чоп, каллаварам!

Акмал апил-тапил ўрнидан турди.

Аравалар сойга келиб тўхтаган, Машраб отларни
тушовламоқда эди.

— Имилламасдан тезроқ бўл, лапашанг! — Қўчқор
Акмални аравадан судраб тушириб, жарлик ёқасида-
ги толзорга имо қилди.— Бундай қулай пайт сира кел-
майди. Чоп!

Акмал нима бўлаётганини тушумасдан Қўч-
қор кўрсатган томонга қараб лапанглаб югуриб
кетди.

У жарлик тагидаги одам бўйи келадиган қамиш-
зорга киргандагина бир оз ҳушига келиб, қадамини се-
кинлатди, лекин шу пайт, олдини тўғсан қамишлар
чайқалиб, тор йўлда... Гулчеҳра кўринди.

Акмал, гўё йўлини бўри тўғсан қуёндай бир сапчиб
тушди, қиз эса, аксинча, лўппи юзларида чуқурчалари
ўйнаб:

— И! — деб кулди.— Сиздаям йўл тўсиш одатлари
борниди, Акмал ака!

У бошида бинафша ранг нафис шоҳи рўмол эгни-
да ўзига ярашиб тушган гулдор чит кўйлак, оёғида
этикча, қўаларини сузиб, жилмайиб турарди.

Акмал унинг ёқимтой кулгисидан эриб кетиб бел-
боғидан қоғозга ўралган ҳадясини олди, сал дудуқла-
ниб:

— Шу...— деди.— Шу арзимас ҳадяни... атайин сизга деб олувдим...

— Ҳадя?.. Вой, нима қиласингиз?— Гулчехра қозони олиб очди, чеҳраси ёришиб, қўлқопни қўлига кийиб кўрди-да, тўсатдан:

— Йиртигу қўлқопчангиз...— деди, бир четидан жимжилогини чиқариб.

Қўлқоп чиндан ҳам чокидан сўкилган эди. Акмалнинг қовоги тушиб кетди.

— Нима қиласиган, боримиз шу... Биз баъзи биролардай шойи рўмолчага чамамиз етмайди.

— Нима, нима, шойи рўмолча? Ҳали рашк қиласман денг?— Гулчехра тўсатдан овози пўлат қўнгироқчадай жаранглаб кулиб юборди.— Бирор текин рўмолча беради-ю, ман олмайманми? Мана, сизнинг ҳам қўлингизни қайтарганим йўқ. Қўлқопчангиз учун раҳмат. Бироқ рашк қилсангиз... хафа бўламан!

Гулчехра оппоқ майда тишларини ярқиратиб яна бир кулди-да, ўзини сой томонга урди.

— Гулчехра. Тўхта...

Акмал юраги турс-турб уриб, унинг кетидан интилган ҳам эдики, орқадан, пахтазор томондан Ёдгорбекнинг:

— Ҳой, менга қара, ҳом семиз!— деган товуши эшитилди.

У ёнбоншида четлари қирилиб кетган эски брезент сумка, лапанглаб келиб, Акмалнинг олдида тўхтадида, қўлига икки букланган бир конверт қистирди.— Қизларнинг кетидан юришни сенга ким қўйди? Ундан кўра отанг бечорага битта яримта посилка юборсангчи, оғайни!

Ёдгорбек шундай деб, кўзини қиеди-да, Гулчехранинг кетидан чопиб кетди.

Акмал муштини тушиб, унинг орқасидан бир-икки қадам юрди, кейин қандайдир ички бир туйгуга бўйсуниб, конвертни очди.

Анчадан кейин унинг йўқолиб қолганидан ҳайрои бўлган Машраб билан Қўчқор югуриб келишгандা, Акмал бошини қўллари орасига олиб, ерда ўтиради. У Машрабларнинг саволларига жавоб бермасдан қўлидаги хатни чўзди.

Хатни ўқиб Қўчқор билан Машраб ҳам гаранг бўлиб қолишиди.

Хат битта эмас, иккита эди. Бири Эшмат акадан, иккинчиси қишлоқ совети номига ёзилган ва шифохона муҳри босилган расмий мактуб эди.

Маълум бўлишича, Эшмат ака заводда ишлаб турган жойида вагонетка қоқиб кетиб, операцияга тушган, ҳозир завод шифохонасида даволанмоқда эди.

«...Кўзимизнинг нури, белимизнинг қуввати, тўнгич ўғлимиз Акмалхонга етиб маълум бўлсинки, бизким, отанг Эшмат Мўмин ўғли Магнитогорск шаҳрида, олло-таолонинг паноҳида соғ-саломат ўз ризқимизни териб еб юрибмиз ҳамда сизлар ул томонда соғ-саломат бўлишларингизни табиатнинг энг нозик жойидан тилаб турибмиз»... деб бопланадиган ва камида юз кишининг номига битта-битта дуойи салом йўлланган бу узун хатнинг энг нозик жойи охирида эди.

Эшмат ака ҳозир саломатлиги ёмон эмаслигини, агар қишлоқдан қарамоғидаги болалари тўғрисида справка келса уйга қайтаришлари мумкинлигини айтиб, охирида шундай деб ёзарди:

«Сизга айтадиган эндиги гал шуким, бошда Чавандоз янгиш ёзганми, билмадик, биз Эшмат Мўминов бўлмай, Эшной Мўминов бўп кетибмиз. Ўзимиз ҳам уч-тўрт ёш яшариб қопмиз. Справка беришганда, шул томонларини ҳам тўғрилаб ёзишса, негаки, кейин ча-тоғи чиқиб юрмасин.

Холмат акамларга кўпдан-кўп дуойи саломимизни айтинг, ўзлари яхши одам, йўқ демаслар...»

Дарҳақиқат, шифохона бош врачининг қишлоқ советига ёзган расмий хатида ҳам Эшмат эмас, Эшвой Мўминов деб ёзилган эди.

Акмал бунга эътибор бермади, у фақат бир нарсани — отаси касалхонага тушганини онасига билдирамасликни ўйларди, холос. Лекин Машраб хатни биринчи ўқишидаёқ:

— Тўхта, нега энди Эшмат ака Эшвой бўлади? — деди.— Эшвой... Эшвой Мўминов...

Тўсатдан унинг кўз олдига ўша олис ёз тонги-ю, ярим яланғоч гажакдор жувон келди, эсига унинг «Хорманг энди, Эшмат ака!» деб кулгани. Эшвой эса: «Иккинчи айтма шу номни!» деб силтаб ташлагани тушди.

— Эшвой Мўминов! Э, бу ўша муттаҳам бақалокку! — Машраб кўзлари газабдан чақнаб бир Қўчқорга, бир Акмалга қаради,

Акмал қош-қовоғини уйиб чурқ этмади, Қўчқор эса, бошини қашиб:

— Эшвой ўз ихтиёри билан армияга кетган-ку, бу ёғи қандоқ бўлди? — деган эди, Машраб кўрсаткич бармоғини пешанасиға бигиз қилиб:

— Шунга ҳам ақлинг етмадими, каллаварам,— деди.— Армия тугул рабочий батальондан қочиб юрган одам, фронтга кетармиди? Ўшанда қўлга тушмаганда кетиб бўпти ў!. Эсингдами, қишида рабочий батальонга фалончиларни ёзишибди, деганда ҳар хил гаплар тарқалувди. Шамол бўлмаса дараҳтнинг учи қимирламайди. Мана энди билинди!

Машрабнинг гапларига ишониш қанчалик қийин бўлмасин, у ҳақ экани кўп ўтмай сезилиб қолди. Кечки пайт справка сўраб қишлоқ советига кириб кетган Акмал, қош-қовоғи осилиб чиқди: Чавандоз аллакимлар билан маслаҳатлашиб олишни важ қилиб, справкани пайсалга солибди.

Усиз ҳам Гулчеҳрани ўйлаб эзилиб юрган Акмал сойга тушиб, кўкрагини захга бериб ётиб олди. Қўчқор ҳам, гўё бунинг ҳаммасига Чавандоз эмас, ўзи айбдордай индамай қолди, Машраб эса сойда қиртқирт ўт чайнаб юрган отларга, терак учларидаги милт-милт ёнган юлдузларга тикилиб ўйга чўмди. Негадир кўз олдидан Эшмат ака кетмасди.

Акмалдан ҳам содда, меҳнаткаш одам, у кечаю кундуз пахтазордан чиқмас, колхозда энг яхши сувчи ҳисобланарди. Қишу ёз кийимлари қуrimасдан ҳўл бўлиб юрар, шунинг учун ҳам одамлар унга «шилта этак» деб ном қўйишганди. Лекин шу соддалигига қарамай, Акмалдай «ичимдагини топ» эмас, сўзга чечан, аскияда не-не одамларни мот қилиб юрарди. У колхоз боғида бўлган қайси бир ўтиришда Иnobat опанинг эри Ҳошим полвонни бир оғиз сўз билан мот қилиб кетгани Машрабнинг әсидан чиқмайди... Уша йили тоғдан эртароқ тушган йилқи қирда ёйилиб юрарди. Эшмат ака бошидаги дўпписини тўғрилай-тўғрилай, шу йилқига имо қилиб:

«Бу йил худо сенинг тилагингни берди-я, полвон!» деб бир жилмайди-да, патнисдай кетмонини елкасига

ташлаб, пахтазорга қараб кетди. Даврада зўр қаҳқаҳа кўтарили: «Бас, мот бўлдинг, полвон! Қойил, Эшмат ака, қойил!» деган хитоблар эшитилди.

Машраб кейин суриштириб билса, Ҳошим полвоннинг лақаби «Қўнғиз» экану, Эшмат ака бу йил тезак кўл бўлишига ишора қилиб, уни жуда нозик жойидан ушлаган экан!

Шу заҳматкаш одам бирорнинг ўрнига кетганини ҳалигача билмайди. Нима қилиш керак? Албатта, Комилга дод солиб бориш мумкин. Лекин, биринчидан, унинг ҳам ташвиши бошидан ортиб юрибди, иккичидан... улар ўларичи? Наҳот уларнинг қўлидан бир иш келмаса?..

Машраб титроқ босиб ўрнидан туриб кетди-да, тўсатдан:

— Ёзамиз! — деб қолди. — Ҳаммасини айтиб обласста ёзамиз. Хўш, нега ёзмас эканми?

Акмал яна индамади. Лекин бу фикр Қўчкорга маъкул тушди. Улар Машрабларникига бориб хат ёзишга киришдилар. Хатни Машраб ўзи ёзди. У шундай шоирона тил ва алам билан ёздики, ҳар қанақа бағритошним эртишга қодир эди. Хат тезроқ етиб борсин учун әртасига шаҳарга бориб, уни скорий поезднинг почта қутисига солиб юборишиди.

* * *

Серафима Фёдоровна янги ўқув йилига шунча жон куйдирив тайёрланганига яраша ёлчитиб дарс бера олмади: мактаб бир ҳафта ишлар-ишламас эшикларга қулф осилиб, ҳамма пахтага сафарбар қилинди.

Пахта!

Серафима Фёдоровна «оқ олтин», деб ном чиқарган бу афсонавий ўсимликнинг очилишини биринчи кўриши.

Бу шуҳратнинг лофи йўқ: оппоқ очилган бўлиқ пахтазор қор босган боғлардай майин, илк ёққая лайлакқордай кишининг кўнглини равшан қиласди. Бироқ одамлар пахтазорни фронтга ўхшатиши бежиз әмас: ипакдай майин кўринган пахтанинг меҳнати тошдан ҳам қаттиқ.

Серафима Фёдоровна буни ўзидан ҳам бурун қизи Лариса билан ҳамشاҳарларининг қийналишидан билди.

Лариса Муяссар бошлиқ юқори синф қизларидан тузилган алоҳида звенода ишлайди. Даشتдан қайтгандан кейин юзи сал тиниқлашиб, ўзига келиб қолган қиз энди бир ҳафтадаёқ кўзлари ичига ботиб, қўллари шилиниб, озиб кетди. Лекин ёш эмасми, қизлардан қолишмасликка ҳаракат қиласди: улар кўпроқ теришса, кўпроқ теришга уринади, кулиписа кулади, йиглашса йиглайди. Баъзан кечалари Ленинградни, ўқиган мактабини, дугоналарини, отасини эслаб ўқсийди:

— Нега бошқа фронтларда душман чекиняпти-ю, Ленинград жим? Дадамларга нима бўлди? — деб сўрайвериб, онасининг усиз ҳам зирқираган юрагини баттар зирқиратади. Лекин әртасига гўё бунинг ҳаммаси эсидан чиқади-ю, бутун вужуди билан ишга киришади, гўё кўнглидаги ғуборни меҳнат билан ювмоқчи бўлади.

Серафима Фёдоровна қўйиб берса Лариса унинг нормасини ҳам ўз зиммасига оладиган. Бироқ Серафима Фёдоровна қийналса ҳам унамайди. У ўзи учун фақат битта енгилликни тан олади, у ҳам бўлса, ҳолдан кетган чоғларида пайкалнинг четига чиқиб сал ҳордиқ чиқаради ёки бир-бир босиб паҳтазорни оралайди, озиб-қорайиб кетган болаларнинг бошларини силайди, юраги аллақандай илиқ бир меҳрга тўлиб, қиз-жувонларга фронтдаги аҳвол ҳақида гапириб беради, кўнгилларини кўтаришга ҳаракат қиласди. Лекин у кўпроқ ўз ҳамшаҳарлари билан бирга бўлшишга тиришади.

Ленинградлик саккиз-тўқиз аёл ишга бирга чиқиб, бирга қайтишади. Ёзда, Моҳира бувининг богида бўлган гаплардан кейин, улар Серафима Фёдоровнага қандайдир суюниб қолишган. Ҳатто опа-сингил Святковскаялар ҳам унинг оғзига қараашади.

Ёздагидан ҳам баттар офтобда куйиб, қорайиб, қўллари шилиниб кетган бу аёлларни узоқроқдан ўзбек қиз-жувонларидан ажратиб бўлмайди, фақат ўқтин-ўқтинда:

Прощай любимый город,
Уходим завтра в море.
И ранней порой, мелькнет за кормой
Знакомый платок голубой...—

каби қўшиқлар бошланади-ю, пахтазорга қандайдир бўлакча, рус далаларидай бепоён ва аллақандай маъюс бир руҳ кириб келади. Шундай пайтларда ҳозир уруш бораётгани, узоқларда — Украина даштларида, Белоруссия ўрмонлари ва севимли Ленинград остоналарида ҳамон қаттиқ жанглар бўлаётгани аниқроқ сезилади-ю, бу қийинчиликлар кўзга кўринмай қолади.

Ҳамма учун бўлмаса ҳам, Муяссар билан Лариса учун, умуман қизлар учун битта кичик шодлик бор, у ҳам бўлса... Уч йигит!

Улар, гарчанд ҳар куни кечқурун шаҳардан чарчаб, ийқилиб-сурилиб қайтишса ҳам, дарҳол ўзларини пахтазорга уришади: йигитлар келиши билан далаға қандайдир жон киради, кулги, ҳазил-мутойиба, баъзан шўх қўшиқлар бошланади.

Серафима Фёдоровна ўзи ҳам йигитларнинг бу шўхликларини, белларигача қип-яланғоч бўлиб, баданлари тердан чўяндай ялтиллаб хирмондаги пахталарни қоплашларини, кейин одам бўйи келадиган қанорларни даст кўтариб, араваларга босишларини завқ билан томоша қиласди, у фақат бир нарсадан — қизи билан Қўчқор ўртасидаги муносабатлар жиддийлашиб кетишидан қўрқарди, холос.

Чунки Серафима Фёдоровна сезади — йигитининг шўх қилиқлари, гап-сўзлари, хатти-ҳаракатлари қизига хуш ёқади, ҳар қалай, Қўчқор келганда Лариса ноз билан кулиб, аллақандай яшнаб кетади... Бунинг устига беш-олти кундан бери нима ҳам бўлиб, Гулчекра ишга чиқмай қолди-ю, қиз-йигитларнинг учрашувлари, шивир-шивирлари кўпайиб кетди. Онани бу ҳам бир оз безовта қиласди, кўнглига ғулгула солади.

...Бугун йигитлар шаҳардан баравақтроқ қайтишиди. Жар ёқасида пахта тераётган Серафима Фёдоровнага шоша-пиша салом беришиб, олисда, қир этагида ишлаётган қизлар томонга ўтиб кетишиди. Бир лаҳзадан кейин Муяссарни бошлаб орқага қайтишиди. Серафима Фёдоровнанинг:

— Ҳа, нима гап, тинчликми? — деган саволига:

— Тинчлик, тинчлик,— деб жавоб беришибди-да, сойга тушиб кетишиди...

«— Буларга нима бўлди?!» — деганича Серафима Фёдоровна кўнгли бир хил бўлиб, кетларидан тикилиб

турган эди, ўнг қўлдаги қатор тутлар панасидан Гулсум опа чиқди. Қўлида бир ҳовуч пахта, у узоқроқда тўхтаб, таклиф қилди:

— Юринг, бир пиёла чой ичайлик. Серафима Фёдоровна, чарчаганга ўхшайсиз.

Хирмонда, тут тагида нималарнидир ёзиб ўтирган Катя Святковскаядан бошқа ҳеч ким йўқ, терилган пахта тօғдай ўюлиб ётарди.

— Иигитлар қани? — деди Гулсум опа. — Боя шу ерда юргандай бўлишувди-ю!

— Қаёқда бўларди. Яна ўша... қизларга кетишган-дир-да, — ноз билан кулди Катя. — Шаҳардан қайтди дегунча ўша ёқка югуришгани югуришган.

Серафима Фёдоровна маъюс жилмайди:

— Иигит бўлгандаи кейин шунаقا бўлади-да, Катенька!

У этагидаги пахтасини хирмонга тўқди-да, Гулсум опани четга чақириб, боя кўрганларини айтиб берди.

Гулсум опа кўзларини сал қисиб сойга, қий-чув кўтаришиб қўш ёнгоққа тош отишаётган болаларга тикилиб ўйланиб қолди.

— Яна ўша Гулчеҳра можаросидир, — деди ниҳоят Гулсум опа. — Яшириқча тўй бўлармиш, деган гап чиқиб қолди, шуни эшлишганга ўхшайди — тўлиб юришипти!..

— Ҳайронман!.. Ахир ҳали ўн еттига чиқмаган қиз... Нима ҳақлари бор?

— Кошки, ҳақ-ҳуқуқни билишса булар! Биз кечаю кундуз ўйлаганимиз фронт, меҳнат, план. Булар бўлса...

Гулсум опа пахтазордан чиққан Барнога кўзи тушиб, индамай қолди ва чуқур тин олиб, ерга каради.

Барно, бошида шойи дурра, эгнида сал эскирган атлас кўйлак, оёғида пошнаси баланд бежиримгина этикча, ҳамон бурунгидай виқорли кўринарди. Лекин Гулсум опа сезади — Барно ичиди қандайдир бир мурвати синган ўйинчоққа ўхшайди. Кўзларини тез олиб қочишиларида, лабларининг қаттиқ қисилишида, юриш-туришларида аллақандай аянчли бир нарса пайдо бўлган.

Мана ҳозир ҳам Барно пахтасини топширди-да, ёнидаги қиз-келинчакларни кутмай, сойга қараб шошилди. Афтидан, у тут панасида ўтирган Гулсум опа-

ларни яқин боргандагина қўрди шекилли, бир зум тўхтаб:

- Салом,— деди секин.
- Салом,— Гулсум опа оҳиста тин олди.— Ҳорма, жоним. Қалай, яхшимисан?
- Раҳмат...— Барно, қуралай кўзлари маъюс жавдираб ерга тикилди, кейин:
- Менинг... идорада ишм бор эди,— деди-да, тез юриб ўтиб кетди.
- Мана, буниям йўлдан урган ўшалар!— Гулсум опа, ранги ўчиб Серафима Фёдоровнага қаради:
- Майли, тўғри қилишяпти йигитлар!.. Ёзишсин. Курашсин. Кўрайлик, токайгача булар шундай қиларкин! Тилимиз қисиқ жойимиш йўқ. Биз эмас, улар ҳайиқсин!

Гулсум опа бошини аллақандай мағрур кўтариб, жирмонга қараб кетди. Серафима Фёдоровна эса Моҳира бувининг әшагига миниб, йўлга тушди.

У Барно ҳақида ҳам, Гулчеҳра тўғрисида ҳам анча гаплар эшишган, Акмалнинг изтироб чекиб юрганини ҳам билар, лекин Гулсум опа бунчалик фигони чиқиб гапиришини биринчи кўриши эди.

...Вақт тун ярмидан оғиб кетган эди. Гулсум опанинг гапларини ўйлай-ўйлай, зўрга кўзи илинган Серафима Фёдоровна қулоғига чалинган аллақандай шовқин-сурондан чўчиб уйғонди.

Ҳовлида қандайдир бир тўполон бошланган, кимлардир гурс-гурс юрар, эшиклар очилиб-ёпилар, кимдир чироқ кўтариб у ёқдан-бу ёққа ўтар, кимдир йиглар. Моҳира бувининг:

- Вой, болажонларим-ей! Нималар қилиб қўйдинглар?— деган овози эшитиларди.

Серафима Фёдоровна юраги шув этиб, Ларисанинг тўшагига қўлини чўзди — Лариса йўқ! У пешанасини совуқ тер босиб, апил-тапил ўрнидан турди-да, эшишка отилди.

Кечакутдай ойдин. Ҳовлининг ўртасидаги сўрида Машраб билан Қўчқор ўтирас, четроқда Акмал ҳам кўринарди. Моҳира буви, қўлида лип-лип этган еттинчи лампа, Машрабга ниманидир куйиниб гапиради.

- Ҳа, нима бўлди, тинчликми, буви?
- Вой айланай Серафим қизим,— Моҳира буви аёлни кўриб югуриб келди.— Булар халиги... Фазлид-

дин оқсоқолнинг қизи... Гулчехрахонни олиб қочиб келишибди.

Машраб қўлини силтади:

— Нега энди олиб қочар эканмиз? Шунчаки.. бошқа жой бўлмагандан кейин.. бошлаб келдик-да бу ерга.

Моҳира буви, қўлида лампаси титраб, бир Серафима Фёдоровнага, бир йигитларга қаради.

— Тағин қизи тушмагур гапга кўнса-чи? Дод солиб йиглаяпти...— Кампир йўрғалаб сўрининг ёнига борди.— Нима қиласанлар энди, куёв кирди қиласанларми?

«Куёв кирди» сўзини эшигтан Акмал ўрнидан сашчиб туриб, эшикка томон йўналди. Қўчкор қаҳқаҳ отиб унинг кетидан югорди, Машраб эса:

— Бўлмаса нима қилайлик?— деди титраб.— Едгорбеклар олиб қочаётганини кўриб, индамай тураверсак яхши бўлармиди?

— Яхши бўлмаса... боятдан бери дод солиб йиглаяпти-ю қизларинг!

Серафима Фёдоровна эндигина пайқади. Катта уйнинг деразалари ёл-ёруғ, у ердан бўғиқ йиги овози эшитилар, Лариса билан Шириной қизни юпатишга ҳаракат қилишарди.

Серафима Фёдоровна кулимсираб Машрабга юзланди:

— Уйга кирайлик. Бир бошдан гапириб беринг-лар-чи? Нима гап ўзи?

У бувининг қўлидан лампасини олиб, уйга бошлиди.

* * *

Йўқ, йигитлар бундай воқеа рўй беришини ўзлари ҳам кутмаган эдилар. Аксинча, улар юборган хатларига жавоб келмагунча тинч юришга аҳд қилишган, чунки бу хат бежавоб қолмаслигига имонлари комил эди. Гарчи юқоридан ҳамон дом-дарак бўлмаса-да, ёзилган хатнинг дастлабки таъсири сезила бошлади. Нечча қишлоқ советининг котиби Акмали чақириб Магнитогорскдан келган хатларни олиб киришини, олиб кирса справка беришини айтди. Кечқурун Гулчехра билан гаплашгани кетган Муяссар ҳам хушха-

бар билан қайтди: беш-олти кундан бери қизини ҳеч кимга кўрсатмай қўйган Гулчеҳранинг ойиси бу сафар Муяссарни очиқ чеҳра билан қарши олибди, эртанидин қизини ишга чиқаришга вайда берибди.

Шу-шу, йигитлар оғизлари қулоқларида, яrim кечагача уйқулари келмай, сойда, жар ёқасидаги оқ теракларнинг майин шовиллашига қулоқ солиб узоқ ётишди.

О! Кенг сойда тагларига қалин пичан тўшаб, фиртир эсган шабадада қоп-қанорларга ёпиниб, тўғондаги бақаларнинг сайрашига қулоқ солиб, ширин хаёллар оғушида ухлаб қолишнинг гаштига не ётсин!

Машраб, қандайдир ёруғ ўйлардан кўнгли сув ичгандай бўлиб (у ёзган хатлар бекорга кетмади ахир!), энди кўзи илингган экан, Қўчқорнинг турткисидан уйгониб кетди.

У анчагача ҳеч нарсага тушуна олмади, кейин от туёқларнинг дупури эшитилган томонга тикилиб, боғ кўчадан чиқсан икки отлиқнинг қорасини кўрди.

Отлиқлар қўш ёнгоқнинг ёнидан ўтиб, тўғонга қараб бурилишди.

— Кўр Шермат билан Ёдгорбек! — деди Қўчқор, ваҳимали шивирлаб. — Бу ерда бир гап бор. Тун ярмida бекорга юрмайди булар!

Дарҳақиқат, отлиқлар тахта кўприкнинг ёнидан ўнгга бурилиб, тўғон бўйида тўхташди.

— Гулчеҳрага келишган! — тўсатдан деди Қўчқор. — Гузардан олиб ўтишдан қўрқишибди-да, муттаҳамлар!

У олдинга толпинган Акмалнинг қўлини қайириб зўрга тўхтатди.

— Шошма, ишнинг пачавасини чиқарасан, каллаварам! Жим! Қани, кетимдан юринглар!

Улар юраклари гурс-гурс урар, қалбларини худди разведкага чиқсан оқшомдагидай, йўқ, ундагидан ҳам бўлакча — сал ваҳимали ва ширин бир туйғу, йигитликка хос бир гуур чулғаб олганди. Ҳозир гап талла эмас, инсон тақдири устида борарди ахир!

Йигитлар тахта кўприкни панараб бориб, тўғонга яқин жойда тўхташди. Энди шубҳага ўрин қолмаган, Ёдгорбек лайлак уя қўйган оқ терак остида отларнинг жиловидан ушлаб турар, Кўр Шермат эса, тў-

ғон устида қулаб ётган толдан юриб ўтиб, қаршидаги боғда ғойиб бўлган эди.

Афтидан, олдиндан гаплашиб қўйилган бўлса керак, сал ўтмай, тўғон устида иккита аёл билан Кўр Шерматнинг қораси кўринди.

Кўр Шермат паранжига ўралган Гулчехрани — уни паканалигиданоқ билса бўларди — даст кўтариб, Ёдгорбекнинг отига миндириди-да, ўзиям бир сакраб отига минди. Гулчехранинг йигиси, «Оқ йўл! Ваъдалар эсдан чиқмасин!» деган хитоблар эши-тилди.

Икки отлиқ йигитларнинг ёнгинасидан ўтиб, не-гадир жарликка томон йўл олишди.

Қўчқор билан Машраб тўсатдан айиқдай олиша бошлиған Акмални зўрга тўхтатиши, сўнг, дараҳтларни панараб отлиқларнинг орқасидан кетишиди.

Лекин отлиқлар қўш ёнгоққа етмасданоқ, Акмал бир толпиниб қўлларидан чиқди-да, лапанглаб бориб қиз минган отнинг жиловидан ушлади:

— Тўхта, босқинчи!

Машраб тўполон бўлиб кетармикин, деб қўрққанди, йўқ, жанжал чиқмади.

Қўчқор Кўр Шерматни бир сакрашдаёқ ёқасидан ушлаб, отдан туширди. Шермат хириллаб олишиб кўрди, Ёдгорбек эса, эсанкираб қолдими, ё одамлар уйғониб, тўполон бўлиб кетишидан қўрқдими, олишмади ҳам, бир-икки сўқинди-да, қизни ташлаб, Кўр Шерматгаям қарамасдан, отига қамчи босди.

Гулчехра бўлса аввал қўрқиб кетди. «Вой, ойижон!» деб қичқириб юборди, кейин йигитларни таниб, овозининг борича ҳўнграб йиглади...

...Мана, у ҳанузгача ўзини боссолмайди, катта мәҳмонхонанинг бурчагида юзини ёстиққа босиб пиқпиқ йиглади...

Машраб бир бувисига, бир Серафима Фёдоровна-га қараб, сўради:

— Шундан кейин... бу ерга олиб келмай нима қилийлик? Ё ўша иккита босқинчига бериб юборсак яхши бўлармиди?

Серафима Фёдоровна кўзини қисиб, бурчакка имоқилди.

— Буни ана... Гулчехрахондан сўрагин-да!

Ҳамма кулиб юборди.

Гулчеҳра эса юзини ёстиққа қаттиқроқ босиб индамай қолди.

У ҳозир нима ҳам дейди? Мана, бир ойдан оғидики, Ёдгорбек кечаю кундуз қизнинг йўлини пойлайди. Ҳар куни янгаларидан совға-саломлар, ҳеч қаердан тоғилмайдиган ироқи совунлар юборади.

Аввал Гулчеҳра йигитдан ўзини олиб қочиб кўрди. Лекин шундай нафис ҳид тараттан ироқи совунларни қайтариб бўлармиди? Кичкиналигидан чиройли безакларга ўч қиз бу совғаларни битта-битта оладиган, ке йинроқ эса, йигит кечалари пахса девор ёнидаги ги-лосларининг ёнига секин ҳуштак чалиб келганди, юраги ўйнайдиган бўлиб қолди.

Лекин у Ёдгорбекни бунчаликка боради, деб ўйлаган эди. Кеча кечқурун янгалари уйларига бир сандиқ кийим-кечак кўтариб киришди-ю, уни атлас мўйлак, гижим рўмол, амиркон маҳси-кавушларга кўмиб ташлади. Гулчеҳра, гарчи бу кийим-кечакларни кўриб, кўзлари ўйнаб кетса-да, юрагини аллақандай ваҳима босиб йиғлай бошлади. Шунда бир томондан ойиси, бир томондан дадаси ўшқириб беришди. Бунинг устига Кўр Шермат кириб келди-да, қизни худди қўйни судрагандай қўлидан шап ушлаб судраб чиқиб кетди. Шу-шу — қиз гўё эс-ҳушидан ажради, ҳатто дод солишга ҳам чамаси келмай қолди, фақат Акмалларни кўргандагина бирдан ўпқаси тўлиб, ҳўнграб йиғлаб юборди.. Мана энди эса, нима қилишини ўзијам билмайди: қувонишини ҳам, ўкинишини ҳам.

Қўчқор Гулчеҳранинг индамаётганидан хуноб бўлиб, унинг ёнига келди.

— Ҳей, менга қара, Гулчеҳра,— деди у.— Агар ҳоҳламасанг, марҳамат, ҳалиям бўлса олиб бориб қўямиз куёв йигитникига.

Унинг ҳазили Ларисага хуш ёқиб тушди шекилли, соchlарини силкитиб кулди-да:

— Рост,— деди.— Сени чиндан йиғлаяпти, деб, олиб бориб қўйишса нима қиласан, ўртоқжон?

Бу сафар Гулчеҳра ҳам «пик» этиб кулиб юборди-ю, ҳамма аркин тин олди.

Серафима Фёдоровна ҳамон гуноҳкорона термилиб турган Машрабга юзланди:

— Молодцы! Жуда соз бўпти! Бўлмаса жавоб кутуб юравергандарингда боплаб кетишаркан улар. Айт-

моқчи, ҳалиги... Магнитогорскдан келган хатлар қани?

— Хатлар куёв тўрада. Ҳозир,— Кўчкор ҳовлига чиқиб қўлида тўрт буқланган конверт билан кирди.

Серафима Фёдоровна Эшмат аканинг хатини қайтариб берди-да, шифохонадан келган қофозни олиб, еттинчи лампанинг хира шуъласига яқин тутиб ўқишига киришди.

Бу — дағалроқ сарғиши қофозга «о» ҳарфи сийқа бўлиб қолган пачоқроқ машинкада ёзилган расмий хат эди.

Қофознинг нац томонида «Магнитогорск металлургия заводи ёнида № 2 шифохона» деб ёзилган штампи, тагида уч бурчакли муҳри бор...

Серафима Фёдоровнанинг кўзи негадир ҳаммадан бурун шу муҳрга, тўғрироғи, унинг ёнидаги имзога тушди. Тушди-ю, гўё бирор кўкрагидан туртгандай, чайқалиб кетди, ранги ўчиб бир Машрабга, бир қизига қаради, сўнг яна қофозга тикилди.

Иўқ, у янгилишиши мумкин эмас, ҳарфлари жуда хира кўринса-да, аниқ ўқиши мумкин: «Магнитогорск металлургия заводи ёнидаги 2-шифохонанинг бош врачи» деган жойда... «Гордый В. М.» деган ном турар, анг муҳими «г»ни «т»га ўхшатиб чекилган имзо — унинг эри, Владислав Мефодьевичининг имзоси эди...

Серафима Фёдоровна ҳолсизланиб кўзларини юмди.

Лариса югуриб келди.

— Ойижон, сизга нима бўлди, ойижон?

Ҳамма шошиб қолди. Моҳира буви бир чойнак чой топиб келди. Лекин Серафима Фёдоровна чойдан бир қултум ичиб: «Қофоз» деди-да, яна чуқур энтикиб деворга суюнди.

Лариса бир зум қофозга кўса тикди, бироқ ҳеч нарсага тушунолмай ойисига қаради.

— Ойижон! Нима қилди, ойижон?

— Даданг,— деди Серафима Фёдоровна ва нафаси етмай томогини силади.— Даданг. Имзо.

Бу сафар Larisa ҳам қофозга кўз ташлаши билан ҳамма нарсага тушуниди. Тушунди-ю, у ҳам ранги ўчиб атрофига жавдираб қаради, кейин, қофозни кўксига босиб, онасининг қучогига отилди.

— Дада! Ойижон, дадам!

Уй тўполон бўлиб кетди, ҳамма нарса, ҳатто Гулчекра ҳам эсдан чиққан эди.

Серафима Фёдоровна ҳамон ўзига келолмас, дам лаблари ғалати титраб, кўзидан тирқираб ёш оқар, дам ўз кўзларига ишонгиси келмагандай, қоғозга қайта-қайта тикилар эди. Лариса эса бир жойда ўтира олмай уйни гир айланар, гоҳ Гулчеҳрани, гоҳ Моҳира бувини қучоқлар, ҳар хил тахминлар айтарди.

... Дадаси, албатта, ўша партизан отрядидан қайтаганнида яраланганду, Магнитогорскдаги госпиталга тушган. Кейин... инвалид бўлганми, завод шифохонасида ишда қолган.

У бирдан ранги ўчиб:

— Ишқилиб... оёқ-қўли бутун бўлсин-да! — деди да, яна ўзидан кулди. — Чўлоқ бўлса ҳам майли. Ишқилиб тирик! Тирик!

Қўйиб беришса Лариса шу бугуноқ Магнитогорска қараб учадиганга ўхшарди. Кейин бу кайфият Серафима Фёдоровнага ҳам ўтди. У олдин Гулчеҳрани қучоқлаб: «Сен бўлмасанг балки бу гаплардан бекабар қолардим, жоним!» деб қайта-қайта ўпди, сўнгра Акмални чақириб, гўё эрининг тирик қолишига Эшмат ака сабаб бўлгандай, уни ҳам бағрига босди.

— Хафа бўлма. Владислав дадангга ёрдам беради. Ҳаммасини тўгрилайди. Бу яхшиликларинг учун... — деб яна йиғлаб юборди.

Ҳали бу гапларни аниқлаш керак-ку, телеграмма юбориш, хат ёзиш лозим-ку, деган фикр она-боланинг эсига Машраблар қўзгалгандагина келди.

Она-бала анча баҳслашганларидан кейин, ниҳоят, шаҳарга Серафима Фёдоровна кетди.

У шаҳар почтасидан бир йўла иккита телеграмма ва учта хат ёзиб жўнатди. Иккала телеграммани эрининг ўзига (биттаси бўлмаса биттаси тегар), хатларнинг биттасини завод кадрлар бўлимига, яна биттасини шаҳар соғлиқни сақлаш бўлимига, яна биттасини эрига жўнатди ва шундан кейингина кўнгли сал жойига тушди.

Кечқурун Серафима Фёдоровна ҳориб-толиб қайтганда Моҳира бувининг уйи одамга тўлиб кетган, кутилмаган шодликни ўртоқлашиш учун бригаданинг ярми йиғилганди.

Рост, Моҳира бувининг гапига қараганда, кечаси Серафима Фёдоровна шаҳарга кетгандан кейин уйда анча кўнгилсиз гаплар бўпти.

Тонг палла доду фарёд солиб Гулчеҳранинг ойиси билан дадаси, қандайдир қариндошлари кириб келишибди. Қишлоқ советидан одамлар чиқиб писандаги қилишибди, акт тузишибди, хуллас, Моҳира бувини роса қўрқитишибди.

Серафима Фёдоровна ўз қувончидан ўзи маст, бу гапларга кўп эътибор бермади. «Ҳўйинг, буви, ваҳими қилманг!» — деб кулиб қўя қолди. Фақат индининг эрталаб ранги бўздай оқарган Гулсум опа кириб келганда ва ички бир аламдан титраб шаҳардан терговчи чиққанини ва йигитлар устидан тергов бошлаганини айтганидагина ҳушига келди-ю, ўзи билан ўзи овора, ҳаммани унутганини эслаб, аллақандай ижирғаниб кетди.

— Қанақа тергов? Айби нима йигитларининг?

Гулсум опа жавоб бермади. У ҳам худди шу саволлар билан ҳозиргина Чавандознинг олдига кирган, лекин аниқ бир жавоб ололмаган эди.

* * *

Қиз можароси бошланишидан икки кун олдин Чавандоз Комил билан бирга тоққа чиқиб кетганди. Улар колхоз йилқисидан йигирма чоғлик от танлаб олишлари, кейин чорвани кўриб қайтишлари керак эди. Йигирма от танлаб олишдан маҳсад, уларни сотиб, колхоз иомидан алоҳида танк заказ қилишмоқчи эди. Гарчанд, бу ишнинг бутун шон-шуҳрати Иnobat билан Комилга тегадиган бўлса-да, Чавандоз бу ташаббусдан четда туришни ўзига эп кўрмаган ва ёрдамга шошилган эди. Лекин Эшмат Мўминнинг ўғли хат кўтариб киргандан бери кўнгли ёришмай юрган Чавандоз, тоққа чиққач, худди бир бахтсизлик бўлишини сезгандай безовталаниб қолди-ю, отлар танлаб олингач, қўй фермаларини оралаб юришга сабри чидамай қайтиб кетди.

Унинг кўнгли хижил бўлиши бежиз эмас экан, идорага кирса, столда бир даста шикоят.

Гўё Чавандоз мәжнат батальонига одам ўрнига одам юборган, гўё бурунги замон бойларидаи вояга

етмаган қизни бир қоп буғдойга сотиб олган, яна бу буғдой ўзиникиям эмас, колхоз хирмонидан ўғирланган эмиш. Ўртоқ Эртоев эса, буни фош қилиш ўрнига, ўзиям фронтовикларнинг қайлиқларини йўлдан уриб, бузуқчилик қилаётганмиш...

Унинг бахтига ҳамманинг хаёли фронтда эмасми, шикоят «текширилиб чора кўрилсин», деган бир парча ҳороз билан олдин ижрокомга, ижрокомдан Чавандознинг ўзига келибди. Урушдан олдинги замонлар бўлса нима бўларди?

Чавандоз бу гапларни Эртоевга айтишини ҳам, айтмасликни ҳам билмай (айтса Эртоев хафа бўлади, айтмаса бир жойдан чатоғи чиқиши мумкин), боши қотиб, фирони чиқиб турганда... Гулчеҳра можароси чиқса бўладими?

Ўзи-ку Чавандоз гап-сўз кўпайиб кетгандан кейин, тўй-томушадан воз кечиб, ишни зимдан битириб қўя қолмоқчи эди, йўқ, бу сафар ҳам тўғаноқ солишиди.

Киши бир марта чидайди, икки марта чидайди, босаверса қурбақа ҳам «вақ» дейди ахир...

Яхшиям, «хўжайин»га тегиб ўтишган экан, Чавандоз телефонда учини чиқариши биланоқ Эртоев бир сапчиб тушди, кейин хиёл ўйланиб тургач, ҳисқа қилиб: Ҳозир етиб бораман,— деди-да, трубкани илиб қўйди...

Мана энди Чавандоз йигирманчи лампа ёқилган ёруғ меҳмонхонанинг тўрида кўкрагани ёстиқча бериб Эртоенни кутиб ётибди.

Олдидаги хонтахтада чақилган ёнгоқ, мева-чева. Бежирим кўкиш кўзачада мусаллас, унинг ёнида иккита жонон пиёла. Лекин Чавандоз мусалласнинг кўнгли тортмай, шамолда чайқалган дараҳтларнинг ваҳимали гувиллашига қулоқ солиб, хаёл дengизида сузди, ўзи билан ўзи олишади.

Йўқ, инсоғ билан айтганда, Холмат Чавандоз Гулсумхон ўйлаганчалик виждонсиз эмас, қаримасдан соchlари оқарган бу аёлни яна дилсиёҳ қилмоқчи эмас эди. Умуман, ёзда куёвидан хат келиб, Гулсумхон жуда мунгайиб, аллақандай чўкиб қолганини кўрганида ёқ унга раҳми келган, кейин, Аъзам ячейка билан ишлаган чоғлари, оғир бўлса-да, дилида аллақандай ёруғ бир шуъла қолдирган ёшлик йиллари эсига тушиб, кўнгли баттар эриган, ҳатто ҳар хил сабаблар билан у

оилага яхши мусомала қилмаганларини ўйлаб, ўзини койинган эди. Негаки, бундоқ дўппини олиб қўйиб ўйлаб қараса, эсидан чиқиб кетган ўша мушкул даврлар умрининг энг соф, энг олижаноб чоғлари экан.

Рост, ўша маҳаллардаям Чавандоз билан кўп тўқ-нашадиган, уни кўп койийдиган одам... Аъзам ячейка эди! Аммо, биринчидан, ячейка койиса ҳам бошқача койир, бугун уришиб, эртасига ярашиб кетаверадиган мард йигитлардан эди. Иккинчидан, у маҳалдаги тўқ-нашувлар ҳам бўлакча бўлар, уларнинг тагида қандайдир жуда катта, пок, олижаноб мақсадлар ётарди.

Хуллас, Чавандоз ўшанда кўп нарсалар эсига тушиб, анча мулоҳазаларга борганди. Лекин кима қилсинки, ўзлари унинг жинига тегишиді!..

Чавандоз айвонда кимнингдир гурс-гурс қадамини сезиб шахт билан ўрнидан турди. Лекин эшик секин очилиб, Ёдгорбек кирди.

— Чой берайми, дада?

— Чой...— Чавандоз ўғлининг аллақандай гуноҳкор қиёфасига тикилиб, бирдаюраги «шиғ» этди.

— Менга қара, ўғлим, намунча сувга тушган товуқдай бўшашиб кетдинг?

Ёдгорбек узун бесўнақай қўлларини қаёққа яширишини билмай ғудранди.

— Йўқ, нега энди...

— Қаддингни тут, ўғлим! Парво қилма! Мен тирикманми — қиз сенини! Эшийтдингми?

Ёдгорбек битта тилла тиши ялтиллаб жилмайди.

— Қиз ўзиям... янгалар орқали сир олишдик— кўнгли йўқ эмас, дада.

— Шунақами: Нур устига нур! Бор, дарвозага чиқ. Хўжайин келадиган пайти бўп қолди.— Чавандоз ўғлининг бесўнақайроқ бўлса-да, ўзига хос хушбичим қоматини кузатиб қоларкан, юраги аллақандай оталик меҳрига тўлиб кулимсиради:

«Сал бўшроғу, аммо... чакки эмас! Энди Қўчқордан умид йўқ. Уйдан безгани безган, Гулсумхоннинг маҳмадонасига қўшилиб Чавандозга чанг соляпти. Эшакка мугиз битса эгасини сузади, деган гап тўғри экан. Энди Чавандознинг биттаю битта умиди шу Ёдгорбек».

Тўсатдан эшик шарақлаб очилди-ю, остоида Эртоев пайдо бўлди.

Оёғида гарчиллаган хром этик, эгнида янги кўк китель, Эртоев Чавандоз билан қўл бериб кўришди-да, қовоғини солиб бурчакдаги стулга ўтиб ўтирди.

— Боя айтган шикоятлар қани? Чўзинг!

Унинг хатти-ҳаракатлари, гап-сўзларида шундай бир қатъият бор эдики, ҳатто Чавандоз ҳам шошиб қолди.

Эртоев бошидаги фуражкасини олиб, ёстиққа ташлади, хатларга кўз юргутириб чиқмасданоқ:

— Эшмат аканинг справкасини бердингизми? — деб сўради.

— Йўқ...

— Нега?

— Энди... Сиз билан бир маслаҳатлашсам девдим...

Эртоев «ялт» этиб Чавандозга қаради.

— Гап-сўзни кўпайтирмасдан тўғрилаб беринг ҳамма справкаларни! — деди кескин. — Эшмат ака рабочий батальонда бўлса... Эшвой ака фронтда юрибди. Нимадан қўрқасиз? Ҳеч ким бу гапларни исбот қилолмайди. Аммо справка бермасангиз гап-сўз кўпайиб кетади. Шунга ҳам ақлингиз етмадими? Хўп. Бу нима. Актларми? — деди у, лекин қоғозларни ўқир-ўқимас яна сўради:

— Шундан бошқа қиз қуриб қолдими, Холмат ака?

Чавандоз бошини қашиб:

— Энди... — деди, — ёлғиз ўғил. Шу қизга кўнгли тушибди...

— Жигаридан урибди денг?.. — кулди Эртоев ва қоғозларни кителининг кўкрак чўнтағига жойларкан, буйруқ оҳангода деди:

— Майли, у ёгини ўзингиз биласиз! Аммо шуни қулогингизга қўйиб қўйингки, бунақа хатларнинг йўли бекилиши керак. Ҳар ҳолда ҳозир, шу кунларда чиқмаслиги керак бунақа гаплар!

У Чавандозга ер остидан тикилиб, қўшимча қилди:

— Мени шу кунларда... обком чақириши керак. Хушхабар чиқиб қолди. Холмат ака!..

Чавандоз унинг гапларидағи қатъиятга эндиғина тушуниб, хушнуд кулди:

— Рост гапми, Эртоев ака? Учини чиқаринг қитдек-қитдек қилиб, бундоқ бир табриклаб қўяйлик.

Эртоев қовоғини солишга ҳаракат қилса ҳам, беихтиёр жилмайиб:

— Подадан олдин чанг чиқармайлигу, лекин... иж-
роком раиси ёқмаяпти обкомга,— деди.— Тўғрисиям
раис эмас, латта ўзи!

Кейин, уст-устига икки пиёла мусаллас ичиб, кўнг-
лидаги ғуборни бир оз тарқатгач, тамом очилиб
кетди.

— Ҳозир бунаقا кўнгилчанлик нетмайди, Чавандоз.
Темир иродали раҳбарлар керак ҳозир. Улассанми, ти-
риласанми — аммо планни бажарсанг бас — сендан
яхши раҳбар йўқ! Мана шу нуқтаи назардан қараган-
да...— Эртоевнинг лабидаги табассуми яна сўнди, кат-
та оппоқ муштини хонтахтага қўйди.— Шу нуқтаи на-
зардан қараганда сизни ҳам танқид қилиш керак, Ча-
вандоз. Сиз ким ўзи? Каттакон бир қишлоқнинг раиси!
Раиснинг ҳуқуқи ўсганми ҳозир? Ўсган! Армияга одам
юбориш, яъни, ҳамма рўйхат ўзларининг ихтиёридами,
ихтиёрида! Колхоз сизга ҳисобот бериши шартми?
Шарт! Хўш, жаноблари бу ҳуқуқлардан қандай фойда-
ланяптилар. Очифини айтиш керакки, яхши фойдалан-
япганлари йўқ! Интизом пасайиб кетган қишлоқда!
Ҳар ким ўзига бек, ўзига хўжайин! Бунга чек қўйиш
керак, раис ака!

Чавандоз, гарчанд кўнглидаги шубҳалари тарқаб,
бу гаплардан яйраб кетса ҳам, табассумини яшириб,
ҳазиллашди:

— Ҳақ-ҳуқуқ дейдилару... аммо лекин, ўзлари ҳам
биз билан ҳисоблашаётганлари йўқ, Эртоев ака!

— Масалан?..

— Масалан ўша... Арзимаган ёш болани уруш қаҳ-
рамони деб, кўкларга кўтардилар, парторгликка сайла-
дилар... Хўш, ўшанда каминаларидан бир оғиз масла-
ҳат сўрадиларми?

— Э, хафа бўптиларда бундан чиқди!— Эртоев
олдин ҳаҳолаб кулди, кейин ёстиқни четга суриб, қад-
дини ростлаб ўтиаркан:

— Бу — бошқа масала, Чавандоз,— деди. Сиёsat
бу, ака! Бунаقا масалада эҳтиёт бўлиш керак, ҳа!

— Хўп, униси-ку сиёsat экан, ячейканинг хотини-
чи? Бу кишиниям сиёsat учун директор қилиб қўйди-
ларми?

Эртоев пахмоқ соchlарини силаб яна илжайди:

— Кечирадилар, ячейканинг хотини ўзларига ёқ-
маслигини билмабмиз, ака!

— Гап унда эмас, Эртоев ака. Худо ҳаққи, шу аёлга ёмонлик раво кўрмайман. Аммо лекин... кўриб турибсизку ахир?.. Сийлаганни сигир билмас экан...

— Биламан! — деди Эртоев.— Унинг директорлиги вақтинча бир гап. Истаган маҳалда иргитиб ташлаймиз. Парво қилманг, Чавандоз!

— Ҳалиям парво қилаётганим йўқ, Эртоев ака. Аммо лекин...— Чавандоз, юзига қон тепиб, келишган мўйловини қимирлатиб кулди.— Яхшиликни билмас экан булар! Сиз ўйлайсизки бу гаплардан Гулсумкоининг жабари йўқ деб! Кечирасиз, балони билади бу хотин! Шошманг, пахта планини бажарсин, нималарни кўрсатаркан у киши!

— Бажарса... ўқувчи-ўқитувчиларнинг пешана тери билан бажаради!

— Шундоқ деймизу, аммо лекин, раҳматни бари бир директор олади-да, Эртоев ака. Боя ўзлари айтдилар-ку...

— Тўғри, лекин... ҳар қалай, ўғли, иккита укаси фронтда. Бу ёгини ҳам ҳисобга олиш керак, Чавандоз!

— Биламан. Билганим учун ҳам тегмай девдим шуларга. Аммо лекин, андишанинг номини қўрқоқ қўйишиди-ю булар, Эртоев ака!

— Тўғри, бир йўлини топиб, сал босиб қўймасак, ҳаддан ошиб кетяпти булар...— Эртоев актларни қўлига олиб ўйчан варақлади.— Вояга етмаган ёш қизни йўлдан уриб, ёмон ният билан уйларига олиб боришган... Чакки эмас... Аммо... ўғлингизни кўрган одам йўқми?

— тўсатдан сўради у.

— Худо демасангиз, бандаси кўрган эмас.

— Хўп, қиз-чи? Қиз чатоқ қилмасмикин?

— Қиз...— Чавандоз Ёдгорбекнинг гаплари эсига тушиб, кулимсиради.— Авваламбор, бизнинг ўғил ҳам чакки эмас, қиз билан дон олишиб юрганга ўхшаб қолди. Иккиласми... қизнинг гапи инобатга ўтмаслиги мумкин...

— Хўп!— Эртоев хонтахтага қўлини тираб, шиддат билан гапирди:

— Мен бу ҳужжатларни тегишли жойларга топшираман. Иш судга чиқиши қийин. Бу тўғрида гап ҳам бўлиши мумкин эмас. Лекин терговга тушиб, бир-икки кун ётиб чиқиша... ҳушлари жойига келиб қолар дейман!— Эртоев қошини учирив кулимсиради-да, яна

жиддийлашди.— Демокчиманки, шу иш юришиб кетса... Гулсум опани олдингизга чақирасизу, мулоимги на қилиб мұхрини құлидан оласиз. Сабабини суриштирсалар, жавоб тайёр: ўз фарзандини тарбия қилолмаган одам бошқаларнинг фарзандини қандай тарбия қила-ди? Тұғрими?

— Тұғриям гапми? Михдек денг, михдек!— Чавандоз азбаройи завқланиб кетиб күзачага құл узатган эди, Эртоев имо билан тұхтатди.

— Еас! Энди камина йұлга чиқади.

— Шунақами?— деди Чавандоз ва сал ийманин-қираб сұради:

— Ҳа, бу... Шерматвойга одам юборсак... бошлаб кесларди-ю нозанин бугалтири, лаббай!

— Нозанин бугалтири...— Эртоев иегадир қизарин-қираб күлди.— Майли, Чавандоз, күнгил толпинса ҳам бирор ҳафта сабр қилмасак бүлмайди. Құлга тушган құш у нозанин! Ҳар қанча толпинса ҳам қочиб қутуломайди зиди!

— Ҳали қочмоқчими нозанин? Шундай бургутдан-а?

— Ҳа... зиди... нозанин бүлгандан кейин нози бүларкан-да, Чавандоз!— деди Эртоев ва үрнидан турди.

— Хуллас калом — бояги гап! Агар ҳалиги иш юришиб кетса... ўзлариям белидан босадилар. Үнгача вазифалари — маълумот түплашу, гувоҳларни пухталаш!

«Маълумот түплашу, гувоҳларни пухталаш!» Чавандоз Эртоев кетгандан кейин ҳам бу ҳақда узоқ ўйлади, үйқуси қочиб, минг бир күчага кириб чиқди, кейин, хаёли чуваланиб кетаётганини сезди-да, құлинни силтади:

«Баттар бўлсин! Нима, менми уларга арбоб билан ўйнашгин деган?»

Эрталаб Фотиманинг кўз ёшлиридан боши гаранг (Қўчқор аразалаб уйларига келмай қўйганидан бери унинг кўз ёши қуrimай қолди!), идорага кирди.

Чавандоз заҳрини кимга сочишини билмай, тұлиб ўтирган эди, бир маҳал, гүё: «Эчки ўлгиси келса, чўпоннинг таёғига суркалар», дегандек, Гулсумхон ўзи кириб келди.

Маълум бўлишича, у йигитларнинг устидан акт

тузилганини эшитиб, гаплашгани келибди. Лекин гаплашиш шунаقا бўладими?

Иўқ, Чавандоз бир қони қайнаса, бир жони ачиб, минг хил мулоҳазаларга бориб юришлари бекор экан! Бўлмаса.. Гулсумхоннинг ўрнида бошқа одам бўлса, таёқ ютса ҳам агар, сал ўпкасини босиб кирмасмиди унинг олдига!

Иўқ, ўпкасини босиши у ёқда турсин, баттар ранглари ўчиб, гўё Чавандозни еб қўядигандай кўзлари ёниб, қалтираб кирди!

Ўзиям рўмоли елкасига тушиб, оқ оралаган сочлари тўзғиб кетган, ҳар бир сўзидан заҳар томади!

Эмиш, ҳамма балога сабабчи Чавандоз билан Эртосев!

Ўзлари истаган номаъқулчиликни қилиб, ҳамма айбни пок, беғубор ёшларга ағдаряпган эмиш. Лекин тухматнинг умри қисқа, барибир бир кун бўлмаса, бир кун ҳақиқат юзага чиқармиш! Ҳаддидан ошганини қарангки, Чавандоз жаҳли чиқиб кетиб, бригадирликни бошқа бирорга топширишни талаб қилган эди:

— Ҳозир мендан бу ишни оламан деб овора бўлманг! — деб жавоб берди.

— Сабаб?

— Сабаб... озмунча меҳнатим сингмади бу пахтазорга. Аввал ҳосилни ўз қўлим билан йигиб-териб топшираман, кейин, марҳамат, хоҳлаган одамингизни қўйинг!

Лекин энг қаттиқ ботгани шуки, Чавандоз унга жавоб беролмай қолди, тўғрироғи, жавоб беришга улгуrolмади. Чунки Гулсумхон, бу гапларни шартта-шартта айтди-да, Чавандоз ўзига келиб, жавоб топгунча эшикни «қарс» ёпиб чиқди кетди.

Кўпдан бери бундай муомалани кўрмаган, фақат таъзимга ўрганиб қолган Чавандоз бу гаплардан вужуди заҳарга тўлиб, қоққан қозиқдай қотди қолди. Анчадан кейин ҳушига келиб:

— Шошмай тур,— деди муштини сиқиб.— Бошингга не кунларни солар эканман ҳали!

Лекин у бу гаплар билан ўзини қанчалик қамчиласин, кечқурун шаҳардан таниш терговчи чиқиб, учала йигитни баравар қамоққа олганда, яна кўнгли бир хил бўлиб кетди...

Иккинчи боб

Мана, инсон ҳаётида рўй бериши мумкин бўлган энг оғир, энг даҳшатли нарса юз берди! Халқнинг мард ўғлонлари урушда душман билан олишаётган бир маҳалда зўравонликда айбланиб қамалиш... Бундан ёмон нима бор? Ўлимми? Йўқ, ўлимдан ҳам ёмон бу!..

Машраб икки қўли бошининг орқасида, қоронғи хонада шифтга тикилиб ётиби.

Тўгри, бу чинакам қамоқхона эмас, қишлоқ советининг коровулхонаси, лекин номи қамоқ бўлгандан кейин...

Ундан нарироқда оёқларини деразанинг темир панжараларига тираб Қўчқор ётиби. Акмал эса бу ерга келгандан бери бурчакка тиқилиб, тескари бурилиб олган.

Дастлаб уларни бу ерга қамаб кетишганда Қўчқор унга тегажаклик қилиб кўрди. Бироқ Акмал қўйқисдан айиқдай бўкириб, шундай ҳамла қилдики, Қўчқор аранг чап бериб қолди.

— Ие, жинни бўлганми бу хом семиз?

— Ҳа, жинни бўлдим!— Акмал чопонини бошига ўраб ғужанак бўлиб ётиб олди.

Акмалнинг бунчалик эзилиши бежиз эмас, кеча терговчининг олдидан чиққанларидаёқ у ҳамма бало ўзи туфайли бўлганини сезди. Буни терговчи истиҳзоли жилмайиб: «Ҳамма қилғуликни ўзлари қилиб, тағин бошқалар устидан арз ёғдиришини қаранг буларни!» дегандаёқ тушунди, тушунди-ю, дўстларининг юзига қарай олмай қолди.

Рост, Эртоевларнинг устидан шикоят қилиш унинг хаёлига ҳам кириб чиққан эмас. Буни Машраб билан Қўчқор бошлади. Лекин улар бу ишни Акмалнинг кўнгли учун, унинг дадаси-ю, севгиси учун қилишди.

Акмал гоҳ дадасининг содда хатларини, кетаётганда: «Болам, укаларингни сенга, сени жудога тонширдим», деган насиҳатларини әслаб тўлганади, гоҳ Гулчехра, унинг сал дагалроқ, лекин жозибали қилиқлари кўса олдига келиб, ичи ёнади... Эҳ, қаёқдан ҳам бултурги воқеа бўлди-ю меҳрибонлик қила қолди бу қиз. Эҳтимол, ўшанда Акмал Гулчехрани ётиб олган эшагини бир телиб тургизаман деб, оёғи чиқиб кетмаганда, қиз эса шундан кейин Акмалнинг атрофида парвона бўлиб,

рўмоли билан сёғини боғлаб, меҳрибонлик қилмагандан ҳозир бунчалик бўлмас эди ў!..

Йўқ, на қамоқхонасидан, на сургунидан қўрқади Акмал! Гулчеҳрасиз ҳаёт керак эмас унга! Гулчеҳрадан айриладиган бўлса... отиб юборишсалар ҳам пинагини бузмайди. Ишқилиб, дўстларига зарари тегмаса бўлди — бошқасидан қўрқмайди.

Қўчқор унинг хаёлидаги ўйларини билади ва ичидага кулади. У Акмалга тегажоқлик қилишининг сабаби ҳам шунда. Бу билан уни аҳмоқона ўйлардан халос қилмоқчи бўлади.

Ҳа, Қўчқор ҳали кўриб қўяди ким енгиб чиқаркан бу курашдан? У кеча терговчига ҳам худди шу гапни айтди. Умуман, у ҳар қандай синовга тайёр, фақат битта нозик масала бор. У ҳам бўлса... ойиси!

Ойисига оғир. Қўчқор шу топда ойиси қанчалик эзилиб, хунибийрон бўлиб юрганини билади. Юраги тошдан ясалган эмас — ақли етади бунга. Бироқ... наchora? Қўчқорми унга шундай нопок одам билан бир ёстиққа бош қўй деган?

Хаёл уни ҳар қаёққа олиб қочади. Отасининг қандайдир бўлакча меҳрга, кузпишар олманинг ҳидидай ҳазини муҳаббатга тўла сўнгги мактуби эсига тушиб, қўнглидаги эски дард яна қўзғалади... Ушандан кейин отасидан хат келмади. Тирикмикин ё ўқча учиб, бир жойда қолиб кетдимикин?

Қўчқор чуқур тин олиб, бир ёнига ағдарилиб ётди, бу ўйлардан қутулиш учун Машрабга гап қотди:

— Ҳа, девонаи Машраб? Жандасидан айрилган қаландардай тўмтайиб қолдинг? Гапирсанг-чи бундоқ!

— Э, қўй! Қўнгилга қил сиғмайди!

— Ке, бўлмаса қуҷоқлашиб бир йиғлашайлик! — деди Қўчқор.— Бунақа экан, йўғонлар билан олишиб бало борми? Ё «Олишмагин арбоб билан, арбоб урар ҳар боб билан» деган гапни эшитмаганмисиз, ўртоқ шоир?

— Бўлмаса нима қилайлик, рақсга тушайликми?

— Рақсга тушмасанг, гаплашиб ётайлик бундоқ, тонг отсин!

— Усиз ҳам тонг отяпти. Эшитяпсанми — эшак ҳанграяпти.

— Э, бор-э! — деди Қўчқор.— Ётавер бўлмаса ўз ёғиннга ўзинг қоврулиб.

У тескари ўгирилиб чопонини ёпиниб олди. Хиёл утмай хуррак ота бошлади.

У чиндан уйқуга кетдими ё Машрабнинг ғашига тегиш учун жўрттага шундай қиляптими — буни билиш қийин. Лекин Машрабнинг кўзида уйқудан асар ҳам йўқ.

Унинг ўйлари шамчироқ атрофида айланган парвонадай ҳамон бир нарса теграсида айланади: наҳотки уларнинг хати областдан Эртоевнинг ўзига қайтган бўлсал Қайтмаса нега кеча терговчи аризабозлик тўғрисида пичинг қилди? Умуман... Наҳот шунча номаъ қулчилик қилган одамлар қутулиб кетса-ю, булар гуноҳкор бўлиб чиқса? Ҳозирги замонда-я? Совет ҳокимияти даврида-я?..

Йўқ, бундай бўлиши мумкин эмас! Рост, кўп нарса Гулчеҳрага боғлиқ. Кечаки терговчининг гапидан ҳам шу нарса аён бўлди. Умуман, тергов, айниқса, терговчи Машрабнинг дилида ғалати таассурот қолдирди.

Одатда «терговчи», «прокурор» деганда Машрабнинг кўз олдига гаплари қатъий, кўзлари ўткир одам келарди. Бу эса худди Эшвой экспедитордай хўппасемиз, ҳар бир қоши мўйловдай келадиган, кўрган кишининг лабида табассум уйготадиган ғалати бир одам эди. Узиям сўроқ пайтида кулиб, ҳатто асқия қилиб ўтирди.

Иигитларнинг олдига савол-жавоб қогоенини сурниб қўяркан, кулиб деди:

— Мана бу... ёлғон гапирсан ойимни Учқўргонда кўраман, деган қоғоз. Марҳамат, табаррук қўлларини қўйисинлар!

Кейин, ҳар биттаси бир мўйловдай пахмоқ қошлирини силаб, ҳазиллашди:

— Аттанг, шундай йигитмисан йигитлар хотин ол-гиларишг кепти, бунақа қиз опқочиб юргунча, ўаимга учини чиқарсаларинг-ку, онаси ўлмаганидан топиб берардим.

Қўчқор бошини ликиллатиб:

— Аттанг, сиздай меҳрибон акамиз борлигини бил-мапмиз-да,— деганди:

— Мана энди таниб қўясиз! — деб яна кулди.

Фақат «суҳбати умумийдан» кейин йигитларни битта-битта чақириб сўроққа тутгандагина ўтган гапларни суринтирган бўлди. Ӯшаидаям, гоҳ ҳандалакдан олиб,

гоҳ:— Аттәнг, қиз билан битишмапсанлар-да, қиз билан битишганларингда-ку, олам гулистон, түя кўрдингми — йўқ, бия кўрдингми — йўқ!— дея ҳазиллашиб ўтириди.

Лекин, гарчи унинг гап-сўзлари ва тақаёттан айблари кулгили кўринмаса-да, одам қўрқулик эди. Чунки Ёдгорбекнинг зўравонлигини кўрган тирик бир жон йўқ, Гулчехра бўлса... Биринчидан, ҳали у нима деб, нима қўйиши номаълум, иккинчидан, башарти чинини айтганда ҳам, унинг гапи инобатга олинмаслиги мумкин, негаки, улар қизни йўлдан уришган эмиш!..

Машраб, азбаройи куйиб кетиб, Эшмат акадан гап очган эди, терговчи:

— Эшмат акани қўйиб туринг, олдин Акмал акадан гапириинг,— деб пичинг отди, сўнг, тўсатдан калта, йўғон қўлини ҳавода силкитиб, бунақа номаъқулчилкларга йўл қўймаслигини, Совет ҳукумати, совет қонуни олдидаги жавоб беражакларини гапириб кетди.

...Совет қонуни дейди-я! Қонунни ҳимоя қиласиган одам ўзи оқни қора, қорани оқ қилиб турибди-ю, тагин қонундан гапиради!

Олдин дарча тақилладими, ё аввал аёл кишининг изтиробли овози заштилдими — Машраб буни ажратолмай қолди.

— «Болам... Болажоним!»— изтиробга тўла майин овоз яна такрорланди.

— «Ойим! Йўқ, бувим!»— Машраб пастки ойна ўрнига ёпиширилган қоғозни йиртиб, синчиклаб қаради:

— Ойи!.. Буви!..

Фира-шира қоронғиликда аёл кишининг рўмол ўраган боши кўринди.

— Болам! Қўчқоржон!

— Фотима хола!— Машраб шошиб Қўчқорни туртди.

— Тур, ойинг келди!

— Ойим?— Қўчқор уйқу аралаш тимирскиланиб деразага ўтди. У ойисининг келишини кутмаган, яна тўғрироғи, истамаган бўлса ҳам, кўнгли аланечук бўлиб:

— Ойи!— деди.— Нима қилиб юрибсиз яrim кечада?

Фотима хола жавоб бермади. Бошини темир панжарага суюб, пиқ-пиқ йиғлаб юборди.

Қўчқор, томоги ғип бўғилиб, шипшиди:

— Ойи! Ойи дейман?

Фотима хола нимадир деб пичирлар, бироқ «пикник» йиги орасидан гапларига тушуниб бўлмас, фақат ўз-ўзидан койиниб, куйиб, дилида тўпланган дардларни тўкиб пичирлаётганини сезиш мумкин эди, холос.

Қўчқорнинг дилидаги гина-кудурат, ойисига нисбатан сўнгги кунларда кучайиб бораётган норозилик—ҳаммаси бир зумда тўзғиб кетди, онанинг кўз ёши гўё бир сел бўлди-ю, қалбидаги ҳамма ғуборни ювиб ташлади.

— Ойи,— деди у, кўнгли юмшаб.— Ҳеч гап бўлгани йўқ, эрта-индин чиқаришади ахир!

— Вой ойигинанг айлансин, болам,— деди Фотима хола.— Бу Чавандозга тегмай ўла қолсам бўлмасмиди мен, қуруним, ўла қолсам бўлмасмиди?

— Бас, ойи!— деди Қўчқор.— Бас, ё бўлмаса...

Гарчи, «ё бўлмаса» нима қилишини Қўчқор ўзиям билмаса-да, унинг бўғилиб айтган бу гапи Фотима холани сал ҳушига келтириди. У кўз ёшларини шошиб артди-ю, кичик бир тугунни узатди.

— Ма, болам. Қулча билан сарёғ. Пича палови ҳам бор. Кечаси даданг меҳмонларга ош дамлатувди, томоғимдан ўтмади.

— Раҳмат, ойи. Энди кетаверинг. Эрта-индин қўйиб юборишади. Сира хавотир бўлманг.

— Қўйиб юборишса уйга борасанми?!

— Бораман ойи, бораман. Кетаверинг... Боринг...

Қўчқор қаттиқ қисташига қарамай, Фотима хола нималарнидир пичирлаб яна анча турди, кейин кўз ёшларини рўмолининг учига арта-арта ғойиб бўлди.

Қўчқор дарҳол Машраб билан Акмални туртди.

— Қани турларинг, лапашанглар, қоринни тўйғазиб олайлик, кейин бир гап бўлар!

Кўпдан бери ош тугул, унинг таъмини ҳам унута-ёзган учта нор йигитга бир коса палов нима бўлади? Ошдан кейин патирни ҳам туширишгач, Қўчқор қорнини силаб хушнуд кулди:

— Аммо-лекин, шунаقا ошлардан бўлиб турса, бир ҳафтада бўрдоқи бўлиб кетардик, лаббай?

— Ҳа, сени бўрдоқи қилиш учун олиб келишганси бўтга!— пўнғиллади Акмал.

— Мени семиртириш учун, сени оздириш учун,— яна кулди Қўчқор.

Тонг палла эшик орқасида қандайдир ғовур-ғувур кўтарилиди, кейин таниш ғазабли овоз әшитилди.

— Қани, эшикни очинг, оқсоқол!

— Хафа бўлмайсия, партком ука, терговчидан беруҳсат...

— Терговчига ўзим жавоб бераман!

Машраб Қўчқорни уйғотди.

— Комил ака!

Учови ҳам қулоқларини әшикка тутиб, қотиб қолишиди.

Лекин, Комил қанча ялиниб-ёлвормасин, қоровул:

— Сира иложи йўқ, ука, овқат бераман десангиз, майли, аммо кўришишнинг иложи йўқ,— деб туриб олди.

Комил, ҳафсаласи пир бўлиб:

— Милиционер бўп кетинг-э!— деди-да, турс-турс юриб, дераза томонга ўтди. Дарчадан қуйилиб турган ёргуликни тўсиб ичкарига қаради.

— Ишлар қалай, лочинлар?

Сал сепкил юзи офтобда куйиб, аллақандай жигар ранг тусга кирган, ўзинг ярашган кўк кўзлари кулимсираб турибди.

Ёйгитлар гўё дилларига нур тушгандай бўлиб, баравар жилмайишди:

— Мана, ётибмиз маза қилиб!— деди Қўчқор.

— Ҳа, дуруст,— кулди Комил, кейин чеҳрасида табассум сўниб, кўзлари қисилди.

— Тоғдан кечаси қайтувдим,— деди у.— Келсан шу гап. Мен ҳозир ҳаммасини суриштираман. Сенларда айб йўқ. Қаттиқ турларинг, уқтиларингми?

— Уқсанда қандоқ!— деди Қўчқор, қувончи ичига сифмай.

— Хўш, мен нима дегандим? Чинакам кураш мана энди бошланди. Ҳа!

Комилдан кейин сал ўтмай Моҳира буви келди. Юм-юм йиглаб дарчадан тугунини бериб кетди. У дарвозадан чиқар-чиқмас Акмалнинг ойиси Солия хола келди. У деразага ёпишиб олиб, ҳадеб бир гапни такрорларди.

— Нималар қилиб қўйдинг, болам? Даданг бўлса

ҳам бир сари эди, ҳолимиз нима кечади, энди, худо-йим? — деб лаблари титраб, ўксиб-ўксиб йигларди.

Йигитлар учовлашиб уни зўрға тинчтиши, кейин, навбатма-навбат дарчадан мўралаб, Комилнинг йўлини пойлашди. Лекин кун ботди ҳамки, Комилдан дарак бўлмади.

* * *

Йигитлар воқеасини Комилдан олдин эшитган ва ундан ҳам қаттиқ ғазабланганлардан бири — Инобат эди.

Уша куни эрталаб у бир-икки мўйсафидларни олиб, даштга кетган, мақсад — кузги буғдойга ер танлаб, қилинадиган ишларни мўлжаллаб қайтиш эди.

Кун илиқ, куз офтоби ипакдай майнин, қизгиш шивоқ билан қопланган кенг дашт олтиндай товланиб соқин мудраб ётар, кишини ўйчанликка, ёруғ эсдаликларга ундар, Инобатнинг кўнгли ҳам шунга мойил эди.

Сўнгти пайтларда ишлар анча юришиб қолди. Ёзда чекилган қийинчиликлар, қилинган оғир меҳнат беҳуда кетмади: пахта яхши бўлди, колхоз районда биринчи бўлмасада, ҳар қалай илгорлар сафида боряпти. Айниқса Қизил Армия фондига беш юз минг сўм ўтказиб, алоҳида танк заказ қилишга қарор қилгандан берни, колхознинг обрўси ошиб кетди. Энди биттаю битта ташвиш қолди, у ҳам бўлса кузлик буғдойни экиб олиш.

Рост, экишининг ўзидан ҳам кўра уруғлик топиш қиёйин бўляпти, чунки, ёзда уруғлик топиб беришни баъда қилиб, бор галлани топширишга мажбур этган одамлар ҳозир ҳеч нарсани билмаган бўлиб, четга чиқиб туришипти. Энди фақат битта йўл — қозоқ даштига әшак карвонни юбориб, қарз галлани олдириш қолди, холос! Шунинг учун ҳам йигитлар тўғрисидаги хабар Инобатни титратиб юборди.

Инобат ёзда, Эшвой қўлга тушгандан кейин йигитлар Чавандоз билан чаплашиб қолганини билар, яқинда бўлган Гулчехра можаросидан ҳам хабари бор эди. Лекин... Наҳот бунинг учун ҳамашса? Ахир бу иккала воқеада ҳам йигитлар ҳақ-ку? Борингки ҳақ бўлмасин, борингки, қизиққонлик қилишиб, сал ошириб юборишган тақдирда ҳам, наҳот шундай долзарб пайтда уларни ҳамаб қўйиш ақлдан бўлса?

Инобат шу чопганича, саман йўргаси кўпикка ботиб, қишлоққа қош ҳорайганда кириб борди.

У бир ўйи тўғри қишлоқ советига кириб, Чавандоз билан гаплашмоқчи эди, кейин: «Олдин бир суриштириб кўрай-чи, нима гап экан?» деган хаёлга борди да, Гулсум опа бригадасига бурилди. Бурилди-ю, боши балога қолди. Чунки йигитлар ўрнига хирмонда қопқанорларга пахта тиқаётган қиз-жувонлар унинг ўзига ёпишиб кетишиди: «Уч бегуноҳ йигитни баравар қаматиб қўйиб, қаёқларда юрибсиз, раис опа?» дея чақиб-чақиб олишиди. Бунга Гулсум опа билан Серафима Фёдоровнанинг босиқ, лекин аламли гаплари қўшилди-ю, Инобат ҳеч қаёққа бурилмасдан тўғри қишлоқ советига кирди.

Чавандоз қаёққадир кетган, лекин терговчи — ҳар бир қоши бир мўйловдай келадиган юм-юмалоқ, семиз одам — қишлоқ советининг ҳовлисида, катта шотутнинг тагидаги сўрида, терга ботиб чой ичиб ўтиради.

У Инобатни очиқ чеҳра билан қарши олди, кўйлагининг тугмаларини иларкан:

— Э, оламда бормисиз, опажон? — деди хушнуд жилмайиб.— Қишлоғингизга йўқлаб келсак ҳам кўринмайсиз?..

Инобат сўрининг четига омонатгина ўтирди.

— Худди яхши иш билан келган одамдай гапирамиз...

Терговчи, мунчоқ кўзлари қисилиб, хаҳолаб кулди.

— Бизнинг ишимиз ўзи шунаقا... ёқимсиз иш бўлса нима қиласиз, опажон?

Инобатга унинг кулгиси ҳам, гап-сўзлари ҳам жуда бачкана кўринди-ю, гапни чўзгиси келмай:

— Бу ишингиз... чиндан бўляптими, ўзи? — деб сўради.

Терговчи лиёлада чой узатаркан, яна қулимсиради:

— Яъни?

— Яъни, йигитларни чиндан қамамоқчимисиз ё пўписа қилмоқчимисиз?

— Ҳмм... — терговчи ҳақорат қилинган одамдай, қовоғини солди.— Ғалати гапларни гапирасиз-а, опажон?

— Ғалати бўлмаса... айтинг-чи, шу йигитларга қўйилаётган айбга ўзингиз ишонасизми?

— Балли! Биз ҳам худди шуни ҳақиқат қилгани келдик-да, жон опа!

— Ҳақиқат! — деди Инобат. — Ниҳоят буни ҳақиқат қилиш учун шундай „олзарб кунларда колхознинг энг яхши, энг ишчан учта йигитини баравар қамаб қўйисангиз?

Терговчининг лабидаги табассум секин сўнди, мўйловдай қошлиари тулашди.

— Биринчидан, — деди у, — қамаган бўлсак, бунга прокурорнинг санкцияси бор. Иккинчидан... тергов қиллаётган сизми, опажон, ё бизми?

— Сиз! — деди Инобат кескин. — Бироқ чин терговчи бўлсангиз ҳақ гапни айтинг! Бўлмаса... ҳақиқатга қарши бораман деб, мансабингиздан айрилиб қоласиз мулла ака!

Инобат бунинг ҳаммасини шартта-шартта айтди-да, шахт билан ўрнидан турди. У кескин бурилиб ҳовлидан чиқаркан, терговчи сўз тополмай анграйиб қолганини кўрди.

Эрталаб кун чиқар-чиқмас Инобат Қурбон ота билан бирга райкомга борди.

Терим бошланганидан бери заготпунктда туриб, борган пахтани лешма-леш топшираётган Қурбон ота бирдан икки арава тўхтаб қолганидан хуноби чиқиб, қишлоққа келаётган экан, ярим йўлда Инобатга учраб қолди-ю, унинг райкомга бораётганини эшитиб, орқасига қайтди.

Райком секретари Умаров бир ёққа кетаётган бўлса керак, бошида қишки телпак, эгнида ҳарбий шинель, «қорни катта» папкасига нималарнидир жойламоқда эди. Ҳамиша вазмин, камгап одам, бу сафар Инобат билан Қурбон отани бир талай илиқ сўзлар билан қарши олди.

— Э, келинг, отахон!.. Ҳорманг, Инобатхон! Газетага чиққандан бери бизларни назарга илмай қўйдингиз, дейман, лоақал бир келиб ҳол-аҳвол ҳам сўрамайсиз?

Инобат ёш қизчадай «дув» қизарип:

— Қанақа газета? — деди тушунмай.

— Ҳали ўқимадингизми? Ана холос!.. — «Фронтга алоқида танк заказ қилган ватанпарварлар!» деб ёзиб чиқишиди-ю! — Умаров кулимсираб «семиз» папкасидан газета олиб Қурбон отага чўзи.

Қурбон ота бурнига кўзойнагини қўндиаркан:

— Аммо лекин, ўзиям мақтаса араигудек маладес иш бўлди-да, ўртоқ Умаров!— деб хитоб қилди.

Инобат газетадаги хабарни ўқишидан ийманиб, кўчага тикилди, сўнг:

— Ундан кўра... қишлоқдаги ажойиб ишлардан гаплашайлик, Умаров ака!— деди секин.

— Нима гап? Тинчликми ўзи?— Умаров бошидаги телпагини олди, оппоқ соchlарини силай-силай Инобатнинг рўпарасига бориб ўтири.

Инобат уф торти:

— Тинчлик бўлса тонг отмасдан сизнинг олдингизга чопиб нима қилардик, Умаров ака?— деди, овози титраб.— Ҳар бир одам олтинга тенг бўлиб турган бир маҳалда уч азамат йигитни бегуноҳ-бесўроқ қамаб қўйишишса... бунга нима дейсиз ахир!

— Бегуноҳ дейсизми!— Умаров кўзларини юмид пешанасини ишқалади.— Менга уларни ёш қизга зўравонлик қилишган дейишувди-ю?

— Зўравонлик қилишган бу азаматлармикин, ё Чавандознинг қутуриб юрган ўғлимикин?

— Между прочим, бу йигитларнинг таърифини билгингиз келса мана мендан сўранг!— Қурбон ота бошида фуражкаси қалтираб йигитларнинг ёздаги ишларини хикоя қилиб берди. Унинг галини Инобат илиб кетди. У бўлган воқеаларни битта-битта айтиб бергач, тўсатдан:

— Эсингиздами, ёзда қозоқ даштларидан оламиз деб, уруғлик ғаллани ҳам топшириб юборувдик,— деб сўради.

Умаров хижолат чекиб йўталди.

— Ҳа, эсимда...

— Эсингизда бўлса... Пахта терими ҳам майли, бир бало қиласиз. Бироқ кузлик буғдой экилсин десангиз... бу уч йигитнинг ишини бир ёқли қилиб беринг. Бўлмаса... Қозоқ даштидан буғдой олиб келадиган одам йўқ колхозда!

Инобат қизишиб кетиб, писандага ўтганини эиди пайқади-ю, уялиб ерга қаради. Бироқ Умаров буни сезмади, у бир-бир босиб тўрга ўтди, трубкани олиб прокурорни, кейин Эртоевни сўради. Лекин ҳар иккалasi ҳам топилмади шекилли, трубкани жойига қўйиб, Инобатга юзланди:

— Хўп. Мен прокурорга ҳам, Эртоевга ҳам тайин-

лаймак: терговни тезлатишсин. Бир-икки кунга қолмай масала ҳал бўлади.

Инобат Эртоевнинг исмини эшитганда баданига изғирин теккандай сесканиб кетди, бир ўйи: «Эртоев аралашмай қўя қолсия шу ишга!» демоқчи ҳам бўлди-ю, райком секретари «нега» деб сўраса тузукроқ бир далил келтира олмаслигини сезиб индамади.

Бу гапдан кейин икки кун ўтди. Лекин умид уйготадиган биронта ҳам хушхабар эшитилмади.

Бугун эрталаб Инобатнинг олдига Серафима Фёдоровна билан Гулсум оға кириб келишди.

Нима қилиш керак? Яна райкомга бориш керакми? Ё тўппа-тўғри обкомга борган маъқулми?..

Инобат шу ўйлар билан боши қотиб ўтирганида юзлари қорайиб, соқол-мўйлови ўсиб кетган Комил кириб келди.

* * *

Комил Инобатнинг саман йўргасида қишлоқдан чи-киб кенг дашт қўйнига киаркан, негадир кўз олдидан ўша илиқ, серюлдуз ёз оқшоми кетмас, «Қоровултепа»да уни кутиб ўтирган уч йигит, уларнинг гаплари, ҳандайдир бўлакча бир дўстлик туйғуси билан кузатиб ҳолишлари қайта-қайта эсига тушарди.

Инобат билан Серафима Фёдоровнанинг гаплари етмагандай, Комил саман йўргани етаклаб дарвозадан чиқаётганида Барно учради.

У олдин ийманиб маъюс кўзларини Комилдан олиб қочди, кейин бош иргаб саломлашди-да:

— Эшитдингизми? — деди оҳиста.— Машрабларни айтаман?..

— Эшитдим...

Барно бошини яна ҳам пастроқ эгди:

— Бу ўшанинг... ўша одамларнинг иши,— деди эшитилар-эшитилмас бир товушда.

Комил ундан бу гапни кутмагани учунми, бир нафас тикилиб қолди.

— Биламан. Мана, шу тўғрида гаплашгани кетяпман.

Барно «ялт» этиб қаради. Унинг маъюс кўзларида аллақандай илиқ меҳр порларди!

Мана энди Комил катта йўлда Инобатнинг саман йўргасини елдириб бораракан, Барнонинг қарави юраги-

ни бир ғамгин ҳисларга тўлдирап, бир хаёлида аламли ўйлар қўзғарди.

У урушда ўлим ҳавфи остида душман билан олишиб юргани чоғларида фронт орқасида бунака ҳодисалар бўлишини хаёлига келтирганими? Ёлғиз Комил эмас, у билан ёнма-ён туриб жанг қилган ҳар бир йигитнинг назарида, бутун эл, ёш-қари, ҳамма фақат бир ўй, бир ният билан яшар, у ҳам бўлса, Ватан тупрогидан душманни ҳайдаб чиқариш, ғалаба қозониш эди! Чунки эркинлик ва адолат учун кураш бўлаётган бу улуғ айёмда бирорта ноҳақлик рўй беришини ўйлашнинг ўзи бемаъни кўринарди. Битта-яримта нопоклар топилса ҳам, улар урушдан эсон-омон қайтганларнинг кўзларига тик қарай олмасликларига, ғолиблар олдида «ер бўлиб» кетишлирага ишонишар эди.

Комил бу ўйлардан дам вужудини алана олар, дам хаёлида Эртоев билан баҳслашар, дам райком секретари ёздаги жанжални босди-босди қилиб юборгани эсига тушиб, хуноби чиқарди.

Шанда, Эртоев ўзбошимчаликда айблаб, масаласини райком бюросига қўймоқчи бўлганида, Комил бир жиҳатдан қувонган эди. Бюро кўрадиган бўлса, Эртоев билан бир беллашмоқчи, агар боши кетса ҳам, бор гапни бир айтиб қолмоқчи эди. Бироқ, бюрга чорак соат қолганда райком секретари Комилни чақириб олиб, бу масала кўрилмаслигини айтиб қолди. Комил унинг гапига тушунмай:

— Қачон кўрилади бўлмаса? — деб сўраган эди, райком секретари мулойим жилмайди-да, Комилнинг елкасига қўйини қўйди.

— Умуман... машоқ масаласини кўтармоқчи эмасмиз, — деди. — Ватан урушининг қаҳрамони унча-мунча хатога йўл қўйса қўйибди-да энди!

Комил қизарип:

— Эртоев ҳақ экан-да бундан чиқди! — деган эди, райком секретари ундан ҳам мулойимроқ бир оҳангда:

— Мен уни ҳақ деяётганим йўқ, — деди. — Лекин... қаттиққўллик қилган бўлса... шахсий манфаати учун эмас-ку, ука. Ўзингиздан қолар гап йўқ. Ватан талаб қилияпти буни!

Сўнг Комилга ўйчан тикилиб қўшимча қилди:

— Битта фронт ҳам етар, бу ерда яна бир фронт очиб юрмайлик, қўйинг шу гапни, иним!..

«Ўз манфаати учун эмас, фронт учун!»

Комил ҳам шундай деб ўйлаган эди, шундай деб ўйлагани учун ҳам унинг баъзи хатти-ҳаракатларини кечирган, ҳатто бошда ҳурмат қилиб юрганди. Лекин энди... Пичоқ суюкка бориб тақалди. Жим туриш мумкин эмас энди!..

Комил шу тарзда ўзи билан ўзи баҳслаша-баҳслаша тап-тақир адирларни босиб ўтиб, кузнинг нафис сарғиши дуррасини ўраган шаҳар боғларига кириб борганида, офтоб ғарбга ёнбошлаган, шаҳар кўчалари сояга кўмилган эди.

Райком биноси негадир кимсасиз ва жимжит.

Комил ҳайрон бўлиб, зинапояга қадам қўйганида ичкаридан таниш секретарь қизи чиқиб қолди. У Комил ичкарига киришидан қўрққандай шоша-пиша ҳамма секретарлар областга кетганини айтди ва бир жилмайпб қўшимча қилди:

— Бир-икки кун беғалла дам олишингиз мумкин, Комил ака!

Комил Инобатнинг бояги гапларидан кейин тўғри обкомга кетаверсаммикин, деган хаёлга борган, бироқ райком секретарига учрамасдан туриб, областга чопишни яна эп кўрмаган эди. Энди нима қилади? Кетаверадими?

У хаёлга чўмганича отининг жиловидан ушлаб орқасига қайтаркан, муюлишдан қорабайир қўшилган таниш извош чиқиб келди. Извошда... Эртоев ўтиради!

Эртоев уни кўриб, отининг бошини бурди, яқин келгач, енгилгина сакраб ерга тушди:

— Э, Комилжонми? Келинг, ука!

Комил сабабини ўзи ҳам англай олмаган ғалати бир ҳолга тушшиб:

— Ҳа шу... — деди.— Секретаримиз билан бир гаплашмоқчи эдим.

— Тинчликми ўзи?— Эртоев бошидан шляпасини олиб, қалин қора соchlарини силади.— У кишини обком чақирганлар. Ҳозир телеграмма келди — мен ҳам эрталаб кетяпман!— Эртоев Комилдан гап кутиб кўзига тикилди, жавоб ололмагач, кулиб сўради:

— Ўзи нима гап? Сир эмасми?

— Йўқ, сир эмас. Мен ноҳақ қамалган ўспириналар тўғрисида гаплашгани келувдим. Уртоқ Умаров сизга айтган бўлишлари керак...

— Ҳа, айтувдилар. Лекин... ноҳақ эканини қаёқдан биласиз, дўстим Комилжон? — Эртоев чиройли катта кўаларини қисиб, билинар-билинмас жилмайди.— Ёки бизнинг жазо органларимизга ишонмайсизми? «Гапни буришини қара, абллах!»

— Жазо органларимиз эмас,— деди Комил,— юборган терговчингиз ҳақ бўлса... нега чинакам ўғрилар, чинакам зўравонлар ҳозиргача озодликда-ю, бу ёш ўспириналрга тұхмат қилинади?

Эртоевнинг қисилган кўзлари қоронғида «ялт» этган пичноқдай йилтиллаб кетди. Бироқ Комил ҳам қадалиб турганини кўриб, юзини четга бурди.

Бошқа пайт ва бошқа одам бўлганда-ку, Эртоев, нима дейишни ўзи биларди. Лекин райком секретари нинг терговни тезлатиш ҳақидаги топширигидан кеинин, энг муҳими, ҳозир яхши хабар билан обком чақирирган бир вазиятда бу фронтовик йигитни силтаб ташлаш... мақсадга мувофиқ бўлармикин? Айни замонда, унинг олдида ўзини паст олса... ҳаддидан ошиб кетмасмикин бу йигитча?

Эртоев томоқ қириб олгач:

— Биринчидан,— деди ўзини босишга уриниб,— терговчи менини эмас, Совет ҳокимиятиники бўлади, ўртоқ Жалолов. Иккинчидан, кимки жиноят қилган бўлса—ўзига яраша жазосини тортади. Учинчидан, менга кўп писайда қилавермасдан, даъвоингиз бўлса... ўша органларнинг ўзига мурожаат қилинг, ука... Сизни фронтовик деб ҳурмат қилганда эшитган гапимиз шу бўлдими?.. Андишанинг номи қўрқоқ бўлмасин-да, дўстим.

— Ҳурматингиз шу бўлса... раҳмат!— деди Комил.

— Назаримда, сиз мени ҳеч нарсани билмайдиган бир гўл деб ўйлаётганга ўхшайсиз.

Эртоев ён-верига бир аланглаб олди, ғаши келиб:

— Масалан, нимани биладилар?— деди.

— Масалан... урушда юрган йигитларнинг қайлиқларини йўлдан ураётган раҳбар ўртоқларни ҳам била-миз!

Эртоев, ранги бўздай оқариб, деди:

— Яна қанақа тұхматлари бор раҳбар ўртоқларга нисбатан?

— Тұхмат эмас, ҳақ гап бу! Софдил йигитларга бўхтон ортиш, халқ мулкига қўл чўзган Эшвой қочоқ-

ни ўз қанотига олиб, унинг уйда хотинбозлик қилиш, урушда дом-дараксиз кетган бир йигитнинг севгилиси-ни йўлдан уриш!.. Барнохон...

— Бўлди! Бунақа тұжматларингиз бор экан, истаган жойингизга шикоят қилишингиз мумкин. Аммо шуни билиб қўйингки, раҳбар ходимларга тұжмат қилиб, уларнинг обрўсини тўкишга ҳеч ким йўл қўймайди.

— Қўрқитманг!

— Мен қўрқитаётганим йўқ, огоҳлантиряпмац холос!— Эртоевнинг юзига қон югуриб, лабларида бояги истеҳзоли табассум пайдо бўлди.— Эшвой-Тошвойнгизни билмайман. Аммо... Барнохон масаласида... Сизнинг рашкингиз келса ҳам айтай... У қиз ўзи менга қўнгил берса... мен нима қилай? Йигит одамсиз... биласиз.

Комил Барнонинг маъюс порлаган қуралай кўзларини зслаб, қалбида нимадир портлагандай бўлди.

— Елғон!— у бу гапни жуда секин, ҳатто пицирлаб айтди. Бироқ унинг бу пицирлашида, оппоқ оқарган юзидай шундай даҳшатли бир ифода бор эдики, Эртоев бир лаҳза индамай турди, сўнг, оғир тебраниб извошига чиқди, лекин стининг жиловини силташдан олдин, атрофига яна бир кўз ташлаб, деди:

— Майли, ука. Бу ишларда мен айбдор бўлсаму, қўлингизда фактларингиз бўлса — билганингизни қиласиа!..

Эртоев жаҳл билан отига қамчи босди.

Комил ариқ бўйидаги толга суянганича узоқ турди. У худди иситмаси ошиб кетаётган хастадай, ҳамон қалт-қалт титрарди.

«Раҳбар ходимларнинг обрўсини тўкишга ҳеч ким йўл қўймайди!..» Топган гапини қара, муттаҳам! «Узи қўнгил берса... мен нима қилай?..»

Комил сўнгги пайтларда Барно аллақандай чўкиб, эзилиб юрганинни зслади-ю, ўзидан ҳам норози бўлди. Нега бирон марта чақириб гаплашмади, ҳол-аҳвол сўрамади ундан?

Комил чуқур тин олиб, эгарга қўл чўзган эди, кимдир елкасига қўлини қўйди. Комил бурилиб қаради: ёнгинасида протевли оёғини гичирлатиб, ҳарбий комиссар Абубакиров турарди.

Чуқур ботган қисиқ, күзларида, ёноқлари туртиб чиққан кенг юзида, юпқа лабларида майин табассум.

— Мен сенга боя телефон қилиб тополмадим, Жалолов! — деди Абубакиров. — Қишлоғингга эрта-индин биздан комиссия чиқади, ёшларни рўйхатга олади. Ёрдам берасанми?

— Қўлдан келган ёрдамни аямаймиз, ўртоқ капитан.

— Раҳмат, старшина. Хўш, ўзинг бу ерда нима қилиб турибсан?

Комил бирдан юраги «шиғ» этди.

— Битта гап бор, ўртоқ капитан. Жангчиларнинг оиласарига нисбатан ноҳақлик бўляпти.

— Жангчиларнинг оиласарига нисбатан ноҳақлик? Бу қанақаси бўлди? Қани юр-чи, бир гаплашайлик!

У протезли оёғини силтаб босиб, ҳарбий комиссариат томонга йўналди, Комилнинг кўнгли бирдан ёришиб, унинг орқасидан зргашди.

* * *

Ўхшатмаса учратмас, деганларидек, Муяссар ҳам Машрабга ўхшаб ҳамиша осмони фалакда юрар, ўзиям Машрабдай шоиртабиат бир қиз эди.

Бу одат унга ота қонидан ўтганми ё Машрабдан юққанми, ёки бўлмаса у берган ишқий романлар таъсирими — буни айтиш қийин. Шу маҳалгача у турмушдаги ҳамма нарса китобларда тасвир қилингандек «тўппа-тўғри» деб ўйлайди, ҳар ишда яхши кўрган қаҳрамонларига тақлид қиласди, ўшалардай катта ишлар қилиш, севгида вафодор бўлиш, яхши кўрган йигитнинг қувончига шерик, дардига ҳамдард бўлиш орзуси билан яшайди.

Шунинг учун ҳам Машрабларнинг қамалиши ҳаммадан кўра Муяссарга қаттиқ тегди. Шу маҳалгача, бирорнинг тариқдай гуноҳини кечиришни истамай, комсомолчасига шартта-шартта гапириб, оловдай ёниб юрган қиз, биринчи марта ўйланиб қолди, биринчи дафъа ҳаётда ҳамма нарса у хаёл қилгандек тўппа-тўғри эмаслигини, баъзан нотўғри, ҳатто ноҳақ ишлар ҳам бўлиб туришини сезди. Сезди-ю, сўнгги кунларда атрофига тўпланган дугоналаридан мамнуни, қалбida ғунчадай очилиб келаётган илк севгининг тотли туйғула-

ридан маст бўлиб, шўх ишлаб, шўх қулиб юрган қиз энди тўсатдан вазминлашиб жимиб қолди.

Бу воқеа кўпларни қаттиқ газаблантирганини, Серафима Фёдоровна билан Иnobат опа тўполон қилаётганларини Муяссар ҳам биларди. Лекин, назарида, ҳамма, айниқса, алоҳида звено бўлиб ишләётган юқори синф қизлари ундан ниманидир кутишарди, уларнинг кўзларida гўё «ҳа, Муяссархон, комсорг деган ҳам шунаقا бўладими? Ҳаммасини кўриб-билиб туриб, индамай ўтираверасизми?» деган бир савол бордай туюларди.

У айниқса биринчи куни ўзини қаёққа қўйишини билмай, гўё кенг далага сигмай қолди, Машрабсиз гўё бутун қишлоқ ҳувиллаб қолган, ҳатто ипакдай нафис боғлар ҳам ўз латофатини йўқотган эди!

Кечқурун терган пахтасини топшириб уйларига ҳайтаркан, боғларидаги катта ариққа етганида, кўнглини бирдан ҳазин туйгулар чулгаб олди-ю, узоқ турди.

Ҳозир ариқда сув йўқ, тагида фақат кўк-сариқ япроқлар ётипти. Лекин мана, ўша ариқка салом бериб ўсган ва опаси Зебо билан Барнохонга оқизилган нақш олмаларни «тутиб» қоладиган кумуш жийдалар... Машраб иккиси худди шу ерда ўтириб бу олмаларни биттабитта териб олишар, ўйилган ҳарфлардан қайси олма қайси йигитники эканини билишар, сўнг «ёқмаган» йигитларнинг олмасини ўзлари еб, қолганларини Барнохонларга олиб бориб беришарди...

Эҳтимол, ҳар эслаганда қалбини илиқ бир нурга тўлдириб юборадиган бу ажиб ҳислар ўшанда, мана шу жийдалар тагида «поччалар»ни мазахлаб, ҳар бири пиёладай олмаларни карс-карс тишлаб, кулишиб ўтирганларida куртак очгандир?

Йўқ, бу илиқ меҳр қиз дилида ундан ҳам олдин, Гулсум опалар шаҳардан кўчиб келганда ва жуда билимдон кўринган Машраб ҳеч кимни менсимай юрган чоғларидаёқ уйғонган. Чунки Машраб, ўша маҳалларда ҳам тут пишгандан кейин уларнинг боғидан чиқмас, ҳозир аллақандай ҳазин куз либосига ўралиб турган ана шу шотутнинг тепасига чиқиб, Муяссарга дўппидўппи тут териб берарди...

Йўқ, у ҳам эмас, бу ҳам эмас, ҳаммаси шеърий китобларда, бирга ўқиган романларидан бошланди.

Бу ўқишилар аксарият Моҳира бувиникида, Шириннинг уйида, узоқ қиши кечаларида бўлар, ҳар хил гап-сўз тарқамасин деб, Муяссар бу кечаларга Гулчеҳрани ҳам бошлаб қеларди.

Бироқ Гулчеҳра билан Шириной қандай қизиқ китоб бўлмасин, тезда уйқуга кетишар, жинчироқ ёнида ёлғиз Машраб билан Муяссар иккиси қолишарди.

О, бутун қишлоқ уйқуга чўмган пайтларда танҳо ўтадиган бу сирли ва унудилмас кечалар!

Ташқаридаги бўрон увиллайди, шамолда чайқалган дараҳтлар ваҳимали шовиллайди, деразаларга урилган қор учқунлари эриб кўз ёшидай тирқираб оқади, гоҳо оёқлари бир-бирига тегиб кетадиган иссиқ танча ва жинчироқ ёрита олмаган ярим қоронги хона мухташам саройдай гўзал туюлади. Негадир, ўқилган севги китобларининг ҳаммасида қиз ўз севгисини, ўз қайноқ ҳисларини кўради, гўё бу китобларни ёзган шоирлар худди, уларнинг — Машраб билан Муяссарнинг муҳабатларини куйлагандай туюлади.

Машраб, соchlари тўзғиб, овози дам майин жаранглаб, дам ҳаяжондан титраб шундай чиройли ўқийидики, қиз унинг тўзғиган соchlарини силагиси, ўт чақнаган кўзларидан ўпгиси келади.

Лекин ўлиш тутул унинг қўлини ушлашга журъат қани қизда? Шунинг учун ҳам аксарият ярим кечада, истар-истамас тарқалишаркан, дилларида айтилмаган гаплари қолар, «яхши ётиб тур», «яхши тушлар кўр», деган оддий сўзларнинг тагида улар учун бир дунё маъно бўларди!

Кейин Муяссар, уйқуси қочиб, қоронги уйда узоқ ётаркан, дам Раъно бўлиб Машраб билан олис юртларга қочар, дам қаҳрамонона ишлар қилиб, унинг бошига тушган мусибатлар билан олишарди...

Мана, Машрабнинг бошига иш тушди. Бироқ қизнинг қўлидан нима келди? Опаси Зебога ўхшагандаку... бир йўлини топарди! Шу кечаю кундузда опаси Днепр бўйларида жанг қилаётган қўшинлар орасида эгнида гимнастёрка, елкасида алтечка, ярадорларни ўқ остидан олиб чиқиб, юзлаб одамларни ўлим чангалидан юлиб оляпти. Бу бўлса... нима қилиши мумкин? Кимга боради? Нима дейди?

Бу саволга кутилмаганда Барно жавоб берди.

Одатда Барно тушгача идорада ишлаб, паҳтага ке-

шиндан кейин чиқар, лекин аксарият Муяссарлар билан эмас, сельпо ва идора хизматчилари билан терарди.

Бу сафар у четроққа чиқиб қолган Муяссарнинг ёнидаги жўякка тушди, қўлидаги этагини белига боғларкан:

— Салом, Муяссархон,— деди мулойим.

Муяссар бурилиб қаради, саломига бош иргаб жавоб берди да, қўллари чаноқлар устида яна ҳам тезроқ уча бошлади: У бирорни хушламаса шундай қиласр, гўё «кечирасиз, вақтим йўқ», дегандай, жон жаҳди билан ишга ёпишарди.

Барно бир лаҳза қизнинг нафис эгилган нозик қоматига, чиройли қирра бурнига, эгик киприкларига тикилиб турди, кейин чуқур тин олиб, теримга киришиди.

У Муяссарнинг ёнига ҳар куни бўлмаса-да, гоҳо-гоҳо келиб туар, бироқ қиз ҳар сафар шундай қиласрди: баъзан кўрмаган бўлиб қўя қоларди, баъзан совуқчина саломлашади-ю, ишга киришиб кетади.

Муяссар уни кўп хушламаслигини Барно сезади, бунинг сабабларини ҳам билади, лекин шунга қарамай ўзини бу қизга, умуман, бу пок, шўх, самимий ёшларга яқинроқ олгиси келади.

Бу истак гажакдор жувонникида ўтган ўша машъум кечадан кейин бошланди.

Йўқ, Эртоев уни «алдаб» кетганий йўқ, гулни узишга узиб, сўлмасданоқ отиб юборадиган баъзи одамлардай, дарров «совиб қолмади, аксинча, унга янада яқинлашиш, уни тамом ўзиники қилиш пайига тушди. Айни замонда унинг муомаласида аллақандай, хўжайинларча ғурур, ўз ҳирсини қондирган одамларда бўладиган жирканчли бир дагаллик пайдо бўлди. Барно буни ўша кеча гажакдор жувонникида қолиб, Эртоевга ён беришга мажбур бўлгандаётк сезди. Ўша дақиқагача қизнинг қўлини ушлашдан ийманиб юрган одам, энди унинг аламли кўз ёшларига эътибор бермай, ўз ҳирсини қайта-қайта қондиришга уринар, кўраганини ишқаб хушиуд жилмаярди... Барно буни сезди-ю, қалбиди ғурур уйғотиб турган бир нарса сингандай, ҳаёти поймол бўлгандай туюлди.

Шу-шу, у негадир Ашрафжонни кўп эслайдиган бўлди. Биринчи марта у билан Тошкентда, анҳор бўйида учрашганилари, кейин қишлоққа келганлари, Аш-

рафжон кечалари боғлари атрофида танҳо айланиб айтадиган маъюс қўшиқлари, тўғон бўйидаги лайлак уя қўйган оқ терак тагида берган илк бўсаси, йигит унинг сочларини аллақандай қўрқиб, титраб силаганлари хаёлида жонланиб, ич-ичидан эзиладиган бўлди. Барно Муяссарга ва софдил ёшларга яқинлашгиси келиши нинг боиси ҳам шу. Буларнинг муносабатларида унга ўз ёшлигини, илк муҳаббатини эслатадиган ажиб бир софлик, беғуборлик бор. Рост, бу яқинлик унинг дилига таскин бермайди, аксинча, шу маҳалгача қалбини нурга тўлдириб турган аллақандай бир нарсадан айрилганини эсига солиб, усиз ҳам ўртанган юрагини баттар ўртайди. Лекин Барно, худди шам теграсидан кетолмаган парвонадай, ўзини яна ҳам яқин олгиси келади уларга.

Бугун Муяссар бурунгидан ҳам совуқ муомала қилди, ҳатто саломига жавоб ҳам бермади.

Илгари пайтлар бўлганда Барно унга қайта гапирмас, бошини мағрут силкитиб, индамай ўтиб кетарди. Лекин ҳозир аламини ичига ютди·да, қизга яқинлашди.

— Муяссархон,— секин чакирди Барно, лекин Муяссарнинг ёнида тераётган Лариса ҳам ўгирилиб қарганини кўриб, тортиниброқ сўради:

— Сиз... Гулчеҳрахон билан гаплашдингизми?

— Йўқ,— Муяссар бошини чайкади.

— Бўлмаса бир гаплашинг,— деди Барно.— Биладиган одамлардан эшилдим. Қиз қаттиқ туриб берса иш анча осонлашармиш. Терговчи қачон чақиради деб, кутиб ўтирмасин. Борсин, ҳақ гапни айтсан, ахир!

Барно бир Ларисага, бир Муяссарга қаради ва секин қўшимча қилди:

— Боя сиз... мен билан гаплашишниям хоҳламадингиз. Мен шунчаки... шуни айтиб қўймоқчи эдим...

У лаблари титраб, ерга қаради, кейин, ҳар жой·ҳар жойдан битта·яримта пахтани олиб, жадаллаб кетди.

Муяссар, кўзларини катта очиб, унинг орқасидан тикилиб қолди. У сўнгги пайтларда Барно нимагадир жуда мунғайиб қолганини пайқаб юрар, бироқ ҳар хил миш·мишлар қулогига чалиниб, унга баттар ўчакишар эди. Лекин ҳозир...

Муяссар юраги бир оразиқиб, ундан узр сўрашга оғиз жуфтлаган ҳам эдики, Лариса хаёlinи бўлди.

— Рост, Муяссар, Гулчехра билан бир гаплашайлик,— деди бўйнида кўпириб ётган соchlарини тўғрилаб.— Нега бундай қиласди? Бир нима десин ахир!

Муяссар кўзанини Барнодан узиб, бош иргади.

— Майли, бугун ишдан эртароқ бўшаб, бориб келайлик. Борасанми?

— Бораман,— деди Лариса.

* * *

...Эшикни Гулчехранинг ойиси — эллик ёшларга бориб қолган, раиг-рўйи заҳил, касалманд аёл очди. Қизларни кўриб бирдан ўзгариб кетди.

— Гулчехра уйдами?

— Ҳа,— деди аёл, истар-истамас ва дарҳол эшикни ёпди, чунки шу пайт ҳовлидан:

— Тағин ким келди?— деган овоз ва бўғиқ йўталаштилди.

— Ҳа, қўшнининг қизи!— аёл шундай деди да, истар-истамас қўшимча қилди:

— Шўтта туринглар, ҳозир айтаман...

Гулчехра анчадан кейин негадир эшикдан эмас, чап қўлдаги тор кўчадан чиқиб келди ю, қизлар билан қучоқлаша кетди.

— Вой, сиаларни кўрадиган кун бор экану, жон дугоналар!

Бошида янги дурра, эгнида гулдор чит кўйлак, у ҳеч ўзгармаган, гўё бўлаётган тўполонлардан бежабардай, кулиб турар, фақат дадасидан қўрқса керак, ойсига ўхшаб шивирлаб гапираради.

Муяссарга ҳаммадан ҳам унинг шу кулгиси оғир ботди.

— Нимага илжаясан?— деди у шартта.— Нималар бўлаётганини эшитдингми ўзи?

— Эшитдим...

— Эшитсанг нега индамай ўтирибсан?

Гулчехра ранги ўчиб, юзини четга бурди.

У нима қилишини билмай боши қотиб қолди.

Қиз тунов кунги воқеалардан кейин Ёдгорбекдая бошим балога қолади, деб ўйлаган эди. У аса тамом аксини қилди. Ҳатто ўшанда юборган бир сандиқ кийим-кечакларини ҳам қайтариб олмади. Ўтган куни

кечаси эса бир белбог майиз ёнгоқ кўтариб яна келди. Янгаси орқали Гулчеҳрани чақиртириб олиб, уни олиб қочмоқчи бўлганлари учун кечирим сўради. Ахийрида уни белидан олиб, усиз туролмаслигини айтиб, шундай мулоим гаплар гапирди, шундай ялиниб-ёлвордики, Гулчеҳра бошини йўқотиб қўйди.

Лекин қиз буни ҳозир бу икки дугонасига қандай айтсин? Муяссар билан Ларисанинг хатти-ҳаракатлари-даги бўлакча бир софлик, беғубор ўртоқлик туйғуси, йигитларга ёрдам бериш истаги ва яна алланималар уни индамасликка, сирини очмасликка ундиади. Айниқса ҳозир, уч йигит баравар унинг дастидан қамалиб ётганда бир нима деб бўладими?

— Ҳа, нега индамайсан? — деди Муяссар.— Гаплир!

Гулчеҳра мунғайганича:

— Нима ҳам дейман? Иложим қанча? — деган өди. Муяссар баттар қайнаб кетди.

— Иложим қанча дейди-я! Терговчига учраш, ҳамма гапни гапириб бер. Яна бу киши комсомол аъзоси эмиш! Ахир улар сени деб, сен учун жабр тортишапти-ку!

Муяссар, томоги тип бўғилиб, гапиролмай қолди. Тўсатдан Гулчеҳра ҳам кўзига ёш олди.

— Сенга осон бундай дейиш! Отанг коммунист бўлса! — деди ҳиқиллаб.— Менинг дадамлардай... касал бўлсалар кўрардим, нима қиласдинг?

Гулчеҳра бу гаплар Муяссарга таъсир этганини сезди-да, юзига дуррасини босиб йиглаб юборди. Муяссар чиндан ҳам нима қилишини билмай эсанкираб қолди. Хайрият, Лариса бор экан. Гулчеҳрани қучоқлаб юпатди, кейин терговчига бориб учрашиш шарт эканини, агар бормаса йигитларнинг иши оғирлашиб кетишини битта-битта тушунтириб берди.

Гулчеҳра бу «ташвиқот»дан кейин, ниҳоят, бориша га кўнди, лекин битта шарт қўйди: терговчининг олдига учалови бирга боришади, бирга гаплашади.

Муяссар билан Лариса унинг бу шартини ҳам қабул қилди. Бироқ шунча қийинчилик билан бошланган иш натижа бермади, чунки улар ийманиб-тортиниб идорага кириб боришганда... терговчи шаҳарга кетган әди. Комилдан сал кейин уни прокурор чақиртириб олибди.

* * *

Елғиз Машраб әмас, биринчи куни ҳеч нарсани писанд қилмаган Қўчкор ҳам учинчи кунга ўтганда аллақандай жимиб, оғир хаёлга чўмиб қолди.

Вақт жуда секин ўтарди. Меҳнатга, кенг далада қизлар даврасида тўполон қилиб юришга ўрганиб қолган йигитларга ҳар бир соат йилдай туюларди.

Эсларига негадир кўпроқ отлар тушар, улар қаровсиз қолгандай туюлиб, юраклари ачишарди. Отларни сойга тушовлаб қўйиб, қиз-келинчаклар бериб кетадиган қовоқ сомсаларни еб, серюлдуз осмонга тикилиб ётадиган сокин оқшомларни зaslashganda иchlari пишиб, юраклари түғёнга тўлиб кетарди.

Шундай пайтларда тераклар дарёдай шовиллаган сокин кечалар, бир хурма қатиқми, гўжами кўтариб келадиган Муяссар билан Ларисанинг сал уятчан хушёқим овозлари, ҳатто тиним билмай пахта ташиб қопқанор кўтариб юрган дамлари ҳам қандайдир жуда завқли кўриниб кетар, қалбларида бўлакча бир нафосат касб этарди! Энг ёмони шундаки, улардан атиги бир-икки кўйлакли олдин тўэдирган йигитлар кўкракларини ўқча тутиб урушда юришипти! Газеталар ҳар куни Аҳмаджон Шукуровдай азамат жангчилар тўғрисидаги ҳикоялар билан тўлиб чиқяпти... Шундай пайтда улар энг ёмон жиноятчилардай қамоқхонада ётишипти!. Терговчи бўлса Комил келиб кетгандан кейин уларни яна бир марта чақиритириб, палапартиш гаплашди-ю, қаёққадир гумдан бўлди. У чақириб тургани ҳам бир жиҳатдан дуруст экан, ҳар қалай, талашиб-тортишиш, баҳслашиш мумкин эди. Бундан ҳам айрилгандан кейин йигитлар худди кимсасиз бир оролга тушиб қолгандай бўлишди.

Терговчи, ниҳоят, учинчи куни пешинда келди ва йигитларни чақирирди.

У Чавандознинг хонасида бир ўзи ўтиради.

Бурноғи куни ғалати тиржайиб, бачканга гаплар билан қарши олган одам, бугун ҳар биттаси бир мўйловдай ўсиқ қошлари туташган, кўзлари киртайган бир қиёфада:

-- Қани, марҳамат, ўтирсинлар,— деди.

У йигитларни биринчи марта кўраётгандай кўалари баттар қисилиб бир зум тикилди-ю, тўсатдан Эртоен-

нинг: «Хўш, нега терговни бунча чўзиб юбордингиз, ака?» деган гапи эсига тушиб, ўрнидан туриб кетди. Калта қўлларини орқасига қилиб деразанинг олдига борди ва йигитлар ҳам эсидан чиқиб бирпас ўйланиб қолди.

Кечаки, Эртоевнинг, бир келиб кетинг, деган гапи билан йўлга чиққанида у муғамбирлиги билан донг тараган бу одамнинг бунчаликка боришини хаёлига келтирганмиди?

У қиплоққа кетаётганида тилидан бол томиб гаплашган, ёш қизларга сўравонлик қилаётган бебошляарнинг танобини тортиб қўйишини қаттиқ тайинлаган Эртоев кечаки уни совуқ қарши олди, қўл бериб кўришар-кўришмас:

— Намунча чўзиб юбордингиз терговни? — деди, қовоғини солиб.

Бундай муомалани кутмаган терговчи олдин гап тополмай довдираб қолди, кейин ўзини сал босиб:

— Ахир... ўзлари айтувдилару... — деган эди, Эртоев оппоқ муштини столга қўйиб, гапини бўлди:

— Хўш, нима дебман? Мен сизга бу ишни бир ойга чўзинг деганимидим? Балки терговни бошқа йўлга буришни ҳам талаб қилгандирман? Лаббай?

«Сурбетлик ҳам эзи билан-да!»... Терговчи юрагига бирор ниш ургандай оғир тебранди, кейин ўзидан ғижиниб:

— Менга қаранг, ўртоқ Эртоев, — деди. — Агар мени ёш бола деб ўйласангиз... чучварани хом санабсиз! Сиз шохига юрсангиз, мен баргига юрадиган хилиданман, ҳа!..

Эртоев шахт билан ўрнидан турди, қўлларини орқасига қилиб, узун кабинетининг нариги бурчагига борди-ю, тўйсатдан хахолаб кулиб юборди.

— Ҳали ҳазилни чинга олдим денг? Оббо сиз-эй!..

У кўз ёшларини арта-арта терговчининг олдига келди ва унинг елкасига қўлини қўйиб:

— Бундай, дўстим, — деди жиддий оҳангда. — Ҳазилни қўйиб турайлик... Қўлингиздаги иш билан жуда кўплар қизиқиб қолди. Бир ёқда райком, бир ёқда военком Абубакиров... Хуллас, прокурор ўзиям айтар — ишни тезлатиш, умуман йигитлар фойдасига ҳал қилиш керак. Албатта йигитлар айбдор! Аммо... — Эртоев

елкасини қисди.— Бир ёқдан уруш... Бир ёқдан катталаар... Энди ён босишига түгри келади, дўстим.

Эртоев буни «илож қанча?» деган маъниода кулиб айтди, лекин терговчи унинг нимадандир ташвишланиб, ҳатто қўрқиб қолганини аниқ сезди.

Ташвишланмай кўрсинг-чи?.. У ўзи ҳам йигитларга тақилган айбнинг пуч эканини бошдаёқ сезган, фақат Эртоев қаттиқ илтимос қилгани учунгина уларни сал «босиб» қўйишта розилик берган эди. Илоннинг ёғини ялаган бу муғамбир эса... иш чигаллашиб кетганини сир тутишга уриняпти!..

Терговчи чуқур ўйга чўмган одамдай, хонани бир айланиб бориб жойига ўтириди.

— Биз ўртоқ прокурор билан маслаҳатлашиб шундай бир тўхтамга келдик,— у томоқ қириб, йигитларга бир қараб олди.— Бир томондан, ёшликларингни, бир томондан, колхоз раҳбарларининг илтимосини ҳисобга олиб, қонунга хилоф бўлса ҳам, сенларни ҳозирча қамоқдан озод қилишини лозим кўрдик.

Машраб ялт этиб Акмал билан Қўчқорга қаради, Қўчқор эса, унинг қарашларини сезмагандай, ер остидан терговчига тикилиб турарди.

— Ҳозирчами ёки мутлақоми, терговчи ака?

— Бу ёги...— терговчи бошини силаб жилмайди.—

Бу ёғи ўзларингга боғлиқ, ука.

— Масалан?— деди Қўчқор.

— Масалан, бунақа ножӯя ишлар қилмасаларинг, бирорларнинг ишига суқилишавермасдан ўз йўлларингдан юрсаларинг...

Қўчқор зидан Акмал билан Mashrabga бир қараб олиб деди:

— Гапнинг пўскалласи... барча номаъқулчиликларни кўра-била туриб писиб юраверларинг, демоқчисизда, терговчи ака!

Терговчи чўнтағидан дастрўмолчасини олиб бошини, пешанасини артди-да, аллақандай маъюс бир товшуда:

— Сизга битта маслаҳат, ука,— деди, тўсатдан негадир «сиз»лаб.— Кўп маҳмадоналиқ қилаверманг, сал босиқ бўлинг. Ҳали ёшсиз, кўп нарсанинг фаҳмига бормайсиз, иним.

Қўчқор нимадир демоқчи эди, терговчи қўлини битиз қилиб әшикни кўрсатди.

— Боринг, ука, кўп билимдонлик қиласвермасдан, қутулганингизга шукур қилинг, ҳал..

— «Шукур қил эмиш! Ўзинг шукур қил бу ноҳақ-ликлар учун бошинг кетмаганига!» — деди Машраб ичида.

Улар ҳовлидаги ариқда юз-қўлларини ювиши. Кейин фақат эркинлик туйгуси бера оладиган бўлакча бир қувончга, ғалаба ғурурига тўла ажойиб дамлар бошланди.

Биринчи бўлиб йигитлар Моҳира бувини кўргани бориши. Меҳрибон кампирнинг гўжалари-ю, зогора иснларига қоринларини тўйдириши. Кейин, у кишининг айланиб-ўргилишларидан кўнгиллари тоғдай ўсиб, Акмалларникига ўтиши. Солия холани тинчитгач, Қўчкор ойисига бир лаҳза кўриниш берди-да, ниҳоят далага, қизларнинг олдига кетиши.

Ажабо: улар қайси кўчадан юрмасин, кимлар билан учрашмасин — ҳамма севинар, ёмоилардан дақки емай, эсон-омон қутулиб чиққанларидан астайдил қувонарди.

Муяссар билан Лариса эса уларни чинакам қаҳрамонлардай кутиб олди. Оқшом яхши кийимларини кийиб сойга чиқиши. Худди шу куни Ларисанинг отасидан телеграмма келипти. Рост, телеграмма жуда қисқа: «Хат ёзинглар, хат кутаман, хат кутаман!» деган хитоблардан иборат эди, холос. Лекин у бир парча қоғоз Ларисага қандайдир қанот берган: бир жойда бирпас тек туролмас, дам сабабсиз кулар, дам тахта кўприк устида ўйинга тушар, дам Қўчкорнинг ғашини келтириб, Магнитогорскка кетишлари тўғрисида минг хил режалар тузарди.

Ҳеч нарсага тенглаштириб бўлмайдиган эркинлик қувончига, ғалаба ғурурига тўла бу баҳтиёр кун ўтиб ёртаси куни қишлоққа ҳарбий комиссарликдан комиссия келди, ўн саккизга тўлган ҳамма ёшларни ҳисобга олиб, қўлларига билет бера бошлади. Бу ёшларнинг орасида Қўчкор билан Акмал ҳам бор эди.

Машраб комиссия келганини эшитган заҳотиёқ: «Улар урушга кетса... мен нима қиласман, бу қишлоқда бир ўзим қандай юраман?» деган фикрга бориб, титраб кетди. Ўша куни қаерга бормасин, қайси кўчадан ўтмасин, ҳамма унга истеҳзоли қараётгандай, «жўжакхўр» деб кулаётгандай туяларди. Ҳатто далада пахта

тераётган хотинларнинг: «Ҳа, Машрабжон, қалайсан, сени комиссияга чақиришмадими?» деган жўн саволлари ҳам қулогига бошқача эшитилар, гўё улар: «Ҳа, ўз дўстларнгдан айрилиб нима қилиб юрибсан?» деётгандай бўларди.

Комиссия қишлоқ советининг идорасига жойлашган, идоранинг олдидаги гузар хотин-халажга тўлиб кетган эди. Комиссияга чақирилган йигитлар Машрабнинг назарида ўзлари билан ўзлари бўлиб, уни назарга илмаётгандай, ҳатто Қўчқор билан Акмал ҳам у билан баланддан туриб гаплашаётгандай кўринарди.

Комиссия иш бошлашининг иккинчи куни эрталаб, Қўчқорларни кўриш умидида гузарга борган Машраб қишлоқ советининг олдидаги майдонда протезли оёғини гарчиллатиб Чавандоз билан айланниб юрган капитан Абубакировни кўриб қолди.

Абубакиров қўлини пахса қилиб Чавандозга ниманидир уҳтиярар, чиройли мўйлови аллақандай шалпайиб қолган Чавандоз эса бошини тез-тез иргаб шалпайиб туради.

Машраб, эҳтимол Чавандоз бўлгани учундир, Абубакировнинг олдига боришига журъат этолмади. Лекин кейинроқ комиссиядан чиққан бир тўп йигитлар капитанни ўраб олиб, у билан суҳбатлаша бошлаганларини кўрганда чидаб туролмади. Бир сакрашда пахса девордан ошиб, майдонга тушди, кейин, қадамларини солдатчасига гурс-гурс босиб Абубакировнинг олдига борди, азбаройи нафаси етмаганидан, сўзларни бўлиб-бўлиб деди:

— Ўртоқ капитан! Мумкин бўлса... Битта арзим бор... шуни... шунга қулоқ солсангиз!

Йигитлар чекиниб унга йўл беришди. Абубакиров иссиқ кўзларини баттар қисиб, қизиқсиниб тикилди.

— Хўш, қандай арз экан, бўз бола?

— Арзим шуки...— Машраб капитаннинг кўзларидаги илиқ меҳрни кўриб енгил тортди.— Арзим шуки, мен ҳам шу йигитларга тенгқурман. Ёшимиз бир. Шунчаки... қишлоқ советининг китобида янгилиш ёзилиб, бир ёш кичик бўлиб қолибман. Агар мумкин бўлса... Мен ҳам комиссиядан ўтсам!

Абубакиров, гўё уни биринчи марта кўраётгандай унга яна бошдан-оёқ разм солиб чиқди, юпқа лабларида мулоийим табассум кўринди:

— Хўш, буларга тенгдош эканингни каёқдан биламиш?

— Мана, ўртоқ капитан...

Машраб: «Мана, Қўчқор айта қолсин!» демокчи эди, бироқ, Қўчқорнинг хўмрайиб турганини кўриб шошиб қолди-да:

— Худо урсин агар ёлғон гапирсам! — деб юборди.

Зўр қаҳқаҳа майдонни янгратди.

Абубакиров, ёш боладай силкиниб-силкиниб кулархан, қўлини Машрабнинг елкасига қўйди, кулги араплаш сўради.

— Унақа бўлса... Ишониш керак! Кимнинг ўғлисан ўзи? Исм-фамилияниг нима?

— Исимим Машраб. Аъзам ячейка деганинг ўғлиман.

— Девонаи Машраб! — деди кимдир.

— А-а!.. Адолат қидириб юрганларданман дегин?

Абубакиров кўз ёшларини артди ва «жим» деган маънода қўлини кўтарди:

— Молодец йигит экан бу! Бор, комиссияга кир—комиссия ҳал қиласи бу ёгини!

«Ҳамма нарсани Абубакиров ўзи ҳал қиласи», деб юрган Машрабнинг руҳи тушиб кетди, комиссия кўрнасданоқ қайтариб юборади, деб ўйлади. Лекин Чавандознинг катта хонасида ўтирган врачлар унинг ёшини суриштирмади ҳам. Бирори бўйини ўлчади, бирори кўкрагига қулогини қўйиб ниманидир эшигтан бўлди, яна бирори тоғ ўнг кўзини, тоғ чап кўзини босиб, қандайдир ҳарфларни ўқитиб кўрди. «Яроқли», «Яроқли» дейишиб, беш минутга қолдирмай комиссиядан ўтказиб қўйишиди. Ўзиям энг қизиқ ишлар шундан кейин бошланди.

Абубакиров йигитларни саф қилиб, Машрабни олдинга ўтказди, кейин қаёқдандир Ёдгорбекни етаклаб келиб ёнма-ён қўйди-ю, қўлларини силкитиб:

— Бу икки йигитга бир қаранглар! — деди.— Мана бу хўроz йигит ўн саккизга чиқиби-ю, буниси ҳали ўн олтида эмиш!

Ҳар жой-ҳар жойдан пиқ-пиқ кулги эшитилди.

— Ҳей,— деди Абубакиров Ёдгорбекка ер остидан тикилиб.— Хотининг борми? Хотин олсанг, беш боланинг отаси бўлардинг-ку!

Зўр қаҳқаҳа гузарни янгратиб юборди. Бечора Ёдгорбек! У, гўё кимдантир нажот кутгандай кўзлари жавдираб, атрофига қарап, худди совқотаётгандай, ҳа: деб бошини елкасига қисарди.

— Йигит деган мана бунақа бўпти! — деб Машрабни кўрсатди Абубакиров.— Туришини қара — хўroz, а, хўроzi..

— Қани, марш комиссияга! — кўзлари чақнаб бујорди у Ёдгорбекка.

Ёдгорбек бесўнақай лапанглаб идорага қараб чопди. Машраб эса, уят, ғуур, шодлик ва яна аллақандай туйғулардан маст бўлиб ўзини қаршидаги боғларга урди.

У кун бўйи шу қувонч, шу кайфиятда юриб, уйлагрига кечқурун, пахтани араваларга ортиб бўлгандан кейин борди, борди-ю, сўрида Фотма-Зуҳрани бағрига босиб ўтирган Мастурани кўриб тўхтади.

Поччасидан қора қоғоз келгандан бери чўпдай сўлиб қолган Мастура секин ўрнидан турди. Хаста одамнинг кўзларидай ичига ботган кўзларida нафратга ўхшаш бир учқун чақнади.

— Сен... ақлинг жойидами ўзи. Мени... Бизни ўйламасанг ойимларни ўйласанг бўлмасми, аҳмоқ! — у лаблари титраб юзини четга бурди.— Бор, ойимнинг аҳволига бир қара!

Машраб, юраги увушиб, әшикни журъатсизгина очди.

Гулсум опа тўрдаги каравотда, қўлларини тиззалига қўйиб худди Машрабнинг кириб келишини кутгандай, әшикка тикилиб ўтиради.

Йўқ, у Мастура айтган аҳволда эмас, одатдагидай ўйчан ва босиқ кўринарди. Бироқ... илгари ҳам шунчалик жуссаси кичкинамиди, ё... ҳозир шундай кўриняптими Машрабга? Рўмоли елкасига тушиб, оқ сочи очилиб қолган... Пешанасидаги, лабларининг четидаги ажинлар бунчалик кўп эмас эди шекилли илгари?

Машраб оҳиста юриб унинг олдига борди, аъзойи баданини жимиirlатиб юборган ички бир туйғуга бўйсуниб тиз чўқди.

— Ойижон, кечиринг. Бошқа иложим бўлмади. Дўстларимдан айрилиб... — у, ойисининг кўзлари жиқ-

қа ёшга тўлганини кўриб, сўзини ичига ютди, бошини унинг тиззасига қўйиб қучоқлаб олди.

Учинчи боб

Фалати нарса-да, турмуш: киши бир қоқилса устма-уст қоқилади, бир бахти чопса, устма-устига чопади.

Йигитларнинг Чавандоз устидан қозонган дастлабки ғалабаларидан кейин.. ишлари юришиб кетди. Яна ўша, оғир бўлса-да, кишига қандайдир гурур баҳш эта-диган улкан меҳнат кунлари бошланди. Бунинг устига ҳар куни бир қувончли воқеа юз берарди: гоҳ фронтда янги шаҳарлар озод бўлар, гоҳ кечалари қизлар сойга Гулчеҳрани бошлаб чиқишар, гоҳ Ларисанинг отасидан хат келиб, бутун бригада шов-шув бўлиб кетарди...

Октябрнинг охирлари эди.

Бир кун йигитларни Гулсум опа чақиртирди. Октябрь байрамигача бутун колхоз пакта планини бажаришини айтди ва шунга уч-тўрт номерлик бўлса-да, бир концерт, ёки кичик бир пьеса қўйиб беришларини илтимос қилди.

Улар олдин концерт қўйиб беришмоқчи эди, бироқ машшоқларнинг мазаси бўлмагач. Машраб шаҳар кутубхонасини ахтариб «Улим босқинчиларга» деган бир пьеса топиб келди-да, учинчи пардасини қўйишга киришди.

Мактабнинг ҳувиллаб ётган бўш зали кечалари чинакам жанг майдонига айланди. Еттинчи лампанинг хира ёргугида гранаталар «портлаб», ёғоч пулемётлар тарақлаб, эҳтиросли монологлар ўқилди. Одатда кечқурун кун ботганда пахталар қанорларга тиқилиб, араваларга ортилиб бўлгандан кейин бошланадиган бу репетициялар кўпинча тун ярмидан ошгунча давом этар, лекин на чарчоқ билинар, на уйқу келарди. Аксинча, машқ тугагандан кейин ҳам чуқур сукутга чўмгаи қишлоқ қўчаларини бошларига кўтариб, баҳслаша-баҳслаша зўрга тарқалишарди.

Бир кун кечаси репетиция айни авжига чиққанда залга Комил кириб келди.

Белида қилич, қўлида автомат, партизан қиз Оксана — Муяссарга гап ўргатиб турган Машраб Комилни

кўриб шошиб қолди. Кўнглидан: «Наҳот, репетицияни эшитиб келган бўлса?» деган фикр кечиб, эти жимирилаб кетди.

Комил мулойим қулимсираб уларнинг ўйинини куватиб турди, кейин мақсадга ўтди.

Ҳа, Машраблар жуда яхши, жуда керакли иш бошлигдан, лекин, афсуски, Комил пъесани кўриш учун эмас, балки тўхтатиши учун келган. Чунки қўшни колхозлардан қарз олиб әкилаётган уруглик тугаган, энди тог орқасидаги қозоқ даштларига бориб, ёзда улар ҳисобига ўтказилган буғдойни олиб келиш керак...

Муяссар билан Лариса тумтайиб қолишиди. Лекин йигитлар хурсанд эди. Чунки, биринчидан, улар кўрмаган жойларни кўрар, иккинчидан, бу, Комил айтмоқчи, фронт учун, галаба учун, урушда қон кечиб юрган жигарбандлари учун қилинадиган катта ва масъулиятли бир вазифа эди!

Репетиция тўхтади, бу гапдан икки кун кейин, байрам арафасида, яна эшак карвон ташкил қилишиб, тонг палла йўлга чиқишиди.

* * *

Ёзда ғалла ташиб чиниқкан машҳур карвонга бу сафар эшаклар жуда саралаб олинган, хўтиклар йўқ. Карвон сон жиҳатидан ҳам ёздагидан кўпроқ — эшаклар юзга борарди.

Машраб билан Ақмал Комилнинг илтимосига кўра карвоннинг охирида («бирорта жўжакхўroz уйқусираб қолиб кетмасин») борарди. Олдинда — саман йўргага мингган Комил билан машҳур кўк ҳангисида қаққайиб кетаётган Қурбон оталар, Қўчқор ҳам уларнинг ёнига ўтиб олган.

...Узоқ йўлнинг ўзиға хос гашти бўлади. Уйдаги ҳамма ташвишлар орқада қолади, олдинда эса кишини нотаниш эллар, одамлар, узоқ ва хатарли йўллар кутади. Аммо энг яхиси — хуржунда колхоз берган беш-олтита зогора, бир-икки қадоқ қурт ва меҳрибон бувилар қўшган бир ҳовуч-ярим ҳовуч туршак, олма қоқи, писта, ҳеч бўлмаганда қовурмоч бор. Комил сафарга чиқишидан олдин озиқ-овқатни эҳтиёт қилишни қаттиқ тайинлаган бўлса ҳам, баъзилар ҳозирданоқ

бир лунжида туршак, бир лунжида қурт, оғзайлари қулоқларida, чақчақлашиб көтятти.

Қишлоқдан чиққақ, йўл куйган калладай тап-тақир қирлар оша ўнг қўлдаги тоғ тизмалари билан ёнмаён кетди.

Офтоб эндигина чиққан, олдиндаги қир ва чўққилар аллақандай майин, илиқ нурга чўмилиб ётибди.

Беш-олти чақирим юрилгач, йўл тоққа қараб бурилди. Сал ўтмай, ярми яхлит тошдан иборат баланд тепаликка кўтарилишиди. Пастда кўк-сариқ яйлов кўринди. Кенг яйловда оқ ўтовлар гулдор дастурхонга тўнтарилган оқ пиёлаларга ўхшаб кўринарди. Ўтовларнинг атрофида аёллар, итлар билан қувлашиб юрган ёш болалар кўзга чалинарди.

Эшак карвон шарқираб оқаётган сой бўйида тўхтади. Яйлов аҳли, айниқса кексалар Қурбон отани яхши танишаркан, дарҳол, сув қовоқларда қатиқ, заранг товоқларда сузма, қурт пайдо бўлди.

Қурбон ота фуражкасини тўғрилаб жилмаярди:

— Ҳа, инқилобга хизмати сингган одамни унумайди, қозоқ! Яхшиликни билади бу халқ! Қани, олинглар!..

Болалар бир-бирларини туртишиб, кўз қисишиб олишиди: отанинг гапи кулгили бўлса ҳам, қурт ва сузмадан кайфлари чоғ эди.

Яйловдан кейин йўл тобора ўрлаб, баланд қирларни ён бағирлаб, олмазор ва ёнғоқзорларни оралаб кетди.

Илиқ куз офтоби баланд кўтарилиган сайин тоғ-тошлар бўлакча бир латофат кашф этади: қалин олмазорлар ўт олган гулхандай ловиллайди, сап-сариқ ўрикзорлар ипакдай майин товланади, баланд мусаффо осмонда секин сузган лочинлар кўринди... Лекин зинг қизиги шундаки, узоқда яхлит бир қоя, катта бир чўққи бўлиб кўринган тепаликлар яқинлашганда гўё ўз бағирларини очадилару, янги яйловлар, сойликлар, шовиллаб оққан дарёчалар намоён бўлади... Бояги шўхлик ва кулги тинган, ҳамма жим, ўйчан...

Акмал эшагининг кесик қулогига тикилиб ниманидир пичирлайди: унинг сафардан умиди катта, чунки Қўчқор ўзига тегадиган галланинг ҳаммасини, Машраб эса ярмини унга берадиган бўлди. Бунга ўз тегиши қўшилса ҳам укалари сал тинчийди, ҳам Гулчехра-

нинг отасига бир-икки пуд дон бериб, маъшуқасини Чавандознинг чангалидан қутқариб қолади... Мабодо унгача дадаси ҳам қайтса, ошиғи олчи бўлади унинг!

Машраб, аксинча, қишлоқни тамом унутган. Гарчи у қишлоқда ўсган бўлса-да, бундай тоғ олмазорларини, ипакдай майин ўрикзорларни, тошларни ёриб чиқиб, тоғ ёнбағирларини қоплаб ётган асрий ёнғоқзорларни биринчи кўриши. Бу ерда ҳамма нарса бўлакча, аллақандай улуғвор, айни замонда, қайдайдир нафис. Машрабга шундай туюладики, гўё тоғ ажиди бир саҳийлик билан ўз сирларини очмоқда, гўё уни мафтун этмоқчи бўлгандай, ўз латофатини кўз-кўз қилмоқда..

Қўчқор ҳам қойил бу тоғлардан. Лекин у хаёлга чўммайди, аксинча, бу кенг яйловлар, баланд чўққилар устида от ўйнатиб юргиси келади. У айниқса, олқарларни кўрганда ичи пишиб кетади. Ҳар сафар шохлари буралиб-буралиб кетган бу ғалати ҳайвонлар йўл ёқасидаги қояларда лайдо бўлганида Қўчқор ҳасад ва алам билан Комилга тикилади.

Қани энди Комил остидаги саманини берса-ю, Қўчқор унинг бошини қўйиб, бу олқарларни қувиб кетса!

Лекин Комил йўл ташвиши билан банд. Эҳтимол, у оғир сафарнинг бутун масъулиятини сезгани учундир, тоғ манзараларининг гўзаллигини эмас, бу йўллардан ёсон-омон қайтишни ўйлади.

Албатта, йўлга олдинроқ чиқиш керак эди. Лекин аввал пахта, кейин кузги дон экиш билан бўлиб, бош қашишга ҳам фурсат бўлмади. Бунинг устига, ёзда бир дон қолдирмай, ҳаммасини топширишга мажбур этган Эртоев, кузги ғалла әкиш планини кечиктирдинг, деб Иnobat иккисини ҳар куни ижрокомга чақиритирвериб, тоза жонларига тегди..

Комил ҳар сафар Эртоевни ўйлаганда эсига негадир Барно тушади-ю, хуржундаги тивит рўмолнинг майинлигини сезгандай ва кўнглидаги ҳамма губор тўзғиб кетгандай бўлади.

Кеча кечқурун Барно секин эшикни очиб, унинг кабинетига кирди, кўзлари жавдираб, қўлидаги тугучани узатаркан: «тивит рўмол, совуқ бўлса... ярадор қўлингизага ўтарсиз», деди, Комил кейин очиб қараса, рўмолдан ташқари бир жуфт жун пайпоқ билан тўрт букланган қофоз ҳам чиқди:

«Ҳурматли Комил ака!

Буни шунчалик бир дўстлик совғаси, деб билгай-
сиз. Ҳамма мендан юз ўғирган. Бутун қишлоқда ёлғиз
сиә: «шу ҳам одам-ку», дегандай сал дурустроқ муома-
ла қиласиз. Яхшиликка яхшилик қилгиси келаркан
кишининг. *Барно».*

Яхшиликка яхшилик! Комил қизнинг әзилиб юр-
ганини, дуч келганда ўзгариб кетишларини билса ҳам,
ҳанузгача у билан очилиб гаплашмаган эди. Бунинг
учун у гоҳ ўзидан ғижинарди, гоҳ қайтгай ҳамон қиз
билан қандай учрашишини ўйлаб, юраги ҳаприқиб ке-
тади.

Унинг ўйларини баъзан Қурбон ота бўлади.

Ота гоҳо кўк ҳангисини тўхтатади, узангига оёғини
тираб, қаддини ростлайди, бошидаги фуражкасини ва
ёнбошидаги чарм сумкасини тўғрилай-тўғрилай бола-
ларга жиддий тикилади:

— Ўртоқлар... Биз ҳў ўша даранинг орқасида не-не
ёт унсурлар билан олишганимиз. Между прочим, ўша
жойларда не-не одамларнинг қабри бор. Телпаклар
олинсин, ўртоқлар!

Сўнг олис-олисларга тикилиб, бир зум сукут сакла-
гач, Машраб билан Қўчқорга имо қилиб, кўшиб қўяди:

— Между прочим, буларнинг оталари ҳам бор эди
ўша жангларда...

Қўчқор болаларга қўшилиб пиқ-пиқ кулса ҳам,
Машраб кулмайди, кулолмайди. Отанинг гаплари юра-
гига жиз-жиз тегади-ю, пиқ-пиқ кулаётган Қўчқорга
қараб йиқиради:

— Аҳмоқ! Қовоқ калла! Ким бўпсан бу гапдан ку-
ладиган?

Офтоб рўпарадаги Рустам довон чўққисининг орқа-
сига бота бошлаганда олисда қандайдир қўралар, уй-
лар кўзга чалинди. Уйларнинг мўрисидан тутун бурқи-
пар, атрофифа қўй-қўзилар ўтлаб юарди.

Қурбон ота яна узангига оёғини тираб, болаларга
мурожаат қилди:

— Бугун шу овулда дам оламиз, негаки, эртага
Ёмонтошдан ўтамиз. Ёмонтош деганини эшитгансан-
лар-а?

Кўп йўловчиларнинг бошига етган, кўп карвонлар-
нинг юкини йўлда қолдирган бу машҳур дарани ҳали
кўрмаган бўлсалар ҳам, унинг совуқ таърифини эшит-
ган болалар бош иргаши:

— Биламиз, отахон

— Балли! — деди ота.— Эшитган бўлсаларинг эшакларни тўйдириб, ўларинг ҳам яхшилаб дам олинглар!

Эшак карвон яқинлашганда овулдан далани бошига кўтариб бузоқдай-бузоқдай бўрибосарлар чиқди, кетма-кет болалар чопиб қелишди, ниҳоят, бошларига ғалати оқ ёпинчоқ ташлаган кампирлар, соchlарига чўлпи таққан қиз-келинчаклар кўринди.

Қурбон отани танийдиган мўйсафидлар бу овулдан ҳам топилди шекилли, қўргонларнинг бирига кириб кетган ота лаҳза ўтмай, ҳассага суюнган чўқчи соқол бир чолни бошлаб чиқди.

Чол сойдаги карвонга узоқ тикилиб тургач, аёлларга кимадир деди.

Шундан кейин болалар уйма-уй таралиб кетишди.

Лочинларнинг чекига овулнинг чеккасидағи кичик қўра тушди.

Улар эшакларини тушовлаб, қўрага яқинлашганда ичкаридан қўйларнинг тапир-тупури, ёш аёлнинг жарангли товуши эшитилди:

— Ўйноқламай ўлиб кетгур!

Қўчқор кулимсираб қўрага кириб кетди.

Қўрага кираверишда қизил қўйлакли нозиккина бир жувон сигирга толпинаётган бузоқ билан олишмоқда эди. Бузоқ ҳар толпинганда жувон бир неча қадам кетидан чопқиллаб борар, шунда орқасидаги бир ўрим сочи силкиниб, чўлпилари кумуш қўнгироқчалардай майнин жирингларди.

Қўчқор чопиб бориб, жувоннинг қўлидан арқонини олди ва бузоқни бостиurmанинг устунига боғлаб берди.

Жувон кутилмаган меҳмонлар тўғрисида эшитган бўлса керак, унча таажжубланмади.

— Раҳмат, қалқам! — деди-да, бир кулиб қўйди.

Жувоннинг кулгиси ҳам, юмaloққина юзи ҳам, кичкинагина бурни ҳам — ҳаммаси аллақандай ўзига ярасиб турар, жуда ёқимтой кўринар эди.

Жувон ўз ҳусни билан йигитларни «лол» қилиб ҳўйганини сеади шекилли, кўзлари қисилиб яна бир жилмайди. Сўнг елиб-югуриб сигирни соғди, ўчаққа ўт қўйиб, сут пиширди ва ниҳоят меҳмонларни чойга чақирди.

Унинг «чой» дегани одатдаги чой эмас, балки сут, қатиқ, сузма ва қуртдан иборат тамадди экан.

Чойни ичиб бўлар бўлмас, уйда набирасини бағрига босиб ўтирган кампир бурчакка тўшак ёзиб ётиб олди. Бирпасдан кейин Ақмал ҳом сәмиа ҳам мудрай бошлиди. Қўчқор ёш жувонга кўзини қисиб, ҳазиллаша бошлаганини кўрган Машраб эса, негадир ғаши келиб, ўрнидан турди.

Ташқари шундай зим-зиё эдики, Машраб ҳеч нарсани ажратса олмай, бир неча дақиқа эшикда туриб қолди, фақат осмонда қандайдир оқиши юлдузлар чараклар, улар шундай йирик эдики, гўё қора баҳмалга сочилган оппоқ олмаларга ўхшарди.

Машраб, қоронгиликка кўзи ўргангач, бир-бир босиб қўрадан чиқди, қир ёнбағрида «қирт-қирт» шивоқ чайнаган эшакларнинг ёнидан ўтиб, сой бўйига тушди.

Оlamни чулғаган қоронгилик энди гўё чекинган, атрофда асрий соқчилардай сукутга чўмган мағрур чўққилар қорайиб кўринарди. Жимжит. Пастда, сойликнинг зим-зиё ўпқонида, бебош тоғ дарёси оҳиста гувиллади. Унга шамолда чайқалган азим чинорларнинг шовиллаши қўшилиб, подий гўё денгиздай улуғвон садо беради.

Машраб сой бўйидаги чинорга суюниб, сукутга сукут қўшган бу ажаб садоларга қулоқ соларкан, теваракдаги чўққилар яна ҳам сирли туюлиб, хаёлини олисларга олиб қочди...

Ҳа, кимлар ўтмаган бу қадимий йўллардан? Кимларни кўрмаган юлдузлар билан сўзлашиб турган бу асрий чўққилар?

Эски ривоятларга қараганда, бу қадимий йўллардан Искандар Зулқарнайн ҳам ўтган, Чингиҳон лашкарлари ҳам, оқсоқ Темур эса тоғлар орасида лашкар тўплаб таҳт ва салтанат учун курашган!

Ким билсин, эҳтимол ҳозир Машраб ўтирган дарё бўйида бутун Осиёни титратган фотиҳлар фотиҳи Амир Темур ҳам ўтирганмикан? Эҳтимол, ҳозир эшаклар ёйилиб юрган қир ёнбағрида отлар кишинаб, қиличлар шарақлагандир. Неча-неча довюрак ўғлонлар дарёнинг у юзидағи қоронги дараларда яшириниб юриб, адолат учун курашгандир?..

Бу ўйлардан ҳаяжонланиб, ономони фалакда юрган Машраб тўсатдан ўн қадамча нарида кимдир пик-пиқ кулганини эшитиб, ҳушини йиғиб олди.

Қўнгироқдай нафис янграган овоз — ёш жувонники!

Хушнуд дўриллагани—Қўчқор!

— Ҳой, ўзбекнинг боласи, қўйиб юбор!— дейди жувон ёлвориб.— Қозоқнинг текин хотини бор дейсанми бу ерда?

— Менга каранг, жон Гулжамол!— Қўчқор ҳанси-
пар эди.— Битта ўпай, жон янга!

— Бўлди. Бўлди дейман ўзбекнинг боласи!

Жувон Қўчқорнинг қўлидан қутулиб чиқди чоғи,
чўлпиларини нафис жаранглатиб қўрага қараб қочди.
Қўчқор унинг кетидан эргашиб:

— Гулжамол!— деди.— Гулжамол. Жоним, бирпас
тўхта!..

Машраб хаёли чувалашиб, ўтирган жойида лол бў-
либ қолди.

Қанақаси бўлди бу? Ахир кечагина эмасми, Қўч-
қор Муяссардан Ларисани чақириб беришни сўраб,
ёлвориб юргани?

Мана, Машраб ҳамон қўлида Муяссарнинг кичкина
мулойим кафтини ҳис этади, қулоқлари остида унинг:
«Йўл оғир, эҳтиёт бўл, Машраб!» деган майин овози
янграйди. У бўлса... шу ҳам муҳаббат бўлдими? Буна-
қа экан, нима қиласи соддадил қизни чалгитиб?.. Эҳ!

Қўргончанинг ёнидан беш-олти болани эргаштириб
Комил ўтди.

— Эшакларни қайтаринглар, бу атрофда қашқир
бўлиши мумкин,— деди у.

Лаҳзадан кейин болалар эшакларни тапир-тупур
қувиб қўраларга ҳайдаб тушиши. Қўчқор билан Ко-
мил қўринди.

— Йигитлар қалай?— деди Комил.

— Намозшом бўлмасданоқ пинакка кетишиди икки-
сиям!

— Сен нима қилиб юрибсан ухламасдан?

— Менми?— Қўчқор жўрттага овози дўриллаб кул-
ди.— Мен бирорта сулув келинчак йўлиқиб қолмасми-
кин, деб пойлаб юрибман!

— О!

— Комил ака,— деди Қўчқор.— Бу... севги деган
бало сизниям бошингиздан ўтганми?

— Ким билсин, ука.

— Нима қиласиз алдаб — сирингизни биламан-ку.

— Қанақа сир?— кулди Комил.

— Фикри зикрингиз Барнохонда!

— Яна қанақа сирларимни биласан? — Комил алла-
қандай ясама кулди...

Машраб уларга кўринмас эди, кўнгли бир жил бў-
либ, қўрага томон юрди. Қўчқорнинг гапи уининг учун
янгилик эмас, сўнгги пайтларда Комил Барно билан
учрашганда кўзлари чақнаб кетишларини пайқаб юради.
Бу ҳол Эртоевдай юрагини тилка-пора қилмаса ҳам,
ҳар қалай, акаси эсига тушиб, қаттиқ ўксинади. Мана,
буғун ҳам шундай... Машраб уйга кирди-да, кўрпага
бурканиб ётиб олди.

* * *

Эртасига карвон тонг отмасдан йўлга тушди, кун
чиқар-чиқмас Ёмонтош дарасига кириб борди ва ўн бир
жойдан сув кечиб, ундан пешинга яқин зўрга ўтди,
кейин Рустам довондан ошиб, кечга яқин қозоқ даشت-
ларига чиқиб олди.

* * *

Қишлоқдан чиқиша уч-тўрт кунда қайтиб келишни
мўлжаллаган эшак карвоннинг иши «уйдаги гап бозор-
га тўғри келмайди» дегандай бўлди: бир ҳужжатлар-
дан нуқсон чиқиб, бир бошлиқлар топилмай, бир юқо-
ридан қўшимча ижозат келмай, даштда ҳафта — ўн кун
қолиб кетишиди.

Яхшиям қозоқ овуллари келди-кетдига ўрганиб қол-
ган, меҳмондўст, сахий бўлади, акс ҳолда болаларнинг
аҳволи танг бўларди. Чунки колхоз берган нон, қурт,
туршак уч-тўрт кундаёқ тугаб, хуржунларнинг таги
кўриниб қолди.

Бу сафар ҳам тог орасидаги овулдагидай болалар
иккита-учтадан қўра-қўрага тақсим бўлган, овул аҳли
улар билан топганини баҳам кўрарди.

Қиласиган тайинли иш йўқ, болаларнинг куни овул
айланасидаги тўқай ва шувоқзорларда эшак боқиш
билан ўтади.

Қишдан дарак йўқ, ўқтин-ўқтин осмонда булут
пайдо бўлса ҳам, ёғин ёғмас, куилар худди қишлоқда-
гидай илиқ, майнин.

Болалар эртадан кечгача тиззадан келадиган бўлиқ
пичанзорларда куран тушишади, бир-бирларига тега-

жаклик қилишади. Зерикаб, ўзларини қаёққа уришни билмай, гоҳо эшакларига миниб, улоқ чопишади.

Эшакларга маза. Улар донли шивоқлардан қоринлари қаппайиб, бир-икки кундаёқ дикиллай бошлаган. Буни кўрган Комил, болаларнинг: «Қачон кетамиз?» — деб қисташларига:

— Шошманглар, йўл оғир, эшаклар семирсин! — деб кулиб қўяди.

Шундай кунларнинг бирида, шивоқзорда ағанашиб бекорчиликда кураш тушаётган «уч оғайнис»нинг ёнига юз ҷоғлик қўйларини олдига солиб, Қалбек деган ўланчи, дўмбирачи йигит келиб қолди.

Қўлида узун таёқ, елкасида дўмбира, кигиз қалпогини бошпининг орқасига сурисиб, шўх кўзларини қисиб бир лаҳза Ақмал билан Қўчқорнинг курашига разм солиб турди, сўнг, таёғига суюниб кулди:

— Ҳа, ўзбекнинг бўз боласи, зерикаб ичларинг пишяптими дейман?

Қўчқор Ақмални қўйиб юбориб, ўгирилиб қаради:

— Зерикмай нима қиласлик, қозоқнинг боласи? Овулнингда қўйдан бошқа нарса йўқ!

— Қўйдан бошқа нарса йўқ? — Қалбекнинг кўзлари қисилиб, юпқа лабларида истеҳзоли табассум жилва қилди.— Бу овулнинг чечан қизларини кўрмапсан, ўзбек!

«Чечан қизлар!»

Машрабнинг юраги чўғ теккандай жизиллаб кетди, Ақмал ғалати жилмайди. Қўчқор аса Қалбекка тегишиди:

— Биз кўрмасак чечан қизларингни! Кўрсатадиганинг биттаси сен бўлсанг, қош қораймасдан туёғингни шиқиллатиб қоласан!

— Танишасанларми сулув қизлар билан? — деди Қалбек ва мугомбirona кулди.— Аммо битта шарти бор.

— Қанақа шарт? Хўш?

— Сўзага чечан, ўланга уста йигитларни ёқтиради қозоқ қизлари! Сўзига сўз, ўланинга ўлан билан жавоб бермасаларинг кулги бўласанлар!

— У ёгини бир бало қиласмиш! — ўйламай нетмай жавоб берди Қўчқор, сўнг Машрабга қараб кўзини қисди.— Ўланчи оқинимиз ҳам бор ичимизда.

Машраб негадир қизариб, дудуғланиб қолди:

— Бекорларни айтялти бу. Ўлан билмайман мен! Қўчқор хуноби чиқиб, қўлини силтади:

— Майли! Бу билмаса... ўзим боплайман. Аввал танишайлик-чи сулувларинг билан, оғайнин!

— Хўп, уддасидан чиқсанг танишириб қўяман, ўзбекнинг боласи!

Акмал йигитнинг кетидан тикилиб:

— Ҳали шарманда қилмаса эди бу пучуқ! — деб пўнгиллаган эди, Қўчқор жеркиб ташлади:

— Сулув қизлардан шарманда бўлишнинг ҳам ўзиға яраша гашти бор. Қўрқсанг уйда қолавер, хомсемиз!

Машраб индамади. У қозоқ романларини, Обой китобларини кўп ўқиган, қозоқ қизлари билан бўз болаларининг эркин муносабатлари, айниқса, қизларнинг шўхликлари, гапга чечанлиги тўғрисида кўп эшитган. Шунинг учун ҳам Қалбекнинг таклифини эшитган заҳоти кўз олдига ғалати нарсалар келиб, юраги питирлаб қолди.

У дам Муяссар асига тушиб, ўзидан нафратланар ва боришдан бош тортмоқчи бўлар, дам ихтиёридан кучлироқ қандайдир бир нарса хаёлини олиб қочар ва тобора тоқатсиаланар эди.

Қалбек қош қорайганда дўмбирасини чертиб ва сеқин хиргойи қилиб кириб келди.

Оёгига пошнаси баланд қизил этик, әгнида янги яхтак, қўзини мугамбirona қисиб деди:

— Ўлан топиб қўйдиларингми, ўзбекнинг болалари? Кетдик бўлмаса. Бу ёгини толеларингдан кўринглар!

Улар овул оралаб кетишиди. Бир-биридан хийла узоқ жойлашган қўраларда таниш ғовур-ғувур босилган, ўчоқларда олов сўнган, фақат кичик-кичик дарчаларда мойчироқлар милт-милт қилади.

Ҳамма ёқ сув қўйгандай жимжит. Ўқтин-ўқтин қўралардаги бўрибосарлар ваҳимали ириллайди-ю, Қалбекни таниб, дарҳол думларини ликиллатиб қолади.

Улар овланинг энг четидаги қўра эшигига тўхташди.

Ичкаридан ловиллаб олов ёнар, унинг қизғин шульласида пастқамгина уйнинг ланг очилган эшиги ва осонада ўралашған қандайдир аёллар кўзга чалинарди.

Қалбек ичкарига қадам қўяркан:

— Бўз болалар келди, кутиб оласанми, янгажон! — деди.

Дарҳол тунов кунгидай чўлпилари майин жаранглаб, рўпарада оғзини рўмол билан ўраб олган новчагина жувон пайдо бўлди, ўзбек сўзларини сал бузиб таклиф қилди:

— Хуш келибсизлар, йигитлар.

Йигитлар торгина даҳлизга киришганда, ўнг қўлдаги эшик бир очилиб ёпилди-ю, мўралаган қизларнинг юлдуздай чараклаган қисиқ кўзлари, кулимсираган юзлари кўринди, шўх кулги эшитилди.

Йигитлар чап қўлдаги хонага киришди.

Хона пастқам бўлса ҳам кенг, уч жойда мойчироқ липиллайди. Деворга осилган сўзана ва гиламларгина змас, тахмондаги тўшаклар, ерга ёзилган кигиз ва налослар, ҳатто сандиқлар — ҳаммаси қирмизи рангда. Шунинг учун ҳам хона чироқ шуъласида қип-қизил товланади.

Қалбек йигитларни тўрга ўтқазди-да, ўзи қаёққадир тойиб бўлди.

Йигитлар бир-бирига қараб олишди. Бу овлоқ қўра, қўшни хонага йигилган қизлар, хушмуомала янга — ҳаммаси қандайдир ғалати туюлади, эшик ҳар очилиб, даҳлиздан қизларнинг жарангли кулгиси, чўлпиларнинг нафис жаранглаши эшитилганда йигитлар бир сапчиб тушишади.

Ниҳоят, эшик очилди-ю, остоная... қўлларида қўлтиқтаёқ, эгнида ҳарбий гимнастёрка, ёлғиз оёғини силтаб босган бир йигит кўринди. Кетма-кет Қалбек кирди.

— Ассалому алайкум, меҳмонлар,— чўлоқ йигит. қўлтиқтаёғини бир силташда, «дик» этиб уйнинг ўртасига келиб қолди. Машраблар ўринларидан тургунча, у қўлтиқтаёқларини деворга суюб:

— Қалай, аҳволлар яхшими, йигитлар? — деди-да, лочинлар билан қўл бериб кўришди. Кўрпачага ўтириб, Қалбекнинг қўлидаги дўмбирасини олди, секин чертиб, унга қаради.

— Янганга айтсанг-чи, қалқам,—деди.—Олиб кирсин сулувларини! Кутавериб ичимиз пишиб кетди-ку, иничагим!

Қалбек ўрнидан қўзғалгунча бўлмади, қўлида дастурхон, янга ўзи кириб келди.

Дастурхонда яна ўша қурт, сузма, сўк пайдо бўлди, салдан кейин эшикда бир гуруҳ қиэлар кўринди.

Улар аввал худди ўзбек қизларида ийманишиб, юзларини сал яшириб, «сен юр, сен юр» дея бир-бирла-рини туртишиб, кулишиб туришди. Кейин дастурхон-нинг бир томонига ўтиришди.

Қизларнинг ҳаммаси деярли бир жил кийинган: оёқларида пошнаси баланд қизил этикча, бошларида қизил шол рўмол, қизил шойи кўйлакларининг устидан хипча бел барқут нимчалар кийган. Нимчаларига та-қилган қатор-қатор кумуш тангачалар майин жарагн-лаб, уйни янгратиб юборди.

Ёноқлари бўртиброқ чиқсан юмалоқ юзларда, қи-сиқроқ бўлса-да, шўх чақнаган қора кўзларда ийма-ниш эмас, балки қизиқишифодаси жилва қиласи, лаб-лар беихтиёр кулимсирайди.

Бу қизиқсениб қараашлар, тортиниш ва зимдан ку-затишлар бир лаҳза давом этгач, чечан янга:

— Ҳой қизлар,— деди кулиб,— қанчадан бери йигитларга зор бўлиб, энди бир тўпландик. Тортина-дан йигитларга ёпишинқираб ўтиринглар!

Қуруқ гулжандай «гув» этган кулги ўртадаги ётси-рашни бир оз кўтарди, юзларида табассум ўйнаб, қиз-лар ёзилинқираб ўтиришди.

Буни кўрган янга яна ҳам авжига чиқди.

— Ҳой, ўзбекнинг бўз болалари! Жон борми ўзла-рингда? Қизларни кулдириб, гапга солиб ўтиранглар-чи! Ё қизга яқинлашишдан қўрқадими ўзбекнинг бўз боласи?

Бўлди кулги!.. Айниқса Машрабнинг ёнидаги Су-лувсоч деган хипча бел, нозиккина қиз қотиб-қотиб ку-лар, янгроқ овози силкинган чўлпиларининг нафис жаранглашига қўшилиб, йигитнинг юрагига жаз-жаз тегарди.

Қўчқор аллақачон янганинг ёнига ўтиб олган, улар кўз уриштира бошлаган, у ҳатто ёш жувоннинг қўлла-рини ушлаб-ушлаб қўяр, умуман, ўзини қишлоқдаги-дай эркин сезар эди. Ёлғиз Акмал ҳамон оғзиға сўк солгандай жим ўтирас, баъзи-баъзида ғалати жилма-йиб қўйса ҳам, гапга аралашолмас, баҳтига, ёнидаги қиз ҳам тортинчоқроқ шекилли, кўп кулавермас, кам-суқум эди.

Бир-бир пиёла чой ичилиб-ичилмасданоқ ярадор йигит:

— Чойингни қўй, янгатой,—деди.—Дастурхонингни йигиштири. Бари бир қўй сўймайсан-ку бизга!

— Қўйим бўлса сўярдим-а бундай меҳмонларга!—деди янга ва кулди.— Қўйнинг калласини оғанг келганда ейсан, қайним!

— Сира қайғурманг, янга. Келиб қолади, оғам!.. Дўмбирани чўз, Қалбек. Яқинроқ ўтири. «Қора тўргай»ни ол, иним!

Сулувсоч қошларини учирив:

— Яна «Қора тўргай»ми?— деб кулди.— Ҳеч тўймас экансиз шу ўланга.

Ярадор йигит дўмбирани секин куйга соларкан:

— Вой қалқам-қалқам!— деди хўрсиниб.— Элдан узоққа кетсанг билардинг бу куйнинг қадрини! Урушда, окопда ётиб орзу қиласардик—эл-юргта омон қайтиб, бир эшитсак «Қора тўргай»ни деб! Не-не бўя йигитлар ўлиб кетди сендай сулув қизларни бир кўрсаму, «Қора тўргай»ни бир эшигсам деб, қалқатоим!

Бир лаҳза шўхлик ва кулги маъюс сукут билан алмашди.

Ярадор йигит дўмбирани созлаб, қаттиқроқ чала бошлади. Унинг қизларникидай ингичка, нозик бармоқлари тагидан чиқаётган ва негадир дарҳол бепоён даштни эслатган нафис куй дилларни қитиқлай бошлади. Қалбек ҳам яқинроқ ўтирди ва кўсини юмиб, секин тебрана бошлади, бироқ шу пайт йигит бармоги билан дўмбиранни бир уриб, куйни узди-да:

— Юринглар, далага чиқайлик!— деди тўсатдан.— Шундай яхши кечада нима қиламиш бу уйга қамалиб. Кетдик, қизлар!

Кеча ҳақиқатан ҳам жуда илиқ, гўё ҳозир кеч куз эмас, майин ёз оқшоми эди. Негадир жуда паст тушиб дашт билан қўшилиб кетган осмон юлдузларнинг қалинлигидан кўзни қамаштиради. Бир ҳафталик кўкиш ой шуъласида олис-олислардаги овулларгача қорайиб кўринади, нурсиз чироқлар кичик юлдузлардай милтираб, кишини ўзига чорлайди.

Ярадор йигит ўтлоққа чўзиларкан:

— Вой айланай, она ерим, жон далам!— деди, ёнверидаги ўтларни кафти билан силаб.— Сенга етадиган кун ҳам бор экану, ота яйловим-ов!

Қизлар аллақандай нозли қулишиб, турна қатор бўлиб ўтиришган ҳамон, йигит дўмбирани қўлига олди.

— Қани, қалқам Қалбек, ўтир ёнимга! «Қора тўргай»ни бошла, иничагим.

Қалбекнинг овози бошда сал бўғиқ эшитилса ҳам, хиёл ўтмай очилди, тобора тикиқлашиб, нозик, ўйноқи оҳанглар касб этди.

Чиндан ҳам, бўзтўргайнинг овозидай майин, хушёқим куй олис-олисларга тарқалиб, майинликка майинлик қўшди-ю, дашт яна ҳам кенгайиб, ёришиб кетгандай бўлди.

Машраб Сулувосчнинг ёнида ёнбошлаб ётиб бу куйни эшитаркан, ўзини худди хаёлий бир оламга тушиб қолгандай сезарди.

Кейинчалик, Машраб бепоён қозоқ даштларидағи кичик-кичик овулларни кўрганида, кишиларнинг: «Одамлар қандай яшаркан бу кимсасиз далада?» деган гапларини эшиптанида, ҳамиша ўша илиқ ёё оқшомини эслайдиган бўлади. Ярадор йигитнинг кўксини ерга бериб, она тупроқни ўпгани, шувоқ ва пичанларни худди севгилиснинг соchlарини силагандай силаганлари, ўша серюлдуз осмон, қиз-келинчакларнинг эрка кулгиси, чўлпиларнинг нафис жаранглаши ва Қалбекнинг қозоқ даштларидай дилрабо ўлани эсига тушадиган бўлди. Ўша куни биринчи марта жаҳонда ёмон ер, ёмон юрт йўқлигини, ҳар бир жой, ҳар бир элатнинг ўз чиройи, ўз ҳусни, латиф куй ва ўланлари борлигини дил-дилидан тушунди Машраб.

У сезган яна бир нарса — бутун халқ бошига тушган мусибат бу кичик овулни ҳам, кенг дашт қўйнида йўқолиб қолган бу заҳматкаш элни ҳам зилдай босиб турганини, ҳамқишлоқлари тортаётган ҳамма мусибат: ҳижрон доги ва висол қувончи, ўлим даҳшати ва айрилиқ, умид ва умидсиалик — ҳаммасини бошидан кечираётганини ич-ичидан ҳис этди.

«Қора тўргай»дан кейин қизлар «Айтишув»ни бошлиймиз, деб туриб олишди.

— Ўлан билмаган йигит ҳам йигит бўлдими? — деб лочинларга тоза тегажаклик қилишди.

Қўчкор Машрабни туртиб:

— Бир бало қил, девона! Шоир деган номингни оқла энди! — деганда, усиз ҳам қиз-келинчакларга жа-

воб тополмаганидан эзилиб ўтирган Машраб, силтаб ташлади:

— Бўлди-да энди! Айтдим-ку сенга бахши эмасман деб!

Янга йигитларга ачинди шекилли, тўсатдан ўзи ўлан бошлади:

Узбекнинг бўз боласи тойдай экан,
Қомати кучга кирган мордай экан,
Ўлани, дўмбираси йўқ, деманглар
Қизларжон, кулиб боқсак арзир экан.

Янга ўланни тугатмаган ҳам эдики, Сулувсоч илиб кетди:

Узбекнинг бўз боласин кўл мақтадинг,
Елғонни кўп гапирдинг, қизармадинг,
Ўлани йўқ йигитни йигит дерми?
Узимизнинг Қалбек пучук дуруст экан!

Бояги кулги ҳам гапми, энди бўлди кулгининг катаси!

Кенг даштни қизларнинг хуррам қаҳқаҳаси, чўлпиларнинг латиф жаранглаши тутиб кетди.

Бу сафар Машраб чидаб туролмади, хеч ким ёлвор-масданоқ, «Зулфия, Ҳижрон...» — деди-да, чуқур нафас олиб бошлади.

Барглари сарғайгак гуллар, дарахтлар,
Окшом туманда сокин боққан чоғ,
Ёрим, севар ёрим, жўнади жангга,
Менинг юрагимга тушди ҳижрон — доғ.

Мен севган дилдорнинг севган юрти бор!
Ишқ доим эрк учун ҳижронга рози.
Бу ҳижрон мангумас, висоли ҳам бор —
Қаҳратон қишлоарнинг бўлгандай ёзи.

— Бормисан, девона! — деди Қўчқор, лекин унинг хитобига ҳеч ким қўшилмади. Ҳамма бир нафас сукутга чўмди, сўнг Машрабнинг шеъридан татсиранган қизлар секин ўлан бошлашди.

Ўланлар ҳар хил эди: шўхи ҳам бор, кулдирадигани ҳам. Аммо аксарияти яна ўша, урушдә юрган бўз

Йигитлар ҳақида, севгилисини кутавериб, юзлари заъ-
фарон бўлган қизлар, ёридан айрилиб тул қолган ёш
келинчаклар тўгрисида эди.

Айниқса янга билан Сулувсочнинг овозлари ёқим-
той ўланлари кўнгилни эритиб юборгудек гўзал эди.
Афтидан, ёлғиз янга эмас, Сулувсоч ҳам ҳижрон доги-
да ёнар, кимнидир соғиниб кутарди..

Тарафма-тараф бўлиб айтилган ўланлар тугаб, қай-
тишга жазм қилишганда ой ботган. Ҳулкар тик тепа-
га келганди. Огулларда милтиллаган чироқлар ҳам ўч-
ган. Ҳамма уйкуга чўмган, фақат у ер-бу ерда итлар
вовиллайди.

Ярадор Йигит билан Қалбек ўз танлаганлари билан
орқароқда қолди, Қўчқор, аксинча, янга билан илгари-
лаб кетди.

Сулувсоч ёш бўлгани учунми ёки Машрабдан гап
кутгани учунми, худди Муяссарга ўхшаб ерга қараб
борарди. Машраб ўзи ҳам гўё Муяссар билан кетаётган-
дай юраги «гуп-гуп» урар, қизни секин қучоқлаб бағ-
рига босгиси, чўлпи тақилган соchlаридан оҳиста сила-
гиси келарди. Айни замонда, Муяссарнинг қўлидан
ушлашга иймангандай ийманар, бир нима дейишга
журъат этолмас эди. Фақат бириичи қўралар кўринган-
да секин сўради:

— Уйингиз қаёқда, Сулувсоч? Олиб бориб қўяйми?

Қиз «пик» этиб секин кулди-да, «сен»лаб жавоб
берди:

— Огулда ит кўп. Қайтишда қўрқасан.

Қиз рост гапириятими, пичинг қиласптими — тушу-
ниш қийин эди. Шундай бўлса ҳам, Машраб юрагида
бир журъат уйғониб, деди:

— Ит тугул олдиндан бўри чиқсаям узатиб қўя-
ман сизни, Сулувсоч!

Қиз бу сафар қия боқиб:

— Узбекнинг боласидан ҳам гап чиқар экан-ку! —
деди кулиб.

— Сиздай қиз бўлади-ю, гап чиқмайдими, Сулув-
соч!

— Узбекнинг ютида мендай қиз йўқми?

Машраб бир дақиқа эсанкираб қолди-да, ниҳоят:

— Йўқ, сиздай қиз оламда йўқ, Сулувсоч! — деб
юборди. Қиз тўхтади ва қоронғида кўзлари чақнаб
кулди:

— Қувликни билади·я, ўзбекнинг боласи!

— Йўқ, қувлик эмас, Сулувсоч, рост гап бу!—
Машраб юраги ҳинидан чиқай деб, қизнинг нозик бе-
лидан қучоқлаб.— Сулувсоч деса Сулувсочсиз сиз...

Қиз чаққонлик қилиб, бир толпинишда унинг қучо-
ғидан чиқди, кутилмаганда бир кескинлик билан:

— Қўлингни торт, ўзбекнинг боласи!— деди, Маш-
рабнинг қўлига бир уриб.— Қизга ёпишгунча ўлан
ўрганиб кел олдин!

Машраб тўсатдан уйғониб кетиб, ширин тушидан
айрилган одамдай, эсанкираб қолди.

Қиз чўлпиларини ноз билан жаранглатиб ғойиб
бўлгандагина ҳушига келди, сўнг, сукутга чўмган овул-
ни оралаб, ўз ётогига кетди.

У қайтиб борганида Акмал ухлаб қолган, Қўчқор
эса, ҳозиргина қайтган бўлса керак, чироқ шуъласида
ечинмоқда эди.

— Ҳа, қалай, ишларинг бешми дейман, кеч қол-
динг?— сўради Қўчқор ва жавоб кутмасдан, жилмайди.

— Аммо лекин, бизнинг ишимиз ҳам ёмон эмас,
оғайни. Ҳўп жувонмисан жувон экан·да, янга деганла-
ри!.. Ортиқча ўхкликка йўл қўймайди·ю, аммо лекин,
лабидан ўпдим. Ўзиям, мен сенга айтсам, олов экан қу-
риб кетгур!.. Агар ишонсанг!..

— Бўлди... кўп вақиллайверма!— Машраб шундай
ғазаб билан гапирдики, Қўчқор бир лаҳза оғзи очилиб
қолди, кейин илгаригидан ҳам хушнуд илжайди:

— Нима, Ларисани унутди деяпсанми мени? Шун-
чаки... Ҳазил·да бу, девона!

Машраб жавоб бермасдан бошини чопонига ўраб
олди.

Йўқ, Машраб на Сулувсочдан хафа, на Қўчқордан.
У ўзига ўзи шундай иполок, нафси бузуқ, пасткаш ту-
юлиб кетдики, инграб юборишидан қўрқиб, кафтини
тишлади:

Ахир... бир ҳафта бурун, унинг ўзи худди шунаقا
қилиқлари учун Қўчқордан нафратлаинган эди·ку? Ҳо-
звир эса... ўзи ундан баттар бўлди. Яна севган қизи бўл-
маса ҳам майли! Севган қизи, Муяссадай тенги Йўқ
маҳбубаси бор·ку, ахир? Боргандা нима дейди? Унинг
юзига қандай қарайди энди?

Машраб ўзи билан ўзи олишиб тонг оттирди.

Тўртинчи боб

Гулсум опа негадир Муяссарни кўчагача кузатиб чиқди.

Кун ботиб-ботмаган, дарахт шохлари ва пахса де-ворлардаги оппоқ қор зар пуркалгандай нафис товла-нади. Моҳира бувининг боғидаги мириза теракларнинг учида олақарғалар яхлаган қанотларини шақ-шақ уришиб, гоҳ «гур» учади, гоҳ «гур» қўнади, совуқ шабада юзларга минг тикан бўлиб қадалади.

Гулсум опа Муяссарга ўйчан тикилиб:

— Бор, боравер, жонгинам,— деди.— Изгиринда кўп турма.

Муяссар Гулсум опанинг юзига қарамасдан (у доим бу аёл билан гаплашганда, негадир, эҳтимол Машрабнинг онаси бўлгани учундир, ийманиб қоларди):

— Мен ойимларга айтаману дарров қайтаман,— деди.

Гулсум опа бошини чайқади:

— Майли, бугун келмай қўя қол, Мастира бор бугунча. Икки кечада ухламадинг ҳисоб. Дамингни ол, жоним.

Муяссар оҳиста бошини кўтариб Гулсум опага қаарди, ёлворгансимон:

— Наҳот анди ҳеч умид бўлмаса?— деб сўради.

Гулсум опа кўзларини узоқлардан, тоғлардан узмасдан ўйчан деди:

— Қайдам, икки томонлама крупозное воспаление, дейишди врачлар...

— Ҳаммадан Ларисага қийин бўлди-да, опажон. Яна Магнитогорскка кетамиз деб туришганда...

— Ҳа, қийин бўлди... Бу ёқда йигитларни айт... Тогда қолиб кетишмаса бўлгани ишқилиб... И! Ҳалиям турибмизми шу совуқда? Бор, жонгинам, дамингни ол!

Муяссар қаршидан урган аччиқ изгириндан салэгилиб, илдам юриб бораракан беморнинг оғир аҳволи кўз олдидан кетмасди. Сўнгги бир ҳафтада эридан хат устига хат олган Серафима Фёдоровна қаддини анча тутиб олган эди.

Гулсум опанинг бригадаси пахта планини ортиғи билан бажариб, бутун мактаб аҳли әркин нафас олган куни, бетоблигини билдирамай, бошқалар қатори хур-

сандликка қўшилди. Ўқишиш бошланишдан бир кун аввал эса, ўқитувчиларнинг эътироғизига қарамай, ҳамма билан баравар мактаб ҳовлисини, синфларни то-залашга ёрдамлашди, Ларисани ёнига олиб, деразаларни артди, пол ювди.

У айниқса ўқишиш бошланган куни яшнаб-яшариб кетди: қайси бир газетада у ўн йил дарс берган ва икки йилдан бери ёпилиб қолган севимли институти қайта иш бошлагани ҳақида хабар чиқипти!

Серафима Фёдоровна қирқ беш минут давомида, дарс ҳам эсидан чиқиб, жонажон институтини, у ерда ўтган студентлик чоғларини, ўн йил бирга ишлашган ҳамкасабаларини, шаҳар қамалда қолгаидан кейин кечирган қийинчиликларни эслаб кетди. Герцен ва Огарев ўқиган, Пушкин ва Гоголлар юрган Нева соҳилларини гапириб берди, озгин заҳил юзи ғалати ловиллаб, кўзлари чақнаб, шеърлар ўқиди.

Ўша куни дарсдан кейин Муяссарни Гулсум опа чақиртириди. Кирса, унинг хонасига ўқитувчилар йингилган Серафима Фёдоровна тўрда, Гулсум опанинг ёнида ҳамон мовий кўзлари чақнаб, юзлари ловиллаб ўтиради.

— Эшитгандирсан,— деди Гулсум опа.— Ленинградда Герцен номидаги Серафима Фёдоровнанинг институти қайта иш бошлабди. Шунга... биз ўқитувчилар маслаҳат қилдик. Ҳар ким баҳоли-қудрат — туршакми, ёнгоқми, майизми — ишқилиб, топганини қўшса-ю, бир-иккита посилка юборсак. Сен ҳам комсомолларни тўплаб, бир гаплашсанг. Ҳар ким кучи етганча...

Шу-шу Серафима Фёдоровна кечаш кундуз тиниб-тинчимай қолди. Ўзиям, бошда ўқитувчилар доира-сидагина бошланган бу иш, кейин жуда катта бўлиб кетди. Олдин бу гапни эшитиб, ҳамма рус аёллари топган-тутганларини кўтариб келишди, уларга ўқитувчилар қўшилди, ниҳоят, бу гапни унга айтмаганларидан қаттиқ ранжид Инобат кирди ва колхоз омборидан бир қоп ёнгоқ ва бир қоп туршак ёзиб берди.

Бу ўртада Серафима Фёдоровна районга бориб, бағаж қилиб жўнатиш масаласини ҳал қилиб келди.

Бир неча кун давомида Гулсум опанинг хонаси омборга, ўқитувчилар кабинети эса қути ясадиган устахоиага айланди. Ниҳоят, бурноғи куни Серафима

Фёдоровна бир арава юк билан шаҳарга кетди- ю, меваларни поездга ортиб жўнатди. Лекин ўзи базўр юрган одам, ўпкасидан айрилиб қайтиб келди... Шундан бери иситмаси $39 - 40^{\circ}$ дан тушмай, дам ўзини билмай, дам ўтда ёнгандай алаҳлаб ётипти. Бугун эрталаб Иnobат от юбориб шаҳар касалхонасининг врачини чақиртириди. Муяссар врач нима маслаҳат берганини эшитмаган эди, ҳозир Гулсум опа айтди...

«Икки томонлама крупное воспаление!..»

Наҳот икки йиллик оч-яланғочлик, хасталик, қамал — ҳаммасига бардosh берган одам, келиб-келиб энди, йўқолган ёстиқдоши топилиб, яқинда кўчамиз деб турганда... Йўқ-йўқ, бундай бўлиши мумкин эмас!..

Муяссар бир бу ўйлардан кўнгли бузилиб, бир кечикиб кетган Машраблар эсига тушиб, кўзига ҳеч нарса кўринмай бораркан, тўсатдан:

— Муяссархон! Мунча шошасиз? — деган товуши эшитиб сесканиб кетди.

Сойга буриладиган тор кўчанинг бошида Ёдгорбек билан Кўр Шермат турарди!

Ёдгорбек куёвлардай ясанган — эгнида кўкраги очиқ банорас тўн, белида белбог, сёғида кўзгудай ялтиллаган хром этиқ. Кўр Шерматнинг кийими жўнроқ бўлса ҳам, янги сур телпакни чап кўзига бостириб кийган, соғ кўзи артилган тилла уаукдай ялтиллайди... Икковининг ҳам кайфлари тарақ, қўлтиқлашиб олган, баравар жилмайишади...

Муяссар юраги гурс-гурс уриб, беихтиёр қадамини секинлатди.

— Салом, Муяссархон! — Ёдгорбек қўлини кўксига қўйиб кулимсиради.— Биз сизни тўйга таклиф қилгани кетаётувдик. Комсомолчасига қизил тўй қилмоқчимиз. Борасиз-а?

— Раҳмат.

— Нима, ишонмайсизми? Ишонмасангиз... — Ёдгорбек қошини маънодор учирди.— Дугонангиздан сўранг, Муяссархон!..

Муяссар, Кўр Шермат сармаст кулимсираб олдини тўсмоқчи бўлаётганини кўрди-ю, тор кўчага бурилиш ҳам эсидан чиқиб, катта кўчадан чопқиллаб кетди.

Орқасидан йигитларнинг кулгиси ва Ёдгорбекнинг истеҳзоли товуши эшитилди:

— Бу йигитга бир қиё боқинг, яхши қиз! Лочин-а, лочин!

Муяссарни тўсатдан қалтироқ босиб, қадамини секинлатди, бир ўйи орқасига қайтмоқчи ҳам бўлди-ю, юраги ҳамон гуп-гуп уриб, журъат этолмади. Лекин йигитлардан узоқлашган сайин дилида уйғонган туғён пўртанадай кучайиб борарди.

Нимадан шунча қўрқди у? Нега гап билан узиб-узиб олмади? Қизил тўй әмиш!.. Гулчеҳра ҳам яхши! Наҳот энди ҳамма нарсани унутиб, тақдирга тан бе-риб қўя қолса?

Муяссар ўзи билан ўзи олишиб, гузарнинг ёнига бориб қолганидагина ҳушига келди-ю, пастки лабини тишлиб... бир зум иккиланиб турди, сўнг шартта бурилиб, Гулчеҳраларникига қараб кетди.

Бу сафар эшикни Гулчеҳранинг отаси очди. У оғир йўталиб Муяссарга хўмрайиб қаради, лекин қиз, гўё унинг ёқтиргмаганини сезмагандай, ёнидан ўтиб, ҳовлига кирди.

Эртага тўй бўлишига қарамай, катта уйда бир-икки кампирлардан бошқа одам кўринмас, Гулчеҳра, бир ўзи бир хонада кашта тикиб ўтиради.

Эгнида ўзига ярашиб тушган хонатлас кўйлак, бошида ғижим рўмол, қандайдир очилиб, юмалоқ юзи тўлин ойдай яшнаб кетганди.

Қиз Муяссарни қўриб шошиб ўрнидан турди, қўлларини ёзиб:

— Вой, дугонажон,— деди-ю, унинг ранг-рўйига қараб, алланечук типирчилаб қолди.

— Табриклайман,— деди Муяссар.

Гулчеҳра пастки лабини тишлиб, қошиқдеккина амиркои кавушининг учларига тикилди.

— Нима қиласай ахир?

— Нима қиласай эмиш! Йўқ десанг бирор босингни олармиди?

Гулчеҳра ранги сал ўчиб:

— Чинини айтсам...— деди.— Мен уни... Едгорбек акамларни яхши кўраман...

— А?

Муяссар бир лаҳза гап тополмай эсанкираб қолди, кейин титроқ босиб:

— Бунақа бўлса,— деди,— нега у бечорани... Акмални аҳмоқ қиласан? Нега ростингни айтиб қўя қолмадинг?..

— Мен бир нима дедимми? У хом семиз ўзи-ку...

— Хом семиз! У хом семиз сенинг бу... ёшини яшириб, дадасининг пинжида пусиб юрган севгилинигдан минг марта яхши! Билдингми?

Муяссар эшикда ичкарига кириш-кирмаслигини билмай, типирчилаб турган Гулчеҳранинг ойисини кўриб:

— Майли, топишганинг яхши бўпти,—деди.—
Мен Акмалга ачинмайман, сенга ачинаман!

Муяссар шундай деди-да, даҳлизда шивир-шивир қилаётган аёлларнинг, ҳовлида, баланд ишкомнинг остида ҳўмрайиб турган оқсоқолнинг ёнидан ўтиб кўчага отилди.

Кун ботган, изғирин босилиб, аллақандай илик, майин қор ёга бошлаган эди. Қишлоқни ўраган майин оқ парда орасидан у ер-бу ерда битта-яримта чироқ милтиради...

Оқсоқолнинг уйидан «кайнаб» чиққан Муяссар сукутга чўмган кимсасиз кўчалардан бир-бир босиб бораркан, ҳамон Гулчеҳра билан уришар, тортишарди. Ахир... наҳот шундай қилиш мумкин бўлса? Наҳот бугун биронни яхши кўрдим деб, бошини айланирса-ю, эртага бошкага севги изҳор қилса?

Сойда, қўш ёнғоқнинг тагида, оппоқ қорга кўмилиб узоқ турди. Юрагидаги исёнкор туйгулар аста-секин сўниб, хаёlinи аллақандай маъюс ўйлар банд этди...

Ху ана шу жойда, тахта кўприкнинг остида, атрофи қалин ялпиз билан ўралган кичик бир булоқ бор. Одатда ёнғоқлар пишиб, болаларнинг «тошибурони»га учраганда Машраб ҳар куни кечқурун ўз улушидан бешолтитасини шу ялпизга ташлаб қўяр, Муяссар эса, кечқурун сувга чиққан маҳалда қидириб топиб оларди... Рост, Машраб кўпинча ёнғоқ ўйнайман деб ютқазиб қўяр, лекин шунда ҳам Муяссарни унутмас лоақал учтўртта бўлса ҳам ялпиз орасига, албатта ташлаб кетарди.

Эҳтимол Машраб... Машраблар бу ерда бўлганда... бунчалик бўлмас эди! Балки Серафима Фёдоровна ҳам касалга чалинмас эди-ю, эҳтимол, ҳозиргача репетициялар тугаб, мактабнинг катта залида одамларни титратиб спектакль кўрсатишарди...

Муяссар бу ўйлардан қутулмоқчи бўлгандай бошини силкиб, рўмолига қўнган майин қорни тўзгитиб

юборди. Қор тўзғиди-ю, бироқ икки кундан бери бутун қишлоқ аҳлини ташвишга солаётган ўйлар хаёлини баттар чулғаб олди: эшак карвонга нима бўлди? Болаларнинг, отасининг аҳволи нима кечди? Бу қорда тогдан ўта олишадими, ё кун исигуқча қозоқ даштида қолиб кетишадими?

* * *

Бир ҳафтага чўзилган чоп-чоплар, тортишувлар, даста-даста ҳужжатлар, юқорига юборилган сўроқлар, ахийри ўз иатижасини берди: сал кам етти тонна ғалла ниҳоят қўлга тегди, бироқ Комил қўрқиб юрган нарса ҳам келиб-келиб ўша куни юз берди: эрталаб ғалланни қўрага ташиётгандарида бошланган совуқ ёмғир сал ўтмай қорга айланди. Кетма-кет изғирин туриб, куп шунчалик совидики, туёклари тўнгиб қолишидан қўрқиб, эшакларни қўрага қамашга мажбур бўлишди.

Намозшомда карвоичилар Комил билан Қурбон ота турган қўрага йиғилишди.

Ярадор қўли совуқ тушгандан кейин баттар безиллай бошлаган Комил вазиятни қисқача тушунтириб берди.

Аҳвол қанчалик оғир эканини айтиб ўтиришнинг ҳожати йўқ: кор бу ерга тўлиқдан ёғса, тоққа тиззадан ёғиши аниқ. Лекин кун исишини кутиш ҳақида гап бўлиши ҳам мумкин эмас. Чунки ҳавона гишониши қийин, энг муҳими, қор устига қор ёғиб, даштда қолиб кетишлари эҳтимолдан холи эмас. Битта-ю битта йўл — ҳамма қийинчиликни бўйнига олиб, белна маҳкам бօғлаб, сафарга чиқиш!

— Бир яхши жойи,— деди Комил.— Эшаклар бир ҳафта дам олиб, жир битиб қолди. Бу ёғи ўзимизга бօғлиқ. Иродамизга, кучимизга, сабр-тоқатимизга бօғлиқ. Гапнинг пўскалласи... олдимизда турган тоғ мисоли душман қалъаси-ю, биз гвардиячи жангчилармиз! Бу қалъаларни эгаллашимиз шарт!

— Балли! Ўғил бола гап бўлди бу!— Қурбон ота, болаларнинг кўз қисишиб жилмайишларини сезмай, ўриидан турди, катта фуражкасини ялтироқ бошининг орқасига суриб ва ёнбоцидаги чарм сумкасини тўғрилаб хитоб қилди:— Между прочим, биз большевиклар бу тоғ орасида, яъни бундан минг фойиз оғир шароит-

ларда оқ унсурлар билан курашганимиз и тор-мор қилганимиз! Бас, бу тогни забт этиш лозим и забт этамиз ҳам!

Вазият қанчалик жиддий бўлмасин, болалар мажлисни тугатиб уйдан чиқишилари билан бир-бирларини туртишиб, кулишди:

— Гапни қойил қилдиларми, бобой!

— «Үртоқ Чапаев» бўладилару, қойил қилмайдиларми?

Тонг палла Комилни Қурбон ота уйғотди. Комил дарчадан қараб серюлдуз осмонни кўрди-ю:

— Хайрият! — деб юборди.

Ота, эгнида қалин чопон, бир ёнида чарм сумка, бесўнақай фуражкасини бостириб кийиб олган, ўзи жуда бардам кўринади.

— Уч азаматни уйғотиб, болаларга юбордим, — деди у. — Баравақтроқ йўлга тушиб, пешингача Ёмонтошга етиб олмасак, аҳволимиз танг!

Комил бош иргади:

— Ҳаво очилипти-ку.

— Очилишга очилгану, аммо лекин лёз. Бамисоли ханжар. Қўлингга аҳтиёт бўл, болам!

Қурбон ота баравақт тургани яхши бўлди: эшакларни тўқимлаб, галлани ортишга анча фурсат кетса ҳам, йўлга чиқишигандаги осмонда ҳали юлдуз бор эди.

Изгириндан кўалар ёшланади, оёқ остида қор гарчиллайди.

Карвон бошида саман йўргага миниб олган Қурбон ота борар, Комил билан Қўчқор өнг орқада, Машраб билан Акмал эса ўртароқда, уларнинг ҳар бири ўн беш-йигирма болага жавобгар.

Кўпчилик болаларнинг кийими юпун: оёқларида йиртиқ-ямоқ этик, эски маҳси-кавуш, тумшуғи тешилган ботинкалар, бошларида дўппи, қулоқлари белбоғ билан танғилган. Битта яхши жойи шуки, кўпларининг оёқ кийимлари катта — топган латта -путтанинг ҳаммаси пайтава қилингач.

Албатта, йўл яхши бўлиб, жадалроқ юришса, совуқ унча билинмас, қулоқ-бурунларни «жаз-жаз» чақмас эди, лекин из тушмаган йўлдан юриш мушкул.

Шунга қарамай, кун чиқар-чиқмас даштии босиб ўтишди-да, тօғ оралиғига кириб боришиди. Тоққа ки-

ришлари билан изгирин ҳам пасайди. Даشتда ўгайлардай совуқ чақнаган осмон энди ўз фарзандига қарагая онадай бирдан мулойимлашди-ю, борлиқ бўлакча бир майнинлик касб этди.

Баланд чўққиларни, адирларни, дарахтларни босиб қолган қор бу ерда шундай юмшоқ ва илиқ кўринаидики, гўё тоққа қор тушган эмас, майин оқ кигиз ёпилган. Икки чети музласа ҳам шарқираб оқаётган дарёчалар қайнаган қозондай буғланади, сойда оқ булатлар кўчиб юргандай туюлади. Яқиндагина вазмин шовиллаб, салобат тўкиб турган азим чинорлар энди оқ тўн ёлинган мўйсафидлардай сокин мудрайди. Фақат юксак қоялар бағридаги кўм-кўк арчалар, момиқ оқ кигиз сатҳида яна ҳам яшилроқ кўриниб, баҳри-дилини очади кишининг. Машрабга шундай туюладики, гўё булар арча эмас, балки оқ рўмолдан чиройига чирой қўшилган сулув келинчаклар... Баъзан бу арчалар уялиб-ийманиб турган Муяссарни эслатади унга... Фақат бир нарса бу гўзалликдан тўйиб баҳра олишга халақит беради, у ҳам бўлса — йўлнинг очилмагани!.. Тоғ оралиғига кириб борган сайин қор қалинлашади. Баъзи жойларда тиззага келади. Бу ҳам етмагандай, кун илиган сайин қор эриб, кийимларни шилта қила бошлади.

Рост, ҳозирча болалар бардам. Баъзилар бошларидаги белбоғларини ечиб, кўқракларини очиб олишган, тез юрганлари қизишиб, юзлари ловиллаб ёнади. Бунинг ҳаммасини куватиб, гоҳо қўрқиб бораётган биттаю битта одам — Комил. У болаларнинг ҳўл ботинкаларига, маҳси-кавушларига, шилта бўлган почаларига ташвиш билан тикилади. Рустам довон устида гоҳ пайдо бўлиб, гоҳ тарқаб кетаётган кул ранг булатларга безовталаниб қарайди. Ахир... олдинда бу довондан ташқари Ёмонтош турибди!

Комил қайта-қайта ёпирилиб келаётган хавотирликдан қутулиш учун хаёлида фронт воқеаларини тирилтиришга уринади, қаттиқ жангларни, хавфли разведкаларни эслайди. Лекин қанча уринмасин, яна бу ташвишларга қайтганини ўзи ҳам сезмайди. Ахир уруш нақадар оғир бўлмасин, Комил бир ўзи учун жавоб берарди. Ҳозир-чи? Уруш бўлмаса уйларида оёқларини танчага тикиб ўтирадиган, мактаб ҳовлисида қорбобо ясаб, яхмалак отиб юрадиган бу бола-

ларга нимаям деб бўлади? Бирор фалокат юз бериб, битта-яримтаси йўлда қолса... қишлоққа нима деб боради? Усиз ҳам ҳар куни фронтдан қорахат олаётган бева-бечораларнинг юзига қандай ҳарайди?

Бу хавотирлар оздай, қўл ўлгур ҳам совуқда бе-зиллаб оғрияпти. Шундай оғрияптики, назарида, ўша лаънати ўқ ҳозир қайта теккану, суюкларини қайта мажақлаб ташлаган. Ўзи жонсиз бўлса ҳам, совуқни сезишини қаранг, касофатнинг! Аттанг, бошда госпиталда кесиб ташламоқчи бўлишгандা бекор кўнмаган эканиман. Энди бир умр азоб берадиганга ўхтайди, савил!

Яхшиям Барно тивит рўмолини берган экан, бўлмаса...

Комил Барнони, унинг аллақандай мунгли хатини ўйлаши билан яна юраги ўйнаб, олисларга тикилди. Ана, кул ранг парда каби хира туман орасидан Рустам довони кўзга чалинди.

Комил мадад истагандек олдинга — бир ёнбошида чарм сумка, бир ёнбошида қўштиғ милтиқ, отда гўдайиб ўтирган Қурбон отага, сўнг лочинларга қаради.

Қўчқор, катта ағдарма телпак бошида, чопонининг ёқаси кўкрагигача очиқ, йирик-йирик одим ташлайди. Юзида аллақандай қатъият, шиддат бор, узоқларга тикилган кўзлари аса, аксинча, мулойим чақнайди.

Машраб тамом бошқача: ҳадеб атрофига аланглагани аланглаган. Қўй кўзлари ҳайрат ва таажжуб билан пор-пор ёнади. Ақмал ҳам қандайдир ўзгариб қолган, бу ажиб тоғларни кўриб унинг ҳам дили равшан тортгани ғалати кулимсирашларидан сезилиб туриби.

Улар Рустам довонидан ошиб, Ёмонтошга ёндош кичик яйловга етгуналарича офтоб гарбга ёнбошлиб, анча хиралашиб қолди. Кечки совуқда эриган қор музлаб, йўл сирғанчиқ бўлиб борар, чарчаган эшаклар, оёқлари чалишиб, дам-бадам суринар эди.

Аҳволни зимдан кузатиб, Комилдан ҳам кўпроқ бевонталаниб келаётган Қурбон ота карвон яйловга етганда Комилни четга имлади.

— Эшакларга бир қара! Ёмонтошда йиқилиб қолиб кетмаса, дейман.

— Илож қанча? Бу ерда тўхтаб, юкии тушириб бўлмайди-ку!

— Илож бор! — деди Қурбон ота. — Эшакларга бир дўппидан ем бериш керак. Уч-тўрт пуд ғалла кетса кетар. Бир қоп ғалла деб, ҳаммасидан айрилиб қолмайлик тағии! Ҷақир йигитларни!

Отанинг гапи йигитларга ҳам маъқул бўлди. Маслаҳат билан, «Информбюро»нинг қопи сўклилиб, (бу безгакдай қалтираб ҳолдан кетиб қолганди!) ҳар бир болага бир дўппидан буғдой улашилди.

Болалар эшакларга ем бериб, ўзлари ҳам оз-оздан нон еб олишгунча ярим соатча вақт ўтди. Бироқ вақт кетса ҳам, отанинг маслаҳати билан иш тутганлари яхши бўлди, чунки Ёмонтош дараси улар кутгандан мудҳиш эди! Яйловда илиқ туюлган ҳаво дарага кириш билан кескин ўзгариб, изғирин бошланди-ю, этларини жунжиктириб юборди.

Лекин энг ёмони шуки, пешингача қор қаттиқ эриб, сойнинг суви анча кўпайиб қолибди! Айни замонда, қирғоқлардаги муз ҳам эримабди.

Энди эшаклар бу муздан юриб сойга тушиши, кеин янга муз босиб қуруқча чиқиши, бир эмас, ўн бир жойдан шу йўсин ўтиши шарт, бошқа илож йўқ эди.

Хайрият, биринчи кечувларда сув сал ёйилиб оққани учун муз юпқароқ экан, Қурбон ота саман йўргани солиши билан қарс-қурс ўпирилиб тушди. Уч-тўрт кечикдан юкии туширмасдан икки ёнидан суюб ўтиб олишди. Фақат сув кечишга мажбур бўлган болалар бир лаҳзадаёқ юзлари, лаблари кўкариб, тишлари тишларига тегмай дир-дир қалтираб қолишиди.

Бешинчи, олтинчи кечувуга борганда дара анча торайиб қолди. Кун тегмагани учун бўлса керак, сойнинг чётларидаги муз шундай қалинлашиб кетган эдикি, от туёқлари у ёқда турсин, қулочкашлаб отилган катта тошлар ҳам иш бермай қўйди.

Эшаклар икки ёнидан суюлганда ҳам бу муздан юқ билан ўтолмайди. Биттаю битта йўл — қопларни кечувдан орқалаб ўтиб, эшакларни салт ҳайдаш. Сипсилиқ қоя тошлардан иборат тор дарада на қум бор, на шагал, шарқираб оққан сув ҳаммасини юваб кетган.

Бирин кам юз эшакнинг юкини беш-олти кечувдан сув кечиб орқалаб ўтишни ўйлаш ўзи даҳшат, бироқ бошқа чора йўқ!

Буни ҳаммадан бурун Қўчқор тушунди. Кўзи Ко-
милнинг иажот қидирган кўзларига тушди-ю, у бир
нима демасданоқ, ҳангисидаги қопни бир силташда
елкасига ағдариб, кечувдан биринчи бўлиб ўтди.

Этигининг қўнижидан келган сув сёқларини хан-
жардай кесиб, кўзидаң ёш чиқариб юборди. Шундай
бўлса ҳам, вужудини тутган қалт-қалт титроқни бо-
сиб ҳазиломуа қичқириди:

— Вой,войвой! Самовардай қайнаб кетиби-я
суви тушмагур! Ким совқотса тушсин сойга!

Комил юраги илиқ бир меҳрга тўлиб:

— Яша Қўчқор! Яша азамат! — деб юборди.

Бу ўртада, Акмал ҳам ўз қопини елкасига ағдар-
ди-да, айиқдай тебраниб, кечикдан ўта бошлади. Уни
кўрганда Машраб ҳам ўзини тутолмади. Машрабнинг
кетидан Мирза, ундан кейин яна уч-тўртта миқтироқ
болалар қопларга тармашди.

Буларнинг ишини совуққонлик билан четдан ку-
затиб туриш қийин, энг муҳими — мумкин эмас, чун-
ки улар бир кам юз қопни кечувдан ташиб ўтгунча...
хуфтон бўлади!

Комил ёнида турган новча қора болага ярадор
қўлини узатиб қаттиқроқ боғлатди-да, болаларга юз-
ланди.

— Қани, укалар! Агар ёлғиз шу азаматларга қа-
раб турсак, қолиб кетамиз бу дарада! Икки овора
қўллашиб иш бошлайлик, инилар!

У шундай деди-да, ёнидаги оғзин қора бола би-
лан қўллашиб соғ қўлини тутди:

— Қани, ке ука, оғирликни менга ташла!

Шериги новча бўлгани учун қопнинг оғирлиги усиз
ҳам Комилга тушарди. Бу ҳам етмагандай, юрганда
қоп силкиниб, ярадор қўли шундай зирқиардики,
назарida, кўзидан ўт чиқиб кетди. Ариқ сувининг
бутун заҳари ҳам негадир шу қўлига урди. Чидаб
бўлмас оғриқдан кўз олди қоронғилашиб, кечикдан
аўрга ўтди-да, ерга ташланган қопга ўтириб қолди.
Анчадан кейин кўзини очганда, болаларнинг деярли
ҳаммаси жуфт-жуфт қўллашиб, ҳар қадамда бир сир-
ганиб, суриниб бўлса ҳам кечувдан ўта бошлаган эди.

Комил тишини тишига қўйиб ўридан турди, соғ
қўлини ёнида қалтираб турган боланинг елкасига қў-
йиб, секин деди:

— Қани, яна бир зўр берайлик, ука!

Шу пайт, орқадан Машрабнинг овози эшигилди:

— Йўқ, сиз ўзингизга қаранг. Комил ака, б-биз ўзимиз бир б-бало қиласиз.

У шунчалик совқотган эдики, тишлари тишларига шақ-шақ тегиб, лаблари гапга келмас, ўзиям чаён чаққандай кўкариб, бурни сўррайиб қолганди.

Комил маъюс кулимсиради:

— Раҳмат, ука. Мени қўяввер. Узинг бир жойда тўхтама, ҳаракат қил ука, ҳаракат...

Машраб усиз ҳам жон-жаҳди билан ҳаракат қиласар, тобора ҳолдан кетаётганини сезса ҳам, Қўчқор билан Акмалдан қолишмасликка уринарди.

Яхшиям бу орада Қурбон ота «Информбюро»ни ёнига олиб — бола бечоранинг ҳатто қўллашишгаям чамаси келмади! — шувоқ ва ёвшан юлиб гулхан ёқишига киришди.

Намиқсан шувоқлар олдин тутаб яхши ёнмаса ҳам кейинроқ чарс-чарс учқун сочди-да, ахийри гуриллаб кетди.

Қопларни ташиб бўлган болалар гулханга қараб чопишиди, шолғомдай қизариб кетган оёқ-қўлларини, тарашадай қотиб қолган пайтаваларини ёниб турган оловга суқишиди. Ажабо, ёвшан ва шувоқлар гуриллаб ёнаётган бўлса-да, на оёқ-қўллари куярди, на пайтавалар. Шунга қарамай, гулхан ҳар ҳолда, анча жонга ора кирди, аъзойи баданларига қон югургаян болалар ҳар ёқдан хитоб қилишди.

— Яшанг, ота. Зап жонон иш бўлди-да бу гулханингиз!

— Биладилар-да бу киши. Босмачилар билан олишган-а!

Қурбон ота, бу хитоблардан вақти чоғ, фуражкасини баландроқ кўтариб, «Информбюро»га қараб мўйлов қилди:

— Қани, болам, юр! Нарироқдан яна биттасини ёқиб қўяйлик. Между прочим, ўртоқ Чапаев ҳам яхши кўрганлар оловни!

Болалар, бу сафар кулишга ҳам чамалари йўқ, маъюс жилмайшиб, яна юқ ортишга киришдилар. Лекин на фойда ариқдай, ўтиб икки юз-икки юз эллик қадам юрар-юрмас, илон изи бўлиб оққан асов сойтағин олдиларини тўсди...

Яна ўша аҳвол: тақасиз эшаклар оёги куйган то-
вуқдай питирлаб, тийғаниб, муз устида чўзилиб қол-
ди. Яна Қўчқор бошлиқ лочинлар биринчи бўлиб
қопларга тармашиши, тиззадан сув кечиб, фалла та-
шишга киришиши. Улардан кейин бошқа болалар
ҳам, кўзларида милт-милт ёш, жуфт-жуфт бўлиб қўл-
лашишга мажбур бўлиши.

Буни кўриш, кўзларида милт-милт ёш, муз устида
сирғаниб, дир-дир титраб кечикдан ўтаётган болалар-
нинг юзига қарашиб... даҳшат! Шунинг учун ҳам Комиля
ҳеч кимга қарамасликка ҳаракат қилас, оғриқ ҳам
эсидан чиқиб, ҳадеб қопга тармашарди. Фақат ўқтин-
ўқтинда лочинларга кўзи тушиб, аллақандай қайноқ
бир туйгу юрагини шифиллатиб юборар, хаёлида эса
ҳадеб бир фикр такрорланарди: «Буни бир кўрсанг
эди, Эртоев! Бир кўриб қўйсанг эди буни, лаънати Эр-
тоев!»

Бу сафар ҳам жонларига ора кирган нарса Қурбон
отанинг олови бўлди. Бироқ нима фойда. Танларига сал
қон юргурган болалар қопларни ортиб, икки юз қадам
корар-юрмас, учиячи кечувга дуч келиши.

Энди, эҳтимол, дир-дир қалтираган болалар юк кў-
таришга ярамас эди, яхшиям Қўчқор бор экан, ку-
тилмаганда ажойиб бир иш қилди.

Навбатдаги кечувни кўрганда у шундай фигони
чиқиб кетдики, тўсатдан бир пуд келадиган катта тош-
ни боши устига кўтарди. Овозининг борича:

— Ё сен бўласан пачоқ, ё мен! — деб қичқирди да,
тошни куч билан музга шундай урдики, муз қарсил-
лаб кетди-ю, ўтовдай жойи ўпирилиб тушди.

Кечик олдида йиғилиб турган болалар, бараварига:
«О!» деб юбориши.

Қўчқор, мақтov севадиган одати бор эмасми, бу
хитоблардан илҳомланиб кетиб, сойнинг у юзидағи
музни ҳам шу тош ва шу куч билан уриб парчалади да,
огир ҳансирақ қичқирди:

— Йўл очиқ! Қўшин ўтиши мумкин, ўртоқ ко-
мандир! Солинглар отларни!

Хайрият, даранинг охирига яқинлашган сайин,
асов сой саёзлашиб муз тобора юпқалаша борди-ю,
ниҳоят қоя тошлар чекиниб, яйлов кўринди. Бироқ бу
ўртада болалар ҳам тамом ҳолдан кетган, баъзилар-
ни турмушдан умидини узган одамлардагина бўлади.

ган ёмон бир бефаҳмлик згаллаб олганди. Бу сафар ҳатто дарадан чиққан жойда ёқилган катта гулхан ҳам фойда бермади. Шунинг учун Комил гулханинг ёнида кўп тўхтамасдан, йўлга тушишга буйруқ берди.

Тоғ оралигидаги тунов кунги қишлоқ Ёмонтошдан узоқ эмас, кўп бўлса бир соатлик йўл. Бироқ бу масофа өрталабдан бери босиб ўтилган узоқ йўлдан ҳам мушкул бўлди. Чунки биринчидан, Ёмонтошдан чиқмасданоқ қоронги тушди, иккинчидан, карвонда ҳамон ўзларини дадил тутиб, болаларни «ҳа-ҳа» лаётган иккита одам қолган, у ҳам бўлса Қурбон ота билан Қўчқор эди. Ҳатто Акмал ҳам маймоқ оёғи қақшаб, оқсоқланиб қолган, Машраб эса боя Ёмонтошдаёқ тамом бўлган, ҳозир йўлда ётиб қолишга тайёр эди. Комилга ўхшаб, уни ҳам биттаю битта нарса — ор-номус ушлаб турар, чунки ён-верида ундан ҳам ёшроқ, нимжонроқ болалар товушсиз юм-юм йиглашса-да, судралиб боришарди!. Мана энди, дарадан чиқар-чиқмас унинг иситмаси кўтарилиб, кўз олдини ғалати бир туман ҳоллаб олди-ю, ҳамма нарса тушдай туюла бошлади. Сал ўтмай, борлиқ чинакам туман орасига шўнғиди: олдинда қандайдир чироқлар милтиради, кимлардир фонус кўтариб чиқди. Аёлларнинг овози, ҳатто чўлпиларнинг таниш шилдираши эшитилди. Анчадан кейин, ичига худди әритилган чўяндай иссиқ ва ёқимли бир нарса қўйилгандай туюлиб, кўзини очди.

У таниш хонанинг бурчагида ётарди. Қўчқор унинг бошини кўтариб турар, ёнгинасига тиз чўйкан тунов кунги ёш жувон қуртова ичирмоқда эди.

Токчадаги мойчироқнинг хира шуъласида ёш жувоннинг юзи аллақандай ғамгин кўринарди. Лекин Машраб қўзини очиш билан жувон оппоқ тишлирини кўрсатиб жилмайди. Майин товушда:

— Ай қалқамов, нима бўлди сенга? — деди.

Рост, нима бўлди ўзи? Наҳот у шунчалик иродасиз бўлсаки, йўлда йиқилиб қолса?

Машраб қўли билан косани четга суриб, туришга ҳаракат қилди.

— Болалар, нима бўлди? Ҳамма омонми?

— Омон! Омон! — деди Қўчқор. — Қуртовани ур, оғайнни!

Машраб ўзини ёстиққа ташлаб, кўзини юмди.

— Хайрият!

Биринчи дарс адабиёт эди. Йигитлар даштга кетгандан кейин анча ҳувиллаб қолган каттагина хонада түққизинчи ва ўнинчи синф ўқувчиларидан ўн чоғлик қиз ўтирас ва эшикка қизиқсиниб қарашарди: бугун адабиёт дарсига урушдан ярадор бўлиб қайтган ёш ўқитувчи кириши керак эди. Лекин қўнгироқ чалинар-чалинмас, эшикда ярадор йигит эмас, математика ўқитувчиси Азиз домла кўринди. Қўлида бир парча қизил мато. У биринчи партанинг олдида тўхтади, сув қўйгандай жимжит синфда термилишиб қолган қизларга қаради-да, яна ерга тикилди.

— Ўқитувчимииз... Серафима Фёдоровна дунёдан ўтди.

У, гўё сукутга чорлагандай, бошини эгиб бир нафас индамай турди, сўнг:

— Мана буни йиртиб, қўлларингга боғланглар, ҳозир дафи маросимига борамиз,— деди-да, қўлидаги қизил латтани Муяссарга тутқазиб, тез юриб чиқиб кетди.

Муяссарнинг кўз олдига Лариса келди. У қизил матони боғлашга ҳам сабри чидамай, Азиз домланинг срқасидан югуриб чиқди.

Моҳира бувининг ҳовлиси билан меҳмонхонаси одамга тўлиб кетган. Бошлари маъюс әгилган рус аёллари айвонда жимгина қаторлашиб туришар, мўйсафидлар ҳовлининг бир четида русча тобут ясашмоқда.

Гулсум опа Муяссарни деразадан кўриб қолиб имо қилди: «Бу ёқса кир».

Муяссар ўзини Ларисанинг ўрнида, олис юртда онаси вафот этган ҳолда кўрди-ю, ўпкаси тўлиб, эшикни секин очди.

Серафима Фёдоровна жасади ўзи ётадиган каравотга қўйилиб, чимилдиқ билан ёпилган.

Моҳира буви билан бир рус кампир, қўлларида игна, ип, қандайдир матолардан нимадир тикишмоқда.

Лариса эгнида эскироқ шерстъ кўйлак, бошида кўк дурра, каравотнинг оёқ томонида, пешанасини каравотга суяб қотиб қолган.

Муяссар киргач, Гулсум опа Ларисанинг ёнига ўтди, елкасидан секин қучоқлаб:

— Қўй энди, жоним,— деди.— Куюнган билан фойда йўқ. Қаддингни тутгин сал...

Лариса қимир этмади.

Моҳира буви кўз ёшларини артиб:

— Иғлаганда ҳам кўнгли сал бўшармиди?— деди. Рус кампир чуқур энтикиб:

— Эрини кўриб ўлгандаям... бунчалик бўлмас эди,— деди. Телеграмма берганда келиб қолармиди?

Гулсум ола бошини маъюс чайқади.

— Айтдик. Марҳума ўзи хоҳламадилар. Кейин... Магнитогорскдай жойдан ҳозир уч кун тугул бир ҳафтада ҳам етиб келиш қийин, буви...

Ларисанинг оғзин жуссаси бир томонга оғиб, пешанасини каравотга қўйиб ўтиришида, тиззаларда ётган қўлларининг ҳолсизлигида, бутун қиёфасида шундай мунгли ва ғариб бир ифода бор эдикни, усиза ҳам кўнгли бузилиб кирган Муяссар, бу гаплардан ўпкаси тўлиб, қизнинг ёнига тиз чўқди, уни секин қучоқлаб ёш тўла кўзлари билан пастан юқорига қаради...

— Лариса...

Лариса бошини кўтарди, ҳеч нарса ифода этмаган кўзлари билан унга анча тикилиб қолди, сўнг лаблари титраб ўзини Муяссарга ташлади.

У гўё рўй берган фожианинг бутун даҳшатини эндингина сезгандай, ғариблиги, нотавонлиги, отасининг йўқлиги — ҳаммаси эндингина эсига тушгандай юзини Муяссарнинг юзига босиб, узоқ йиглади.

Тун ярмидан бери ҳайкалдай қотиб қолганидан безовталанган аёллар бошларини чайқашди.

Майли, кўнгли сал юмшасин. Тошни ҳам эритади бу кўз ёши...

Майда-чуйда нарсалар тахт бўлганда бир от қўшилган аравани ҳайдаб куни кеча фронтдан Ҳошим полвон етиб келди. Полвоннинг қўлтиқтаёқлари ёнида ярим қоп жўхорига суюниб Йинобатхон ўтиради. Солдатча шинель ва телпак кийган полвоннинг бақувват жуссаси ёнида шол рўмолга ўраниб олган раиса ола кичкинагина қизчага ўхшарди.

Арава тўхтар-тўхтамас, қора айғирини ўйнатиб Чавандоз пайдо бўлди. У отдан сакраб тушиб, қорни ғарчиллатиб босганича, уйдан чиққан Гулсум опанинг ёнига борди.

- Хўш, ҳаммаси тайёрми? — деб сўради.
— Билмадим, тайёр бўлса керак, — деди Гулсум ола истар-истамас.
— Тайёр бўлса, нима қиласиз?.. Жиндак русчалига митинг-питинг қиласизми? Яхши одам эди, бечора.

У гапни тугатмаган ҳам эдики, Инобатхон тўсатдан кўзлари чақнаб:

— Яхши одам эканини билсангиз, — деди, — нима қиласиз шу бугун, мотам устига тўй қилиб?

— Тўй қилсан... ўғлим ҳам эрта-индин урушга кетяпти...

— У тенгилар аллақачон урушда юрипти! — деди Инобат.

Чавандоз оғир энтикли. У бир ўйи: «Ёлғиз ўғлим кўзларингга чўп бўлса... эрта-индин қутуласанлар, энди лоақал тўйиниям кўрмайми?» — демоқчи эди, бироқ шу пайт, аравада ёлғиз оёгини силаб ўтирган Ҳошим Польон:

— Ҳей, Чавандоз! — деди қўлтиқтаёгини кўтариб. — Ўғлингни қўйиб тур. Сен менга айт: Эшмат акам қаёқдалар? Эшмат акамни топиб бер аввал!

— «Бошланди!» — Чавандоз совқотгандай бошини елкасига қисиб, четроққа чиқаркан, пўнғиллади:

— Майли, гап тўйда бўлса... бугун қилмасак қилмасмиз.

— Тўй, эмиш. Мен тоғдан келсан, бу боғдан кела-ди-я! — деди Ҳошим Польон. Бироқ аза устида ғижиллашиб ўтиришни эп кўрмади шекилли, қўлини силтаб қўя қолди.

Катта ҳовли бир лаҳзада одамга тўлиб кетди, колхозчи хотин-қизлар, кампирлар, чоллар, ўқитувчилар — ҳаммаси тўпланди.

Қизил матога ўралган тобутни аравага қўйиб се-кин йўлга тушишди.

Муяскар билан Маствура йигидан толиқиб қолган Ларисани қўлтиқлаб олишди.

Кечаги изғирин босилган, лайлаккордай майин, қандайдир илиқ қор ёға бошлаган эди.

Сирғончиқ қишлоқ кўчаларидан бир-бир босиб, қир ён бағридаги эски қабристонга чиқишиди.

Қабристоннинг бир четида босмачилар билан урушда ҳалок бўлган уч-тўртта жангчининг қабри бор эди.

Темир панжаралар билан ўралган бу қабрларнинг ёнида яна тўртта ёш қабр — икки кампир ва икки ёш боланинг гўри пайдо бўлган. Серафима Фёдоровнанинг қабри ҳам шуларга ёнма-ён тушган.

Азиз домла бошлиқ уч-тўртта мўйсафидлар аёлларнинг деярли товушсиз йигиси остида, қор ёғиб турган сокин жимликда тобутни аравадан туширишди. Лариса сўнгги марта тобутга бошини қўйиб, оғир тўлғаниб йиглади, кейин уни қўлтиқлаб четга олиб чиқишиди-да, тобутни гўрга қўйишиди...

Кампир-чолларни аравага чиқариб, қабристондан чиқа бошлаганларида қир устидаги оппоқ туман орасида секин қимирилаган қора нуқталар пайдо бўлди. Чумолидай қатор чизилган бу нуқталар аста-секин кўпайиб, пастга томон туша бошлади.

— Йигитлар! — деди кимдир. — Даشتга кетган йигитлар... Эшак карвон бу!

Одамлар бу мотам устида шодликларини билдиришниям, билдиримасликниям билмай, тўхтаб қолишиди. Ҳамманинг кўзи қирда, лаблар беихтиёр пи chirларди:

— Йигитлар!

— Ғалла!

— Хайрият!

Эшак карвон ўтадиган катта йўл қабристондан яrim чақиримча нарида эди. Шунга қарамай, карвондагилар ҳам буларни кўрди шекилли, қаршига келганда бир киши ажralиб қабристон томон юрди. Бу — Қўчқор эди.

Эгнида кўкраги очиқ пахталик фуфайка, бошида елкасига томон сурилган эски қалпоқ, оёғида пачаги чиққан бесўнақай этик, у қандайдир бошқача, жуда катта кўринар, чаккалари ичига ботиб, озиб, қорайиб кетган юзида қандайдир шиддатли бир ифода пайдо бўлган.

У жимгина тикилиб қолган одамларга яқин келиб тўхтади, чуқур ботган ғалати кўк-сағриш кўэлари билан ҳамманинг юзига бир-бир қаради, сўнг, уни кўрган заҳоти яна ўпкаси тўлиб, пиқ-пиқ йиглай бошлаган Ларисанинг ёнидан ўтиб, қабристонга кирди.

У катта телпагини қўлида ғижимлаб, гўр ёнида анча турди, кейин, ҳамон қошлари чимирилган, араванинг ёнига келди, бир лаҳза иккиланиб тургач,

Муяссарнинг ўрнига ўтиб Ларисани қўлтиқлаб олди, катта, совуқ кафти билан унинг кичкина кучсиз қўлларини сиқди.

Арава қўзғалди. Лекин йўлга чиққунча ҳеч ким сукутни бузмади. Йўлга чиққанларидан кейингина Ҳошим полвон:

— Қалай, ука, эсон-омон келдиларингми? — десуради.

Кўчқор бош иргади:

— Раҳмат. Касаллар бору, аммо... тузук. Эсон-омон ўтиб олдик тоғдан.

Ҳамма баравар енгил нафас олди.

* * *

Лочинлар олис қозоқ әлига сафарга чиқаётганларида атиги ўн кун ичидаги шунчакда кўнгилсиз воқеалар юз беради, деб ўйлашганмиди?

Биринчи «ғалаба» туйғусидан бошлари осмонга етиб, нопок одамлар билан янги курашларга бел боғлаган чоғларида ҳамма ёқ ағдар-тўнтар бўлиб кетишини хаёлларига келтиришганмиди?..

...Кечгача қазилган бўлса ҳам, оппоқ қорга кўмилб, бошқа гўрларга ўхшаб қолган қабрнинг олдида уч йигит бош яланг сукут сақлаб узоқ туришди.

Атрофи азим чинорлар билан ўралган эски қабристон жимжит. Ҳамма ёқда момиқдай юмшоқ оппоқ қор...

Машраб билан Акмални қабристонга Кўчқор бошлаб чиққан эди.

Аллақандай мунғайиб, юzlари бир парча бўлиб қолган Лариса кеча унга кўзи тушган заҳоти пиқ-пиқ йиғлаб юборгани Кўчқорнинг кўз олдидан нари кетмас эди.

Кўчқор дўстлари билан бугун Лариса тўғрисида гаплашмоқчи эди.

Лекин, қабр тепасида бош эгиб тураркан, ҳозир бунга ҳожат қолмаганини сезди. Бу ерда ҳар қанақа яхши гап ҳам ортиқча бўлишини, энг самимий сўзлар ҳам ясама туюлишини ич-ичидан ҳис этди-ю, индамади. Ўйлаб қўйган ҳамма гапларини битта-битта кўнглидан ўтказди, холос.

Кун ботган, лекин ҳали ёруғ. Майин оқ кигизга ўранган қишлоқ — қорга кўмилган паст-баланд адирларга ўхшайди. Фақат мўриларидан эшилиб-эшилиб чиқаётган тутунлар қор тагида ҳаёт борлигидан далолат беради.

Улар катта йўлдан юриб сой бўйидаги боғларга яқинлашганди, узоқдан афтидан, гузар томондан, «Банг, банг, гиж-банг!» деган садо эшитилиб, ҳавони янгратиб юборди.

— «Банг, банг! Гиж-банг!»

Олдинда бораётган Қўчқор тўхтади.

Машраб ер остидан Акмалга кўз ташлади. У Акмалнинг юрагидаги изтиробини шундай аниқ ҳис этдики, гўё бу «гижбанглар» кўксини ўқ бўлиб тешиб ўтаётгандай туюлди.

— Тўхтанглар! — деди у қўққисдан.— Менда битта таклиф бор: тўйга борамиз ҳозир!

Қўчқор истеҳзоли жилмайди:

— Хўш, тагин қанақа ақлли галинг бор, девона?

— Гапнинг белига тепмай, «берди» сини эшит, каллаварам! — Машраб кўзлари шиддат билан ялтиллаб бир Акмалга, бир Қўчқорга тикилди: — Дуторни оламиз! «Айладинг-кетинг»ни барада қўйиб, кириб борамиз ўша базми жамшидларига!

Бу фикр Машрабнинг хаёлига бугун келаётгани ўйқ. Илгари ҳам жуда кўп ўйлаган буни, фақат бошқа муносабат билан.

Бундан бир-икки йил бурун Машраб Муяссарни пинҳон севиб юрган чоғларида унга шундай туюлардики, гўё ахир бир кун Муяссар ҳам бевафолик қиласди, ундан айниб, бошқа бирорга тегади. Шунда Машраб нима қиласди?.. У ўйлаб-ўйлаб бир йўл топган эди: яқин дўстларини эргаштириб, қўлларида дутор, ғамгин ашуулаларни айтиб Муяссарнинг тўйига кириб боради...

Бутун тўй аҳли уларнинг мунгли қўшиқларини жим туриб эшитади, кўнгиллари эриб, кўалари ёшланади, Машрабнинг муҳаббатини эндиғина сезган Муяссар эса, чимилдиқдан отилиб чиқиб, унинг қучогига ташланади...

Ҳозир Машрабнинг назарида Гулчеҳрани ҳам шундай йўл билан қутқариш мумкин эди.

Қўчқор қалпогини бошининг орқасига суриб:

— Ёмон фикр эмас! — деди.— Ўйлаб кўриш керак.

Акмал қовоғи солиқ, узун бурни ғалати қимиirlаб:

— Мен... — деди.— Мен бормайман!

— Нега?

Акмал индамади. Аэалдан шодлигини ҳам, қайғусини ҳам ичига ютишга ўрганиб қолган бу камгап йигит кечак түй бўлишини эшитганда ҳам ҳеч нима демади, фақат бошини кўрпага ўраб ётиб олди. Рост, тоғдан қайтганда уни «кутиб олган» сопуқ гаплар орасида хушхабар ҳам бор, дадасидан хат келган, Эшмат аканинг ёзишича, ҳужжатларини тўғрилаб тез кунда келиб қолиши керак эди. Лекин Гулчехра...

— Оғзингга сўк солдишми?— деди Машраб титраб.— Бир нима десанг-чи, ахир? Нега бормайсан? Ё кўнглига озор беришдан қўрқасанми ўша... ўша субутсиз читтакнинг?

— Ҳа, қўрқаман!— пўнғиллади Акмал.

Машраб қўлини бир силтаб, қадамини жадаллатди.

— Бормасанг, баттар бўл! Бу ҳам оз сендай лапашингта!

Йигитлар, гарчи қаттиқ араалаб қолган одамлардай қовоқлари тушиб кетса ҳам, бирга бувиникига боришли.

Қўчқор Ларисанинг олдига кирмоқчи эди, меҳмонхонадан чиқиб қолган Моҳира буви йўлини тўсади.

— Қўй, болам, кирмай қўя қол. Яна кўнгли бузилиди... Қиз бечора... Ўзларинг ҳам рангларинг сомон, одам қўрқади қарашга. Катта уйга киринглар. Бир коса иссиқ шўрвам бор, ичларинг-да, ўралиб ётлалинг.

Улар уйга кириб, танчанинг атрофига ўтирап-ўтирас, буғи бурқираб турган декчани кўтариб Шириной кирди. Унинг кетидан, қўлида кўзача, Моҳира буви кўринди.

— Машрабжон сафарга чиққанда атайнин ният қилиб пича тариқ солувдим, дори бўлади деб. Кўп эмас, бир пиёладан ичиб, бир терланглар!

Бўза нималигини билмаган Йигитлар бир пиёладан ичмасданоқ, кўз олдилари жимир-жимир қилиб, таналари яйраб кетди. Иккинчи пиёладан кейин кўнглидаги фам-ғусса ҳам тарқагандай бўлди-ю, юракларда сўна бошлаган ўт қайта аланга олди. Энди Машраб билан Қўчқор у ёқда қолиб, Акмал ўзи тўйга толпинди.

Учинчи лиёладан кейин кўчага қараган деразанинг миҳларини пичоқ билан суғириб, секин очишиди-да, бувига билдирмасдан кўчага чиқишиди.

Кундузги булатлар тамом тарқаган, осмон асаларининг уясидай гуж-гуж юлдузларга тўлган. Изғирин туриб, оёқ остидаги қорлар гарчиллаб қолган.

Уйлар, ҳовлилар, кўчалар жимжит. Фақат чилдирманнинг гоҳ әштилиб, гоҳ тўхтаб қолаётган «гижбанг-гижбанг»лари қулоқча чалинади.

Улар Машрабларницидан дуторни олиб, қишлоқ ўртасидаги тепага чиққанларида, пастда, Чавандознинг ҳовлиси томондаги кўчаларнинг бирида, гуриллаб ёнган гулханнинг қизғиши шуъласи кўринди.

Қўчқор қадамини тезлатиб:

— Келин келди шекилли! — деган эди, Акмал тўсатдан йўл ёқасидаги қорга тиз чўқди-да:

— Мен... мен бахтсиз! — деди ва бошини қўллари орасига олиб, ётиб қолди.

У кўкрагини қорга бериб, қаттиқ дард тутаётган одамдай тўлғанарди. Машраб билан Қўчқор олдин нима қилишларини билмай, эсанкираб қолишиди. Кейин Машраб Акмални елкасидан ушлаб қаттиқ силтади.

— Узингда исрат-нафс, ғурур деган нарсадан зитирдак борми, ё ҳаммасидан айрилганмисан шу аҳмоқ читтакни деб?

Одатда бундай пайтларда силтаб ташлайдиган Акмал, бу сафар кўзларини тез-тез артиб ва ҳиқиллаб ўрнидан турди.

— Рост-да, ахир! — деди Қўчқор ҳам. У Акмални бир ёнидан қўлтиқлаб олди. — Булар шунақаки, ўзингни паст олган сайин устингга чиқиб тепишади!..

Чавандознинг бори эски қалъа харобасининг кунгай томонида, унга тепадан шундай тушиб бориш мумкин.

Улар тепага чиқиши билан пастдаги катта ҳовли, дараҳтларга осилган фонарлар, қандайдир одамларнинг қораси кўзга чалинди.

Машраб дуторни созларкан:

— Ашулани шундай айтайликки, — деди, — Чавандоз тугул тўйга келган оғайнилариям дод деб юборсин!

Улар пахса девор тагида бир зум тўхташди.

— «Абдураҳмон беги!..» — шипшиди Машраб ва

аллақандай ички титроқдан овози хиёл олиниб ашула-
ни бошлади:

«Ул париваш қадрим билмас, тө камолга етмагунча...»

Құчқор девор раҳнасидан ошиб ўтаркан, овози дү-
риллаб қўшилди:

«Кўнгли қаттиқ, дардим билмас, ул ҳам ошиқ бўлмагунча..»

Бояги танбеҳлар қаттиқ таъсир этган шекилли,
ховлига кирганларидан кейин ашулага Акмал ҳам
қўшилди-ю, уч йигитнинг жўр овози ҳовлини тутиб
кетди:

«Ҳозир ёшдур, вафо қылмас, ўлдим десам бир қарамас,
Минг оҳ урсам, бир қайрилмас, то бошига тушмагунча...»

Афтидан, қозон атрофида ўралашиб юрганлар улар-
ни бир ёқдан келган машишоқлар деб ўйлашган бўлса
керак, қўл қовуштириб, пешвоз чиқишиди, болалар қу-
вониб, қий-чув кўтаришиди. Фақат фонаръ ёнига бор-
гандарида, қаёқдантир пайдо бўлган Кўр Шермат-
нинг:

— Ие, ўзимизнинг гирромлар-ку! — деган хитоби
эшитилди-да, ҳамма бирдан жимиб қолди.

Ҳаяжондан ҳамма нарса эсидан чиққан Машраб,
Кўр Шерматнинг хитобига эътибор бермай, ашула-
нинг авжига чиқаркан, кўзи меҳмонхонада, дераза-
нинг ёнида турган Барнога тушди.

Барно эгнида хонатлас кўйлак, битта ўрилган ма-
йин йўғон сочи белида, гўё тўй билан иши йўқ, ўйга
чўмиб турарди.

«Жон ўйнатур қора кўзи, мафтун этур ширин сўзи,
Қамаштиур кўзни юзи, майда сочи тўスマгунча...»

Тўсатдан айвоннинг ўнг қанотидаги эшик шарақ-
лаб очилди-да, оstonада Чавандоз пайдо бўлди:

— Нима гап? Нима шовқин бу? — у текис ерда
қоқиниб, айвоннинг четига келди:

— Ҳа, яна келдиларингми? Хўш, мақсадларинг
нима? Елғиз ўғлим эрта-индин фронтга кетяпти!

Ниятларингга етдиларинг, тағин нима керак сенларга?
Энди бир қилмаганларинг тўйни бузишмиди?

Эшик яна очилиб, олдин Эртоев, унинг кетидан
қандайдир нотаниш одамлар кўринди.

Этнида кўк гимнастёрка ва галифе шим, белида
ялтироқ камар, шерсимон қалин сочлари ҳурпайиб,
зийфатда чеҳраси яна ҳам очилиб кетган Эртоев хром
этигини гарчиллатиб Чавандознинг ёнига келди.

— Ким бу? Нима тўполон?

— Мана, қаранг, тўйни бузишмоқчи булар!

Эртоев қаддини сал эгиб пастга қаради, кўзлари
қисилиб:

— А-а... эски ошилар-ку! — деди ва илжайди.—
Тўғри, Чавандоз, бузуқлик буларнинг ота касби
ўзи!

Машраб одамларни четга суриб, олдинга ўтди.

— Оғзингизга қараб гапиринг, ўртоқ Эртоев! Биз
бузуқми ёки муттаҳамларга ҳомийлик қилаётган, қиз-
келинчакларни алдаб йўлдан ураётган одамлар бузуқ-
ми?

Чавандоз унга қараб толпинган эди, Эртоев қўли-
дан «шап» ушлаб тўхтатди:

— Шошманг, Чавандоз! — қичқирди у.— Биласиз-
ми, ким ҳаддидан ошириб юборган буларни? Сиз! Қа-
ранг, ҳар бири бир буқага ўхшайди. Аллақачон ҳай-
даш керак эди буларни фронтга! Ҳалиям ҳайданг уруш-
га! Кўриб қўйишин қутуриш қанақа бўлишини!

Эҳтимол, Эртоев шу топда йигитларнинг устига
чиқиб тепдим, деб ўйлагандир. Бироқ... улар ўзлари
аллақачон фронтга интилиб, теэроқ кетишга ошиқиб
юрсалару, бу... аҳмоқ... бу пасткаш одам уларни
«фронт» сўзи билан қўрқитмоқчи бўлса!

Машраб асабий кулди. Қўчқор кўксини ўққа тута-
ётгандай кериб:

— Кошки фронтга олишса! — деб қичқирди.—
Биз ариза берганимиз кўнгилли бўлиб кетишга!

— Сиз... Сиз! — деди Машраб Эртоевга нафрат би-
лан тикилиб: — Ҳаммани ўзингиздай қўрқоқ деб,
фронтдан қочиб юрибди, деб ўйлайсиз шекил-
ли?

Эртоев қалтироқ босиб, бўғиқ шивирлади:

— Бас! Ҳайданг буларни! Ҳайданг ёки мен, мен
ҳозир.

Худди шуни кутиб тургандай, Кўр Шермат бошлиқ бир неча киши уч йигитга қараб ёнирилди-ю, ҳовли қий-чув тўполон бўлиб кетди.

Ениб турган фонарлар ўзи ўчдими, ё бирор жўрттага ўчиридими, ишқилиб, зим-зиё қоронғликда Қўчқор кимнидир уриб қулатди. Акмал эса орқасидан қучоқламоқчи бўлган бирорни елкасидан ошириб айвонга отди. Машраб қулогига теккан шапатидан гангаб қолди. Қўлидаги дутор оёқ остига тушиб қарсиллаб синди... Тўсатдан, бу тўполон қий-чувни босиб, аёл кишининг:

— Қўчқор! Болагинам! Эҳтиёт бўл!— деб қичқирган аламли овози янгради-ю, Қўчқор бирдан ҳушига келди.

— Акмал, Машраб, бўлди! Тартиб билан чекиниш керак!— деди.

Йигитлар кўчада бир зум тўхтаб, у ёқ-бу ёқларини силаб-сийпаб кўришиди. Акмал билан Қўчқор, кўйлаклари йиртилгану, бироқ кўп калтак емаган, ёлғиз. Машраб ҳам бурни қонаған, ҳам дуторидан айрилган эди.

— Парво қилма!— деди Қўчқор.— Бош омон бўлса дутор топилади. Булар билан ҳали кўп олишамиз. Қани, бошқа ёққа бориб маслаҳатлашайлик!

Улар тепага қараб юрган ҳам эдиларки, орқадан:

— Машраб, Машрабжон!— деган овоз эшитилди.

— Барно!

Машраб девор панасида аёл кишининг қорасини кўриб, нима қилишини билмай тўхтади.

— Қўчқор қайрилиб қараб:

— Биз тепада кутиб турамиз, тезроқ бор!— деб шипшиди-да, Акмалнинг кетидан югуриб кетди.

Қорни гарч-ғурч босиб чопқиллаб келган Барно икки қадам нарида тўхтади.

Эгнидаги пальтосининг олди очиқ, тивит рўмоли елкасига тушиб, боши очилиб қолган, қоронғида юзи, кўзлари аниқ қўринмайди, лекин ҳансираф нафас олиши сезилиб турибди.

— Машраб,— деди Барно.— Машрабжон!..— у ортиқ гапиролмади, гўё қулаге кетаётгандай бир тебранди-да, Машрабни қучоқлаб олди.

— Машрабжон! Нега бундай қиласан? Балодан қочгандай қочасан мендан. Акангни салкам уч йил

күтдим. Йўлларига интизор бўлиб күтдим. Гуноҳим нима менинг?

Машраб титроқ босиб гаранг бўлиб қолди.

— Кўйинг. Сизни ҳеч ким айблаётгани йўқ.

— Йўқ, йўқ! — Барно майин кафтлари билан Машрабнинг икки чаккасидан ушлаб, кўзларидан, юзидан ўпди, ўпкаси тўлиб, энтикиб гапирди:

— Ойимлар, бувимлар — ҳаммаси, ҳаммаси ҳақ, мен ёмон, ифлос қизман! Улар мендан нафрат қилишса арзиди. Фақат сен... Сен юз ўғирмагин мендан. Мен сени жонимдан азиз қайним демоқчи эдим! Мен сени... сендан айрилганимга ачинаман!.. Мен... бахтсиз, дунёда энг бахтсиз қизман, Машраб!.. — У кўз ёшидан бўғилиб, гапиролмай қолди.

Машраб ҳамон ҳайкалдай қотиб турар, кўкрагида қушдай питирлаётган бу қизни қандай юпатишини билмас, чунки ўзиям томоги ғип бўғилган, юрагида шу вақтгача тўплангандар оғтобда қолган муздай эриб кетмоқда эди!

— Мен сизни ҳеч қачон айبلاغан эмасман. Шунчаки... акамни ўйлаб... У сизни... шундай яхши кўрарди...

— Биламан. Ҳаммасини биламан, Машрабжон. Нима қилай, янгишдим, субутсиалик қилдим. Шунинг учун ҳам, мана, қишлоқдан кетяпман.

— Қаёққа?

— Тошкентга. Бу ерда бундай юргандан кўра, ўқишимни давом эттирай. Одам бўлишга ҳаракат қиласай...

Шу пайт боғдан бир неча кишининг баравар:

— Барно! Барнохон! — деган овозлари эшитилди.

Барно шошиб кўзларини артди:

— Мен борай,— деди.— Уша одам билан, Эртоев билан мен ҳам бугун бир гаплашмоқчиман. Гаплашаману, кетаман. Хайр, Машрабжон... — У Машрабнинг пешанасидан бир ўпди-да, қоронғида қоқиниб-суриниб, дараҳтлар орасида ғойиб бўлди.

Машраб, қулоқлари остида ҳамон Барнонинг нидоси, ҳорғин одимлаб, дўстларининг ортидан кетди.

Йўқ, Барно уни яхши дегани бекор, у нақадар гўр, бефаҳм одам эканки, шу маҳалгача бу қизнинг кўнглидан нималар кечаетганини билгиси ҳам келмабди? Барно ҳам одам эканлиги, у ҳам хато қилиши мумкин-

лиги, бенуқсон одам йўқлиги хаёлига ҳам кириб чиқмабди Машрабнинг! Ахир... Муяссарни шундай севганинг ўзи тунов куни Сулувсочнинг бир ширин сўзигаёқ эриб кетмаганмиди? Шундоқ экан, Барони бунчалик қоралашдан олдин унга ёрдам қўлини чўзса, хато йўлдан қайтарса бўлмасмиди? Зотан, у йўлагандан мураккаброқ, чигалроқ эмасмикин бу масалалар? Ахир уруш бўлмаганда бу йўлларга Барно киармиди?.. Бу лаънати уруш бўлмаганда у ҳам бахтли бўлмасмиди?

Машраб, Акмал билан Қўчқор ҳам эсидан чиқиб, қорга кўмилган улкан қишлоққа, совуқ осмонда чараклаб турган гуж-гуж юлдузларга тикилиб тепада узоқ турди.

Негадир кўзида ёш ҳалқаланаар, бироқ бу — кишини дилсиёҳ қиласидиган кўз ёши эмас, аксинча, ҳамма турбатни ювиб ташлайдиган кўз ёши эди...

* * *

Лариса, кўзлари очиқ, Моҳира бувининг катта меҳмонхонасида, қиров босган деразаларга тикилиб уйғоқ ётипи.

Унинг бир ёнида гужанак бўлиб ва ёи болалардай кафтини чаккасига қўйиб, Шириной ухлаяпти. Бир ёнидаги Моҳира бувининг тўшаги бўш. Машрабларнинг тўсатдан ғойиб бўлишидан безовталанган камшир бир-икки марта ўринидан туриб чиқиб келди-ю, кейин тагин ухлай олмади шекилли, ҳозир яна хабар олгани кетди.

Бечора буви! У Ларисани ухлаб қолди деб йўлаб, ҳар сафар жуда эҳтиёт бўлиб ҳаракат қиласиди, қоронгида калишларини қўллари билан тимискилаб топади, эшикни оҳиста очиб, оҳиста ёпади. Қиз икки кечадан бери мижжа қоқмай тонг оттираётганини билмайди.

Лариса қишлоқдан кетишга аҳд қилди. У қишлоқни, бу ернинг одамларини яхши кўриб қолганига қарамай, эндиликда бу ерда туролмаслигини, ҳатто отасининг келишини ҳам кута олмаслигини сезади. У онаси вафот этгандан бери, бу ердагилар тагин ҳам меҳрибонроқ бўлиб қолганини кўриб-билиб турар, лекин буни ҳис этган сайин қишлоқда қололмаслигига ҳам ишончи ортиб борарди. Ҳали сабабига ўзи ҳам

аиниқ тушунолмаган бир туйғу уни қишлоқдан кетиш-
га даъват этар, қишлоқ одамлари қанчалик меҳрибон-
лик қилмасин, онасининг қабри, унинг сўнгти кун-
ларда чеккан азоб-уқубатлари кўз олдидан кетмас-
лигини сезарди.

Ойиси айниқса сўнгги икки кеча кўп қийналди.
Худди ўтда куйгандай иситмаси қирқдан тушмай
тонг отгучча алаҳлаб чиқди. Алаҳлаганда ҳам ҳадеб
Ленинградни эслаб, дадаси билан «гаплашиб» тонг
оттирди.

Ларисанинг юрагини тилка-пора қилаётган нарса
ҳам — ойисининг бир «ўлиб тирилган» дадасини кў-
ролмай дунёдан ўтгани!

Албатта, телеграмма бериш мумкин эди, лекин,
биринчидан, отаси дастлабки хатларидаёқ бу томон-
ларга келолмаслигини, чунки, чап қўлидан айрилиб,
завод касалхонасига ўтганига қарамасдан ҳарбий
госпиталда ҳам хирургия бўйича бош консультант
эканини айтган, шунинг учун, уй-жой масаласи ҳал
бўлиши билан уларнинг ўзларини Магнитогорскка
чақириб олишини ёзган эди. Сўнгги хатига қараганда
эса уй-жой масаласи ҳам ҳафта-ўн кун ичидаги ҳал
бўлиши керак эди...

Лариса сира унутмайди: ойиси бу хатни Ленин-
градга мева-чева юбориш билан банд бўлиб, кечаю
кундуза югуриб юрганида олган, олгану касали ҳам
эсидан чиқиб, ўн ёш яшариб кетганди.

Ойиси алаҳлаган пайтларда негадир доим дадаси-
нинг қўлларини гапиравди. Дадаси чиндан ҳам «қўли
гул» деганча бор: моҳир хирург эди! Эди бир қўлсиз
қандай ишлайтийкин, деб қаттиқ ташвишланар, сўнг:
«Майли куюнма, азизим, жонинг омон қолганини
айт...» деб қайта-қайта такрорларди...

Йўқ, Лариса бир ҳафта тугул, бир кун ҳам турол-
майди бу ерда! Майли, уй-жой ҳам керак эмас, дада-
сини кўрса, бошини унинг кўкрагига қўйиб, соғ қў-
лини бир ўпса бўлди — бошқаси керак эмас!

Қиз бу фикрини Гулсум опа билан Моҳира буви-
га, қолаверса, бошқа дўстларига кечеёқ айтмоқчи,
ҳатто кечеёқ йўлга тушмоқчи эди. Бироқ бошда осон-
гина кўринган бу гапни айтиш, кейин маълум бўли-
шича, осон эмас экан.

Лариса бу оиласи, Машраб билан Қўчқорни, Муяс-

сарни, умуман бутун қишлоқни қанчалик яхши кўриб қолганини кетишга бел боғлаганидан кейингина билди. У ўзи билан бу одамлар ўртасида қандайдир жуда самимий ва илиқ туйгулар вужудга келганини, аллақандай мустаҳкам ришталар билан боғланниб қолганини, бу туйгуларни емириш, ришталарни узиш — кўнглини чил-чил синдириш билан баравар бўлишини тушунди. Ҳар ҳолда, кечадан бери, бу аҳдини бирорга айтишга журъат этолмайди, айтиш кераклигини билади. Билади-ю, айтолмайди, ўз ўйлари билан олишиб уйқуси қочади.

Лариса саҳар пайти мизғиб кетиб кампирнинг яна кириб чиққанини сезмаган бўлса керак, бувининг оёқ шарпасини эшитиб кўзини очганида, хона хийла ёришган эди.

Буви камзулини ечиб, секин келиб тўшакка ўтиреди. Ўтираётib Larisasing юзига эгилиб қаради, пешана-сидаги соchlарини оҳиста тўғриларкан:

— Ухла болам,— деди секин.— Ҳали барваҳт, ухлайвер, бувинг ўргилсан.

У Larisani ухляяпти, деб ўйласа керак, шундай секин ва мулойим гапирдики, қиз беихтиёр ўз бувиси ёдига тушиб, юраги «шиғ» этди.

Лариса кичкиналигига ўз бувиси ҳам худди мана шундай ҳар куни эрталаб каравотининг тепасига келлар, гоҳ ёстигини, гоҳ устидаги кўрпасини тўғриларкан, соchlарини оҳиста силаб:

— Ухла, болам, ухла, ҳали эрта,— деб пичирларди.

Лариса тўсатдан кўнгли бир хил бўлиб, кўзи очи-либ кетди, буви ҳамон тикилиб ўтирганини кўриб, қўлини ушлади.

— Бувижон, мен кетмоқчиман, кетаман,— деди.

Моҳира буви тушунмади. У илгари ҳам Larisasing гапларига унча яхши тушунавермас, лекин ўзбек сўзла-рини бузиб гапириши кампиргга жуда хуш ёқар, айниқса «бувиджон» деб хитоб қилишлари кўнглини әритиб юборарди. Бу сафар ҳам шундай бўлди-ю:

— Қаёққа кетасан, айлансин бувинг,— деди.— Ҳали бомдод ҳам бўлгани йўқ.

Лариса уни қучоқлаб, тиззасига бошини қўйди.

— Йўқ, буви, сиз тушунмадингиз. Мен мутлақо кетаман. Қишлоқдан кетмоқчиман. Бутунлай. Тушун-дингизми, буви!

Кампир бир нимадан чўчиғандай, сал сурилиб ўтириди.

— Қаёққа кетасан? Нимага кетасан? Бирор хафа қилдими, болам. Қўнглингга озор бердими бирор?

— Йўқ-йўқ, бувижон, ҳеч ким хафа қилгани йўқ!— Лариса кампирнинг тарашадай қаттиқ, кичкина кафтини ушлаб, кўксига босди.— Дадамларнинг олдига кетмоқчиман. Магнитогорск шаҳрига, тушундингизми, бувиджон, дадамга...

— Ҳа, отамни соғиндим дегин...— буви қизнинг кўнглидаги тугёнга тушунди шекилли, бошини ғамгин чайқаб ўйланиб қолди.— Майли, отанг бечораям сени соғингандир...

— Раҳмат, бувиджон,— деди Лариса.— Катта раҳмат. Ҳаммаларингиага. Мен сизларнинг ойимта... ҳаммамизга қилган яхшиликларингизни ҳеч... ҳеч қачон...

Ларисанинг томоғи «ғиппа» бўғилиб, индамай қолди. У ҳозир Моҳира бувининг саволлар беришидан қўрқар, чунки шу тобда гапиришдан, айниқса уни кетишга мажбур қилаётган нарсаларни тушунириб беришидан ожиз эди! Бироқ буви ҳам лом-мим демади. Фақат кафтини Ларисанинг қўлидан секин тортиб олиб, унинг бўйнида тўзғиб ётган соchlарини тўғрилаб қўйди. Шу бир ҳаракатнинг ўзидаёқ Лариса кампирнинг ҳамма нарсага, унинг дилидаги дардларига тушунганини сезди-ю, вужудига иссиқ бир нарса таралиб, бидани жимиirlab кетди.

— Биз нима ҳам дердик, болам, ўзинг биласан,— деди яна буви.— Шунчаки... Ҳалиги... болалар билан туппа-тузук бўлиб қолувдиларинг...

Буви «болалар» деганда Ларисанинг кўз олдига ҳаммадан бурун Қўчқор келди, у кейинги маҳалда қандайдир меҳрибон бўлиб қолганларини эслаб, чуқур тин олди.

— Биламан, бувиджон,— деди Лариса анчадан кейин ва юзи ловиллаб кампирни секин қучоқлади.— Ҳаммасини биламан, бироқ... сира иложим йўқ...

Улар ҳар бири ўз ўйи билан банд, тонг оттириши. Қисқа қиши куни йўл ҳозирлиги билан ўтди.

«Лариса кетармиш!»

Бу гапни ашитганлар дарҳол: «Нега? Қаёққа?» деб сўрашса ҳам, «отасининг олдига борармиш!» деган жавобдан кейин индамай қолишарди. Ҳатто Машраб би-

лан Муяссар ҳам кўп суриштириб ўтиришмади. Елғиз Қўчқор аллақандай тумтайиб ғалати бўлиб қолди.

У кун бўйи гўё азиз бир нарсасидан айрилган одамдай юраги таскин топмай, маъюс ўйларга чўмиб юрди. Қаерга бормасин, кўз олдидан қизнинг ғамгин чеҳраси, чуқур ботган мовий нигоҳи кетмас, сойда, тахта кўприкда ўтириб ёруғ куз оқшомларида қурган сұҳбатлари хаёлидан чиқмас эди.

Ўшанда Лариса унинг ҳазилларига олпоқ тишлари ярқираб, киприкларининг қалинлигидан қоп-қора кўринган чиройли кўзлари чақнаб, кулиб жавоб берган маҳалларда, қиз ҳам унга кўнгил бергандай туюларди Қўчқорга. Туюларди-ю, илгариги журъатини йўқотар, қалби офтобдай мулоим бир ҳисларга тўлиб, кўнгли мунаввар бўларди.

Наҳот Лариса бу сокин куз оқшомларини, сой бўйидаги оқ теракларнинг ғалати ғувиллашини, кўм-кўн майсазорда қўл ушлашиб ва мусаффо туйгулардан этлари жимиirlаб ўтирган баҳтиёр дамларни унутса! Бунинг ҳаммасини эсидан чиқариб абадий ташлаб кетса!. Еки Қўчқор қозоқ даштида қилган бемаънилигининг жазосини тортаптимикин! Лекин унинг ҳаммаси шунчаки бир ҳазил эди-ку!

Кечқурун, кун ботиши олдида тўртовлашиб қабристонга чиқишиди.

Лариса қабр олдига чўнқайиб, яланг бош, соchlари бўйнида тўзғиган, елкалари титраб, гўё юрагидаги бутун дарди, аламини шу ерга тўкиб кетмоқчи бўлгандай узоқ йиғлади. Ахири Муяссар уни қучоқлаб зўрға турғазди.

Индамасдан, бир-бир босиб орқага қайтишиди. Факат сойга тушганларида ва Лариса йифидан тўхтаб кўзларини артганида Қўчқор ийманинқираб таклиф қилди:

— Юринглар, жарликнинг устига чиқайлик,— деди.— Эсларингдами, ёзда Ларисалар кўчиб келган куни чиқиб, гаплашиб ўтирувдик. Ўша кунни бир эслайлик...— У шундай деди-да, яна ўзи:— Сенлар бораверинглар, мен кетларингдан етиб оламан,— деб қаёққадир чопиб кетди.

Қўчқор чорак соатдан кейин Акмални бошлаб чиқди. Акмалнинг юмaloқ юзи сўлиб, қорайиб кетган,

доим мулойим порлаб турадиган қўй кўзлари чуқур ботган.

Лариса уни кўриши билан ёнига бориб қўлини олди.

— Сен хафа бўлма. Дадам дадаңгнинг ҳамма ишларини тўғрилабди. Хатида айтган. Менга, ойимга қилган яхшиликларинг... Мен бораману, яна тезлатаман... Хафа бўлма, Акмал, бу ёғи яхши бўлади.

Машраб ер остидан Қўчқорга тикилди.

— «Нима демоқчисан? Айт!»

Қўчқор негадир хижолат чекиб:

— Эсларингдами, ёзда қасамёд қилувдик,— деди да, бир йўталиб олди.— Рост, баъзилар... мен Гулчеҳрани айтаман, бу қасамни бузди. Бузса... баттар бўлсин. Ачинмайлик унга. Энди мана... Эртага Лариса кетяпти. Шунга мен...— тагин бир томоқ қирди ва тўсатдан тоvuши жаранглаб кетди:

— Келинглар, шу ерда яна бир аҳду паймон қилайлик — ҳеч қачон бир-биrimизни унумаслик тўғрисида! Умрдбор шу дўстлигимиз эсимиздан чиқмасин!

У баланд довондан ошган одамдай пешанасидаги терларини сидириб ташлади-да, чеҳраси равшан тортиб, қўливи чўзи:

— Қасамёд қилайлик шунга!

Бу сафар ёздагидай •қасамёд• сўзини ҳеч ким такрорламади, лекин беш жуфт қўллар бирлашганда худди ўшандагидай юракларнинг тепиши қўлларга ўтиб, ўша беғубор, ўша тивиқ ҳис қалбларини қайта эгаллаб олди.

Иигитлар қизларни кузатиб қўйиб, Акмалларникига қайтишаркан, Қўчқор Машрабни четга тортди.

— Менга қара, дўстим, сенга айтадиган гап бор,— деди у.— Абубакиров рухсат берса мен Лариса билан бирга кетаман. Иложи бўлса Магнитогорсккача бораман. Балки Эшмат акани олиб қайтарман.

Машраб индамади.

— Энди сендан битта илтимос,— деди Қўчқор.— Акмалга эҳтиёт бўл. Бир-икки ҳафта ёнидан жилма. Ўзини бир бало қилиб қўймасин у каллаварам. Мен Комил акага ҳам айтдим бу гапни, у ҳам кўз-қулоқ бўлиб туради...

Улар қаттиқ қучоқлашдилар. Қўчқор Машрабни бағрига босаркан, тўсатдан томоги гип бўғилиб, узоқ

турди. Машраб эса ёш боладай ўпкаси тўлиб, ҳиқил-лаб қолди.

Эртасига кун чиқар-чиқмас Лариса билан Қўчқор икковлари икки эшакда йўлга чиқишиди.

Бешинчи боб

Гулсум опа йигитлар воқеасидан кейин Чавандозни кўришга тоқати қолмаса-да, мактаб ишлари яна унинг олдига киришга мажбур этди.

Пахтадан қутулгандан кейин ўқитувчилар бош бўлиб, синифларни сал-пал ремонт қилишган, синган дера-заларига қоғоз ёпиштириб бўлса-да, эпақага келтиришган, кейин юқори синф ўқувчилари билан бирга оз-моз ўтин ҳам ғамлашган, хуллас, ўқишини бошлаб юборишган эди. Бироқ қор ёғиб совуқ тушиши билан болаларнинг ярми уст-бошлари, айниқса, оёқ кийимлари юпунлик қилиб ўқишига келолмай қолди.

Гулсум опа шу ҳақда гаплашиб, сельпо орқали промкомбинат чиқара бошлаган кавуш-маҳсилардан оз-моз олмоқчи, қолаверса, колхозлардан бир пуд-ярим пуд ғалла сўраб, етим болалар учун мактабда бир маҳал иссиқ овқат ташкил қилмоқчи эди.

Бу ишларнинг бирортаси ҳам Чавандозсиз ҳал бўлмайди. Лекин Чавандоз тўйдан кейин районга, ундан областга кетган экан, Гулсум опа бир-икки марта кириб тополмади, ниҳоят, ҳафтанинг охирида унинг қайтганини эшитиб, яна борди.

Гулсум опа кирганида Чавандоз граммафонга ўхшаган катта телефонга тирсагини қўйиб, ким биландир хушнуд гаплашмоқда эди.

Эгнида янги кўк кителъ, бошида янги қоракўл телпак, ўсиқ мўйловининг учлари қирқилган, у қандайдир яшариб кетганга ўхшар, ўзиям оппоқ тишларини кўрсатиб ҳадеб кулар эди:

— Ҳа, ҳа, бош устига. Бирваракайта областдаги муваффақиятларни ҳам ювамиз. Бўлмасам-чи? Қулинг ўргилсин ўша қўл бола мусаллас. Лаббай?.. Ҳа-ҳа-ҳа...

У трубкани жойига қўйди-да, худди бир ҳолатдан иккинчи ҳолатга ўтишга ўрганиб қолган моҳир санъаткордай, қалин қошлиарини чимириб:

— Хўш, хизмат? — деди.

Гулсум опа буни сезмаган бўлиб оҳиста гап бошлиди:

— Хабарингиз бор — ўқишини бошлаб юбордик, Холмат ака. Бироқ, қийин бир масалага дуч келиб қолдик, ўзингиз бир ёрдам бермасангиз бўлмайди. Холмат ака...

Гулсум опа Чавандозни «юмшатиб» ишни битириш учун жўрттага ҳар сўзида бир «Холмат ака»ни тилга олиб, жуда мулоим гапирди, лекин дардини айтиб туғатмаган ҳам эдики, Чавандоз бармоқлари билан столни асабий чертиб:

— Сиз... Ҳалиям мактабга директорлик қиляпсизми ўзи? — деб сўради.

Гулсум опа ранги сал ўчиб, кўзини Чавандоздан узди.

— Билмадим энди... Агар ишдан бўшатилганимдан ўзим бехабар қолган бўлмасам... ҳозирча директорман шекилли...

— Директор бўлсангиз... ўғлингиз бошлиқ бир туруҳ беаори ўқувчиларингиз менинг тўйимда нималар қилганидан хабарингиз борми?

Гулсум опа бу воқеанинг чет-ёқасини эшитган, бироқ бутун тафсилотларидан хабари йўқ эди.

— Қайдам...

— Қайдам дейди-я! Менга қилган дўқ-писандаларини айтмай қўя қолай. Мен бунақаларга ўрганиб қолганиман. Аммо лекин, районжроком раисига, ўртоқ Эртөевга бунақа қўполлик қилиш!. Мактабингизда тартиб интизом деган нарса борми ўзи?

Чавандознинг гапларидан Гулсум опани қалтироқ тута бошласа-да, у ўзини босиб:

— Билмадим энди... — деди. — Ёшлик қилишган дир...

— Билмасангиз нима қиласиз мактабга директорлик қилиб? — Чавандоз қўлларини столга тираб, ўрнидан турди. — Ўз фарзандини тарбия қилолмаган она, бирорларнинг болаларини қандай тарбия қиласди? Бунақа экан, бўшатиб қўйинг мактабни. Ҳа!

Гулсум опа ҳам ўрнидан турди. Чавандознинг гапларидаги ноҳақлик вужудини қақшатиб юборса ҳам, яна ўзини босиб, истеҳзоли кулимсиради:

— Ёшларнинг битта тўполнонига шунча дағдагами? Сиз қанча адолатсизликлар қилганда у бечоралар ҳам

бир марта кўнгилларидаги дардини айтмоқчи бўлишибди-да, Холмат ака! Халқимизнинг: «Пичоқни ўзингга ур, оғримаса — бошқага», деган гапи бор. Сал мард бўлинг, Чавандоз.

Бу мақол аллақачон эсидан чиқиб кетган Чавандозга Гулсум опанинг гапи шундай қаттиқ тегдики, у мўйлови дикрайиб, лаблари пирпираб, сўз тополмай қолди.

— Энди директорлик вазифасига келсак,— деди Гулсум опа.— Ёзда ўзингиз айтгандай, мени бу ишга сиз тайинлаган эмассиз, шунинг учун...

— Уша тайинлаган одамларнинг, шахсан ўртоқ Эртоенниг буйруги бор.

— Марҳамат, ўша буйруқни ёзма равишда олиб келинг. Унгача мен сиз билан бу тўғрида гаплашишни ҳам истамайман! Шу!

Гулсум опа, гарчи бу гаплар билан бир оз аламини олгандай бўлса ҳам, кўчага чиққандан кейин кўнгли шундай чўкди, шундай чўкдики, олам қоронги кўриниб кетди кўзига.

Лекин ҳар ёмоннинг бир яхиси бўлади, дегандек, турмуш ҳам кишини бир оёғидан чалса, бир бошини силаб қўяркан.

Кўзига ҳеч нарса кўринмай уйига қайтиб борса, меҳмонхонада, қаёқдандир йигитлиб қолган қўни-қўшилilar орасида... Қилич ўтирибди!..

Ўша, Аъзам аканинг севикли шогирди, не-не ма-шаққатларда ҳам, шодликларда ҳам бирга бўлган Қилич ўтирибди уйида.

Кўкрагида қўш орден, елкасида майорлик погони, оёғида хром этик, йигитлик давридагидай шиддатли ва хушқомат. Фақат биқинидан ва елкасидан ўқ еган экан, бўйни оқ дока билан бофланган.

Гулсум опа ўзи тўлиб тургани учунми, тўсатдан ёшлиқ чоғлари, оғир бўлса-да, дилида баҳордай ёруг из ҳолдирган мастьуд йиллар, Аъзам аканинг ўлими — ҳаммаси бирдан эсига тушиб кетди-да, Қилич билан кўришаётib йиглаб юборди.

* * *

Қилич бир ёнида Ақмал, бир ёнида Машраб сойга чиқди. Кечагина кигиз бўлиб ётган оппоқ қор бир кундаёқ эриб кетган, сойдаги ажриқлар ёмғирда ювилган

майсазордай кўм-кўк, сув бўйидаги ялангоч толлар, олисдаги қирлар, қизғиш боғлар майин буғланади.

Қилич қўлини кўкрагига қўйиб, тахта кўприкда анча турди. Ҳаво шундай майин, шундай хушбўйки, киши тўйиб-тўйиб ҳидлагиси келар, лекин оскољка туриб қолган кўкрак чуқур нафас олишга қўймас, игна санчилгандай санчиб оғирди... Қилич болаликдан таниш кенг сойга кўзи тушиши билан юраги «шиғ» этиб эти жимиirlаб кетди.

— Майли, сенлар қайтаверинглар, йигитлар. Мен ўзим қишлоқни бир айланиб келмоқчиман.

Машраб илиқ меҳр билан ёнган кўзларини ундан узолмай:

— Сиз кўп ташвишланманг, Қилич ака,—деди.— Қўчқор унақа... бир жойда хор бўладиган йигитлардан эмас, қаерда бўлмасин йўлини топиб кетади у. Тўғрими, хомсемиз?

— Ҳа,— деди Акмал, қовоғини очмай.— Нонини ажратиб ейди у.

Қилич йигитларнинг гапига бир жилмайиб қўйида, қўш ёнғоқقا қараб юрди, сўнг, қандайдир ички бир туйғуга бўйсуниб, тўғонга томон бурилди.

Қўчқор... Қўчқор... Бултур кузда Қилич уни кўп йиллик айрилиқдан кейин биринчи марта кўрганида бутун ўйлари ағдар-тўнтар бўлиб кетган эди. Чунки Қўчқор ўшанда уни қанчалик совуқ қарши олмасин, Қилич ич-ичидан ҳис этган: ўғли байни унинг ўзгинаси эди. Қўчқор фақат келишган қадди-қомати, қийгир бурни, доим кулиб турадиган кўк-сарғиш кўзлари, умуман ташки қиёфаси билангина эмас, хатти-ҳаракатлари, гап-сўзлари, кулгиси билан ҳам худди унинг ўзига, Қиличга ўхшарди.

Кейин Дон даштларида, оғир жангларда юрган пайтларида, Қўчқордан бирин-кетин хатлар бора бошлиди. Қўчқор бу ўртада негадир ўзгарган, бултур куздаги совуқ муомаласидан асар ҳам қолмаган, хатлари аллақандай ўғиллик меҳрига, афсус ва соғиниш туйғуларига тўла эди. Шу-шу, Қилич бу хатларни кўкрак чўнтагида асрайдиган бўлди. Эскадрони билан душман орқасига қилган узоқ походларда, гарбий Дон даштларида бўлган қаттиқ жанглардан кейин, кечалари бир нафас ором олган пайтларида ёлғиз ўғлининг бу илиқ мактубларини қайта-қайта ўқиди. Ўпкасидан ўқ еб,

оғир операциядан кейин госпиталда ҳолсиз ётган пайтларида эса кечаю кундуз Қўчқорни ўйлади. Ҳаёлида бутун оталик меҳри билан уни бағрига босиб ўтмишдаги бемеҳрликлари учун кечирим сўрарди. Дишида худди шу гуноҳкорлик туйгуси бўлгани учун ҳам, Қилич госпиталдан унга кат ёзишни истамаган, ҳамма гапни боргандагаплашмоқчи бўлган эди!..

Қўчқор... Қўчқор... Уни энди қаёқдан топса бўлади? Энди у қайтиб келармикин ё ўшанақасига Магнитогорскдан армияга кетиб қолармикин?.. Умуман, дийдор кўришиш насиб бўлармикин, бўлмасмикин?..

Қилич хаёлга чўмганича тўғонга тикилиб узоқ турди. Қор эриб кўпайган сув тўғон қиргоқларидан ошиб, шаршарадай гувиллаб оқар, лекин тўғоннинг сатҳи кўзгудай силлиқ, фақат ўқтин-ўқтин балиқлар чўлл-чўлл сакраганда катта-кичик ҳалқачалар пайдо бўларди. Таниш оқ теракнинг учидаги тандирдай уя ҳозир ҳам бўм-бўш, лайлаклар аллақачон учиб кетган эди.

Қизиқ: бу уя бундан ўн икки-ўн уч йил олдин қандай турган бўлса шундай турар, фақат у маҳалларда бу азим терак анча ёш эди, энди бўлса белидан пастроғидаги бир-икки шохлари қуриб қолибди... Қиличининг эсида бор. Ер ислоҳотидан сал кейин коллективлаштириш арафасида, Аъзам aka шу ерга катта сўри қурдириб, қизил чойхона очдирган эди. Ҳафтада бир марта, одатда жума кунлари, чойхонада овозсиз кино қўйилар, бу киноларга активлар ўз «ўртоқлари»ни ҳам бошлиб келишар, улар орасида... Фотима ҳам бўларди. У аллақачон парижисини ташлаган бўлса-да, эрининг ёнида ўтиришдан уялиб, Гулсум опанинг пинжига суқулар, тўрт-беш яшар Қўчқор эса, дадасининг тиэзасига ўтириб олиб, чойхонани бошига кўтариб гужурларди.

Ундан ҳам олдин, эндигина уйланган пайтларида эса ёруғ ёз оқшомлари куёв-келин баъзан шу тўғон бўйига чиқишар, Қилич қўшни боғларга тушиб, дўппидўппи шафтоли узиб келар ва кулиша-кулиша сув бўйида ўтириб ейишарди. Фотима у маҳалда шундай нозик, шундай гўзал эдики, Қилич қайтишда уни қўлларига кўтариб оларди...

Қилич оғир тин олиб, қўш ёнғоқнинг рўпарасидаги тор кўчага бурилди.

У ҳамон хаёл дарёсида сузар, бир маҳалнинг ўзида ҳам маъюс, ҳам аллақандай ёруғ ўйлар фикрини шунчалик эгаллаб олган эдики, у эшик тирқишларидан, пахса деворларидан мўралаб қараган аёлларни, кетидан әргашган ёш болаларни пайқамас, ҳурмат билан қўйл қовуштириб берган саломларига бош иргабгина жавоб берарди!..

Мана, қишлоқ ўртасидаги кўхна қалъа жойлашган баланд тепа. Бир маҳаллар қалъага кираверишда, қўш тавақали катта дарвоза бўлар, дарвозанинг ёнидаги супачаларда бошларида салла, эгниларида зарбоф тўн, қишлоқнинг казо-казолари ўтиришарди. Қалъанинг ичидаги узун-узун расталар, қатор-қатор дўконлар бўлар, бир-бирига туташиб кетган пастқам уйларнинг томларида болалар тўп ўйнашар, қиши кунлари кечаку кундуз варрак учиришар, гоҳ болохоналарга, гоҳ сомонхоналарга яшириниб беркинмачоқ ўйнашарди...

Ҳозир эски қалъадан фақат баланд пахса деворлару, тепанинг қоқ ўртасидаги эски гишт мачит қолган...

Қанча-қанча тўқнашувлар, оташ нутқлар, баҳс-мунозараларнинг шоҳиди бўлган бу эски мачит... Гулханларда гуриллаб ёнган паранжилару, қулоқ қилинган бойлар исёни, босмачилар таҳликаси-ю, ер-сув олган камбагаллар шодиёнасини кўрган бу кўхна тепалик!

Қилич ботаётган офтобга, эски мачитнинг қизгиш деворларига, пастдаги баҳор нафаси таралган боғларга тикилиб узоқ турди.

Унинг хаёлидаги маъюс ўйлар аста-секин қандайдир аламли бир туғён билан алмашди.

Ахир... наҳот шафқатсиз курашларни бошлаб берган энг пок одамларнинг бир қисми революция йўлида қурбон бўлиб кетсалар, бир қисми ҳамон ўтида юрсалару, Эртоев билан Чавандозага ўхшаган худбинлар, нопок мансабпарамстлар бу ерда истаган номаъқулчилкларини қиласалар?

Аттанг! Ўртада Фотима бўлмаганда-ку, Қилич кечаси Гулсум опа билан Қурбон отанинг гапларини эшитган заҳотиёқ Чавандозни топиб бир тўқнашарди. Афсуски, ўртада Фотима бор!..

Иўқ, у ҳалиям бўлса бу ишга бир аралашади. Эртанидин райкомга боради. Эртоев билан Чавандознинг ҳамма кирдикорларини очиб ташламагунча қўймайди! Лекин... ўша эски дардни деб, киндик қони тўкилган

бу суюкли қишлоқдан, ўз она юртидан кетиши шартмикин? Ўша дардни деб салкам ўн беш йил олис жойларда юргани етмасмикин? У ёқларда қанча юрмасин, қанча обрў орттирмасин, бари бир на оила қурди, на бахтини топди! Ўз уясига толпинган қушдай, бари бир шу диёрга, шу она тупроққа талпинди!..

Қилич бир-бир босиб, қоронғида мильт-мильт юлдузларга тўлган боғларни оралаб, колхоз идорасига томон йўл олди.

* * *

Қиличининг идорада қиласидиган ортиқча ишиям йўқ. Инобатни олиб, уйида тоби қочиб ётган Комилни кўриб келмоқчи эди, холос. Лекин Инобат қарияларни йигиб, кузги буғдойни экиш керакми, йўқми — шу ҳақда маслаҳатлашаётган өкан, идорада анча тутилиб қолди.

Қурбон ота бошлиқ бир гуруҳ чоллар қор эриб, кун илиб кеттанидан фойдалапиб қолишни, ҳали фурсат борлигини таъкидлар, бошқа бир гуруҳи, аксинча, ер совуқлик қиласмикин деб шубҳа билдиришарди. Инобат эса қайси томонга қўшилишни билмас, бир ер совуқлик қилишидан қўрқар, бир уруғлик буғдойни кўкламгача сақлаб қололмаслигини ўйлаб, тараддудга тушарди. Қилич иккала томоннинг мулоҳазаларини ёшитиб бўлгач, кулиб битта таклиф киритди: яна биринки кун сабр қилинса, кейин, ҳаво шу йўсин исиб кетса, қўрқмай экавериш керак, чунки Инобат ҳақ: уруғлик буғдойни кўкламгача асраб қолишнинг иложи бўлмайди.

Бу гап ҳаммага маъқул тушди-ю, чоллар тарқалишиди. Лекин Қилич билан Инобат өнди ўринларидан турган эдилар ҳамки, эшик очилиб оstonада Комилнинг ўзи кўринди.

Ярадор қўли қалин рўмол билан ўралган, чаккалари ўйиб олингандай чуқур ботган, бурни ҳам сўррайиб қолган, фақат кўзлари иситмаси баланд одамнинг кўзларидай чақнаб турибди.

У елкаларига заррин погон таққан хушқомат майорни кўрганда беихтиёр ийманиб, бир нафас оstonада тўхтаб қолди, кейин кулимсираб соғ қўлини чўэшиб кўришди-да, Қурбон отанинг ёнига ўтиб ўтирди.

Инобат норози оҳангда: «Иситманг борга ўхшайди-ю, нега келдинг», деган эди, Комил қўйнидан уч буқланган бир конверт олиб, столга ташлади:

— Буни бир ўқиб кўринг, кейин биласиз нимага келганимни.

Хат қора қалам билан ёзилган бўлиб, кўп жойлари ўчиб қолган экан, Қилич зўрга ҳижжалаб ўқиди:

— «Ҳурматли ҳамда қадрли инимиз Комилжон Жалоловга етиб маълум бўлсинким, бизким, Эшвой Мўмин олло-таолонинг берган ризқини териб еб, мана, фронтга ҳам етиб келдик, ҳамда сизларнинг ул томонда сиҳат-саломат бўлишларингиизни оллодаи тилаб турибмиз.

Қадрдан иним Комилжон!

Пешанамизга ёзилган экан—бугуни эртами урушга кирамиз. Уруш нималигини ўзингиз биласиз. Ундан омон чиқиб, дийдор кўришамизми, ўйқми — буни олло ўзи билади. Бироқ сиз инимга айтаман деб, айтолмай кетган бир армоним бор эди, шуни айтиб қолай, дедим.

Ишилиб, худо ўзи кечирсин, иним Комилжон, мен кўп номаъқулчиликлар қилдим, кўп бадбахтлик қилдим: рабочий батальонига кетаётган жойимда, ўрнимга бечора Эшмат акамларни юбортириб, ўзим қишлоқда қолдим. Қолиб тинч юрсам ҳам майли — қўшмачилик қилдим, ўғирлик қилдим, қаллоблик қилдим, борингки, қилмаган номаъқулчилигим қолмади. Бироқ худо ўзи кўриб турибди, нимаики номаъқулчилик қилмай, ўша икки муттаҳамни деб, Эртоев билан Чавандозни деб қилдим. Топганимни шулар еди, шулар ичди. Кайф-сафо, айш-ишратни шулар сурди-ю, мен бўлсан... Нима қилай, улар «сени урущдан олиб қоламиз», дейишиди, биз тургандаги кўнглинг тўқ бўлсин, дейишиди, хом сут эмган банда эканмиз, шу гапга учдим. Аммо бошимга иш тушди-ю, уларнинг «дўстлигини» кўрдим. Улар ҳамма балога мени рўпара қилиб, ўзлари четга чиқиб олишиди.

Энди сиз: ҳамма қилгуликни қилиб бўлиб, бу гапларни айтишдан мақсад нима, дерсиз, иним!

Мақсад шулким, ўлмасам ул икки муттаҳам билан ўзим гаплашармай, аммо ўлиб кетсан бу гаплар дилимда бир армон бўлиб кетмасин дедим, иним. Иккиламчи... Худо ўзи раҳм қилгай, лекин агар бир нарса бўлсан... кетимда қоладиган уч-тўртта жўжаларим

бор, сиз шул норасидалардан ҳол аҳвол сўраб, бошини силаб турсани из... Мен бу гапларни аслида қадрдонларимга айтсам бўлади, аммо ўз қорнидан бошқани ўйламайдиган бу икки муттаҳамда раҳм-шафқат нима қилисин, иним **Комилжон!**

Хайр, омон бўлинг ука. Агар ўлиб кетмасам мен ҳам одам бўлиб қайтарман, ўлиб кетсан ҳаммаларингдан розилик сўраб... Эшвой Мўмин ўғли деб билгайсиз...

12 ноябрь, 1943 йил. Полевая почта 97615 «Д.»

Қилич хатни ўқиб бўлар-бўлмас тўрда ўтирган Қурбон ота ўрнидан турди.

— Қани, хатни бу ёқса бер. Қилич, мен бир гаплашман бу одамлар билан!

Қилич гўё унинг илтимосига тушунмагандай бир дақиқа юзига тикилиб қолди, кейин хатни буклаб киссаныга соларкан:

— Йўқ,— деди қатъий.— Сиз эмас, энди мен гаплашман бу одамлар билан!

* * *

— Қилич акамлар келдилар, кираверсинларми?

— Қайси Қилич акангни айтялсан?

— Қайси бўларди? Уша. Урушдан қаҳрамон бўп келган Қилич акамларда. Кечадан бери довруги қишлоқни тутиб кетди-ку!

— Ҳмм... Айт, кирсин!

Қоровул чол нимагадир мийигида кулимсираб чиқиб кетди. Чавандоз эса, бошида кўк сур телпак, қўлида қамчи... катта хонанинг ўртасида қозиқдай қотиб қолди.

У кеча Қилич келганини ва Аъзам ячейканинг уйига тушганини эшигандан бери бориб кўришини ҳам, кўрмаслигини ҳам билмай, талвасага тушиб қолган, бироқ Қилич ўзи унинг олдига келишини кутмаган эди.

Ҳозир ярим кечада тўсатдан кириб келишидан мақсади нима? Фотима учун ўчини олмоқчими ё Гулсумхонга ён босмоқчими, ёки бошқа бирор нияти борми?

Чавандоз юраги така-пука бўлиб кетганини сезиб, қўлини чойнакка чўзди, лекин шу пайт эшик шиддат билан очилди:

— Мумкинми?

Чавандозга шундай туюлдики, гүё Қилич ўзгармаган, бурунгидай ёш, шиддатли, хушқомат. Эгнидаги заррин погонли шинели ва ярқ-ярқ этган хром этиги уни яна ҳам новча ва чиройли қилиб кўрсатар, фақат фуражкасининг тагидан кўриниб турган сал жингалак сочлари оппоқ оқарган эди, холос.

У Қиличнинг лабларида билинار-билинмас табасум пайдо бўлганини кўриб, ҳушини йигди.

— Марҳамат... — Чавандоз «дўстим» демоқчи бўлди-ю, деёлмади:

— Уртоқ майор...

Қилич қалбида мавж урган қандайдир ички бир адватни енгигб:

— Мен сен билан бир гаплашмоқчи бўлиб келдим, Холматбой,—деди.

Қиличнинг «Холматбой» дейиши Чавандозга жуда илиқ эшитилиб чеҳраси ёришиб кетди.

— Жа соз бўпти-да! Мен келганингни эшитиб чиқиб кўрай дедиму, тагин... ўзингдан қолар гап йўқ. Ешлик экан...

— Хўп. Ўтган ишга салавот. Олдин мана буни бир ўқиб чиқ! — Қилич унинг гапини шартта бўлиб, Эшвойнинг хатини столга ташлади.

Чавандоз ранги оқариб, жойига ўтириди, бошидан қоракўл қалпогини олиб столга ташлади, шундан кеийингина хатни қўлига олди.

Қилич ундан кўзини узмай, рўпарасига ўтириди.

Чавандоз хийла ўзгарган: тўлишган, бағбақа солган, дўнг пешанасида, қисилган кўзларининг атрофига чуқур чизиқлар пайдо бўлган... Унинг қиёфасида бир маҳалнинг ўзида ҳам шафқатсиз, ҳам қандайдир аянчли бир нарса бор... Эҳ, мана шу одамни деб, Фотима ундан айниди. Фотима айнидими, ё бу фирибгар уни йўлдан урдими? Йўқ, яххиси буни ўйламаслик керак...

Тўсатдан Чавандознинг мўйлови тилратикандай диккайди, кўзлари олайиб:

— Ёлғон! Туҳмат! — деб бақирди-да, хатни гижимлади. Агар Қилич чаққонлик қилиб қўлидан «шап» ушламаганда уни парча-парча қилиб йиртиб ташларди.

Қилич унинг қўлини қўйиб юбормасдан олайган кўзларига тикилди, овози титраб деди:

— Бу хат ёлгон, ўғлингнинг ёшини яшириб, армиядан қочириб юрганинг ёлғон, колхоз мулкига қўл чўзганларинг ёлғон, фронтовик йигитларнинг қайлиқларини йўлдан урганларинг ёлғон, ҳаммаси ёлғон, ҳамма сенларга тұхмат қиласди-ю, ёлғиз сенлар ҳақсанлар!.. Шунақами?

Чавандоз бармоқларини ёзиб, хатни столга ташлади-да, секин ўрнидан турди, бошига телпагини киаркан:

— Менга қара, Қиличвой,— деди истеҳзоли жилмайиб.— Бунақа иғво гапларни тўплаб нима қиласан, оғайнин! Ундан кўра очиғини айта қол: Фотима учун ўчимни оляпман, де! Эски кек, эски адоварат ҳалиям всимдан чиқмади, деб қўя қол, дўстим!..

Ҳамма қаллоб ва фирибгарлардай Чавандоз ҳам пок қалбларнинг энг нозик торларини яхши биларди!

Қилич бир зум бошини әгиб турди, сўнг кескин юриб Чавандознинг олдига келди:

— Менга қара, Чавандоз! Мен сенинг ёмонлигинги бугун ашитаётганим йўқ. Мен буни аллақачон ашитганман, лекин мана шу гапни рўйач қилишингни билиб.. индамаган эдим. Энди ўйлаб қарасам, ёшлик қилган эканман. Билиб қўй: анди бу гаплар билан қутулиб кетолмайсан. Энди оғайнинг Эртоев билан бирга қилган ҳамма номаъқулчиликларинг, ҳамма адолатсизликларинг учун... жалқ олдида, партия олдида жавоб берасанлар. Тушундийнгми?

Қилич овозини кўтартмади, лекин унинг мушт бўлиб тугилган қўлларида, бошини сал вгиб секин гапиришида шундай аўр бир нафрат ва қатъият бор әдики, ўртада турган Чавандоз оёқларида қандайдир дармон-сизлик сезиб, ўзини стулга ташлади.

— Нима қилай, турмуш мажбур қилар экан, Қилич.

— Турмуш мажбур қилар эмиш!— ашикка томон юрган Қилич тўхтаб кескин ўгирилиб қаради.— Бошқаларга қилганларингни айтмай қўя қолай, лекин Аъзам ака... У кишининг оиласига нисбатан бунчаликка боришга қандай виждонинг ёр берди, Чавандоз? У кишининг қилган жизматларини, шу қишлоқ учун, шу қора кўзлар учун кўрсатган жонбоазликларини била туриб, бундай қилиши!.. Сенда инсоф, виждон, одамгарчиллик дегандан зигирдек қолганими ўзи?

Қилич Чавандознинг тепасида бир нафас жавоб кутиб турди, кейин эшикни қарс ёпиб чиқиб кетди. Бу овоз Чавандозга худди аччиқ хипчиндай тегди-ю, ўрнидан сакраб туриб, телефонга ёпишди:

— Менга райижроком раисини беринг. Ўртоқ Эртоевни. Ўртоқ Эртоевни деялман сизга!..

* * *

Гулсум опа педсоветни очиб биринчи масалани муҳокама қила бошлаганда, орқадан икки букланган қозғоз олди:

«Қишлоқ советига бориб келармишсиз...»

У қоғозни олдидаги китобнинг тагига бостириб, савол назари билан тикилиб қолган ўқитувчиларга ҳаради. Биринчи масала — Серафима Фёдоровнанинг ўрнига рус тили ўқитувчиси топиш, ҳозирча эса бу вазифани яқинда фронтдан қайтган иккита ёш йигитнинг биттасига юклаш лозим эди.

Гулсум опа хатни олганда кўнгли бир хил бўлиб кетса ҳам, бу масалани охирига етказди, лекин иккичи масалага ўтганда ортиқ чидай олмади, нимагадир юраги ўйнаб, педсоветни Азиз домлага топширди-да, қишлоқ советига қараб кетди.

«Тагин нима гап топдийкин бу нопок? Тунов куни айтган буйргунини қўлимга тутқазмоқчими ё қишлоқдан ҳайдамоқчими?»

Тўсатдан унинг хаёлига бошқа бир фикр келиб тирноқларигача музлаб кетди: наҳот Ашрафжон?.. Йўқ-йўқ! Баъзан қаёқдаги бемаъни гаплар келади-я, кишининг кўнглига? Нима қиласи, шунаقا бемаъни ўйлар билан ўзини қийнаб?

Гулсум опа бу йўллардан қутулиш учун жўрттага Қилични ўйлай бошлади.

Қўчқор Абубакировнинг рухсати билан Ларисани Тошкентта кузатиб қўйиши ва билетларини тўғрилаб бериб, қайтиб келиши керак экан. Ўғли келавермагач, Қилич кеча эрталаб шаҳарга отланди. Кетишдан олдин Гулсум опани чақириб олиб яна узоқ гаплашди:

— Сиз хафа бўлманг,— деди.— Эҳтимол мен раёнда ишда қолсан. Кетмоқчи эдиму, очигини айтсан, сизнинг гапларини гиздан кейин жуда қайнаб кетдим.

Гулсумхон! Умуман, қаддингизни тутинг. Қўрқманг, юракда қўр бор, булар билан бир курашиб кўрамиз ҳали!

...Гулсум опа, Қиличнинг гаплари эсига тупшиб, кўнгли сал ёришса ҳам, гузарга яқинлашган сайин юраги увушиб дармони қуриётгаңдай бўлди.

Бостирмада таниш қора айғирнинг охурига беда ташлаётган қоровул чол уни кўриб, имо қилди:

— Қираверинг, синглим, сизни кутяптилар хўжайин.

Гулсум опа тор йўлакда навбат кутиб ўтирган учтўртта мўйсафидларга салом бериб, юзига рўмолини тушириб пиқ-пиқ йиглаётган аёлнинг ёнига ўтган ҳам əдики, эшик очилиб Чавандоз кўриди.

У, Гулсум опага кўзи тушиб, негадир: «Кечирасиз, ҳозир»... деди-да, йиглаётган аёлни ичкарига таклиф қилди.

Аёлнинг яқинда бўйига етиб қолган қизи ўлган, шу баҳонада «рабочий»га кетган эрини беш-олти кунга бўлса-да, чақириб олиши учун справка сўраб келган əди.

Чавандоз шошиб тургани учун, аёлга ваъда бергаб, тез чиқариб юборди-да, Гулсум опани таклиф қилмоқчи бўлиб ўрнидан турган эди, тўсатдан телефон жиринглаб қолди.

Узоқ давом əтган хириллаш ва тарақлашлардан кейин, ниҳоят, сал бўғиқ ва ўқтам овоз эшитилди:

— Бу ким? Раисми?

— Мен, мен! — Чавандоз Эртоевни таниб, беихтиёр трубкага томон энгашди.— Қулогум сизда, Эртоев ака!

Трубка ҳамон хириллар, тарақлар, Эртоевнинг гапларига тушуниш қийин эди.

— Кечаги гап нима бўлди?

— Қайси гапни айтасиз?

— Қайси гап бўларди,— асабий такрорлади Эртоев,— Гулсум опани чақириб гаплашдингизми?

— Чақирдим. Негаки, усиз ҳам ўғилларига...

— Ўғилларини қўйиб туринг: кеча ўзини чақириб гаплашинг демаганмидим сизга!

— Ҳозир гаплашаман, ўртоқ Эртоев, ҳозир...

Чавандоз трубка жимиб қолганини кўриб, энди жойига қўймоқчи эди, тағин ўша овоз хириллади:

— Қилич қайтиб бормадими, хабар олмадингизми?

— Йўқ. Аммо лекин, келсаям яна ўша... ўзингиз билган одамнинг уйига тушади. Хотирингиз жам бўлсин, Эртоев ака!

— Тағин эски ҳаммом, эски тос! Қўйиб туриинг ҳозир бу гапни! Ундан кўра топшириқни бажаринг! Яхшилаб гаплашинг. Ҳамма илтимосларини бажо келтиринг. Иссиқ овқат учун дон-дун сўраган эмиш, айтинг — ҳаммасини тўғрилаймиз. Эшитяпсизми?

— Эшитяпман, эшитяпман, Эртоев ака.

— Эшитаётган бўлсангиз — гап шу. Кўнглини кўтаринг. Хато қилибман денг. Хуллас, кечаги гап!

Чавандоз трубкани жойига осишни ҳам унутиб, хаёлга чўмид анча турди.

— «Яхшилаб гаплашинг. Кўнглини кўтаринг! Хато қилибман денг!»

«Нима бало бўлди бу Эртоевга? Ё сиёсат ўзгариб қолдими? Наҳот шунча обрўси билан Қиличвой олдида дағ-дағ қалтираб қолса?»

Эртоев кечаки ҳам худди шундай ҳоялиқиб, шошиб гапирган, Қиличвой районда қолиш эҳтимоли борлигини айтиб, Гулсум опани ўз ишида қолдиришини тайинлаган эди. Бугун кечагидан ҳам баттар довдираяпти... Ёки каттакон бўляптимикин бу Қиличвой? Ҳали райком бўлиб кетмаса денг! Кўкрагида қўш орден, ўзи майор, райком бўлиб кетсаям ажаб эмас. Негаки... «бир балоси бўлмаса шудгорда қўйруқ на қилур», дегандай, Эртоев бир нимани сезмаса бунчалик талвасага тушмас эди... Чавандознинг бадани музлаб, стулга ўтириб қолди. Кейин, сувга чўкаётган одам чўпга ёпишгандай, ўзини оқладиган сабаблар қидира бошлади.

Ҳамма балони ўша Эртоев бошлаган! Тунов куни Чавандоз Гулсумхонга: «Ишдан бўшадинг», деган бўлса... ўшанинг буйруғи билан айтган, холос. Эшвой-Эшматлар ҳам ўшанинг «дуойи саломи» билан бўлган эди. Мана энди балога Чавандоз қоляпти. Ўша воқеа бўлмаганда, балки Абубакиров ҳам Ёдгорбекка бунча ёпишмас эди. Лекин гап ундаям эмас. Бошга тушганини кўз кўрар. Энг муҳими... Чавандоз ҳам одам, ахир. Эрталаб келган бир даста повесткалар орасида... Машраб ҳам борлигини кўриб юраги зир

титраб кетди. Эртоев бўлса бу гапниям эшитгиси келмади. «Хато қилибман денг», дейди-я! Ҳамма балони унга тўнкаб, ўзи яна қутулиб кетмоқчига ўхшайди бу мугамбир.

Чавандоз сапчиб ўрнидан турди. Этигини гарчилатиб катта хонанинг у бошидан-бу бошига бир-икки марта бориб келгач, ўзини сал босиб, эшикни очди,

— Марҳамат, Гулсумхон...

Чавандоз, Гулсумхонга юқорироқдан жой кўрсатиб, ўзи жойига ўтиб ўтириди. Нима қилишини билмай, столнинг тортмасини очаркан, кўзи яна бир даста повест-каларга тушиб, негадир дарров қайта ёпди.

У Гулсум опага нима дейишини кечаси Эртоев билан гаплашганидаёқ ўйлаб қўйган зди. Бироқ жабрдийда аёлнинг сал ҳадиксираган кўзларига, қаттиқ қисилган лабларига кўзи тушди-ю, яна боягидай мудҳиш бир шубҳа ва қўрқув юрагини муалатиб юборди.

— Афв өтасиз, Гулсумхон,— ниҳоят деди у.— Жаҳл чиққанда ақл қочади деган гап бор. Тұннов куни аччиқ устида сизга анча озор берибман...

Чавандоз хижолат чекиб йўталди, дўпписини олиб, бошини қашиди.

— Гапимга ишонинг, Гулсумхон, сут билан кирган қон билан чиқади, дегандек, одат әкан, жаҳл устида ҳар нима деб юбораману, аммо лекин, худо ҳақи, кейин пушаймон чекаман. Аъзам акамлар ҳам асимдан чиққан әмас...

Гулсум опа ҳаммадан кўра бу одамнинг мана шундай киши кўнглини овламоқчи бўлишидан қўрқарди, чунки бунинг тагида ҳамиша бир ёмон гал, бир совуқ хабар ётарди.

Гулсум опа тоқатсизланиб:

— Утган ишга салавот,— деди.— Шуни айтгани чақирдингизми мени?

— Чақиришдан мақсад...— Чавандоз дўпписини кийиб, пешанасини қашиди.— Мақсад, ўзингиз айтгандай, ўтган ишга салавот, Гулсумхон. Кўнглингизни тўқ қилиб вазифангизни бажараверинг. Мен ўртоқ Эртоев билан гаплашдим. Сиз яхши ташаббус кўрсатаётганингизни айтдим. Ердам бермасак бўлмайди, дедим. Гапният пўскалласи: кийим-кечак масаласидаям ёрдам берамиз, иссиқ овқат масаласидаям. Агар ҳўп десангиз келинимният мактабга олинг. Үқисин у ҳам...

«Тўсатдан нима бўлди бу одамга? Наҳот Қиличдан шунчалик қўрқиб қолишган бўлса?»— Гулсум опа Чавандознинг жилмайиб турганини кўриб, алла-қандай ижирганиб кетди:

— Тунов куни ишдан бўшатилганим тўғрисида қўлимга буйруқ бермоқчи эдингиз. Бугун бундай деяпсиз. Нима бўлди ўзи?

— Тунов куни...—Чавандоз зриган кўнгли қайта музлаб, пешанаси тиришди.— Албатта, мендан хафа бўлишга ҳаққингиз бор,— деди у, ўксиниб.— Ҳаққингиз бору, аммо ўзинги бир ўйлаб кўринг, эрта-индин урушга кетаётган ёлгиз фарзандингиз тўйида бирор шундай қилса... нима дердингиз, Гулсумхон? Мен ўғлингизни ёмонламоқчи эмасману, аммо лекин, жуда... ғалати бола чиқди Машрабвой. На ўзини аяди, на бирорни. Мана! Ўз ихтиёри билэн қилган ишининг оқибати!

Чавандоз тортмасидан бир даста қофоз олиб, биттасини Гулсум опага чўзаркан, уф тортиб деди:

— Военкомдан повестка. Индинга кетиши лозим...

Шундан кейин яна нималар деди Чавандоз — биттаси ҳам Гулсум опанинг қулогига кирмади.

Йўқ, бу қофоз янгилик эмас, Гулсум опа повесткани яқин икки ойдан бери кутади. Машраб оёғига чўйка тушиб гапириб берган ўша оқшомдан бери ўзини шунга тайёрлар эди. Лекин қанчалик тайёрланмасин, айрилиш пайти шунчалик яқин деб, ўйлаганмиди? Бундай бўлишини билганда у ўша куни ҳарбий комиссарнинг олдига чопиб бормасмиди?.. Чопиб бормасмиди?! На метрика бор (йигирма олтинчи йили кимнинг эсига кепти метрика олиш), на бошқа ҳужжат, чопиб борганда нима дерди? Зотан, Машрабнинг ўша кунги гапларидан кейин қаёққа ҳам борарди?

Биттаю битта умиди — бу иш ҳали-ҳозир бўлмайди, деб ўйлаганди! Мана бу умиди ҳам пучга чиқди.

Ашрафжон бўлганда ҳам, лоақал ундан хат келиб турганда ҳам бир сари әди! Ашрафжон ўлик-тириги номаълум, хат-хабарсиз кетган бир маҳалда Машрабдан айрилиб, бахти қора қизи билан танҳо ҳолишидил..

— Бола менини эмас, сизники-ю, аммо-лекин, маниман деган йигитлар ўзларини панага олиб юрганда ёшини оширишни ким қўйди унга?.. Унга нима! Сизга қийин, Гулсумхон...

Гулсум опа босинқираб уйғонган одамдай секин ҳушини йигаркан:

— «Бу нималар деяпти ўзи» — деди хаёлида, бошини ликиллатиб ўтирган Чавандозга ўйчан тикилиб. — «Ха, ўғлим нима учун шундай қилганини тушинармидинг сен! Йўқ, сен буни ҳеч қачон тушунмайсан!»

У қандайдир ички бир туйғуга бўйсуниб ўрнидан турди, кўзлари сал қисилиб:

— Майли,— деди.— Отасининг боласи-да. Ўша сен билган Ячейканинг ўғли-да, Чавандоз. Мен унга нима ҳам дердим?

Гулсум опа, нимага шундай қилаётганини ўзи ҳам сезмасдан, бошини мағрур тутиб, хонадан чиқди, чиқди-ю, ҳовлида бирдан бўшашиб, деворга суюнди.

Аlam қаттиқ бўлса кўз ёши ҳам қуриб қолади дейдилар. Бу гап ростми-ёлғонми, ҳар нечук, Гулсум опа изтироб чеккан сайин юраги музласа музладики, кўзидан бир томчи ёш чиқмади.

У фақат бир нарсани — Машрабни тезроқ топиб бағрига босишни, то кетгунча ёнидан жилдирмасдан бирга бўлишни, юрагида тўпланган ҳамма гапни айтиб қолишини истарди, холос. Ёлғиз Гулсум опа эмас, Маствура, Моҳира буви, уйга йигилган қариндош-уруглар — ҳаммаси уни кун бўйи кутишди. Машраб бўлса тун ярмида, ўшанда ҳам усти-боғчи шалаббо, лекин оғзи қулогида, ширақайф бир ҳолда кириб келди...

* * *

Машрабнинг бу аҳволга тушишига бир жиҳатдан повестка олган йигитлар сабаб бўлди.

Афтидан, йигитлар кечаси повестка тўғрисида гап тарि�ғагандаёқ келишиб қўйған бўлишса керак, Чавандознинг олдидан чиқишилари билан, Машрабни четга чақиришиб, бир жойда жиндай ўтириш борлигини айтишди ва уни ҳам таклиф қилишди.

Машраб йўқ деёлмади, чунки йигитлар ҳаммаси баравар:

«Ке, юр бир отамлашайлик энди!» дейишиб, қўярда-қўймай бошлаб кетишди.

Шу-шу, зиёфатга зиёфат уланиб кетди.

Ҳали улфатчилик нималигини билмаган, чинакам йигитлик даврини бошидан кечирмаган ўслиринлар, гўё повестка қўлларига тегиши билан беш-олти ёш улгайиб қолгандай, ўзларини салобатли тута бошлаган, қадаҳларни қайтармасдан ичишар, қизлар тўғрисида осмондан келиб гапиришар, гўё қолган икки кунда йигитлик инъом этадиган ҳамма хурсандчиликни олиб қолишга ҳаракат қилишарди!

Лекин энг қизиги — қишлоқ аҳли ҳам уларга аллақаидай бошқача қарай бошлаган эди. Бир пиёла мусалласдан кайфлари ошиб, ўзларини жуда салобатли тутаётган бу ўслиринлар уларга ҳам чинакам йигит бўлиб туюлар, йигитлар ҳовлидан ҳовлига ўтганларида ҳатто мўйсафидлар қўл ҳовуштириб кузатиб қолишар ва қўл ҳовуштириб кутиб олишарди.

Машраб бу ўйин-кулгига беихтиёр бериларкан, у ҳам ўзини бир неча ёш улгайгандай сезар, айни замонда, ҳамқишлоқларининг саломлашишида, гап-сўзларида бўлакча бир ҳурмат билан бирга аллақаидай чуқур бир ғамгинлик борлигини ҳам пайқарди. Шундай пайтларда даврадан чиқиб кетгиси, боғларни, адирларни танҳо кезгиси келар, дам-бадам Муяссан эсига тушиб, юраги бир зириллаб қўяр, зотан, кўнглида уйғонган йигитлик ғурури билан бирга ниманидир йўқотаётганини, қон-қонига сингиб кетган азиз бир нарсасидан айрилаётганини сира унуполмас эди.

Кечқурун зиёфат авжига чиққанда Акмал маст бўлиб қолди. Қайтаётгандаридан бир неча жойда ўзини тоҳ ариққа отиб, тоҳ учраган дарахтзорга уриб, ётиб олди. У ҳадеб бир сўзни такрорлар:

— Сенлардан қолиб, Гулимдан айрилиб нима қиласман мен бу қишлоқда! — деди. — Йўқ, керакмас менга бу турмуш. Бундан кўра ўлганим яхши. Ўламан! — деб бақиради-да, гўё буни исбот қилмоқчи бўлгандай, бошини қўллари орасига олиб у ёқдан-бу ёққа ағанар, тўлғанарди.

Акмал айиқдай йигит, Машрабнинг унга кучи етиши амри маҳол. Илгари бундай пайтларда унга ёлғиз Қўчқор бас келарди. Машраб олдин анча олишиб кўрди, кейин бас келолмаслигини сезгач, тўсатдан Қўчқорнинг гаплари эсига тушиб, Акмални елкасидан ушлаб силкиди:

— Бўлди. Хотин кишига ўхшаб кўп хиқиллайверма! Юр, Комил акага борамиз!

— Комил ака? Нима қиласми?

— Нима қиласми дейди-я? Қўли газак олиб, уйида касал ётибдику! Бир бориб кўрмайсанми, каллаварам!

Машраб буни фақат Акмални «овутиш» учун айтётгани йўқ — Комил сафардан қайтгандан бери чиндан ҳам қўли оғриб уйдан чиқолмай қолган ёди. Ҳар қалай, бу гап Акмалга таъсир этди чоғи, индамай кетидан эргашди. Лекин идоранинг ёнидан ўтаётганиларида Машраб тўсатдан тўхтади: жудди ёзда, ҳандалакка бориб қўлга тушган оқшомдагидай, деразаларнинг бири ёруг ёди.

Машраб гўё юрагида кул босиб ётгани эски бир дард қайта яллиғлангандай бўлди-да, тўхтади.

— Менга қара. Идорада Иnobat опа ўтирганга ўхшайди. Юр, бир кириб чиқайлик. Мен хайрлашиб кетай у киши билан.

Улар қоровул чолнинг: «Хой, ҳой, ким бу бемаҳалда дайдиб юрган», дейишига ҳам қарамай, ёнидан ўтиб айвонга яқинлашганларида тўсатдан деразалардаги ёруг ўчди-да, ёшик очилиб икки киши кўринди.

«Комил! Қилич ака!»

Машраб, ҳушини йиғиб, уст-бошини тўғрилай бошлиди.

— Бу ким? — Комил бир қадам олдинга юриб, яна тўхтади.— Машраб? Акмал?.. Нима қилиб юрибсанлар ярим кечада? Қани, бу ёқса юринглар-чи?

Комил ўз хонасига кириб, столдаги ўнинчи лампани ёқди, қовоғини солиб, бир Акмалга, бир Машрабга тикилиб қаради, кейин пойгакда бошини бир томонга сал эгиб кулимсираб турган Қилич акага юзланди.

— Қалай, ўртоқ майор? Чинакам разведкачиларга ўхшайдими йигитларимиз?

Қилич чаккасига бостириб кийган ва ўзига ярашиб тушган фуражкасини тўғриларкан:

— Ҳа, душманни кўриб тирақайлаб қочган ботирларга ўхшайди, йигитлар! — деб кулди.— Ҳўш, нима бўлди, Машрабжон? Ё повесткани ювдиларингми?

Унинг: «Повесткани ювдиларингизми?» дегани Машрабга: «Аламдан ичдиларингми?» дегандай ёши-

тилди-ю, ўнгайсизланиб, ниманидир ғўлдираган эди,
Акмал:

— Адолат қидириб юрибди бу... девонаи Машраб! — деб пўнгиллади.

Комил тивит рўмол билан ўраб олган қўлини ушлай-ушлай яқинроқ келди.

— Бу-ку, адолат қидириб юрган экан, сен-чи? Сен нима ҳилиб юрибсан? — деди кескин.— Боя ойинг келиб кетди. Кечако кундуз хотинларга ўхшаб йиғлармишсан! Қишлоқдан бошимни олиб кетаман, дермишсан. Бу қанақа гап? Қанақа лапашанглик ўзи?

Акмал оғир тин олиб, бошини эгди. Комил яна бир нима демоқчи эди, Қилич «инدامанг» деб кўзини қисди-да, Акмалнинг елкасига қўлини қўйди.

— Энди... бундай бўлсин, ука. Бугун-эрта бутун қишлоқ буғдой экишга даштга кетяпти. Сен ҳам бир-икки кун шу юмушга бориб келгину, кейин МТС га ўқишга бор. Тракторчилар курси очилибди. Биз сени ўшанга ёзиб қўйдик. Курсни битиргунингча бу ғам-ғусса ҳам асингдан чиқиб кетади. Унгача бу ёқда даданг ҳам келиб қолади. Мана! — У кўкрак чўнтағидан қандайдир қогоз олиб Машрабга чўэди.— Ўқиб бер, дўстингга!

Машраб қогозни олиб очаркан, юраги бир сапчиб тушди. Бу Ларисадан келган телеграмма эди:

•Боғистон райони, «Ленин йўли» колхози, Қўчкор Қиличеевга.

Мен соғ-саломат етиб келдим. Дадам билан тошишдим. Госпиталга санитарка бўлиб жойлашдим. Эшимат аканинг соғлиги тузик. Эрта-индин йўлга чиқади.

Ҳаммаларингни қаттиқ ўпаман. Ҳеч қачон унумайман, Лариса».

Машраб, Акмални ҳам унугиб, Қиличга қаради:

— Телеграмма Қўчкорга ёзилипти-ку? Демак... у Магнитогорскка бормалти-да?

— Тошкентданми, бир жойдан поездга чиқариб қайтаётган бўлса керак,— деди Комил.— Ҳарбий комиссарликдан берухсат бир ёқса кетадиган йигит әмас, Қўчкор!

Қилич чуқур тин олди-да, Акмалга юзланди:

— Хўп, гап шу, ука! Ҳозирлигингни кўравер — МТСга ўқишга кетасан. Дўстларинг армиядан офицер бўлиб қайтгунча сен бу ёқда зўр тракторчи-инженер

бўлиб оласан!— Қилич буни қулиб гапиришига қара-
масдан, унинг қаттиқ ташвишга тушиб қолгани чек-
расида шундоқ акс этиб турарди. Машраб ўзи ҳам
йўл-йўлакай Қўчқорни ўйлаб кетди: Ларисани Магни-
тогорскка олиб бормаган бўлса, бир ҳафтадан бери
қаёқларда юрипти? Ё қишлоққа қайтгиси келмай, бор-
ган жойидан армияга кетиб қолдимикан? Унақа бўл-
са бу ёқда повесткаси нима бўлади?

Машраб минг хил хаёлда тахта кўприкдан ўтиб,
қатор толларга яқинлашган ҳам эдики, боғлардан
икки киши чиқиб келди.

Машраб дарҳол таниди: уларнинг бири Шириной,
иккинчиси Муяссар эди!

Машраб ўз севгилисини ойдинда аниқ кўриниб
турган таниш қизайл дуррасидан, Ширинойга бир ни-
ма деб кулган майнин овозидан таниди, гёё кечаси
офтоб чиққандай бўлиб:

— Муяссар?— деди.

Муяссар олдин ёш қизлардай Ширинойнинг орқа-
сига яширинди, кейин қулиб олдинга ўтди ва бирдан
чўчиб Ширинойнинг қўлини ушлади:

— Вой, маст!

Машраб қулди.

— Менми, Муяс!

— Йўқ, йўқ, маст, маст!— қўрқибми, жирканиб-
ми, деди Муяссар, сўнг орқага чекинди-да, уйларига
қараб чопди, унинг кетидан Шириной ҳам югурди.
Машраб эса:

— Муяс... менга қара, Муяс,—деганича ой нурига
чўмилган кенг сойда бир ўзи қолди...

* * *

Тўғри, Машраб бунинг ҳаммасини зартасига,
пешинга яқин уйғониб эслади. Эслади-ю, меҳмонхо-
нада ҳамон унга тикилиб, афтидан, унинг уйғониши-
ни кутиб ўтирган ойисини, бувисини, қариндош-уруг-
ларини кўриб, уялганидан кўзини қайта юмди. Кейин,
тўсатдан кеча йигитларни меҳмонга чақиргани, улар
келадиган пайт яқинлашиб қолгани эсига тушиб, ўр-
нидаи туришга мажбур бўлди.

Машраб кутганига қарши, меҳмон тўғрисидаги гап
ҳеч кимни ранжитмади, аксинча, уйдагилар буни хур-
сандлик билан кутиб олишиди.

Дарҳақиқат, нимага ҳам қувонишмасин! Ахир...
Машраб умрида биринчи марта меҳмон чақирмоқда
эди! Бу унинг йигит бўлганидак бир нишона эмасми?
Қайси она ўз ўғлиниң йигит бўлишини, чинакам эр-
каклардай меҳмон чақириб хурсандчиллик қилишини
истамайди? Ўғлиниң илк меҳмонига хизмат қилишини
орзу қилмайди?

Моҳира буви, Маствура ва Ширинойгина эмас, ҳатто
Гулсум опа ҳам ўзгариб қолган, Машрабнинг ҳар бир
тилагини дарҳол бажо келтиришар, гўё улар Маш-
рабнинг эмас, балки рӯзгор бошлигининг хизматини
қилишарди.

Зиёфат чакки бўлмади. Кириб келишда сал ха-
фароқ кўринган йигитлар, бир-бир коса бўздан ке-
йин, анча қизишиб, чеҳралари очилиб кетди. Ҳазил-
мутойиба, ашула, ҳатто ўйин-кулги бошланди.

Бунинг устига бир тўрва жўхори кўтариб Иnobат-
хон билан Ҳошим полвон келиб қолиши. Полвон
«жўжахўроз»ларни асқияга тутиб ва фронт воқеала-
ридан гапириб, ҳаммани тоза кулдирди-ю, ўтиришга
яна ҳам файз кирди. Ёлғиз Машраб кўнглига қил сиғ-
мас, қанча уринмасин бари бир хаёли Муяссарга қараб
учар, кечаси унинг ижирғаниб айтган сўзлари эсига
тушиб, ич-ичидан зил кетар, назарида, Муяссар энди
у билан қайтиб юа кўришмас эди.

Зиёфат кун ботиш олдида зўрга тарқади. Машраб
Йигитларни сойгача кузатиб қўйиб, энди орқага қай-
таётган эди, рўпарасидаги тор кўчадан Қурбон ота
чиқиб қолди.

Машраб истиҳола қилиб, салом бериб тез ўтиб кет-
моқчи эди, ота бармоги билан имо қилди.

— Бери кел!

У Машраб ёнига боргунча кутиб турди, сўнг,
хина суртилган сарғиши муйловининг учларини бу-
раб:

— Сан — маладес! — деди.— Баайни отангнинг йў-
лини тутибсан! Между прочим, гражданлар уруши
даврида ҳаммамиз ҳам шундай қилганимиз. Кўнгил-
ли бўлиб Қизил Армияга ёзилганимиз. Хуллас қалом,
маладес йигитсан. Энди... Сенга айтадиган битта гап
бор.

Ота, оппоқ қошлари туташиб:

— Менинг қизимни биласан-а? — деб сўради.—

Междум прочим, ёмон қис әмас. Ақлли. Илмли. Ком-
сорт. Ну, ҳусниям жойида!

Машраб ер ёрилса ерга киргудай бўлиб, питирлаб
қолганини Қурбон ота сезди шекилли, бир йўталиб
олди:

— Галнинг пўскалласи, билиб қўй: сен қайтгунча
хеладиган совчиларни қуваман и қувганим-қувган.
Кўнглинг тўқ бўлсин. Уқтингми, болам!

Машраб, жавоб беришга ҳам мажоли етмай, ўзини
сой бўйидаги толзорга урди. Уят, миннатдорлик ва
қувонч туйғуси қўшилиб, гўё зўр бир тошқинга ай-
ланди-ю, уни ўз оқимиға илаштириб кетди.

У на тиззага келган шудгорни сезди, на дарахт
шохларидан ёмғирдай тўкилган совуқ томчиларни!
Қирнинг ярмига боргандагина ўпкаси томогига тиқи-
либ, ерга ағанай кетди.

Пастда, сёқлари остида гўё ҳарир кўкиш пардага
ўранган қишлоқ ётарди.

Таниш уйлар, боғлар, кўчалар... Ҳу ана, ҳароба
тепаликнинг шундоқ ёнбошида бувисининг боғи.
Ундан хийла берида, тахта кўприкнинг нариги боши-
да бир-бирига чирмашиб ўстган қўш ёнғоқ.

Қишлоқ болаларининг севимли дарахти, меҳрибон
бувиларидаи сахий бобоёнғоқ! Қанча марта Машраб
укинг шохларига миниб қўйнини ёнғоққа тўлдирган,
қўллари, оғизларигача қоп-қора бўлиб, унинг тагида
ёнғоқ отиб ўйнаган, гоҳ ютиб, гоҳ ютқазиб, катта
бўлган!

Кўприкнинг бу юзида ўз ҳовлилари, унинг ёнги-
насида Муяссарларнинг боғи, боғнинг этагида, бир
ариқ сув оқиб келиб, эгилган жийдалар орасига кириб
кетадиган жойида... яна бир севимли дарахт — яп-
роғидан меваси кўп бўладиган кекса шотут кўринади.

Қанча марта Машраб билан Муяссар бу тут таги-
да ўтириб, Барно билан Зебохонга оқиб келадиган
олмаларни бирга тутиб ейишган, йигитларнинг исмлари
ўйилган жойларини карс-карс тишлаб, ўзларига ёқ-
маган поччаларни «ўлдиришган» эди!..

Ана, лайлак уя қурган оқ терак! Четлари қамиш
билан қопланган тўғон, худди илк баҳордагидай кўм-
кўк бўлиб яшиаб ётган кеңг сой!..

Баҳорда Муяссар билан бирга ялпиз терган, бирга
копток ўйнаган, илк муҳаббатига шоҳид бўлган, ўн

саккиз баҳори ўтган... Йўқ, нега ўн саккиз бўларкан,
ўн етти йил умри ўтган гўзал сой, киндик қони тў-
килган она тупроқ!

Йўқ, Машраб ёшини ўзгартириб, фронтга кетаёт-
ганидан ўқинмайди, сира ўқинмайди! Фақат кўнгли-
нинг бир четида қандайдир ҳазин туйғулар секин теб-
ранади. Видолашув туйғулари, болаликдан қон-қони-
га сингиб кетган севимли қишлоқ билан, муштипар
она, меҳрибон буви, қалбидан илк севги уйғотган ажо-
йиб қиз билан хайрлашув туйғулари бу! Бу туйғулар
ўз ихтиёрига қарши хаёлида ғамгин ўйлар уйғотади.
Бу азиз қишлоққа қайтиб келиш насиб бўлармикин,
бўлмасмикин? Бу ям-яшил сойда, оқ терак соясида,
тўғон бўйида чалқанча ётиб юлдузларни сайр этиш,
Муяссарнинг йўлига тикилиб орзиқиб кутиш, она та-
бассумини кўриш, бувисининг айланиб ўргилишла-
рини эшитиш насиб бўладими, ёки... ёки тунов кунги
қозоқ йигит айтмоқчи, бир кўролмай олис юртларда
ўлиб кетадими?

Йўқ, яхшиси буни ўйламаслик керак! Ундан кў-
ра... Наҳот Муяссар билан кўриша олмаса? Наҳот у
кечаги нарсага аччиқ қилиб ҳатто хайрлашишга ҳам
келмаса?

Машраб ҳарир кўк туман орасига чўма бошлиган
қишлоққа сўнг марта кўз ташлади-да, ўрнидан турди.

Муяссарларнинг боғи ёнида, ёзда шафтоли қоқа-
ётганида кўрган жойида, бир зум тўхтаб синчиклаб
қаради. Муяссардан яна дарак бўлмагач, секин боғ
оралаб ўз ҳовлиларига ўтган ҳам эди, айвонда ойиси
билан гаплашиб турган Шириной тез юриб олдига
келди.

— Қаёқларда юрибсан ўзинг? — деди Шириной
сал жеркинқираб. — Кечадан бери қорангни кўрса-
майсан. Ўлиб бўлдигу пойлайвериб!

Машраб юраги жиз этиб, ойисига қараганди, Гул-
сум опа кулимсираб, ёнига келди.

— Суюнчи бер, болам. Дўстинг келди, Қўчқор
келди...

— Қачон? — Машраб юраги гуп-гуп уриб, уйга
талпинди-ю, ойиси бошини чайқаганини кўриб, тўх-
тади.

— Қўй, болам, охирги кеча ота-бала бир тўйиб
гаплашсин. Мен ҳам сен билан бир гаплашсам дев-

диму...— Гулсум ола ғамгин кулимсиради.— Майли, Ширинойнинг гапи муҳимроққа ўхшайди. Аввал бунинг ишини битказа қол, болам...

Машраб ойисининг юзига қарашга уялиб, Ширинойга тикилди. Шириной муғамбирана жилмайди.

— Юр, кутавериб кўзлари тўрт бўлди, бечора!

* * *

Мана, ўн йиллаб дийдор кўришиш ишқида ёнган ота-бала, ниҳоят мурод-мақсадларига етди...

Ота!. Бу сўзниң қадрини болалиги етимликада ўтган, бошини эркак кишининг меҳрибон ва кучли қўллари силамаган ўғил болаларгина билади, дейишиади. Лекин Қўчқор, балки кичкиналигига олов бўлгани учундир, отасининг йўқлигини унча билмаган эди. Буни у анча улгайганда, ўшандаям отасининг довруғини, унинг мардлиги ва довюраклиги ҳақидаги галларни эшитганда тушунган, тушунгану, қалбida ғуур аралаш аламли бир түғён кўтарилган эди. Чунки ҳар сафар дадаси ҳақида ўйлаганда кўз олдига ойисининг мунгли чеҳраси келарди-ю, кўнглида: «Нега у яхши бўлса ойимларни бу номарднинг чангалидан қутқариб олмади», деган фикр ўтарди. Фақат фронгдан бўлакча бир меҳр билан йўғрилган маъюс хатлар кела бошлагандан кейингина юрагидаги музлар эриган эди.

Эсида бор, бултур кузда дадаси келиб кетгандан кейин бир кун Машраб унга «Сўна» деган роман берди.

Китобга унча ихлоси йўқ Қўчқор бу романни бир кечадаёқ мижжак қоқмай ўқиб чиқкан, ўшандан бери отаси тўғрисида ўйласа, кўз олдига негадир Артур билан Монтанеллининг учрашуви келар, назарида, уларнинг учрашуви ҳам худди шундай бўларди. Лекин бугун Қўчқор отасини кўрганда тортичоқликданми ёки, аксинча, йигитлик ғуурими, уни қаттиқ қулоқлашга жалақит берди, фақат отаси уни бағрига босаркан, қўллари титраб, «қулт» ютганини кўргандагина юрагига чўғ теккандай «жаз» этиб кўнгли эриб кетди. У ҳам отасини қаттиқ қулоқламоқчи эди, лекин шу пайт, Қилич кўз ёшидан хижолат бўлгандай йўталиб, уни қўйиб юборди-да, деразанинг олдидаги табуреткага бориб ўтирди, Қўчқор эса, Машрабнинг каравотига суюнди.

Улар бир-бирларига тез-тез қарашар, лекин кўзлари учрашиши билан дарҳол олиб қочишарди.

Йўқ, Қўчқор янгишмади! Отаси у тасаввур этганидан ҳам келишган, мард, энг муҳими — чинакам қаҳрамон эди! Фақат қиров қўнган соchlари ва кўзларининг атрофидаги ажинлари отасини сал қарироқ ва аллақандай ғамгин қилиб кўрсатарди.

Қилич чиндан ҳам ғамгин эди. У ўғлини узоқдан кўргандаёқ яна дил-дилидан ҳис этди. Қўчқор, гарчи у кутганидан сал бошқачароқ, қандайдир чапанироқ кўринса ҳам, унинг ўзгинаси эди!

Қўчқор ялангтўш кучли қомати, қорайиб кетган шиддатли юзи ва кулимсираб турган кўк-сағириш кўзларидан тортиб, кенг одим ташлашларигача баайни Қиличининг ўзгинаси, тўғрироғи, бунинг ҳаммасида унга хуш ёқиб тушадиган алланима бор эди. Ҳатто қўришаётгандарига саросимага тушганини билдирумаслик учун қовоғини солиб туриши ҳам Қиличининг ўзиға ўхшарди.

Бунинг ҳаммаси қўшилди-ю, Қилич юраги илгари ҳеч қачон ҳис этмаган илиқ бир меҳрга тўлиб, кўзи беихтиёр намланди. Айни замонда миясида аламли бир фикр чақнаб вужудини қақшатиб юборди:

«Наҳот ёлғиз фарзандини кўришни шунча орзу қиласа-ю, бу орзуга зўрға етганида дийдорига тўймасдан яна ажрашса?»

Қилич ўрнидан туриб, уйни бир айланиб чиқди, ўғли билан гаплашишдан ҳам кўра унинг овозини эшитиш учун:

— Қизча нима бўлди? — деб сўради.

— Қизчани Тошкентга олиб бориб поездга солиб юбордим.

Қилич яна юраги «лов» этди: ўғлининг дўриллоқ овози ҳам унга ўз ёшлигини эслатди!

У юришдан тўхтаб, зимдан Қўчқорга кўз ташлади.

— Ҳозир сенга нима дейишимни ҳам билмай қолдим, ўғлим,— деди секин.— Ҳатларингда кўп яхши гаплар айтибсан. Раҳмат. Аммо... мен сенинг олдингда гуноҳкорман, болам. Ҳар нима бўлганда ҳам мен сени бу ифлос одамнинг қўлида қолдирмаслигим керак эди.

— Мени қўяверинг, дада! — Қўчқор кескин гапирганини пайқаб қолиб, бошини әгди.— Умуман,

энди бу гапларнинг кераги йўқ. Мен ҳаммасига тушуниб турибман. Сиз фақат бир нарсанни билиб юйинг, дада: ойимлар ҳам бахтиёр эмаслар. У киши ҳам юраклари ғам-ҳасратга тўла.

— Биламан, ўғлим, Илож қанча? Мен ҳам буни бу нокасни кўргандан кейин тушундим.

Қилич чуқур антикиб, ўйланиб қолди.

— Билмадим,— деди Қўчқор.— Мен кетяпман, Энди ойимнинг аҳволи нима бўлади, ҳайронман!

Ўртага узоқ жимлик чўяди.

— Майли, бир йўлини қидириб кўрармиз,— деди Қилич, ниҳоят,— Лекин сен...

У тўсатдан юраги қаттиқ санчиганини сезиб, қўлини кўксига қўйди, қўзини юмиб анча турди, сўнг, чуқур нафас олиб, ҳазин кулимсиради:

— Бу қандоқ бўлди, кўришмасдан туриб яна ажрашадиган бўлдигу, ўғлим?

Бу ғамгин табассум гўё музага тушган бир нурдай ўртадаги ётсирашни тамом тарқатиб юборди.

— Ажралиш лозим экан, ажраламиз-да, дада.— Қўчқор кулди.— Уруш!

— Ҳа, уруш!

Қилич қўлларини орқасига қилиб, меҳмонхонанинг у бошидан-бу бошига бориб келди.

Ажабо: на фронтга кетаётганида, на эскадрони билан душманнинг орқасига, Дон даштларига ўтиб, олов орасида юрган пайтларида қўрқув нималигини билмаган одам, у ҳозир бу қийинчиликлар ўғлининг бошига тушишини ўйлаганда юраги без-без қиласарди... Ё булар вапас полкка тушиб, бир-икки ой ҳарбий техникани ўргангунча уруш тугаб қолармикин? Йўқ, уруш тугашига ҳали анча бор... Лекин нима қилиш керак? У ҳозир ўғлига нима маслаҳат бериши мумкин? Зотан, ҳеч нарсанни писанд қилмай, кулимсираб ўтирган бу йигит маслаҳатга муҳтоҷми ўзи?

Қилич боя уни биринчи марта кўрган маҳалдаёқ кўпдан бери кўнглида тушиб юрган гапларни айтиб ўтиришнинг ҳожати йўқлигини тушунди: бу йигит на бирорга гина сақлар, на отанинг кечирим сўрашига муҳтоҷ әди!..

— Билмадим энди, сенга бирор ёрдамим тегадими, йўқми?

— Ердам,— деди Қўчқор.— Менга ҳеч қандай

ёрдам керак эмас, дада. Юртга келган улуғ тўй. Бонг-қалар нима бўлса мен ҳам шу-да!

У қўлини силтаб кулди.

— Мендан кўнглингиз тўқ бўлсин, дада, бош омон бўлса, бир гап бўлар. Сиз... ўзингиз...— Қўчқор отасининг дока ўралган бўйнига қаради.— Яна ўша илгариги ишингизга кетмоқчимисиз?

Қилич унинг гапни буриш учун шундай деганини сезди.

— Тўғрисини айтсам, ўша томонларга кетмоқчи эдиму, аммо қишлоқдаги баъзи гапларни эшитиб шу ерда қолишга қарор қилдим.

— Ростданми?

— Ҳа энди... баъзи йигитлар курашдан чарчагандан кейин нима қиласми? Курашни давом эттириш керакми ахир?

— О!— күшнуд деди Қўчқор.— Курашдан чарчаган ким? Бизми?

— Билмадим энди?

— О!— деди яна Қўчқор.

Унга отасининг ҳазили, айниқса бир қарашда жуда шиддатли ва аллақандай ўйчан кўринган бу одам билан дўстларча кулишиб, гаплашиш мумкинлиги жуда хуш ёқиб тушди.

— Майли! Танқидингиз ноҳақ бўлсаем қабул қилдик. Аммо сизга ҳам битта маслаҳат!

— Ҳўш?— деди Қилич ва ўғлига тикилди.

Фақат тенгқурлар ва кўнгли яқин кишилар орасидагина бўладиган бу ҳазил-мутойиба унга ҳам жуда ёқар, шу топда у ўғлидан дил-дилидан миннатдор эди.

— Маслаҳат шуки, ўзлариям эҳтиёт бўлсалар. Бу ерда фош қилган сайин зўраядиган... урса қўпарлар бор.

— Урса қўпарлар ким? Эртоев, Чавандозми?

— Шулар-да, албаттат!

Қилич кулимсираган кўаларини ўғлидан узмай:

— Халқимизда: «Осилсанг баланд дорга осил», деган гап бор,— деди.— Биз ҳам олишгандаи кейин ўшанақа урса қўпарлар билан олишамиз-да, ўғлим? Яна шуни ҳам айтиб қўяй: эрта-индин бу номардларнинг иши райкомда, лозим бўлса обкомда кўрилади! Мәқтаниб айтай — даданг энди уларни йиқитмагунча қўймайди, болам.

Қўчқор, азбаройи қойил қолганидан ўрнидан туриб кетди, у отасининг қўлини сиқмоқчи эди, шу пайт ашик тақиллаб, меҳмонхонага Гулсум опа кирди.

— Гапнинг белига тепмадимми?

— Йўқ, йўқ, келинг,—деди Қилич.

Қўчқор кўзлари ўйнаб хитоб қилди:

— Девона келдими? Согиниб қолдигу, опажон!

— Девона келди-ю, бироқ ойисидан ҳам азизроқ бир одами бор акан. Ушанга кетди.

— Шунақами?

— Майли. Йигит бўлти. Мендан ҳам азиз одам топилипти. Шунгаям шукур.— Гулсум опа кулимсираб ер остидан Қиличга қаради.

— Фотима келди. Сени кўрмоқчи, Қўчқор.

Бир лаҳза ғалати жимлик чўқди.

— Сиз чиқмайсизми, Қилич?— деди Гулсум опа.

— Мен...— Қилич пешанасини ишқалаб, йўталди.— Йўқ, мен ҳозир учрашмаганим маъқулдир?

— Майли, ўзингиз биласиз. Сен чиқарсан, Қўчқоржон.

— Ҳозир, ҳозир,— шошиб деди Қўчқор ва отасига қаради.

Қилич ҳамон пешанасини ишқалаб ер остидан ўғлига тикилиб турар, чеҳрасидаги бояти майин табасум сўйган, кўзларининг, лабларининг четида чуқур чизиқлар пайдо бўлган эди.

— Ҳа, сен чиқиб гаплаш, кўнглини ол, ўғлим.

Аммо мен ҳозир чиқмаганим маъқул, кечирасан, ўғлим. Кейин бир пайти келар...

У иккала қўлини Қўчқорнинг елкасига қўйди ва тўсатдан овови титраб:

— Сен... жуда яхши йигит бўлсан,— деди.— Афуски, биз кеч топишдик. Айб сенда эмас, менда албатта.

Қўчқор тирноқларигача жимиirlab:

— Бу гапнинг кераги йўқ, дада,— деди ва қилт этиб ютиниб, қўшимча қилди:

— Мен... сиздай бўлишни орзу қилардим, дада!

Ота-бола, гўё, узоқ айрилиқдан кейин кўришган икки дўст, икки тенгдошдай, қаттиқ қучоқлашдилар.

— Менга қара, Муяссар. Нега бундай қиласан?
Нега қарамайсан?

— Чунки... мен сиаздан қўрқаман.

— Қачондан бери мени «сиэ» лайдиган бўлдинг?

— Сиз эр етиб, маст бўлиш одатларини чиқарганингиаздан бери.

Машраб жавоб тополмай қизнинг озғин бўйни-
даги майин соч толаларига тикилганича жим
қолди.

Муяссар боя Mashrab кирганда қандай бўлса шун-
дай — кўкрагига ташлаган бир ўрим сочини ўйнаб,
деразадан ташқарига, зим-зиё бўшлиққа тикилиб ту-
рибди.

Эгнида қора атлас кўйлак билан хипча белини на-
фис қучган бархит нимча, бошида чеҳрасига ярашиб
тушадиган ҳарир қизил дурра, қиз илгаригидан ҳам
нозик кўринарди. Mashrab, агар истаса, шундоқ бели-
дан қучиб, ўзига қаратиб олиши мумкин. Лекин у
қучоқлашга журъат этолмади, вужудини чулғаб ол-
ган қандайдир илиқ бир титроққа бўйсуниб, қўлини
секин ушлади.

— Ахир... мен әрталаб кетяпман-ку, Муяс...

— Кетсангиа... мениям бирга олиб кетинг,— де-
ди қиз.

— Қаёқдаги гапларни айтасан-а!

— Нега қаёқдаги бўларкан. Ана опам, мана
сен...

— Мен бошқа гап!

— Бошқа гап! Сен кетиб мен... Мен... — қизнинг
овозидаги бутун ноз ва ўйноқилик тўсатдан юраги-
дан қайнаб чиққан аламли нидо билан алмашди.—
Сен кетиб, мен нима қиласман бу ерда!—аранг
дэя олди у ва юзини кафтлари билан босиб йиғлаб
юборди.

Машраб тўсатдан ўзини катта одам ҳис қилиб,
қизни ўзига қаратди, кичкина иссиқ қўлларидан
ушлаб бир зум ёш тўла мулойим кўзларига ти-
килди.

Машраб бу сўлим чеҳрани, доим пориллаб тура-
диган бу қўй кўзларининг ҳар бир кипригигача би-

ламан, деб ўйларди, йўқ, ҳаммаси бекор экан. Ловилм лаб ёнган бу узунчоқ озғин чехра у ўйлагандан ҳам мулоийим, четларида кулгичлари ўйнаган лаблар яна ҳам нафис эди! Ёш тўла кўзлар эса гўғ аллақандай чексиз меҳрга, алам на садоқат нурларига тўла тиниқ бир чашмага ўхшарди.

— Муяссар, севгилим, жонгинам! — деди Машраб. Қиз кўз ёши аралаш жилмайди. Жилмайганда юзи гўё ёмғир билан ювилган осмондай ярқираб кетди-ю, Машраб уни кўксига босиб, иссиқ лабларидан ўпди, ёш тўла кўзларидан чаккасидаги кулгичларидан ўпди.

Қиз бурунгидай чўчимади, ўзини олиб қочмади ҳам. У кўзларини юмиб, кулчадай қизиган юзини йигитнинг юзига босди. Фақат кўз ёшлари тўхтамас, киприклари орасидан оқиб чиққан илиқ томчилар худди тиниқ ойнада тирқираб оққан ёмғир томчила-ридай лабларининг чуқурчаларига тушар, иягидан бўйнига қуюларди...

...Хали висол оразуси, ҳижрон докларига тўла ойлар, Йиллар ўтади. Қизнинг лабларига қуйилган бу шаффоф томчилар аламли кўз ёшларига айланади. Машраб эса, елкасида гоҳ милтиқ, гоҳ зилдай пулемёт, оғир ва узоқ походларда вазмин одимлаб, совуқ окопларда ётиб висол оразусида ёнади, ҳеч бир изтироб бовар келолмайдиган ҳижрон аламидан тўлғана-ди... Лекин ҳозир кўксисда қизнинг патир-путир қилгани юрагини ҳис этаркан, унинг қўш олмадай қаттиқ ва нафис кўкраклари вужудини чўғдай куйдираркан, у, гўё юлдузлар оламида парвоз қиласди!

Сўнгти пайтларда хаёлидан чиқмаган оғир ўйлари, чеккан гуссалари — ҳаммаси бекор, ҳаммаси майдада ва арзимас бир нарса бўлиб қолган. Шу топда Машраб бу кенг жаҳонда энг кучли, энг довюрак, энг келишган ва энг баҳтиёр йигит эди. Ажабо: у шундай пок, гўзал, ақлли қизнинг қалбини ўзига шайдо қиласди-ю, яна нимага изтироб чекади, бундан аъло яна нимани оразу қиласди...

— Сен кетиб... Мен нима қиласман дейсанми, Муяс? Илгаридай қишлоқни тўлдириб, оловдай ёниб юрасан. Менинг йўқлигимни билдиrmайсан.

— Кошки сенинг ўрнингни босиш мумкин бўлса?

- Мумкин, Мус. Мен сенга ишонаман.
- Мен бўлсам... қўрқаман. Сен ўзингни оловгаям урасан, сувгаям.
- Бўлмасам... Едгорбекдай қочиб юрганим яхшими?
- Йўқ, ҳар нечук аҳтиёт бўл!
- Сен ҳам.
- Мени бўри ерниди?
- Уйингда сени егиси келган бўрилар йўқми?
- Бор бўлсаям қўрқмайман. Мактабдан кейин ўқишига кетаман. Опамлардай ТошМИга кираман. Майлими?
- Майли, фақат битта шартим бор.
- Айт.
- Мени унутмайсан...
- Нима қиласан буни айтиб?
- Эсингдами... «Мени кутгил ва мен қайтарман...»
- Ўқи! Яна ўқи!

..Мени кутгил ва мен қайтарман,
Улимларни ҳолдириб додга.
Иши ўнгдан кепти десинлар,
Кутмаганлар мени у чогда.

Қандай омон қолганлигимни
Елғиз сенга айтарман, сирдош,—
Кута олдинг мени сен фақат,
Буюк эди сендаги бардosh.

- Қандай яхши шеър экан. Кошки қизлар тилидан ҳам шундай бир шеър бўлса! Ҳозир сенга ўқиб берардим.
- Мен ёзиб юбораман истаган шеърингни!
- Машраб унинг кафтини сиқиб, яна қўзларига тикилди, гўё қизнинг чеҳрасидаги ҳар бир чизиги, ҳар бир кипригини умрбод эсида сақлаб қолгиси келгандай узоқ термилиб ҳаради...

Олдинда турган олис йўлнинг бутун мушаккатларидан, изтиробларидан оғир ҳаёт сафарида ҳали кўп

бўрон ва довуллар кутишидан ҳабарлари йўқ, улар фақат вафо ва садоқат ҳақида галлашиб, аҳд-паймон қилиб тонг оттиришди.

Икки қалбнинг иссиқ оғушлари, эҳтиросли бўслари билан чароғон туюлган узун қиш кечаси бир зумда ўтди-кетди...

* * *

Эрталаб йигитлар йўлга чиқишиди. Бутун қишлоқ аҳли уларнинг эсон-омон қайтишларини тилаб, кузатиб қолди.

*Тошкент — Туркистон.
1962—1965 йиллар.*



ИЗЛАЙМАН

К и с с а

Укам, Мансуржон!

Ғалаба куни Дағрон акангиизни ёслаб ёзган ҳатингизни олдим, бунинг учун раҳмат, уқажон!

Сиз у кишининг кундалик дафтари билан ҳатларини сўрабсиз.

Ҳатлари... ёшликда ҳамма севишганлар бир-бирларига қана-
қа ҳатлар ёзишса... бизлар ҳам шунақа ҳатлар ёзишганимиз,
уқажон. Шунинг учун үларни Сизга юборишни эп кўрмадим,
кундалик дафтарни эса юборяпман.

Сиздан илтимос: дафтарни менга қайтариб юборганингизда,
ҳар эҳтимолга қарши, заказной бандероль қилиб жўнатсангиз.

Ўзингиздан қолар еап йўқ: Дағрон акангииздан менга қолган
битта-ю битта ёслалик — шу кундалик, холос. Яшириб нима
қиласай. Мансуржон, еодо-гоҳо юрагим сиқилиб, бир нимадан
хафа бўлиб, тўлиб кетган чоғларимда, айниқса Ғалаба кунлари
кўнглимга қил сиргай ёлгиз қолган пайтларимда... шу эски даф-
тарни варақлаб овукаман, юрагим сал таскин топгандай бўлади.
Қолаверса, неварам Дағронжон, умри узоқ бўлсин, катта бўлга-
нида ўқиса дейман...

Сўнгги мақолаларингиз менга анча ёқди. Айниқса уруш
тақида, қуролдош дўстларингиз тўғрисидаги ёслаликларингизни
ўқиб, қувондим. Ишларингизга мубаффақият тилаб, опангиз

С А Л О М А Т .

1970 й и л, 25 а в г у с т .

Мен коленкор жилдли қалин дафтарни, унинг чумоли изидай майда ёзув билан тўлдирилган оқ-сарғиш саҳифаларини секин варақлайман.

Саҳифаларнинг баъзилари қалам билан, баъзилари сиёҳ билан ёзилган. Қаламда ёзилган саҳифалар анча ўчиб, хиралашиб қолган. Жуда ҳам хиралашиб кетган ёзувларининг устидан кимдир, афтидан Саломатхон опа бўлсалар керак, сиёҳ юргизган..

Таниш ёзув, таниш саҳифалар!..

Дилимни аллақандай ҳазин туйғулар чулғаб олди.
Дафтарни бир четга суриб қўйиб, ҳовлига чиқдим.

Шаҳар устига илиқ куза оқшоми қанот ёзган, бахмалдай тиниқ осмон гуж-гуж юлдузларга тўлган.

Кўнши ҳовлилардан майин бир куй эшитилар, дараҳт шохлари орасидан телевизор экрани ялтираб кўринарди. Тўсатдан олисда, афтидан шаҳар ўртасида бўлса керак, тўп овози гумбурлади-ю, осмон қаътирига отилиб чиқсан қизгиш ва тўқ яшил мушаклар ҳавода бир жом зар бўлиб сочилиб кетди. Кўчани болаларнинг хушнуд қий-чуви тутди..

Бу — япон босқинчилари устидан қозонилган галаба шарафига берилаётган салют эди.

Кўз олдимга гвардиячи капитан Даврон Фозиев келди. Унинг новча, келишган бўй-басти, айни пайтда, ҳам шиддатли, ҳам кулганида яшарип кетадиган хушсурат чеҳраси намоён бўлди. Эсимга Даврон ака билан бирга ўтган Гоби саҳроси, Катта Хинган тоғларида чеккан машаққатларимиз, Олянинг меҳрибонларлири, у билан гвардиячи капитан ўртасидаги ғалати муносабатлар тушди. Кейинчалик, Даврон аканинг кундалигини ўқиб, мен кўп нарсага тушундим, албатта. Лекин бошда, улар билан илик бор учрашганимда, мен ўз ихтиёри билан урушга кетган ўн саккиз яшар бир йигитча эдим. Ўн саккиз ёшда эса, кишига ҳамма нарса бошқача кўринади.

* * *

Мен гвардиячи капитан Даврон Фозиевни илк бор Мўгулистонга борган кунимизнинг эртасига кўрдим.

Биз, бир эшелон солдат, бепоён даштга тушиб, саёзгина дарё бўйида чодир тикиб ётардик. Тушдан кейин бизни қабул қилиб олгани соchlари қордай оппоқ кекса полковник бошлиқ ўттиз чоқли офицер келди. Улар орасида новчагина ёш капитан ҳам бор эди. Мен уни кўришим биланоқ «ўзбек эмасми», деган фикр кўнглимдан ўтди. У бир қарашда ўзбекка унча ўхшамас, оқ-сариқдан келган, қирра бурун, қўй кўз бир йигит эди. Лекин қош-киприкларининг қоп-қоралигидами, ё қўй кўзларининг сал қийғочлигидами, ишқилиб, чеҳрасида унинг ўзбек ё тожик эканига ишора қилувчи алланима бор эди.

Енимда турган Арслон ҳам капитанга ишора қилиб: «Ўзимизнинг златга ўхшайди-ку!» деб кулди. Мен

ҳам кулдим, чунки ўзбек жангчиларининг урушдаги қаҳрамонлари ҳақида кўп эшилсак ҳам, тўққиз ой армияда бўлиб, ўзбек офицерини биринчи кўришимиз эди...

Капитан худди Рокоссовскийга ўжшаб, кўкраги тўла орден ва медалларини жаранг-журунг қилиб ёнимиздан ўтаркан, Арслон иккимизга бир қараб қўйди. Бироқ индамади. Унинг чеҳрасида, юпқа лабларида аллақандай бир қатъият бор, ҳаракатлари кескин, шиддатли эди.

Қайтиб келаётисб, капитан яна менга қаради. Мен тиржайиб турган эканманми, билмадим, тўсатдан рўпарамда тўхтаб:

— Хўш, нимага куласан, солдат? — деб сўради.

— Кулаётганим йўқ, ўртоқ гвардиячи капитан...

Капитаннинг қўй кўзлари сал қисилиб, лабларига кулги югурди-ю, чеҳрасидаги қатъият йўқолиб, кўзимга жуда ёш кўриниб кетди.

— Қаерликсан? — деди капитан яна қовогини солиб.

— Чимкент обlastidanman, ўртоқ гвардиячи капитан.

— Чимкент? — деди капитан. — Шаҳарнинг ўзиданмисан?

— Йўқ. Қорасув деган қишлоқ бор. Ушатданман, ўртоқ капитан.

— Қорасув? — деб тақрорлади у. — Қорасув... фамилиянг нима?

— Муродов, Мансур Муродов, ўртоқ капитан.

— Ҳм... — деди капитан. — Рус тилини яхши биларкансан-ку!. Қаерда ўргангансан?

— Илгари шаҳарда турардик, ўртоқ капитан. Олтинчи синғача рус мактабида ўқиганман.

Капитан яна бир марта менга бошдан-оёқ разм солди-да, тўсатдан:

— Хатинг чиройлими? — деб сўради.

— Билмадим...

— Қани, исм-фамилиянгни ёз-чи! — У шундай деб планшетидан қалин блокнот билан ручка олиб қўлимга тутди. Мен исм-фамилиямни ёздим.

— Яхши, — деди капитан ва «Харитонов!» деб чаҳирди.

Офицерлар орасидан юзида кулгичлари ўйнаб турган ёшгина старший лейтенант чиқиб честь берди. Унинг ҳам кўкраги орден-медалларга тўла эди, честь берганида жаранг-журунг бўлиб кетди.

— Эшитаман, ўртоқ капитан!

— Бу солдатни вақтинча Дмитрий Михайлович нинг ихтиёрига ўтказасан,— капитан ёнидаги шоп мўйловли старшинага ишора қилди, сўнг яна менга юзланди.— Гап шу. Батальон штабида мирзалик қиласан... Қаршилик йўқми?—Тўсатдан ўзбекчалаб сўради у.

Мендан олдин Арслон жавоб берди:

— Нега қаршилик қиласар экан? Биз буни шоир деймиз ўртоқ капитан. Ўзиям кечак-ю кундуз ёзгани ёзган, чизгани чизган!

Капитан мийифида кулиб, Арслонга қаради.

— Сенинг исминг нима?

— Арслоншер! Қалай, ўхшайманми, ўртоқ капитан?— деди Арслон кўкрагини кериб.

— Сен ҳам Қорасувданмисан?

— Худди ўзгинасидан-да, ўртоқ капитан! Қорасувнинг ширин-ширин булоқларидан сув ичиб, арслондай йигит бўлганимиз, ўртоқ капитан!

— Сен ҳам шоирмисан дейман?

— Шоирликка йўл бўлсин, ўртоқ капитан! Қишлоқда кетмончи эдик, армияга келиб, автоматчи бўлдик. Биз фақирга шу ҳам бўлаверади, ўртоқ капитан!

— Молодец!— капитан курсанд бўлиб Арслоннинг елкасига қоқиб қўйди.— Яхши солдат шунаقا бўлиши керак... Хўп, Мансурбек, кечқурун батальон штабига боравер!— Капитан шундай деди-да, ёнидаги офицерлар билан бирга қирдаги чодирларга қараб кетди.

Мўгулистонга келган бир эшелон солдат орасида биз ўзбеклардан беш йигит эдик. Тақсимот пайтида ҳаммамиз ҳар томонга тарқаб кетдик.

Арслон иккимиз биринчи батальонга, ҳамқишлоғим Шоюсуф билан Серкибой деган қозоқ йигит учинчи батальонга тушишди. Лекин энг қизиги, орамизда Мирҳайдар деган кечак-ю кундуз фақат овқатни ўйладиган, қорнининг қули бўлиб қолган баланд бўйли галварсроқ бир йигит бор эди, келиб-келиб уни ПФСга, яъни озиқ-овқат омборига олишибди! Буни эшитиб, кулавериб ичагимиз узилай деди.

— Бундан чиқди, омборга каламушни мудир қилишибди да,— деди Арслон.— Қайси аҳмоқнинг хаёлига келди бу фикр?

— Нега аҳмоқ бўларкан?— пўнгиллади Мирҳайдар, уаун гўштдор бурнини жийириб.— Армиядан олдин нима иш қилгансан, деб сўраши. Рабкоопда ишлаганимни айтувдим, ПФСга олсак борасанми, де-йиши. Нима, йўқ, дейманми? Жоним билан бораман, дедим...

— Сен-ку, жон-жон дейсан. Лекин омборда сен ўтиранг, бизнинг ҳолимиз нима кечади?

Мирҳайдар сўйлоқ тишини кўрсатиб ишшайди.

— Қўрқма, менинг чўмичим мой бўлса, сенинг ҳам қошиғинг қуруқ бўлмайди, оғайни!

Биз худди қайта кўришмайдигандай қучоқлашиб хайрлашдик.

Мен взводда пулемётчи эдим. Ердамчи Вася Колбаскин деган, қош-киприклари оппоқ, кичкинагина бўлса ҳам пишиқнина солдат эди. Кечқурун қўл пулемётимни Васяга топшириб, майда-чуйдаларимни буюм тўрвамга жойлаб, штабга кетдим.

Батальон штаби ҳам оддий чодирга жойлашган, фақат бу чодир дарё бўйидан сал баландроққа, қир ён бағрига тикилган эди.

Арслон мени штабгача кузатиб қўйди. У ҳамон капитаннинг Қорасувни суриштирганидан ҳайрон бўлиб:

— Бизнинг қишлоқни қаёқдан билади, а?— деди пилоткаси билан бошини ишқаб.— Қўшни қишлоқданмикан, ҳамқишлоқ чиқиб қолса-я ҳали?

— Ҳамқишлоқ бўлса нима бўпти?

— Нима бўлишини кўриб турибсан-ку!— деди Арслон.— Ҳалитдан штабга мирза қилиб қўйди. Шу кетища ефрейтор бўп кетишинг ҳам ҳеч гап эмас. У ёги генерал бўлишингга сал қолади!

Мен ҳам ундан қолишгим келмай:

— Генерал бўлсам, сени ўзимга югурдак қилиб олардим!— дедим.

— Мен югурдак бўлсам ҳам сендача генералга этигимни тозалатардим!— деди Арслон кулиб.— Мен билан ҳазиллашсанг майли-ю, бироқ капитан билан ҳазиллаша кўрма. Аммо-лекин ўзи ҳам йигитмисан йигит экан-да! Капитанни айтаман. Лочинга ўхшай-

ди-я, азамат! Худо берамай деган бандасига қўш қўл-
лаб бераверар өкан-да. Кўкрагидаги орденларини кўр-
дингми?

— Нима қипти?

— Нима қипти, дейди-я! Кўкрагида Александр
Невский ордени ҳам бор-а! Буни ҳаммага ҳам
беришавермайди, каллаварам!.. Ана, келдик мако-
нингга!

Биз тепасига қизил бўёқ билан «штаб» деб ёзиб
қўйилган катта чодирдан берироқда тўхтадик. Арслон
қўлимни қаттиқ қисаркан, яна тиржайди:

— Катта бўлдим, деб, биздақа фақир-фуқароларни
всингдан чиқариб қўйма. Бориб тур ротага!

— Сен ҳам келиб тур, оғайни. Мен начальник
бўлсан ҳам камтарин начальникман.

Биз кулишиб хайрлашдик. Арслон орқага қайтди.
Мен шабада тегсин деб, четлари кўтариб қўйилган
чодирга кирдим. Кирдиму, бир зум лол бўлиб қолдим.
Чодирниң ўртасида, олдида кичкинагина кўзгу, кўк-
сини тўлдирган узун тилла ранг сочини ўриб, ўн тўқ-
қиз-йигирма ўшлардаги бир қиз ўтиради. Елкасида-
ги погонига қараганда, қиз кичик лейтенант эди.
Қиз мовий кўзларини кўзгудан узиб, менга қаради.

Унинг худди тагида митти тошлиригача кўриниб
турадиган тоғ чашмасидай тиниқ кўаларидан ажаб
бир мовий нур қўйилиб турар, бу нур гўё чодирни
ёритиб юборган эди.

— Келинг, солдат! — қиз олдин бир ўрим йўғон
сочини елкасига ташлаб, менга мулойим тикилди. Ке-
йин... оппоқ сонларига кўзим тушганини кўриб, юб-
касини тўғрилади-да, ўридан сапчиб турди.

— Командирни кўрганида солдат нима қилиши
керак?

Қизнинг овози қатъий бўлса ҳам важоҳати, ай-
ниқса кўкракларининг учига тўғри келган медаллари
ғалати туюлиб, кулгим қистади. Ўзимни зўрга босиб:

— Кечирасиз, ўртоқ кичик лейтенант,— деб честь
бердим.— Оддий солдат Муродов. Гвардиячи капитан-
нинг буйруғи билан штабга келдим!

— Ҳа, капитан айтган солдат сенмисан? Капитан
ўз ҳамшаҳарларидан топибида-да мирзани! — деди
қиз. Бу гап менга қаттиқ текканини сеади шекилли,
тиниқ кўм-кўк кўзларини сал сузиб, қўлинни чўади:

— Танишиб қўяйлик. Кичик лейтенант Оля Куприянова.

— Бўпти, ўртоқ кичик лейтенант! — Мен унинг кичкина узунчоқ кафтини қаттиқ қисдим.— Мансур Муродов.

Қиз тўсатдан қошларини чимириб:

— Нега тиржаясан? — деди.— Қани, смиро! Мен яна иложсиз гоз турдим.

— Агар бунақа тиржайдиган бўлсанг, олдимда доим гоз турасан. Сен тугул офицерлар ҳам тиржайдиган эмас менга. Тушундингми?

— Тушундим, ўртоқ кичик лейтенант!

— Фронтда бўлганмисан?

— Йўқ, ўртоқ кичик лейтенант!

— Ҳали порохнинг ҳидя қанақалигини билмайсану, қизларга кўз қисасан! Ёшлик қиласан, йигит! Тушундингми?

— Тушундим, ўртоқ кичик лейтенант!

— Бўпти. Бирга ишлаймиз. Ана у сандиқ сеники. Унда штабнинг лаш-лушлари турди. Сандиқнинг уёғида сея ётасан, бу ёғида мен. Хўп, мен кетдим. Капитан сўраса, биринчи ротага кетди, де. Тушундингми?

Қиз сочини бошининг орқасига турмаклаб, пилоткасини пешансига чиройли қилиб қўндириди-да, чодирдан чиқа бошлади. Лекин худди шу пайт чодирнинг олдида... фуражкасини чапаниларча қўндириб олган, бўй-басти келишган, хипчагина, хушқомат бир капитан пайдо бўлди.

Капитан Оляни кўриб, бир қадам орқага чекинди, кўзгудай ялтираб турган хром этикларини шақ-шақ уриб, гоз турди.

— Салом, ўртоқ кичик лейтенант!..

— Салом,— Оля тўхтади.

Капитаннинг қоп-қора кўзларида ҳайрат порлади, лабларининг четида, ўзига ярашиб турган ингичка мўйловининг тагида мулоим табассум жилва қилди.

— Танишиб қўяйлик, ўртоқ кичик лейтенант,— деди у қўлини чўзиб — Артём.

— Оля...

Капитан қизга бошдан-оёқ разм солиб, оппоқ тўпларини кўрсатиб, яна кулди:

— Полкимизда шундай жозибали қиз бор экану, кўрмабман-а!

— Буни қаранг,— Оля ҳам кулди.— Мен ҳам сизни кўрмабман-а!

— Полкка келганимга уч-тўрт кун бўлди,— деди капитан.— Тўппа-тўғри Кавказдан келдим,— қўшимча қилди у, «Кавказ» сўзини қандайдир бошқача, сирли оҳангда талаффуз этиб.— Бу жазирамага ҳеч ўрганол-маяпман. Сиз ҳам қийналаётгандирсиз, Олењка?

— Йўқ, кўннишиб қолдим...

— Қўйинг шу гапларни!— деди капитан кўзини сушиб.— Бизнинг Кавказ тоғларида яйраб юрадиган қиз...

Оля елкасини учирди.

— Худди ҳозир Кавказга олиб кета оладиган одамдай гапирасиз-а?!

— Ноумид шайтон, Олењка. Жон-жон деб олиб кетаман. Фақат сиз розилик берсангиз, бас...

— Бўпти. Олиб кетадиган куни келинг!— Оля шундай деб ҳазиллашди-да, ўзига ярашган брезент этик-чаларини дукиллатиб, сойга қараб чопқиллаб тушиб кетди.

Капитан унинг кетидан бир зум тикилиб қолди, кейин томоқ қириб, менга юзланди.

— Тузук нарса экан, а, солдат?— деди у ва чап кўзини қисди.— Комбат ҳам баломи дейман, а?

— Нима?— дедим унинг гапига тушунмаган бўлиб.

— Лапашанг!— капитан қовоғини солди.— Комбат қаёқда?

— Билмасам...

— Келса айт — полкка телефон қилсин. Капитан Ногаевга де! Уқдингми?— У Оля кетган томонга яна бир кўз ташлади-ю, чодирнинг орқасига ўтиб кетди.

Ногаев менга ёқмади... Лекин... нега Оля бу шилқим билан кулиб гаплашди? Нега уни дарҳол силтаб ташламади!.. Бу фикр негадир (балки қиз менга ёқиб қолгани учун бўлса керак) кўнглимни ғаш қилди.

Таъбим тирриқ бўлиб, похол устидаги тўшакка қўзилдим.

«Сандиқнинг у ёғида сен ётасан, бу ёғида мен...» Сандиқ жонвор ҳам пастаккина эди. Беихтиёр кулиб қўйдим.

Четлари кўтарилигган чодирнинг ичи салқин, куидуэги ҳарорат пасайиб, ғир-ғир шабада эса бошлаган эди.

Бу ердан, қир ён бағридан, бутун атроф кафтдай кўринар эди. Тўрт томон, олисдаги яласқи қирларга-ча кенг дашт, даштда сон-саноқсиз чодирлар, узоқда, чодир тикилмаган жойларда машиналар, от-аравалар, брезент ёпилган тўп ва танклар қаторлашиб турибди. У ер-бу ерда дала ошхоналарининг мўриларидан тутун бурқсийди, солдат қўшиқлари эшитилади.

Бу жазирама чўлда Забайкалье фронтининг янги кўшилмалари, янги полк ва батальонлари ташкил қилинмоқда. Ташкил қилинаётган янги қисмлар орасида Берлин остонасидан кўкраклари орден-медалларга тўлиб қайтган кекса солдатлар ҳам, кечагина запасдаги полкдан чиқкан бизлардақа жўжахўзлар ҳам бор эди. Яна бир неча кундан кейин бу қисмлар Манжурия чегарасига қараб йўл олади...

— Ҳа, келдингми, Мансуржон?

Мен ўрнимдан сапчиб турдим.

— Ўртоқ гвардиячи капитан! Буйруғингизга биноан...

— Вольно!— деди капитан ва чиройли планшетини темир сандиқчага ташлаб, ечина бошлади.

— Бундай, Мансурбек. Штаб бошлиғимиз касал бўлиб медсанбатга тушиб қолди. У киши қайтгунча қоғозбозлик ишларини ўзинг тўғрилаб турасан...— Капитан кулимсираб қўйди, планшетидан бир варақ когоғ олиб, столга ташлади.— Буни «форма бир» дейдилар, эртага шуни тўлдириб, полк штабига элтиб берасан. Тушунмаган жойинг бўлса, Оля билан старшина Салодан сўраб, билиб оласан... Нега куласан?— тўсатдан сўради у. Бу унинг иккинчи марта шундай дейиши эди. Мен қизариб:

— Кечирасиз, ўртоқ капитан,— дедим.— Сиз Сало деганингизга... Ваводимизда Вася Колбаскин деган бир солдат бор...

— Э, шунақами?— кулди капитан.— Бунақа ғалати фамилиялар кўп. Лекин ажойиб одам. Старшина Салони айтаман. Олтин одам. Хўш, нима деягандим? Ҳа, ўша одам билан ишлашаверасан. Менинг қоғозбозликка тоқатим йўқ, ука... Мана, Дмитрий Михай-

лович ўзлари ҳам келдилар. Хизрни йўқласак ҳам бўларкан...

Дмитрий Михайлович, бояги шоп мўйлов, миқти старшина, икки қўлида икки котелок шавла, қўлтиғида бир буханка нон, чодирга оҳиста кириб келди.

Мен уни кўриб, ўрнимдан сакраб турган эдим, старшина юзини бужмайтириб:

— Ўтиравер, ўглим, ўтиравер,—деди.—Бундан кейин мени кўрганда ўрнингдан турмасанг ҳам бўлаверади.—У котелокларни кўчма столга дўқиллатиб қўйди.—Бугун яна сули шавла. Жонга тегиб кетди.

— Иштаҳалар карнай, сули бўлса ҳам ураверамиз,—деб ҳазиллашди капитан.—Қани, ўтириңг, Дмитрий Михайлович.

— Раҳмат. Мёни интендант чақирган эди, бориб келай. Бемалол олаверинглар...

Старшина сандиқдан қандайдир қоғозларни олиб, шошиб чиқиб кетди. Капитан гимнастеркасини чодирнинг қозигига илиб, қалин қўнғир соchlарини силайсилай ёнимга келиб ўтирди.

— Қани, қошиғингни ол, иккимиага ҳам етади бу овқат!

Қошиғимни олиб, капитаннинг рўпарасига ийманибгина ўтирдим.

Запасдаги полкда командирлар олдида ғоз туришга одатланиб қолганим учунми, капитаннинг бу таклифи ҳам, старшинани «Дмитрий Михайлович» деб чақиришлари ҳам жуда ғалати туюлди. Афтидан, жангларда тобланган бу одамлар ўртасида биздай жўжакўроларнинг ақли етмайдиган бошқача муносабатлар ҳукмрои эди.

Капитан нонни иштаҳа билан чайнаб, шавла ейишга киришаркан, тўсатдан:

— Бу дейман... Қорасув яхши қишлоқми, Мансурбек?— деб сўраб қолди.

Беихтиёр илжайдим.

— Нимасини айтасиз, ўртоқ капитан! Ҳамма ёқ булоқ, боф-роғ...

— Шунақами?— деди капитан қошларини чимириб.—Мабодо сен... Сайдикром тегирмончи деган одамни танимайсанми?,

Мен ҳайрон бўлиб:

— Нега танимас эканман? — дедим. — Жуда яхши танийман. Мен доим ўша кишининг тегирмонида буғдой торттиардим...

Капитан ер остидан менга бир қараб олди.

— Бўлмаса, у кишининг қизи... Саломатхонни ҳам танисанг керак?

Юрагим бир ҳаприқиб тушди.

— Танийман. Лекин сиз... сиз уни қаёқдан танийсиз, ўртоқ капитан?

Капитан қошигини шавлага қадаб, ўрнидан турди.

— Мен уни таниганим... — деб қизаринқираб кулди. — Техникимда бирга ўқиганмиз...

— Ростданми? Бўлмаса, балки биларсиз, — дедим ҳаяжондан зиникиб. — Саломатхон...

— Чол қалай? — деди капитан сўзимни бўлиб. — Кишлоқдан чиққанларингда тузукмиди?

— Ҳа, ёмон эмас, фақат... катта ўғлидан қорахат келиб, бир оз чўкиб қолувди...

— Ҳмм... — Капитан бошини бир томонга сал эгиб, ўйланиб қолди. — Уруш тугасин-чи, бир борар эканмизда Қорасув томонларга!

Мен: «Албатта борасиз!» демоқчи эдим, шу пайт тұсатдан телефон жиринглаб қолди.

Капитан трубкани олиб, қулогига тутди-да: «Хўп бўлади, ўртоқ полковник!» — деди. Сўнг, трубкани шақ этиб жойига қўйиб, шоша-пиша кийина бошлади.

— Мен штабга бориб келаман. Балки кечроқ қайтарман. Сен бугун дамингни олавер... Буни қара, салкам ҳамқишлоқ чиқиб қолдик-ку! Ҳали кўи гаплашамиз! — капитан кўзини қисиб кулимсирадида, фуражкасини пешанасига қўндириб, чодирдан чиқди.

Мен шундагина Ногаев эсимга тушиб, орқасидан қичқирдим:

— Ўртоқ капитан! Ногаев деган капитанга телефон қиласар экансиз.

— Ким? — деди Даврон ака тўхтаб.

— Ногаев. Капитан Ногаев.

Даврон ака бир нима деб қўлинни силтади-да, жадаллаб кетди. Мен унинг орқасидан тикилганимча ўйланиб қолдим,

Минг тўқиз юз қирқинчи йилнинг илиқ ёз оқшоми. Мен мактаб ҳовлисида турган бричка аравада, қалин тўшалган қуруқ пичан устида чалқанча ётибман.

Ўша куни товонимга игна кириб, синиги ичидаголган эди. Мени шаҳар касалхонасига жўнатишяпти. Мен билан бирга ўша аравада етти йиллик мактабни битиргани бир гуруҳ қиз-йигитлар ҳам кетишияпти. Мен шаҳарда қоламан. Улар эса поездда Тошкентга, ўқишига жўнашади. Шаҳарга кетаётган иккита араванинг атрофига бутун қишлоқ аҳли йигилган ҳисоб. Йигитлар хушнуд, шарақлаб кулишади, қизлар эса шодликларини яширишиб, кўз ёши қилаётган хотин-халажнинг пинжига суқилишади...

Тўсатдан: «Ана, келишияпти!.. Қаёкларда қолдингиз, Саломатхон?» — деган овозлар эшитилди.

Мен бошимни кўтариб қарайман: Саломатхон, эгнида атлас кўйлак, бошида зардўзи дўппи, қўлида бир тутам райҳон, ўзини қизларнинг қучогига отди.

Мен бир йилдан бери унга салгина ошиқман. Ушандан бир ҳафта олдин, унинг мактабни битирувчилар кечасида айтган қўшиқларини эшитганимдан бери эса ҳадеб кўргим келади. Шунинг учун Саломатхон келди дегуича, назаримда, осмонга ой чиқиб, ҳамма ёқ ёришиб кетгандай туюлди...

Саломатхоннинг дадаси соқол-мўйловидан тегирмон гарди аримайдиган (у киши қишлоқда тегирмончилик қиласади) қора қош, қора кўз, хушсурат мўйсафид қизининг пешанасидан ўпид хайрлашди.

Саломат ҳам бошқа қизлар қатори мен ётган аравага чиқаётганини кўриб, юрагим тотли ҳисларга тўлди.

Шу пайт тоғам — мактаб директори:

— Саломатхон,— деб уни тўхтатди.— Мен эрталаб отда етиб бораман. Ўзим ҳаммаларингни поездга тушириб юбораман. Вокзал ёнидаги боғда кутинглар... Ҳа, айтмоқчи, аравада жияним ётиби. Енингиздан жилдирманг...

— Хўп, домла,— Саломатхон аравага чиқиб, бош томонимга ўтди, атлас кўйлагини тўғрилаб, дурустроқ жойлашиб ўтираркан, энгашиб:

— Оёғига игна кирган йигитча сизмисиз? — деб сўради.

— Ҳа...

— Оғрияптими?

— Йўқ, — дедим мен. Чунки чиндан ҳам оғриқ сизмасдим, агар ойимлар, оёққа кирган игна қон билан мияга чиқармиш», деб ваҳима кўтармаганларида балки докторга ҳам бормас эдим. Саломатхон менинг «йўқ» деганимга ишонмай, бошини чайқади.

— О, ҷидамли экансиз. Мен шунақа бўлсам... Билмадим, ҳозир додлаб ётармидим!.. — У қўли билан пешанамни силаб, мулојим жилмайди.

Унинг чиройли бурун катаклари, кулиб турган қопқора кўзлари, бошимни силаган қўллари шундай мулојим, нафис, шундай гўзал кўринардики, бир зум сеҳрлангандай тикилиб қоламану, кейин уялиб юзими чётга бураман...

Саломатхон яна кулимсиради.

— Олма ейсанми? — деди у тўсатдан «сансираб» ва менинг жавобимни кутмасданоқ хуржунидан катта бир олма олиб қўлимга тутқазди. — Бу — фақат бизнинг қишлоғимиэда, Қорасувдагина ўсадиган, ҳар бири пиёладек келадиган дастор олма.

Саломатхон ўзи ҳам битта олмани карс-карс тишлаб, дугоналарининг ёнига ўтди.

Шу заҳотиёқ қизларнинг сирли шивир-шивири, пиқир-пиқир кулгиси бошланди. Мен олмани кафтларим орасига олиб ҳидладим. Димоғимга олма варайхоннинг бир-бирига аралашиб кетган хушбўй ҳиди «гуп» этиб урди. Қаранг, олмага бирпасда Саломатхоннинг қўлидаги райҳон ҳиди урибди... Кўнглим яйраб, кўзимни юмдим, назаримда, аравада эмас, кемада, катта ва сокин дарёда сузиб кетаётгандай бўлдим...

Кўзим илинган эканми, билмадим, тўсатдан олдинги аравадаги йигитларнинг қўшиғини эшитиб, уйғониб кетдим. Бир эмас, бир неча йигит овозлари унча қонушмаса ҳам аллақандай ички бир дард билан тўлғаниб, ашула айтишарди:

«Агар тош бўлса ҳам кўнглинг зриб, лозим эди раҳминг,
Кўзига душманим, ер бирла яксон айладинг жетдинг...»

Билмадим нега, лекин менга шундай түюлдики, гўё йигитлар ашулани ёлғиз Саломатхон учун айтишар, гўё унинг кетаётганидан, шундай қиздан айрилиб қолаётганларидан иола қилишарди...

Бу фикримни тасдиқлагандай, ашула тугаши билан қоронгиликдан:

— Саломатхон! — деган дўрилдоқ овоз эшитилди.

— Битта ашула айтиб беринг энди! Бундан кейин овозингизни эшитиш насиб бўладими, йўқми?

— Вой, нега ундаи дейсиз? — деди Саломатхон ўпкалаб.

— Энди... ким билади, катта шаҳар, бунақа кенг далалар, бунақа сайиллар қаёқда дейсиз? Айта қолинг энди!

Аравадаги қизлар ҳам:

— Айта қолинг, Саломатхон!

— Йигитларнинг сўзини ерда қолдирманг!

— Бунча ноз қиласиз? — деб чуғурлаб кетишиди.

Кўнглимда, Саломатхон ўша бити्रувчилар кечасида айтган қўшигини айтса, деб илтижо қиласман, ўша оқшом мактаб боғида ҳаммани ҳайратта солган чашмадай тиниқ, янгроқ овозини яна бир эшитсан дейман, лекин Саломатхон тўсатдан:

— Келинглар, қизлар, «ёр-ёр» айтамиз! — деди. Қизлар жавоб бергунча бўлмай, ўзи секин бошлади:

•Йўлим олис, отим ориқ,
Етолмайман, ёр-ёр, етолмайман,
Дарё тошқин, сувлар шошқин,
Ўтолмайман, ёр-ёр, ўтолмайман...•

Қизлар ҳам кўп ноз қилишмасдан, Саломатхоннинг қўшигини илиб кетицди.

•Йўлим олис, отим ориқ,
Етолмайман, ёр-ёр, етолмайман...•

Қизларнинг ҳам ўйноқи, ҳам хиёл куйга йўғрилган қўшигидан кўнглим сув ичгандай бўлиб, бошимни кўтараман. Назаримда, қоронгиликка чўмган кенг дашт, тўйган қўзичоқлардай мудраб ётган қирлар, олис-олисларда чироқлари милтираб кўринган қозоқ ўтовлари, осмонни тўлдирган митти юлдузлар — ҳам-

ма-ҳаммаси қизларнинг жозибали қўшиғига маҳлиё бўлиб сукут сақлар, зриб, тўлғаниб ёшитар, мусоғир юртта кетаётган бу илк қалдирғочларга баҳт тиларди...

Юрагимга қўйилиб келган ажиб бир туйғулардан теримга сифмай чалқанча тушиб ётаман, ётаману, яна боягидаи дарё, йўқ, сокин бир дентизда қайиқда сувиб кетаётгандай бўламан, назаримда, узоқда милт-милт этган қозоқ ўтовлари ҳам, ўтов замас, балки чироқлари ўчиб-ёниб бораётган денгиз кемалари-ю, бу кемалардан ажиб бир ўлан, ҳазин бир куй оқиб келаётгандай туюлади...

«Йўлим олис, отим ориқ
Етолмайман, ёр-ёр, етолмайман.
Дарё тошқин, сувлар шошқин,
Ўтолмайман, ёр-ёр, ўтолмайман...»

Ширақайф одамдай, дилимдаги ҳислардан маст бўлиб кўзимни юмаман, сўнг қандайдир нозик бармоқлар бошимни, юзимни силаганини сезиб, уйғониб кетаман.

Ашула тинган, Саломатхон ёнимга ўтириб, кўрпасини ёзмоқда эди.

— Совқотмадингми? — деди у, қоронғида қимирлаганимни сезиб.

— Йўқ...

— Кечаси шудринг тушади, — Саломатхон кўрпамнинг устидан наматга ўхшаган бир нарсани ёпдида, ўз кўрпасига ўранди. Сал ўтмай, қизлардан бирининг:

— Саломатхон, ҳо Саломатхон. Уйгоқмисан? — деб шивиrlагани ёшитилди. — Қўрқмайсанми? Шаҳардан қўрқмайсанми?

— Сен-чи? — деди Саломатхон.

— Менга бало урармиди?

— Менга-чи? — кулди Саломатхон.

— Сен сулувсан. Сулув қизларнинг кетига тушадиганлар кўп бўлади.

— Қаёқдаги гапларни топмай ўл! — деди Саломатхон кулиб.

...Эрталаб мени тогам уйғотади. Арава касалхонанинг олдида туар, лекин на Саломатхон кўринар эди, на қизлар.

Кўзим жавдираб атрофга қарадим, назаримда, кечаси кўрган-кечиргандаримнинг ҳаммаси: йигитларнинг дардли қўшиғи, қизларнинг ҳазин ёр-ёrlари, Саломатхоннинг пешсанамни силагани: олисдаги қозоқ ўтовлари, осмон тўла юлдуз, сокин денгизда қайиқда сузид кетаётгандай бўлганларим — бунинг ҳаммаси ҳақиқат әмас, шунчаки ширин бир рӯё, гўзал бир туш әди!..

Мен анчагача бу тушни қўмсаб, ўша ажойиб оқшомни, Саломатхоннинг дилрабо овозини соғиниб юрдим. Шунинг учунми, билмадим, қишлоқда «Саломатхон бирор билан қочибди», деган мишмиш тарқалганида, бир неча кунгача ўзимни қаёқса уришини билмай, тўлганиб юрдим...

Саломатхон ҳақидаги мишмишлар бир-биридан хунук, бир-биридан даҳшатли эди!

«Саломатхон безориларга қўшилиб, ёмон йўлларга кириб кетибди!»

«Саломатхонни олиб қочган йигит уни уйидан қуввиб юборибди!»

«Саломатхон мусофири ютида хор бўлиб юрганиш!..»

Эсимда бор, бир куни гузардан ўтаётганимда чойхонадан кимнингдир осмонни бошига кўтариб, бўралаб сўкинаётган бўғиқ овозини эшишиб, чопиб кирдим.

Чинор тагидаги сўрида чарлston шим ва оқ шойи кўйлак кийган бир гурӯҳ йигитлар ўтирас, булар уруш бошлангандан кейин ўқишини ташлаб, қишлоққа қайтган студентлар эди. Уларнинг қаршисида Саломатхоннинг отаси — соқол - мўйловига тегирмон гарди илашган кекса тегирмончи турар ва қўлларини пахса қилиб бақирав эди:

— Ким айтди сенларни белида белбоғи бор йигитлар деб? Мард бўлсаларинг қизимни бир бегонага олдириб қўярмидиларинг. Олдириб қўйиб, кетидан бемаза гапларни тарқатиб юрагидиларинг?.. Тўғри қилган қизим! Ўзи уdda қилолмай, кетидан хотинлардай фисқи фасод қилиб юрадиган сендақа ҳезлардан ўша бегона яхши! Балли! Қандини урсин ўша йигит!..

Йигитлар чурқ әтмай, бошларини эгиб ўтиришар, чунки тегирмончи сўкиниб гапирса ҳам кўзларидаи оққан ёш тегирмон гарди қўнган юзида тарам-тарам из қолдириб, соқолига сизарди...

Мен ўпкам тўлиб, секин орқамга қайтдим.

Ўшандан кейин бир неча йил ўтди. Болаликда уйғонган галати туйғу, ширин туш ҳам аста-секин эсимдан чиқиб кетди, чунки бу ўртада Саломатхон ҳақида бир оғиз гап эшитмадим. Фақат ўқтин-ўқтин буғдой торттиргани тегирмонга бориб, кекса тегирмончини кўрганимдагина ўша серюлдуз сокин оқшом эсимга тушиб, кўнглим бир хил бўлиб кетарди. Соч-соқоли, қош-кўзлари тегирмон гардида оппоқ оқарган тегирмончи, олдида чилим, тегирмоннинг ярим қоронги заҳ хонасида доим бошини ҳам қилиб, ҳаёлга толиб ўтипар, келган-кетгандарга унча рўйхуш бермас, «опкет, ташлаб кет»дан бошқа гап айтмас эди. Хотинлар: «Бечора чол! Суюкли қизидан айрилиб савдои бўлиб қолди!» — деб пичирлашар эди.

... Қирқ тўртингчи йил, сентябрь ойининг ўрталари. Үқишни йигишириб колхозда аравакашлик қилиб юрган пайтларимиз. Бир куни заводга пахта олиб кетган Арслон кечқурун ҳовлиқиб келиб қолди.

— Биласанми, мен шаҳардан кимни олиб келдим.

— Хўш кимни?

— Тегирмончининг қизини. Ўша урушдан олдин фаргоналик йигит билан қочиб кетган қизи бор-ку, ўшани... Аммо-лекин, ўзиям йигитлар қуйганича бор экан-да! Ҳалиям онаси ўпмаган қизга ўхшайди-я. Жилмайгандан олам ёришиб кетгандай бўлади...

— Ҳа, жигарингдан урганими дейман, а? — деб кулдим.

— Жигаримдан уриб бўлти-ю, аммо сендақа шоир бир кўрса девона бўлиб, «ҳу» деб қишлоқдан чиқиб кетади, оғайни!..

Арслоннинг гапига кулиб қўя қолсам ҳам Саломатхонни бир кўргим келиб, бир-икки марта тегирмончининг уйи атрофидан ўтдим, тегирмонга бордим, лекин уни учратолмадим. Фақат қулоғимга ҳар хил мишишлар чалинарди:

«Бечоранинг эри урушда ўлганмиш».

«Эрининг қариндошлари айттирган экан, кўнмаганимиш».

«Эрининг ола-сингиллари паранжига ўраб, уйидан чиқармай қамаб қўйишган экан, қочиб келганмиш».

Бир кун қишилоқ советининг котиби мени излаб келиб қолди.

— Кечқурун колхоз боғида қаҳрамон билан учрашув бўлади. Дутор-сеторларингни олиб борар экансан.

Уша маҳалларда биз уч-тўртта қиз-йигит мактабда бадиий ҳаваскорлик тўгараги ташкил қилиб, узун қиши кечалари концерт-поинцерт кўрсатиб, одамларни овунтириб юрадик.

Қаҳрамон — қўшни қишлоқда туғилган йигит, фронтдан ярадор бўлиб қайтган, бир ҳафтадан бери бутун район унинг довруғи билан яшар, учрашувустига учрашув ўтарди. Кечқурун тўгарак аъзолари дутор-сеторларимизни кўтариб бордик.

Колхоз боғига столлар қўйилиб, дастурхонига олма-узум, қовун-тарвуз тортилган, стол атрофига ўттиз-қирқ чоғли актив тўпланган эди.

Қаҳрамон ёшгина, камтаргиниа йигит экан. Тўрда — ижроком раисининг ёнида, ўз довруғидан уялиб, ерга қараб ўтиради. Биз боргандан сўнг ижроком раиси мажлисни очмоқчи бўлиб, энди ўринидан турган эди, қандайдир «шивир-шивир» бошланиб қолди. Кўча томонга бурилиб қарасам... амбулатория, мактаб ва сельподга ишлайдиган бир тўп ёш жувон кириб келяпти. Ораларида Саломатхон!. Эгнида атлас кўйлак, оёгида пошиаси балағ ҳокиёти туфли, икки ўрим йўғон сочи белига тушган. Ўзиям, назаримда, ҳеч ўзгармаган, худди уша олис ёз оқшомидагидай ёш, гўзал эди. Катта қора кўзлари узланидан жавдираб, ёш жувонларниг пиижига суқилиб, ийманқираб кириб келди.

Арслон биқинимга туртиб: «Қалай?» — деб сўради, сўнг: «О-о! — деди уҳ тортиб. — Нега мени ойим беш йил олдин турмади!»

Жувонларни тўрга, қаҳрамон билан ижроком раисининг ўртасига ўтқазиши. Шундан кейин ижроком раиси кечани очиб, қаҳрамонга сўз берди. Қаҳрамон — шон-шуҳратга ўрганмаган оддий тракторчи йигит — қизариб-терлаб, фронт ҳақида, ўзининг кўрган-кечирганлари ҳақида дудуқланана-дудуқланана галириб берди. Унинг гапидан кейин навбат машшоқларга келди. Лекин биз биринчи номерни ижро этиб улгурмасимизданоқ, ён ёқдак: «Саломатхон битта қўшиқ айтиб берсинлар!» деган таклифлар ёғилиб кетди.

Саломатхон дарҳол отилиб чиқмаса ҳам, ноз қилиб ҳам турмади, бир-икки марта таклиф қилишгандан

кейин биэнинг ёнимизга ўтиб, иккита ашула айтиб берди... Эсимда бор, биттаси мен яхши кўрадиган «Излайман» деган қўшиқ, иккинчиси фронтдаги йигитларга бағишлиган «Кел» деган ашула эди. Унинг овози бурунгидан ҳам очилиб, ажиб бир тиниқлик касб этган эди. У ҳар иккала ашулани, айниқса, фронтдаги ёрига бағишлиган «Кел» деган қўшиқни шундай чуқур бир ички дард билан айтдики, авжига чиққанида ҳаммани зир титратиб юборди. У менинг ўнг томонимда қўлини стулнинг суюнчиғига қўйиб, хиёл олдинга энгалиб туар, мен унинг юзини кўрмас эдим, фақат атиргул варайхон ҳиди димоғимга гуп-гуп ураг, назаримда, бу нафис муаттар ҳид оламни тўлдириб юборган эди. Мен пиқ-пиқ йиглаётган жувонларга қараб дутор чертарканман, дам ўпкам тўлиб, кўз ёшларимни қилт-қилт ютар, дам ўша олис ёз оқшомидагидай, дилим ёруғ ва ҳазин ҳисларга тўлиб-тошарди...

Учрашувдан кейин, дутор-сеторларни кўтариб, бодан чиқаётган эдим, Арслон қўлимдан «шаппа» ушлаб қоронғи токзорга тортид:

- Шошма, қизларни жўнатиб, кейин кетамиз!
- Нега? — дедим ҳайрон бўлиб.
- Гап бор! — деди Арслон. — Кейин хурсанд бўласан...

Бир лаҳзадан кейин жувонлар пиқ-пиқ кулишиб, ёнимиздан ўта бошлапши. Шу пайт орқада турс-турс қадам товуши, кейин қишлоқ совети котибининг:

- Саломатхон! — деган таниш овози эшитилди.
- Жувонлар тўхташди.
- Лаббай? — деди Саломатхон.
- Сизлар кетаверинглар! — деди қишлоқ совети нинг котиби, — Саломатхонга бир оғиз гапим бор.
- Иўқ, тўхтаинглар, қизлар! — деди Саломатхон қатъий овозда. — Булардан сир эмасдир гапингиз...
- Сир эмас... яъни, жиндек ўтиришимиз бор эди, ўшангаборсангиз, деб...
- Раҳмат! — деди Саломатхон. — Учрашувга келдим, шу ҳам етар...
- Раис илтимос қилдилар...
- Раисга айтиб қўйинг, менинг хонаки ўтиришларга бориш одатим йўқ!..

— Тўхтанг, Саломатхон! — котиб унинг қўлидан ушлади чамаси, Саломатнинг «Қўйиб юборинг!» деган ўқтам овози эшилди. Бунга чидаб туролмаган Арслон бирдан қаттиқ йўталди. Шундан кейин котиб қўлини тортиб олди шекилли, Саломатхон югуриб бориб, нарироқда шивирлашиб турган жувонларга қўшилди-ю, ҳаммаси «гурр» кулишиб, нари кетишиди. Котиб эса токзорга яқинлашишга журъат этолмай, бир сўкинди-да, орқасига қайтди.

Арслон яна биқинимга туртди:

— Гапимга энди тушундингми, каллаварам? Мен буни боя шивир-шивир қилишаётгандаридаёқ билувдим. Аммо-лекин, молодес хотин экан-да, Саломатхон! Боплади бу қўшмачини. Қойил!

Мен ҳам қалбимни тўлдирган шодлик, ҳайрат ва фурурдан теримга сифмай қувонардим. Арслон иккимиз худди улоқда ютиб чиқсан ёш чавандоз, йўқ. оғир курашда голиб келган ёш полвондай, кўнгли-миз ўсиб, тун ярмигача Саломатхон тўғрисида, унинг гўзаллиги, поклиги, овози, ақли тўғрисида гаплашиб, сукунатга чўмган қишлоқ кўчаларини айланиб юрдик.

Яна бир-икки ойдан кейин, декабрнинг охирларида, армияга жўнайдиган бўлиб қолдик. Жўнаётгандар орасида тегирмончининг кичик ўғли — Саломатхон нинг укаси ҳам бор эди. У маҳалда Саломатхон мактабда ишлар, бешинчи-олтинчи синфларга адабиётдан дарс берарди. У бир неча аёллар билан бирга бизни вокзалгача кузатиб қўйди. Эгнида эскироқ бўлса ҳам ўзига ярашиб тушган қундуз ёқали қора пальто, бошида тивит рўмол, Саломатхон укасининг қўлидан ушлаб бир четда турар, бошқа хотинлардай дод солиб йиғламас, фақат кўзларидан тирқираб оқсан ёшларини жимгина артар, лекин унинг унсиз йиғиси, укасининг чеҳрасига тикилган кўзларидаги мунг бошқа хотинларнинг фарёдидан қаттиқроқ эзарди кишини.

...Укаси билан запасдаги полкда бирга бўлдик. Саломатхоннинг «сир»ларини сўрагим келса ҳам ўзи гап очмагандан кейин сўрашга журъат этолмас эдим. Бир кун у қишлоқдан хат олди-ю, нима ҳам бўлиб, ўзи ёрилиб қолди. Гапига қараганда, қишлоқдаги мишишилар ҳаммаси бекор, лекин поччаси бир йилдан бери дом-дараксиз кетган эмиш...

Саломатхоннинг укаси Читагача бирга келди. Читада уларнинг эшелони Узоқ Шарққа кетди, биз эса бу ёққа, Мұғулистанга бурилдик.

* * *

...Наҳот ман-ман деган қишлоқ йигитларининг орасидан шундай қизани юлиб олиб чиқиб кетган, тегирмончи чол юм-юм йиғлаб бўлса ҳам «Балли! Қандини урсин!» деб тан берган азamat йигит шу ёш капитан бўлса? Е у ҳам шунчаки Саломатхонга шайдо бўлиб, қуруқ қолган мажнунлардан биттасимикан? Лекин унақа бўлса, нега Қорасувни қайта-қайта сўради, тегирмончини синчиклаб суриштирди?.. «Уруш тамом бўлса қишлоқларингга борар эканмиз-да», деди. Бораман эмас, борамиз-да, деди.

Хаёлимчувалашиб, ўрнимдан туриб, ташқарига чиқдим.

Кўз илғамас кенг дашт, пастдаги қатор-қатор чодирлар, боя кўриниб турган машиналар, тўплар, олисдаги қирлар — ҳаммаси фақат саҳродагина бўладиган майнин қоронгиликка чўмган, у ер-бу ерда милтираган битта-яримта чироқ демаса, ҳамма ёқ зимиёнэди. Лекин ҳар жой-ҳар жойда гармонь овози янграр, солдат қўшиқлари эшитилар, яқиндаги чодир олдида эса бир неча киши гармонга қўшилиб ҳуштак чалар, кимдир этиги билан ер депсиниб ўйинга тушар, бошқалар осмонни бошларига кўтариб қийқиришар эди! .

Мен қовжираб қолган ўтларга ёнбошлаб, осмонни тўлдирган гуж-гуж юлдузларга тикилдим. Бундай йирик ва оппоқ юлдузлар фақат саҳро осмонида бўлади... Ана, етти қароқчи, етти қароқчининг устида, қора бахмалга сочилган зардай, нафис ялтираган сомон йўли... Сомон йўлининг пастроғида яна бир ҳовуч оқ юлдуз. Бу — Ҳулкар!..

Беихтиёр қишлоқ кўз олдимга келди.., Бундан бир йил муқаддам, худди шу кунлари, Арслон иккимиз даштда қиз-жувонларга қўшилиб буғдой ўардик.

Юрагимни яна ҳижроннинг аламли дуди чулғаб олди. Кўз олдимга яна ўша таниш буғдойзорлар, ўроқчи қизларнинг мулојим чеҳралари келди, қулогимга уларнинг шўх кулгилари, ҳазил ва дилрабо ёрёлари эшитилгандай бўлди-ю, ой шуъласида мудраб

ётган бу кенг дашт жуда ёт ва жуда совуқ кўриниб кетди. Мен биринчи марта суюкли она юртимдан нақадар узоқ эканлигимни тушундим, тушуниб, ўзимни жуда нотавон сездим. Фақат бир нарса кўнглимга тасалли берарди — у ҳам бўлса, гвардиячи капитан!

Уни ўйлашим билан урушдан олдин Саломатхонни «олиб қочиб кетган азамат Йигит» шу капитан бўлиб чиқишини, у билан яна ҳам яқинлашишимизни дил-дилдан истардим.

Совуқдан жунжикиб, ўрнимдан турдим.

Чодирлардаги ашула ва гармонь овозлари тинган, битта-яримта чироқлар ҳам ўчган, лагерь чуқур сукунатга чўмган, фақат штаб жойлашган чодир ёруғ эди. Мен лагерь чегарасидаги соқчининг: «Тўхта! Ким келяпти?» деган хитобига паролни айтиб чодирга яқинлашдим, яқинлашдим Оля билан гвардиячи капитаннинг кулгисини эшитиб, тўхтадим.

— Интендант бўлса... нега пиёда аскарлар капитанинг погонини тақади? — деди Оля.

— Погони ҳам «кавказликман» деган гапига ўхшаса керак-да! — кулди Даврон ака. — Шунача биттасини илгари ҳам кўргандим. Ўлгудай хотинбоз Йигит эди. Ўзи қайси миллатдан әканини тушуниб бўлмасди-ю, чиройли қизни кўрса бас, дарҳол гапни «Серқуёш Кавказдан» бошларди...

Оля қаҳ-қаҳ отиб юборди. Сўнг, яна сирли шивир-шивир бошланди. Мен, Саломатхон ҳақидаги бояги ўйларим әсимга тушиб, ичимда ўзимдан кулдиму сенин орқага қайтдим...

* * *

Шундай қилиб, штабда ишлай бошладим.

Иш кўп, сафарда керак бўладиган ҳар хил анжомлар, кийим-кечак, идиш-товоқ дегандек... нарсаларнинг рўйхатини тузиш, штабга минг хил ахборот беришдан қўлимиз бўшамас эди. Бу ишларни старшина Сало ва Оля учовимиз қиласиз.

Капитан кундуз даштда ҳар хил машғулот ўтказар ё полк штабидаги кенгашларга кетар, бўш вақтларда ётиб китоб ўқир, Олядан немис тилини ўрганар эди. Кечқурунлари эса, Оля билан старшина Сало учо-

ви штабга йигилишиб, қўшиқ айтишар, урушда бўлган воқеаларни волашиб, ярим кечагача сұҳбатлашиб ўтиришар, баъзан бу сұҳбатларга биринчи рота командирини, худди қизларникдай юзида кулгичлари ўйнаб турадиган ёшгина старший лейтенант Харитоновни чақириб келишар, у келса гурунг яна ҳам қизир, чунки Харитонов ашулани ҳам, гапни ҳам қоийил қиласар, умуман, жуда ёқимтой йигит эди.

Баъзан, одатда ёлғиз қолган пайтларида, Даврон aka планшетидан қора жилдлик қалин дафтарини олиб, алланималарни ёзипга киришарди.

Уша пайтларда унча-мунча шеър машқ қилиб юрганим учунми, мен унинг кундалигини бир ўқиш, қора жилдлик қалин дафтарни бир вараглаб кўришни ҳавас қиласар эдим, лекин капитан ёзib бўлиб, дафтарини планшетига соларди-да, ўрнидан туриб кетарди. Баъзан шундай пайтларда Оля ҳазиллашиб:

— Асар тугаб қолдими, ўртоқ ёзувчи? — деб сўрар, капитан ҳам кулиб:

— Йўқ, Олењка,— дерди. — Буюк санъат асарлари йиллаб ёзилади!

Шундан кейин, одатда, адабиёт ҳақида, улуг санъаткорлар тўғрисида суҳбат бошланар, бу суҳбатлар аксарият баҳсга айланиб кетарди. Мен уларнинг бу суҳбатларини жон қулогим билан эшитгим келар, лекин кўпинча ийманиб, чодирдан чиқиб кетардим. Чунки ўрталарида аллақандай бир яқинлик бордай туюларди-ю, худди уларга халақит бераётгандай бўлардим. Шундай пайтларда негадир эсимга яна Саломатхон тушиб, ғалати бўлиб кетардим.

Оля иккимиз жуда иноқ эдик. У бошқа офицерларга ўхшаб, доим ғоз туришимни талаб қилмас, аксинча, туғишган опамдай меҳрибон эди. Лекин Саломатхон!.. Мен уни сира унупотлас эдим.

Бир куни ғалати бир воқеа бўлди-ю, хаёлим баттарчувалашиб кетди. Эрталаб котелокни чилдирма қилиб чалиб овқатга кетаётган эдим, тўсатдан... олдимдан Мирҳайдар чиқиб қолди. Мен уни кўриб, оғзим очилиб қолди: эгнида янги гимнастерка, бошида янги пилотка, оёғида ботинка ўрнига офицерлар кийдиган хром этик, кечагина шумшайиб юрган Мирҳайдар ўрта қўлдек бир йигит бўлибди-қолибди!

— Ие, Мирҳайдар сенмисан?

— Ўхшайманми ўзи? — Мирҳайдар курак тишини кўрсатиб хушнуд тиржайди-да, қаппайиб турган буюм халтачасини ерга қўйиб қўлини чўзди. — Омонмисан, оғайни?

— Ишлар ванг-ку! — дедим унинг аллақандай очилиб кетганини кўриб...

— Худога шукур, оғайни. Ёмон эмас...

— Йўл бўлсин?

— Авваламбор, ўзингни бир кўргим келди, оғайни. Қолаверса... — Мирҳайдар мунчиқдек кўзларини миттиратиб, ғалати жилмайди. — Штабларингда... Оля Куприянова деган қиз борми?

— Хўш? — дедим қизиқсиниб.

— Шунга... бизни хўжайин майда-чуйда, совға-салом бериб юборувди...

— Қайси хўжайининг?

— Қайси бўларди? Битта хўжайиним бор-да — гвардиячи капитан Ногаев... Оляхон шўттами ўзи?

— Шўтта.

— Шўтта бўлса... — Мирҳайдар қаппайган буюм тўрвасини узатди. — Ўзинг олиб кириб бера қол. Илтимос...

Мирҳайдар гўё тўрва эмас, илон чўзаётгандай орқамга тисарилдим.

— Йўқ, йўқ, керак бўлса ўзинг олиб кириб бер! — дедим жеркиб. — Лекин эҳтиёт бўл, совға-саломинг билан афтингга урмасин.

— Епирай, а? — деди Мирҳайдар. — Бизнинг хўжайнандай йигит совға-салом юборади-ю, Оляхон олмас эканми? Хотин кишини билмас экансан.

— Кўрамиз! — дедим Олянинг у кунги кулгиси эсимга тушиб.

— Кўрамиз! — Мирҳайдар ғалати кулимсирадида, штабга қараб кетди.

Мен ҳам йўлимга равона бўлдим, лекин уч-тўрт қадам юрмасданоқ тўхтаб, орқамга қарадим. Мирҳайдар штабнинг олдида тўхтаб:

— Мумкинми, ўртоқ кичик лейтенант? — деб сўради.

Чодирдан Олянинг:

— Марҳамат! — деган мулойим овози эшитилди.

Мирҳайдар менга бир қараб қўйди-да, чодирга шўнғиди.

«Оладими, йўқми? Наҳот олиб қолса?» Назаримда, Оля ҳозир Ногаевнинг совға-саломларини отиб юборадигандек, Мирҳайдар шарманда бўлиб қайтиб чиқадигандек эди.

Билмадим, балки бу мулойим қиз менга жуда ёқиб қолгани учундир, у ҳозир Мирҳайдарни шарманда қилиб, ҳайдаб чиқаришини ич-ичимдан истардим. Лекин анча вақт ўтди ҳамки, ундан дарак бўлмади. Ниҳоят, яна беш минутча ўтгандан кейин, Мирҳайдар оғзи қулоғида чиқиб келди. Мен унинг қўлида буюм тўрваси йўқлигини кўрдиму шартта бурилиб, ошхонага қараб кетдим.

Мирҳайдар мени ошхонага яқинлашиб қолганимда қувиб етди, мунчоқ кўзларини ялт-ялт қилиб:

— Хўш, нима деган эдим? — деб сўради.

— Бор, бор, тошингни тер! — дедим бошқа гап топмай.

— Жўжакхўроуз! — деди Мирҳайдар. — Сен нимани биласан ҳали?

— Сен жа ақлли бўлиб кетибсан!

— Ҳар қалай аҳмоқ эмасдирман, мана, роҳатижон иш топиб олдим! Менга қара, шоир, — деди у елкамга қўлини қўйиб. — Хоҳлассанг мен хўжайин билан гаплашай. Сенга ҳам иш топилади ПФСдан.

— Раҳмат!

— Аҳмоқсанда, аҳмоқ! — деди Мирҳайдар худди ёш боладан кулгандай. — Ҳалиям бўлса ўйлаб кўр, кейин афсус қилиб юрасан, ука!

Мирҳайдар шундай деди-да, секин ҳуштак чалиб саёз дарё соҳилига тикилган қатор чодирларга қараб кетди. Мен унинг орқасидан тикилиб қолдим... Наҳот бу запасдаги полкда ҳаммага кулги бўлиб юрган Мирҳайдар бўлса? Қачон бу бунчалик ўзгариб, уддабурон йигит бўлиб қолди? Лекин энг ёмони... Наҳот шундай мулойим, жозибали, ақлли қиз унинг қўлидан бачканга бир одамнинг совға-саломларини олиб қолса?..

...Чодирга киришим билан димоғимга «гуп» этиб атир ҳиди урди.

Оля эгнида гимнастёрка, бошида эса... гулдор шоий дурра, чодирни йиғиштирмоқда эди. Уртадаги кўчма стол устида бир уюм қоғозли конфет, шоколад ва печенье туарди...

Кичик лейтенант мени кўриб, қўлидаги супургиси-ни ерга ташлади, кейин бошидаги гулдор дуррасини тўғрилаб, жилмайди:

— Қалай, ярашибдими?

Гулдор дурра унга чиндан ҳам ярашган, чеҳраси яна ҳам очилиб, тиниқ мовий кўзлари порлаб кетган эди!. Лекин бу дуррани унга берган одам...

Мен индамай, юзимни тескари бурдим.

— Сенга нима бўлди, Мансур?— деди Оля. — Қани ўтири, шоколад билан чой ичамиз.

— Раҳмат!

— Гўдак!— Оля қўли билан сочимни тўзгитиб кулди.

Унинг офицер экани эсимдан чиқиб, қўлини силтаб ташладим, ҳудди шу пайт:

— Нима гап ўзи?— деган ўқтам овоз эшитилди.

Чодирга киравериша... қовоғини солиб Даврон ака туарди.

У қошлари чимирилганича:

— Нима гап ўзи?— деб тақрорлади.

— Ҳеч гап йўқ!— мен шундай деб ташқарига чиқмоқчи бўлган эдим, капитан йўлимни тўсиб, тўсатдан бақириб берди:

— Сен ким билан гаплашяпсан ўзи? Командир биланми ё...

— Кечиравасиз, ўртоқ гвардиячи капитан!— дедим дарҳол ғоз туриб.

— Менга қара,— деди капитан баттар қовоғини солиб. — Бор, бугун ротанг билан бирга машгулотга чиқ!

— Вой, нега?— деди Оля кўзларини катта очиб.

— Қўявер. Бу ерда ўтиравериб, жуда талтайиб кетди бўл!..

— Ҳўп бўлади! Кетишга рухсат беринг, ўртоқ капитан?

— Боравер!— деди капитан юзимга қарамай.

* * *

Ҳарбий машқлар сойнинг кунботиш томонидаги ясси қирларда ўтказилар эди.

Бу машқлар олисдаги мишенларни нишонга олиш,

қопларга сомон тиқиб ясалган «самурайлар»га наиза санчиш, ер бағирлаб душман позициясига яқинлашиш каби оғир ишлардан иборат, түғрироги, бу машқларнинг оғир-енгил бўлиши рота командирларига боғлиқ эди. Солдатлар одатда рота командирларини икки тоифага бўлар: ҳарбий машқлар пайтида талабчанлик қилганинни «тошюраклар» тоифасига, кўп қийнамайдиганинни эса, «мехрибонлар» тоифасига киритишар эди.

Бахтимизга рота командиримиз—старший лейтенант Харитонов «мехрибонлар» тоифасига кираради. У кўп қийнамади. Бир-икки соат машқ ўтказди-да, дам олишга рухсат берди.

Офтоб терак бўйи кўтарилиган, гиёхлари қовжираб, тап-тақир бўлиб қолган дашт тандирдай қизий бошлаган эди. Биз гимнастёрка ва ботинкаларимизни ечиб, ярим яланғоч бўлиб, тақир ерга чўзилдик. Бунинг номи «офтобда чиниқиши» деб аталарди. Ҳақиқатан ҳам ҳар куни шу йўсин «чиниқиби» юрган солдатларнинг таналари чўяндай қорайган, ҳатто балиқдай оппоқ Вася ҳам мисдай қизарган эди.

Мен биринчи марта «чиниқаётганим» учун бирлаҳза ётмасданоқ, тер қуйиб, мудраб кетаётган эканман, Харитоновнинг:

— Рота! Естать! Смирно!— деган овозини эшитиб, сапчиб турдим.

Сой томондан Даврон ака билан батальон командирининг сиёсий ишлар бўйича муовини чиқиб келишибди. Старший лейтенант Харитонов шоша-пиша гимнастёркасини кийиб, уларга пешвуз юрди.

— Ўртоқ комбат!..

— Вольно!— Гвардиячи капитан, қўлларини орқасига қилганича, ротага яқинлашиди. Унинг қовоги солиқ, қошлари чимирилган эди. Харитоновнинг олдида тўхтаб, истеҳзоли кулимсиради:

— Худди Қора денгиз бўйида курортда ётгандай ётибсизлар-ку!

— Ҳа, энди, оғир сафардан олдин,— деди Харитонов калзвляниб.

— Бунинг номи «чиниқиши» бўлса, сафарга чиққанда бутун ротанг йўлда сулайиб қолмасин тағин?— капитан шундай деди-да, тўсатдан бошини баланд кўтариб:

— Рота! Командамга қулоқ сол! — деб буюрди.— Фронтовиклар ўнг томонга, қолган солдатлар чап томонга сафлан!

Фронтовиклар — ёшу қари — орден медалларини жаранг-журунг қилиб ўнг томонга, қолганларимиз чап томонга саф тортдик. Гвардиячи капитан этиги билан тақир ерни тап-тап босиб, олдимиизга келди, кафти билан кўзини офтобдан тўсиб узоқларга тикилди.

— Ҳу, анати адирни кўряпсизларми? — капитан олисдаги бир томони ўпирилиб тушган қирни кўрсатди.

— Кўряпмиз, ўртоқ комбат!

— Кўраётган бўлсаларинг... ўша қирга югуриб бориб, югуриб келасанлар! Қани, бегом марш!

Капитан айтган қир камидা бир чақирим келарди. Қўлимда стволи офтобда чўғдай қизиган пулемёт, мен ярим йўлга бормасданоқ ҳансирақ қолдим. Қирга яқинлашганимда, солдатларнинг олди маррага етиб, орқага қайтган, улар орасида Арслон билан Вася ҳам бор эди. Арслон ҳансираса ҳам хушчақчақ илжайиб йўлимни тўси:

— Қалайсан, шоир? Қани, пулемётни бериб, автоматни ол!

Мен тиззаларим қалтираб кетаётган бўлса ҳам капитанинг эрталабки сўзлари эсимга тушиб, индамай ёнидан ўтиб кетдим. Орқамдан Васянинг кулган овози өшишилди:

— Қўявер, Арслон, штабда орттирган жири сал камайсин. Ёнгиллашади!

Васянинг кинояси қаттиқ тегса ҳам жавоб бермай илгарилаб кетдим. Маррага етиб, орқамга қайтганимда, йўлда қулаг қолган иккита солдатга кўзим тушди. Мен ҳам қулашга яқин эдим, лекин қўлида фляга, қаршимдан югуриб келаётган бўлинма командири, баджаҳл сержантни кўрдиму, бор кучимни тўплаб, олдинга интилдим. Энди фақат бир нарсадан — Даврон аканинг кўзига тушишдан кўрқардим, чунки аҳволим аянчли эканини сезардим. Хайрият, бахтимга, ротага яқинлашиб қолганимда, сойдан амфибия машинаси чиқиб келди-ю, ундан... кўкрагида олтин юлдузи бор, ўрта бўйли бир полковник тушди.

Гвардиячи капитан:

— Рота! Смирно! — деб бақирди-да, қўлини чақка-

сига қилганича ерни тап-тап босиб, машинага қараб юрди.

Ўзимни солдатларнинг орасига урдим. Ҳамманинг кўзи полковник билан комбатда эди, атрофдан: «Полк командири, полковник Белобородов!..» деган шивир-шивир овозлар эшитиларди.

Полковник, комбатнинг рапортини эшитиб бўлиб, бир-бир босиб ёнимизга келди.

— Машқлар оғир бўляптими дейман, а, солдатлар?

Мен секин Васяни туртдим.

— Тўғри, ўртоқ полковник!— деди Вася ингичка овоазини чийиллатиб.— Жир битишга қўймаяпти комбат.

— Жирни нима қиласи солдат?— деди Белобородов.

— Энди самурайлар билан урушадиган бўлсак...

— Урушда жир керакми, йўқми, мана бу чоллардан сўра!— полковник кулимсираб четроқда турган уч-тўртта мўйсафидга юзланди:

— Яна урушишга тўғри келяпти-ю, чоллар?

«Чоллар» бошларини қашишиб:

— Урушиш керак бўлса урушамизда, ўртоқ полковник!— деб жавоб беришди.

Белобородов ҳоргин юзидаги маржон-маржон терларни сидириб ташлаб, бош иргади.

— Урушиш керак бўляпти, солдатлар, жуда керак бўляпти!

— Иттифоқчилар олдида мажбурият олганмиз, демокчисиз-да, ўртоқ полковник?— Тўсатдан яна чинқирди Вася. «Гурр» кулги кўтарилиди. Ёлгия полковник кулмади. У бошини чайқаб:

— Йўқ, гап фақат мажбуриятда эмас, ўғлим,— деди. — Ватанимиз чегарасида миллион кишилик Квантун армияси турганида бизга ҳеч қачон тинчлик бўлмайди. Ҳасан кўли-ю, Халхингол эсларингдами?

Капитан қандайдир ранги ўчиб:

— Йигирманчи йиллардаги тажовузлари-чи, — деди.— Паровоз ўтхонасига тириклай ташланган Сергей Лазо-чи? Эсларингдами?

— Эсимизада, ўртоқ капитан!— овози борича яна бақирди Вася.

Яна кулги кўтарилиди. Полковник кўзларини катта очиб:

— Узинг кичкинагинасану, овозинг тошни тешади-я! — деган эди, Арслон:

— Ўртоқ полковник! — деб кулди. — Бу шунаقا... кичкина дема мени, кўтариб ураман сени, дейдиганлардан!

— Ҳа, тузук! — деди полковник. — Ҳўп, солдатлар, чиниқаверинглар! Эрта-индин юриш бошланади. Оғир, лекин шарафли юриш бўлади бу... Капитан Фозиев, машинага чиқ, гап бор!..

Даврон ака ёнимдан ўтаётиб бир зум тўхтади.

— Тузук, бўш келмадинг, — деди у кулимсираб. — Штабга бор. Иш чиқиб қолди. Лекин иккинчи марта кичик лейтенантга қўполлик қила кўрма. Уқдингми?

— Уқдим, ўртоқ капитан!

* * *

Оля батальоннинг фельдшери ҳисобланар, лекин иши кам бўлгани учун, одатда, менга ёрдамлашар эди.

Оля иккимиз капитан айтган ишни битириб, энди кечки овқатга ўтирган эдик, чодирга Мирҳайдарнинг хўжайини — капитан Ногаев кириб келди.

— Мумкинми, ўртоқ кичик лейтенант?

Оля ер остидан менга қаради, кейин, негадир, ҳизаринқираб:

— Келинг, — деди.

Капитан пешанасига чапаниларча қўндирилган фурражкасини бошининг орқасига суриб, Олянинг ёнига ўтириди-да, унинг қошиқ тутган қўлидан ушлади.

— Сиздан илтимос, Оленька, шу овқатни емай туринг.

— Вой, нега? — деди Оля чиройли мовий қўзларини катта очиб.

— Иштаҳангизни бузманг. Биз кавказча кабоб тайёрлаётувдик. Шунга сизни таклиф қилиб келдим.

— Раҳмат! — Оля шавладан олмоқчи эди, Ногаев яна унинг қўлини ушлади.

— Йўқ деманг, Оленька, илтимос, атайин сиз учум қилдик бу кабобни. Бирпас гаплашиб ўтирамиз. Коин танцага борамиз.

Оля менга қаради.

— Кабоб ейсанми, Мансур?

— Мансурга кабобдан бериб юборамиза,— деди Ногаев, худди «хўп» деб қўйишимдан қўрқандай шошиб. — Кабони бунинг ҳамشاҳари қилган. Ўзи олиб келиб беради. Бўла қолинг, Оля. Бир ёзилиб келасиа...

— Ҳеч қўймадингиз, қўймадингиз-да... — Оля ўринидан туриб, сочини турмаклай бошлади: — Сиз чиқиб туринг, ўртоқ капитан, мен ҳозир... кетингиздан чиқаман!

— Есть, ўртоқ кичик лейтенант! — Ногаев ҳазиломуз итоаткорлик билан честь берди-да, чодирдан чиқди.

Оля соchlарини туватиб, ёнимга келди.

— Нега бундай қиляпсан, Мансур?

— Нима қилдим?

— Қўриб турибсан-ку, елимдай ёпишиб олди! Капитаннинг гапи эсимга тушиб:

— Менга нима, бораверинг! — дедим.

— Гўдак! — Оля әркалаб сочими тўзгитиб юборди.

Кун ботган, атроф қоронгиликка чўмган, осмонда илтираб турган бир ҳафталик ой шуъласида даштни тўлдирган чодирлар, сойдаги машина ва танклар, хартумларини осмонга чўзган тўплар аллақандай ваҳимали туюлар эди. Сойда, ҳар жой-ҳар жойда қўшиқ ва гармонъ овозлари ёшитилар, ер депсиниб раҳсга тушаётган солдатларнинг ҳуштаклари қулоққа чалинар эди...

Қанча ухлаганим эсимда йўқ, бир маҳал гвардиячи капитаннинг бўғиқ, асабий овозини ёшитиб уйгониб кетдим.

— Қани, кечирим сўра! Эшитяпсанми, сенга айтапман!

— Қивиқсан-я, Фозиев...

— Гапни чўзма! Кечирим сўра деялман сенга!

Мен четлари кўтарилиган чодирдан эгилиб ташқарига қарадим. Чодирнинг ёнгинасида Даврон aka билан Ногаев, улардан сал нарироқда Оля турар эди. Ногаев қаттиқ таҳқирланган одамдай кўкрагани керип, қотиб қолган: гвардиячи капитан бошини бир томонга әгиб, муштларини туғиб турар, Оля все юзиини кафтлари билан тўсиб олган, у йиглар эди.

— Менга ҳара, Ногаев! — деди гвардиячи капитан ҳансирааб.— Дарҳол кечирим сўра, ё...

— Хўп. Яхши! — Ногаев бошини мағрур кўтарди. — Кечирасиз, ўртоқ кичик лейтенант! Мен билмай қолибман. Кечирасиз. — У Оляга таъзим қилгандай, қаддини сал әгди-да, шартта бурилиб, чодирнинг орқасига ўтиб кетди.

Капитан Олянинг ёнига борди. У қизнинг елкасидан қучоқлаганини кўрдиму ўзимни тўшакка ташладим.

— Оля, азизим,— деди капитан худди ёш болани юпатаётгандай мулойим товушда. — Шу ифлосни деб...

— Ўзидан ҳам гапи ифлос... гўё мен... гўё... — Оля давомини айтольмади, унинг пиқ-пиқ йиглаган овози эшитилди.

— Оля, азизим,— деди капитан. — Сен шундай пок, шундай яхши қизсанки, бу гапларни... елимлаб ёпиштиrsa ҳам ёпишмайди сенга... Қўй, йиглама. Кўзингни арт. Юр, қирларни айланиб келамиз. Осмонга бир қара! Юлдузлар худди оппоқ олмаларга ўхшайди. Қани, кўзингни арт... Юр, кетдик.

Секин эшитилган оёқ шарпаси узоқлаша-узоқлаша қоронғиликка сингиб кетди.

Хаёлимда яратган севги достоним тамоман барбод бўлган эди. Гўё бирор мени қаттиқ таҳқирлагандай туюлиб, бошимни шинелимга ўраб олдим.

* * *

— Эртага юриш! — деди гвардиячи капитан кўзларимга синовчан тикилиб. — Ротангга қайтарсам... Саҳрода қийналиб қолмасмикансан?

Қизариб кетганимни сезиб, ерга қарадим.

— Қийналсан... кўпга келган тўй-ку, ўртоқ капитан.

— Балли, ука! — деди Даврон ака. У чодирга кириб келган старшина Салони кўриб кулди. — Мана, Дмитрий Михайловични взводларингизга командир қилиб тайинладик. Бирга бўласизлар...

Старшина Сало, ўнг қўлинин орқасига яширганича, кирган жойида тўхтади:

— Битта эрийдиган бўлдингиз, ўртоқ капитан.

— Хатми? Кимдан? — Даврон ака сал ранги ўчиб, старшинага яқинлаша бошлади.

— Йўқ, йўқ, олдин яримтани столга қўйинг, ке-
йин оласиз хатни!

— Дмитрий Михайлович! Яримта эмас, ўнта ярим-
тага эрийман! — Капитан шундай деди-да, старшина-
ни қучоқлаб қўлидан хатни юлиб олди. Лекин уч бур-
чак хатга кўз ташлади-ю, индамай бир четга бориб
үтири.

— Яримтани топиб қўйинг, ҳозир газагини олиб
келаман... — старшина менга кўзини қисиб, чодирдан
чиқди. Мен негадир ўнгайсизланиб, ёзиш-чишишга ки-
ришдиму, Даврон аканинг қаттиқ сўкинганини эшитиб
ялт этиб қарадим. У олисларга тикилиб турар, сал
қисилган кўзларида, лабларини қаттиқ тишлаб тури-
шида аллақандай мунг, йўқ, шафқатсиз бир ифода бор
эди.

— Менга қара, Мансурбек.—деди у тўсатдан,—
қишлоқдан чиққанингга неча ой бўлди?..

— Салкам бир йил бўлди.

— Бир йил... Мабодо Саломатни кўрмаганмидинг?
Юрагим ўйнаб кетди.

— Нега кўрмас эканман? Кўрганман! Биз кета-
ётганимизда мактабда дарс берардилар! Агар бироз
уни ёмонлаб хат ёзган бўлса... аҳмоқ экан!

— Хўш? Хўш?—деди капитан. Унинг ҳаяжон-
ланган юзига қарадиму, негадир кечаси бўлган гаплар
эсимга тушди.

«Бу одам ким ўзи? Саломатхонни олиб қочиб кет-
ган йигит шуми? Шу бўлса нега очигини айтиб қўя
қолмайди? Нега Оля билан...»

— Юртоқ капитан!—дедим юрак ютиб. — Сизга
битта саволим бор: урушдан олдин Саломатхон опам-
лар ўқишида юрганларида фаргоналик бир йигит...

— Тўхта!— капитан тоқатсизланиб афтини буриш-
тири. — У гапларни қўйиб тур! Сен Саломатхон тўғ-
рисида гапираётган эдинг. Хўш?

Капитанинг гали негадир оғир тегди. Шундай
бўлса ҳам тутила-тутила бултур кузда колхоз боғида
бўлиб ўтган воқеаларни гапириб бердим. Охири кўз
олдимга вокзалда унсиз титраб йиглаётган Саломат-
хон келиб, ўзим ҳам титраб кетдим. Шу сабаб бўлди-
ми ёки ўшилик ҳилдимми, билмадим, ишқилиб, кечаси
бўлган воқеалар яна эсимга тушди-ю, тўсатдан қан-
дайдир ўксиб:

— Нима қиласиз Саломатхонни суриштиравериб? — дедим. — Ҳадеб уни сўрайсизу, ўзингиз бўлса бу ёқда...

— Нима? — деди капитан. — Нима деб алжираяпсан?

У ранги ўчиб рўпарамда тўхтади. Лекин мен ҳам әнди ўзимни босадиган ҳолатда эмас эдим.

— Нима қиласиз яшириб? — дедим раинкиб. — Ё мени гўл бир қишлоқи дейсизми? Оля билан юрганингиз...

— Бас! — тўсатдан бақириб юборди Даврон ака.

Унинг ғазабдан қалтироқ босиб, гапиролмай қолганини кўриб, бирдан ҳушёр тортдим.

— Сен бу... бу бўлмагур гапларни қаёқдан топдинг? — Капитаннинг сўзи оғзида ҳолди, чунки шу пайт дук-дук қадам товушлари эштилиб, чодирга Оля кирди.

— Ҳа, нима бўлди, ўртоқ капитан? Тинчликми?

Даврон ака Олянинг саволига жавоб бермай менга юзланиб:

— Қани, йиғиштир лаш-лушларингни! — деб юборди.

Оля бир капитанга, бир менга қаради.

— Нега буни қувасиз? Нима бўлди ахир? Мансур!..

Мен унга жавоб бермай, майдачуидаларимни йиғиштира бошладим.

— Ивисимай тезроқ бўл! — Бақирди капитан. — Бўлдингми? Қани, туёғингни шиқиллат! Иккинчи кўзимга кўринма!

Мен лол бўлиб қолган Олянинг ёнидан ўтиб, ташқарига отилдим.

* * *

«Тўғри қилдимми, йўқми? Комбатдай одамга бу гапларни айтишни, унинг шахсий ишларига аралашибни менга ким қўйибди? Унинг ўрнида бошқа бир офицер бўлганда нима бўлардим? Лекин унинг ўрнида бошқа одам бўлганда, Саломатхон турмаганида мен ҳам бу гапларни айтмас эдим-да!..»

Штабдан ҳайдалишга ҳайдалсан ҳам ротага бормай, ўзим билан ўзим олишиб, даштда танҳо айлананиб ўрган эдим, бир маҳал Арслон қидириб келиб қолди.

— Нима бало, кулоҳидан айрилган қаландардай калланг шалвираб қопти, шоир? — кулди у. — Қани тур. Ҳамқишлоқлар келишди.

— Қайси ҳамқишлоқлар?

— Катта бўламан деб, ҳамқишлоқларни унтиб ўйдингми? — деди Арслон. — Бўл тезроқ. Йигитлар кутиб қолиши. Капитанга айтдим, у киши ҳам бораман, дедилар.

«Капитан» сўзини эшитганда, юрагим безилласа ҳам ҳамқишлоқларим сафардан олдин хайрлашгани келишганини ўйлаб, ўйқ дейёлмадим.

Ҳамқишлоқларнинг биттаси ўша ҳийғир бурун, барваста Мирҳайдар, иккинчиси колхоз чўпонининг ўғли Серкабой деган қисиқ кўзли, сўзга чечан дўмбирачи бола, учинчиси Шоюсуф, ёш уйланган, шунинг учун ҳам Арслоннинг «аския манбай»га айланган, мўмин-қобилгина йигит.

Уларни кўрганда кўнглимдаги губор хиёл тарқагандай бўлди. Дўстларим, айниқса, Шоюсуф қўлимни қўйиб юбормас, юмaloқ қорача юзи қулгидан хамирдай ёйилиб: «Бормисан оғайнин? Сени кўрадиган ҳам кун бор экан-ку!» дерди энтикиб.

Майсазорга шинелларимизни тўшаб, давра қуриб ўтирик. Мирҳайдар ўзини кўрсатиш учун бўлса керак, буюм халтасини тўлдириб консерва, нои ва қанд-қурс олиб келган эди. Арслон қаламтароши билан унинг консерваларини очаркан, тегиша кетди:

— Қалай, омборга бориб овқатга кўзинг тўйдими ё ҳалиям қолган-қутган қаттиқ нонларни йигиб юрибсанми, Ҳайдар?

Мирҳайдар узун бурнини ишқаб ишшайди:

— Кўзим тўйса сенга ҳам ёмон бўлмаяпти-ку!

— Тўғри, — деди Арслон. — Бир жиҳатдан ПФСга борганинг ҳам яхши бўлди. Ротада юрганингда тағин қозондан картошка ўғирлаб, ҳаммамизни шарманда қиласардинг!

Картошка воқеаси эсимга тушиб кулиб юбордим.

Биз тушган запасдаги полк қалин ўрмонзорга жойлашган бўлиб, яқин-атрофда битта ҳам қишлоқ йўқ еди. Ертўлада яшаймиз. Ертўланинг бир четига қозиқ қоқилиб, узун «стол» ясалган, ўша жойда овқатлаҳамиз. Кўпчилик берган овқатга қаноат қилса ҳам, баъзилар биринчи кунданоқ ғалати одатлар чиқара

бошлашди. Шулар орасида Мирҳайдар ҳам бор эди. У икки-уч кунгача олган нонини емасдан солдатларга сотар, кейин йиққан ҳамма пулига бир йўла бир буҳанка нон олиб, бир ўтиришда пок-покиза туширади-ю, кейин яна кўзини лўқ қилиб ўтираверарди. Кеинчалик у ўзига ўхшаган уч-тўрттасини топиб олди, кечалари бир соат бўш вақт берилганида, ҳамма китоб ўқиса, хат ёёса, булар ошхонага тўпланишиб, ҳадеб овқатдан гаплашишар, теккан бир чақмоқ қандини тамакига, тамакисини бир бурда нонга алмаштиришиб «савдогарчилик қилишарди». Буни кўрган солдатлар: Ана Олой бозорида «савдо бошланди», деб кулишарди.

Бир куни кечқурун Мирҳайдар билан овқат олиб келгани ошхонага бордик. Кун совуқ, туф десанг, тупук ерга тушмайди. Қоронғида қоқиниб-суриниб, ўн беш челак карам шўрва, икки челак шавла билан икки қоп нонни зўр-базўр кўтариб келдик... Старшина, одатда челакларни санаб олгиндан кейин, узун сопли катта чўмич билан шўрвани ковлаб кўриш одати бор эди. Қовлаганда челаклардаги масаллиқ юзага қалқиб чиқарди. Бу сафар баъзи челаклардаги масаллиқ бутчиқди, лекин иккита челакдан на гўшт чиқди, на картошка! У ҳайрон бўлиб менга қаради.

— Эҳтимол, ошпаз янгишгандир,— дедим хижолат чекиб.

Шу пайт старшина, бу ёққа қара, деб елкамга туртди. Қарасам, Мирҳайдар, орқароқда шумшайиб турар, шинелининг чўнтағидан эса, худди қозон қайнаётгандай, пага-пага буг кўтарилади!..

— Солдат Норбўтаев, бир қадам олдинга марш!— деб буюрди старшина.

Мирҳайдар сувга тушган мушукдай шумшайиб, бир қадам олдинга чиқди. Шунда солдатлар унинг чўнтағидан кўтарилаётгани бугни кўриб, бирдан қаҳ-қаҳ отиб юборишиди!

Старшина бўлса, бутун ротани йигди-да, унга қараб:

— Қани, чўнтағингдагини котелокка сол!— деб буюрди.

Илож қанча? Бечора инқиллаб-синқиллаб чўнтағларидан картошка билан гўшт бўлакларини биттабитта олиб, котелокка сола бошлади. Ҳар битта кар-

тошкани олганида, бир қаҳқаҳа кўтарилаарди. Ўзи ҳам ер ёрилмади, ерга кирмади!..

Старшина уни ўша ернинг ўзида тўппа-тўғри гаупвахтага жўнатди...

Арслон шуларни эслаб, яна унга тегиша бошлаган ёди, Серкабой:

— Э, қўйсайши, Арстан! — деди энсаси қотиб.— Биз сенинг аскингди соғиниб келмадик бу жерга. Элди сағинип, бир ангимелесейик, деп келдик...

Ҳамманинг «сиридан» воқиф бўлган Арслон дарҳол унинг ўзига ёшиша кетди:

— Қалай, Чипоргулдан хат келиб турибдими, Серкабой? Бирорта Қўйбой, Йилқибой, Туябойга тегиб кетмабдими ҳайтовур?

Серкабой ҳам бўш келмай:

— Майли,— деб кулди.— Чипоргул қашиб кетса, Паршагул бор. Паршагул бўлмаса, Сапаргул бор...

У қўлларини бошининг орқасига қўйиб чалқанча ётди-да, чуқур хўрсиниб:

— Ёпирай! — деди. — Шу топда «Туя тас»да нималар бўляпти экан? Овулдинг қиз-келиншектери-мен бўз болалари жайловга шиқиб ўлан айтисаётгандир-ов!..

Аллақандай майин, тонг шабадасидай илиқ бир туйғу — соғинч туйғуси ёпирилиб келди-ю, дилларни чулғаб олди... Кўз олдимга боғларга кўмилган қишлоқ, икки томони тутзор тор кўчалар, гумбази тагига мусичалар уя қўйган эски мачит, атрофи қорли чўққилар билан ўралган «Туя тош» яйлови, худди тўнтарилган пиёладай ўтовлар, чўлпилари майин шилдираган қозоқ қизлари келди... Сукут чўзилиб, дилларда уйғонган соғинч туйғуси тобора ортиб борар, у дам маъюс хаёлларга олиб кетар, дам кўнгилини равшан қиласар, дам киндик қони тўкилган она юртнинг нақадар узоқда қолганини эслатиб, юракни зиркиратар эди...

Ўртага чўккан жимликни Серкабой бузди.

— Овулга омон-соғ қайтсан,— деди хўрсиниб.— Тўй қиласан, адирда кўпкар шоптириб, пойга бериб, оламин Чипоргулни.

Арслон унинг биқинига туртиб кулди:

— Сен-ку, тўйни энди қиласан. Аммо Шоюсуфга

қийин. Айтмоқчи, хотинингдан ҳат келиб турибдими, оғайни? Бевафолик қидмаялтими, ишқилиб?

— Қўйсанг-чи шу гапни!— деди Шоюсуф, унинг овози аллақандай аянчли эшитилди ю, ўртага яна ноқулай жимлик чўки.

Қишлоғимиздан армияга чақирилган йығирма чоғлиқ йигит ичидан битта ю битта уйлағани шу Шоюсуф эди. Бечора соддалик қилиб, ўзда, зиҳонсиз кетаётганимизда, биринчи никоҳ кечасининг ҳамма тафсилогларици галириб бериб, кулгига қолган эди. Шоюсуф бу кулги ва қочириқлардан ҳаттиқ әзилар, хотинидан ҳат кечиккан пайтларда эса ёш боладай ўқсиб йигламсираб қолар эди. Бу сафар ҳам ҳат кечиккан эканми, билмадим. Арслон яна тегиша бошлаган эди, ўринидан туриб кетди.

— Қачон қўясан шу гапларингни?— деди у йигламсираб.

Шу пайт қоронгидан:

— Ҳа, нима жанжал, йигитлар?— деган таниш овоз эшитилди. Бу гвардиячи капитам эди. У:

— Қўзғалманглар, қўзғалманглар!— деди-да, ёни миага келиб ёнбошлиди. — Қўм, тинчлими, йигитлар?

— Ҳа, шу... ҳазиллашиб ўтирувдик, ўртоқ капитан!

Арслон Шоюсуфминг қўлидан тортиб ўтқазди.

— Биз буни Шоюсуф лапашанг, деймиз, ўртоқ капитан. Лекин ўзи лапашанг бўлса ҳам бало! «Қорасув»нинг гулдай қизини туаогига туширган.

— Демак, маладес экан-да! — деб қулди капитан.

— Маладесликка маладеску-я, лекин бу ёғи қандоқ бўлар экан? — деди Арслон.— Хотини жуда кетиворган эди-да.

Шоюсуф Арслоннинг қўяними силтаб ташлади, боягидан ҳам аянчли асабий овозда:

— Сенга қолса, бу думёда битта ҳам вафодор хотин йўқ!— деди овози қалтираб.

Мен ер остидан капитанга қарадим. Унинг чеҳрасидаги бояги табассум сўнган, бошини бир томонга этиб, бир нуқтага тикилиб ётарди.

— О-о, вафо, вафо,— деди Арслон. — Хотиннинг сени деса қишлоқдан чиқмасингдан туриб, раисга секретарь бўлармиди, каллаварам?

Капитан тұсатдан шахт билан құзғалиб:

— Нима қиласан шу гапларни гапириб? — деди кескин. — Тұңпа-түзук йигит, қаёқдаги бачкана гапларни гапириб ўтирибсан?

Арслон үнгайсызланып йұталиб, бопини пилоткаси билан ишқаб:

— Ҳазыл-да, ўртоқ капитан! — деди.

— Иүқ! Вироннинг күнглини оғритадиган гапларни ҳазыл деб бұлмайды! Ҳаммаларинг бир қишлоқдан экансизлар, дұст экансизлар, нима қиласызлар бир-бирларингизни ранжитиб.

Бу гап Шоюсуфға ёқди шекилли:

— Ўртоқ гвардиячи капитан! — деди. — Агар мумкин бұлса... бизни ҳам үз батальоннанға олсанғиз. Ҳаммамиз бирга бұлардик, нима дейсіз?

Капитан күлди.

— Авваламбор, ҳалиям ҳаммамиз бир полкдамиз. Қолаверса... Ҳаммаларинг бир жойга йиғилиб, бир-бирларинггүйнин гапларни сүқилаверишдан фойда йүқ, йигитлар. Армия — сизлар учун катта бир мактаб. Бу мактабдаған фойдаланыб... Хуллас, пишиб чини-қиши керәк, йигитлар! — Капитан шундай деди-да, соатына қаради.

— Соат ўн бирдан ошибди, ётايлик, йигитлар.

Ҳаммамиз құзғалдик. Капитан бизни күргани келген йигитлар биләй күл беріб хайрлаташаркан:

— Сизларга айтадиган битта гапим бор, йигитлар, — деди секін. — Сафар жуда оғир бўлади. Вутун Гоби саяросини пиёда босиб ўтамиз. Белни маҳкам боғланлар. Ҳамқишлоқлар деган номга дөр тушмасин!..

Даврон ака менга қарамас эди. Лекін гапларидан бўлакча бир самимият бор эди. Мен буни сездиму, ҳалиги қилиғым эсимга тушшиб, ўзимдан қаттиқ ранжидим.

* * *

Капитан ҳақ. Бу чиндан ҳам мислсиз машаққатли сафар, чекесиз, чегарасын олис йўл эди. Кўз илғамас бе-поён сахро, бир-бирига туташиб кетган пастак қирлар. Кўкламда униб чиққан гиёхлар аллақачон жиаганак

бўлиб, қовжираб ётибди. Гоҳо-гоҳодагина кўкаlamзор сойликлар учраб қолади. Сойликларда ёйилиб юрган подалар, саёс дарё бўйларига тикилган ўтовлар кўрилади. Бу ўтовлар, ўтовлар айланасида ўйнаб юрган болакайлар, сойликда ёйилиб юрган подалар худди яйловларимизни эслатади-ю, кўнглим бир хил бўлиб кетади... Бошқа пайт, эртадан кечгача бир хил манзара, қорамтирилар, бепоён жигар ранг саҳро, булутсиз осмон сатҳида сокин сузган калхатлар, ерда эса фақат юмрониқозиқлар-у, биздан қочиб ўзларини кавакка урган калтакесаклар...

Кенг саҳро қўшинга тўлиб кетган. Олдинда саф тортиб кетаётган аскарлар узоқдан ўрмалаб бораётган чумолиларни эслатади. Ўткин-ўқтин ўнг ва чап томонларимиздан тягачларга миниб олган артиллеристлар ва зенитчилар тўпларини судраб ўтишарди, солдатлардай саф тортган оғир танклар ерни ларзага солади. Люкларини ланг очиб, яланғочланиб олган танкистлар, бизларга қараб, қўл силкитишиади, тишларини ярқиратиб кулишади:

— Ҳа, дала маликаси! Аҳвол қалай? Қани, бошингни кўтар. Дадилроқ одимла! — деб қичқиришиади. Биз бу хушчақчақ, соғлом, бахтиёр йигитларга ҳасад билан тикиламиш, улар узоқлашиб кетгунча термилиб қоламиш. Лекин баъзан, айниқса туш пайтларида, биздан кулиб ўтган танкистлар ўзлари кулгига қолишиади. Бу «дашти Карбало»га, олов пуркаган офтобга ҳатто темир ҳам бардош беролмайди. Моторлар қизиб, шарақлаб қолади, радиаторлар очилганда, вақирлаб қайнаган лойқа сув осмонга фонтан бўлиб отилади. Ҳар туёги ўчоқдай келадиган, филсифат немис отлари эса, худди сувдан чиқиб қолган балиқдай, оғизларини каппа-каппа очиб, йўл бўйига йиқилиб қолади... Фақат пиёда аскарлар — оғирга ҳам, енгилга ҳам ўрганиб қолишиган, улар бепоён даштии вазмин одимлаб, бир маромда илгарилаб боришади...

Ҳар куни эрталаб, йўлга чиқишида олинадиган бир фляга сув сал ўтмасданоқ исиб қолади, лекин исиб қолган бу шўр сувнинг ҳар бир томчиси бир тиллага тенг. Уни фақат оғизлар қуруқшаб қолгандагина ҳўплаш мумкин. Бошқа пайт бир қултум ютсангиз, командирларнинг сўкишига қоласиз. Рост, взвод командиризиз старшина Сало бошқалардай «шафқатсиз» эмас,

аксинча, шунчалик мулойимки, ёш солдатларга «ўғлим» деб мурожаат қиласди, ўз тенги солдатларни эса исми фамилиясини айтиб чақиради.

Елкамда қўйл пулемёти. Ўқланган иккита дискани ёрдамчим Вася Колбаскин кўтариб олган. Васянинг фамилияси қандай ғалати бўлса, афти ангори ҳам шундай ғалати: сочи, қош-кўзлари, ҳатто киприкларигача оппоғу, юзи қип-қизил, тўғрироғи, вллақандай пушти ранг. Бу ҳам етмагандай узун бурнининг бир қават териси офтобда шилиниб, худди пўсти олинган колбасадай қип-қизариб қолган. Шунинг учун солдатлар унга тегишгани тегишган. Бири: «О, қани энди ҳозир бир кило колбаса бўлса, ион билан пок-покиза тушириб олсанг!» — деса, яна бири бурнига ишора қилиб: «Вася! Офтобда жингиртоб бўлиб кетибди-ку, колбасанг!», — деб кулади.

Вася ҳам бўш келмайди.

— Кўп суқланиб қарайверма! — дейди узун бурни ишқаб. — Кўзинг тегади!

Васянинг қувноқлиги учун ҳамма яхши кўради. Дам олиш пайтлари капитан ҳам келиб: «Ҳа, Вася, ишлар қалай?» деб ҳол-аҳвол сўраб туради. Вася эса:

— Мендан олдин старшинадан аҳвол сўранг, ўртоқ капитан! — дейди муғомбirona кулимсираб. — Бу офтобда колбасадан кўра салога қийин, ўртоқ капитан.

Капитан кулиб, асқияни илиб кетади:

— Ҳа, тўғри, эҳтиёт бўлиш керак. Чунки сало офтобда эриб кетса, колбасанинг ҳам мазаси қолмайди!

Капитан кула-кула бошқа взвод ва роталарга ўтиб кетади. У бальзан Арслон билан ҳам ҳазиллашади, менга эса индамайди, тўғрироғи, ўзини кўриб кўрмаганга солади.

Саҳро қоронғиликка чўмиб, осмонда илик юлдузлар кўринганида бирорта қир ён бағрида тўхтаймиз. Овқат емасданоқ, тақир ерга чодирларни тўшаб, ўзимизни тапла-тапла ерга ташлаймиз. Туннинг совуқлиги ҳам, ернинг қаттиқлиги ҳам билинмайди, буюм халтамизга бошимизни қўйишимиз билан пинакка кетамиз. Эрта саҳар, ҳали осмонда юлдузлар сўнмасдан, яна йўлга тушамиз...

Сафарга чиққанимизниң бешинчи ё олтинчи күни эди чамаси, саҳрода рўй бериши мумкин бўлган ёнг даҳшатли ҳодиса содир бўлди.

Тик тепага келган офтоб олов пуркайди, тандирдай қизиган саҳрода тангадай соя йўқ, гўё бутун табиат солдатга қарши ўчакишгандай, унинг иродасини букишга аҳд қилгандай эди. Адирлар оша ҳориб-толиб қудукқа зўрга етган роталар, икки қир ўртасидағи сойлиника таппа-таппа ташлаб, чўзилиб қолди. Қуруқшаган, иссиқдан қовжираган лабларда фақат бир оғиз сўз: «Сув!.. Сув!..» Сергўшт, серёғ шавлага қарайдиган одам йўқ: Сув! Сув!

— Ҳамма офицерлар полк командирларининг олдига йигилсин! — деган буйруқ келди.

Ярим соатдан кейин офицерлар қайтиб келишди.

— Ротадаги ҳамма идишлар: овқат ташийдиган баклар, флягалар, котелоклар — ҳаммаси старшиналарга төвширилсиз! — деган буйруқ берилди.

Бу ўртада сойга иккита бензовоз келиб тўхтади.

— Сув келди! Сув! — деган қувончли қийқириқлар эшитилди.

Икки бенаовознинг атрофини бир зумда тумонат одам қуршаб олди. Сув тарқатаётган сержантларнинг тапига қулоқ соладиган одам йўқ.

Тўсатдан, учинчи ротанинг старшинаси — ноғчадан келган чиройли сержант нима ҳам бўлиб, бизнинг мўмин-мулойим Сало билан олиша кетди. Уларга солдатлар қўшилишди. Тўс-тўполон кўтарилиган эди, хайрият, рота командиримиз, старший лейтенант Харитонов келиб қолди. У бир сакрашда бенаовознинг устига чиқди-да, тўқпончасини қинидан чиқариб, осмонга устма-уст беш-олти ўқ узди.

— Бас! Бўлди! Старшиналар ўз жойларига турсин! Ҳар бир вазвод ўз навбати билан келсин сувга!

Харитоновнинг ўт чақнаган қўзларида, қорайиб кетган чеҳраси ва пистолетини ҳавода ўйнатиб буйруқ беришида илгари тасаввур қилиш қийин бўлган бир шиддат ва қатъият бор ади.

Шов-шув, гала-ғовур бирдан босилиб, ҳамма сафга турди. Бизнинг тўқсон кишилик биринчи ротага йигирма котелок — тўрт солдатга бир котелокдан сув

тегди. Сув лойқа, ундан бензин, чалов ҳиди анқиб турарди. Мен котелокни бошимга күтариб, чалов ҳиди анқиб турган сувни ичаётганимда, ёнимизга кетма-кет иккита студебеккер келиб тұхтади-да, үша томондан:

— Бормисан, шоир? — деган таниш овоз аштилди.

Биринчи студебеккериңнинг кузовида, тогдай уюлган қоплар устида, хушнуд тиржайыб Мирҳайдар үтиради! У құлини кузовга қўйиб, ерга сакраб тушди. Эгнида янги гимнастёрка, оғигда хром этик, бошида пилотка үрнига офицерлар киядиган фуражка. Мирҳайдар тунос кунгидан ҳам тұлишиб, аллақандай йилтиллаб кетген, агар пешанасидан оқсан жимир-жимир терни демаса, сақрода змас, курортда юрган одамга ўхшар эди.

— Бурнинг ерга тегай деб қопти-ку, оғайні! Айтудим-а, қийналиб ғоласан, деб! Үжарлик қилдингда, дұстим!

У ачиниб уст-бошимга қараб юзини бужмайтири-ди. Күзим беихтиёр бесұнақай катта ботинкаларимга, тердан шүри чиқиб, оқарыб қолган шимимга тушиб, қызарыб кетдиму дағаллук билан:

— Майли! — дедим, — үжарлик қилған бұлсам жазосини үзим тортятпман. Сенға нима?

Мирҳайдар дағаллигимни күнглига олмай мийигида кулимесиради-да:

— Сув ичасанми? — деб, камарига бояланған флягасини еча бошлади. Лекин шу пайт:

— Ву машиналарда нима бор? — деган таниш овоз аштилди.

Биринчи студебеккериңнинг ёнида гвардиячи капитан билан батальон штаб бошлиғи, соchlарига оқ оралған кекса старший лейтенант турар эди.

Мирҳайдар ғоя туриб:

— Машиналарда... макарон, ун, қанд-қурс бор, үртоқ капитан! — деб жавоб берди.

— Қоплар тушкылсын! — деди гвардиячи капитан түсатдан. Мирҳайдар оғзи очилганича бир зум ағрайиб қолди, кейин:

— Үртоқ гвардиячи капитан! — деб бақириб юборди. — Ахир, мен... үз хўжайиним, капитан Ногаевнинг буйруғисиз...

Даврон ака ранги ўчиб кескин қўл силтади:

— Юклар туширилсин! Ҳозир сувга боради машиналар!—деди. Сўнг, ёнида турган рота командири мизга юзланиб, машиналарга ишора қилди.

— Харитонов!

Унинг буйргуини изоҳсиз тушунган Харитонов биринчи машинага сакраб чиқди-да:

— Старшина Сало!.. Солдатлар!— деб бақирди.

«Сув» сўзини эшитган солдатлар кутилмаган бир шодлик билан машиналарга ёпирилиб чиқишиди. Саросимага тушган Мирҳайдар: «Ўртоқ капитан! Ахир бу... ахир!» деб дам Даврон аканинг олдига чопиб борар, дам машиналарга қараб югуради. Тўсатдан у: «Ахир... ахир хўжайиним бор-ку!» — деди-да, қирга қараб чопиб кетди.

Даврон ака ёнидаги штаб бошлиғига юзланиб:

— Ҳамма роталарни шу ерга йигинг!— деб буюрди.

Солдатлар оғир ҳансирашиб, ҳамон қопларни ағдаришар эди. Мен қаёқдандир югуриб келиб, биринчи машинага тирмашган Арслон билан Васяни кўриб, уларга қўшилмоқчи бўлдиму кузовда турган Харитонинг:

— Ўртоқ комбат! Ногаев келяпти! — деганини эшитиб беихтиёр Мирҳайдар кетган томонга қарадим.

Капитан Ногаев билан Мирҳайдар ёнма-ён югуриб келишарди. Ногаев дам пешанасига қўндириган фуражкасини бостиринкираб қўяр, дам камарини тўғрилаб, гимнастёркасининг этагини тузатар, вожоҳатидан худди кела солиб, муштлашиб кетадиган одамга ўхшарди.

Даврон ака бошини бир томонга сал қийшайтириб жимгина кутиб турагар, у жуда вазмин кўринар, лекин қисилган кўзларига қараганда, у ҳам асабий ҳолатда эди. Ногаев ерда тоғдай уюлиб ётган қопларнинг ёнидан ўтиб, Даврон аканиниг рўпарасида тўхтади. Унинг чиндан ҳам кавказликларга ўхшаган шиддатли юзида қон қолмаган, бурун катаклари керилган, кўзлари қисилган ёди.

Гала-ғовур бирдан тўхтаб, ҳамма жим бўлиб қолди.

— Ўртоқ Фозиев!— деди Ногаев «капитан» сўзини қўшмасдан.—Сизга ким рухсат берди бундай қилишга?

Гвардиячи капитан пешанасини тириштириб:

— Капитан Ногаев! — деди секин. — Юринг, четроққа чиқиб гаплашайлик!

— Йўқ, кечирасиз! — Ногаевнинг овози таҳдид билан янгради. — Мен четга чиқиб гаплашадиган жинойй иш қилганим йўқ! Бундай буйруқ беришга ким рухсат берди сизга?

— Вазият! — деди Даврон ака. — Тушундингиизми, вазият! — такрорлади у. — Ҳозир сув керак. Биринчи наебатда сув!

— Сув керак бўлса, марҳамат, таъмин этинг! — кичқирди Ногаев. — Лекин сиз... батальон ихтиёрида бўлмаган машиналарнинг юкини тушириш ҳақида буйруқ беришингиз!..

Ногаев Даврон аканинг ёнига келиб тўхтаган Оляни кўриб, бир зум дудуқланиб қолди.

— Сиз бу ишингиза учун полк командири олдида жавоб берасиз! — деди Ногаев.

— Бас! — Даврон ака тўсатдан бақириб юборди. — Мен ҳеч қачон ўз буйруқларим учун жавоб беришдан бош тортган эмасман! Бу сафар ҳам бош тортмайман!

— Яхши... лекин... — Ногаев қулт этиб ютпиди. — Сиз нима учун менинг ишларимга тўғаноқ бўлаётганингизни биламан. Сиз мени...

— Гапни айлантирманг! — деди комбат ғижиниб.

— Бўпти! Белобородов олдида гаплашамиз! — Ногаев шитоб билан бурилди ва текис жойда қоқилиб суриниб, келган томонига югуриб кетди. Уининг кетидан Мирҳайдар ҳам лўкиллаб жўнаб қолганди...

Гвардиячи капитан жим бўлиб қолган солдатларнинг ёнидан ўтиб, биринчи машинага чиқди. Роталар машина атрофини қуршаб олган, юзлари чўяндай қорайган солдатлар, жунбушга келган офтобда қўйилаётган терларини артиб, қуруқшаган лабларини ялаб, комбатга жимгина тикилиб туришар эди.

— Ўртоқлар! Солдат ва сержантлар! — гвардиячи капитан бошидан фуражкасини олиб, кафти билан пешана терларини сидириб ташлади. — Бу ердан Йигирма километр нарида сапёрлар ҳозир қудуқ қазишяпти. Ҳамма куч, ҳамма техника ишга солинган. Бир-икки соатдан кейин сув бўлади. Лекин биз бу ерда сув келишини кутиб, осмонга қараб ётолмаймиз!.. — Комбат сўзидан тўхтаб, сукутга чўмган солдатларга тикилди.—

Ҳозирги вазият — шиддатли жангдан қолишмайди! Умуман, бу юриш, бу жазирама саҳро, бу сувсиз чўлда босиб ўтилган ҳар бир километр йўл... япон империалистларига, мамлакатимиз биқинида бизга таҳдид солиб ётган Квантун армиясига берилган бир зарба демакдир! Шунинг учун шиддатли жангга кирган солдатдан қандай жасорат, ирова, матонат талаб қилинса, ҳозир сизлардан ҳам шундай ирова ва матонат талаб қилинади... Мен сизларда бу ирова, бу матонат етарли эканига аминман!

Капитан пешана терларини яна сидириб ташладида, овозининг борича:

— Батальон! — деб буюрди. — Рота-рота бўлиб сафлан!

* * *

Яна ўша бир-бирига туташган яssi адирлар, ўт-ўланлари офтобда куйиб, оқариб қолгани шўрхок сойлар, уғқа туташиб кетган бепоён тақир саҳро...

Эрталабки кулги, ҳазил-мутойиба, ғовур-ғувур тинган, солдатлар қуруқшаган лабларини ялаб, чўяндай оғир сёқларини базур кўтариб, оҳиста тебраниб боришади.

Ана, биринчи қир орқада қолди, иккинчи қир ортидан учинчи қир ҳам кўринди.. Типпимни тишимга қўйиб, энг сўнгги кучимни йиғиб олдинга интиламан, лекин иккинчи қирга чиқа олдимми, йўқми — билмайман. Фақат Арслон қўлимдан пулемётимни олгани эсимда. Бир маҳал кўзимни очсан... қир ён бағрида ётибман. Ҷонимда учбурчак чодирнинг дўппидек сояси. Ёнимда Оля, пилоткаси билан юзимни слиб ўтирибди.

Олянинг бошида фуражка. Фуражка унга жуда ярашгану, офтобда сал қорайган мулойим чеҳраси тагин ҳам очилиб кетган. Негадир капитанга айтган гапларим эсимга тушиб, кўзимни қайта юмдим: биладими, йўқми?

Оля қимирлаганимни кўриб, тепамга энгашди.

— Ҳа, қалайсан, Мансур? — у кўаларини сал сувиб, кулимсирайди, — мен гвардиячи капитаннинг ҳамشاҳарлари иссиққа чидамли бўлади десам, биздан ҳам баттар экансизлар-ку!

Олянинг кинояси оғир ботади-ю, бор кучимни тўплаб қаддимни ростлаб ўтираман. Қуёш уфқа ёнбошлаган, лекин ҳамон ўт пуркайди, жизиллағади. Кунботиш тарафда, то олисдаги қирларга қадар, ҳар жой-ҳар жойда бир чодир. Чодир тагидан менга ўхшаб офтоб уриб, йиқилиб қолган солдатларнинг оёқлари кўринади.

— Сен бошингни сояга яшириб қимирламай ёта-вер! — деди Оля. — Йиқилиб қолдингми, энди номус қилмай қўя қол. Мен бошқа солдатларга қарай...

Тўсатдан қулсғимга гувиллаган бир овоз чалинди. Оля иккимиз баравар ўгирилиб қараймиз. Узоқдаги адирнинг ён бағрида бир нима ўрмалаб келяпти! Йўқ, бу сувга кетган юк машинаси эмас, юриши тез, ўзи ҳам қора қўнгиздай кичкина. «Қўнғизча» йўл ёқасидаги ҳар бир чодирнинг ёнида тўхтаб-тўхтаб келяпти...

— Полковник Белобородов! — дейди Оля ва фурражкасини тўғрилаб ўрнидан туради.

«Оббо! Шарманда бўлдим-ку», дейман ичимда ва яна сояга чўзилиб кўзимни юмаман. Бир лаҳзадан кейин «амфибия» тепамда тўхтайди. Эркак кишининг бўғиқ, аллақандай чарчоқ овози эшитилди:

— Батальонда неча киши йиқилиб қолди?

— Анча бор, ўртоқ полковник! Кўпчилиги ёш солдатлар...

Секин кўзимни очаман. Тепамда, Олянинг ёнида, кул ранг гимнастёркасининг кўкрагида Совет Иттифоқи Қаҳрамонининг Олтин Юлдузи, полковник Белобородов турибди! У тунов кунгидай бардам эмас, кўзлари киртайиб қолган, юзи офтобда қорайган, ўзиям жуда ҳоргин кўринади. Бор кучимни йигиб, қаддимни ростлаб ўтираман.

Оля кўзини мендан узиб, полковникка қарайди.

— Бунга пулемёт эмас, автомат беришсаям бўларди. Ёш солдат...

Полковник индамай ёнимга чўккалааб, елкамга қўлини қўяди.

— Нима бўлди, солдат? Чарчаб қолсан-да, а?

Унинг кексаларга хос бўлакча меҳр билан «солдат» дейиши қулсғимга Салонинг «ўғлим» дейишидай мулойим эшитилади-ю, уялиб ерга қарайман.

- Ўзим ҳам билмайман, ўртоқ полковник...
- Сувдан борми? — дейди Белобородов, шофёрга қозланиб.
- Йўқ, ўртоқ гвардиячи полковник. Бинода бир томчи ҳам сув қолмади.
- Флягами ол!
- Шофёр флягани беради, полковник уни менга узатади.
- Ма, ич, солдат!
- Сув илиқ, лекин боягидай чалов ҳиди йўқ, аксинча, шакардай ширин. Назаримда, томир-томирларимга ҳаётбахш бир нарса тараалгандай бўлиб яйраб кетаман. Флягани оғзимдан зўрга олиб, полковникка қарайман.
- Қалай? — дейди у кулимсираб.
- Раҳмат, ўртоқ полковник! — мен тиззаларим қалтираб бўлса ҳам ўрнимдан тураман.
- Қалай, ўзинг юриб кета оласаними, солдат?
- Ҳаракат қиласман, ўртоқ полковник!
- Мана бу бошқа гап! — дейди полковник мийигида кулиб. — Сени қара-ю, шундай чиройли қиз исикни писанд қилмай кулиб турибди. Сен бўлсанг сувайиб ётибсан. Яхши эмас. Ҳозир сувга кетган машиналар келади. Балки олдингдан чиқиб қолар...
- Ер остидан Оляга қарадим. У негадир қизариб, гимнастёркасининг тутгасини ўйнаб турарди
- Машинага чиқ, Олењка, — деди полкоаник. — Солдатлардан ҳол-аъзвол сўраб, айланиб келайлик... Комбат сувга кетгандир-да?
- Худди шундай, ўртоқ полковник! — деди кичик лейтенант.
- Ҳмм... анча солдат йўлда ётибди... Хўп, яхши, машинага чиқ!
- Белобородов менга қараганини кўриб, секин йўлга тушдим.
- Қаршимдаги тепаликнинг устида юк машинаси кўринди... Капитан бўлса-я!..
- Шу топда мен капитанни кўришдан, тўғрироги, у мени бу аянчли аҳволда кўриб қолишидан қўрқардим. Шоша-пиша ўзимни қандайдир чуқурга отдим.
- Лекин машина гувиллаб келиб, тепамда тўхтади. Кимдир ундан сакраб тушганини сезиб, қизариб-бўзариб ўрнимдан турдим. Рӯпарамда... Даврон ака турар-

ди! Гимнастёркасининг ёқаси кўкрагигача очилган, қорайган юзида маржон-маржон тер, кўзларида ҳайрат.

— Сен нима қилиб ётибсан бу чуқурда?

— Ҳа, шу... ўзим!..

— Қойил! — капитан ғижиниб яна бир нима демоқчи бўлди-ю, гувиллаган овоани эшишиб, орқасига ўгирилиб қаради.

Мотор қаттиқроқ ўкириб, қаршидаги тепанинг устидаги студебеккер кўринди. Машинанинг кузовида кимдир кабинага сяянниб турарди.

Ногаев!

Студебеккер комбатнинг машинасига етмай тормозларини ғичирлатиб тўхтади. Ногаев кузовдан сакраб тушиб, кабинанинг эшигини очди. Кабинадан баланд бўйли, ёш бўлса ҳам қорин сола бошлаган подполковник тушиб, машинанинг ёнида оёқларини кериб тўхтади.

Капитан Ногаев чиройли мўйловини ғалати қимирлатиб кулимсиради:

— Мана, марҳамат, ўртоқ подполковник...

Подполковник индамай комбатга тикилиб турар, комбат ҳам, бошини бир томонга этиб, унга қадалиб ўлган эди.

— Капитан Фозиев! — деди ниҳоят подполковник.

Комбат фуражкасини тўғрилаб, қақроқ ерни таптап босиб подполковникнинг олдига борди.

— Эши таман, ўртоқ подполковник!

Подполковник қаддини ростлаб:

— Нимани эшиласиз? — деди жеркиб, — ундан кўра жавоб беринг. Полк ихтиёридаги машиналарни тортиб олишга ким рухсат берди сизга?

— Ўртоқ подполковник...

— Жавоб беринг!

— Ўзингиз кўриб турибсиз, вазият оғир, ўртоқ подполковник. Сув...

— Вазият оғир бўлса қимматбаҳо юкларни ағдариб, машиналарни тортиб оласизми?

— Ўртоқ подполковник! — Комбатнинг овози тўсатдан янграб кетди.— Мен бу ишни ўзим учун эмас, солдатларни ўйлаб қилдим...

Четроқда турган Ногаев асабий кулимсираб елкасими учирди.

— Эшитдингизми, ўртоқ подполковник! Бу киши солдатларниң ғамхўри-ю, сиз билан биз унинг душманимиз!

Комбат ялт этиб унга қаради, бирдаи ранги ўчиб:

— Гапни бурма, Ногаев! — деди титраб. — Агар сен ҳам солдатни ўйлайдиган бўлсанг, арзимаган нарсага шовқин-сурон кўтариб юрмасдан, солдатнинг жонига ора киришни ўйлардинг!

— Мен ўзимга топширилган вазифани ўйлайман! — деди Ногаев бурун катаклари пирнираб. У яна бир нима демоқчи эди, лекин подполковник оғзидан гапини олди.

— Гоби саҳросидан пиёда ўтишни мен ўйлаб чиқармадим, капитан Фозиев! — деди у вазминлик билан. — Бу — қўмондоиликниң стратегик плани асосида бўлаётган иш...

— Тўғри, ўртоқ подполковник. Лекин бу плани амалга оширадиган яна ўша солдат. Демак, унинг қадрини билишимиз, оғирини енгил қилишимиз керак. Бу солдатларнинг кўпчилиги тўрт йил урушган, ҳамма машаққатларни бошидан кечирган одамлар...

Гапга яна Ногаев аралашди.

— Эшитсанами, ўртоқ подполковник? — кинояли кулди у. — Бу кишига қўмондоиликниң стратегик плани ёқмаяпти. Балки, сиз умуман бу урушга қарниидирсиз?

Комбат бирдан кўзлари ёниб, Ногаевга қаради. Лекин подполковник уни гапиртиргади.

— Бас! — деди подполковник ва ер остидан машинада ўтирган солдатларга қараб қўйди.

У солдатлар олдида ади-бади айтишиб нотўғри қилаётганини сезиб қолди шекилли, студебеккернинг орқасига ўтаркан:

— Капитан Фозиев! — деди. — Қани, бу ёққа келинг-чи!

Комбат билан Ногаев унинг кетидан студебеккерниң орқасига ўтиши. Гаплари эшитилмай қолди. Фақат кескин, бўғиқ овозлар қулоққа чалинарди.

Комбат чорак соатдан кейин қайтиб келди. У боягидан ҳам қорайиб кетганга ўжшарди. Ёнимдан ўтаркан, қисқа қилиб:

— Чиқ машинага! — деб буюрди.

* * *

Бу воқеанинг эртасига: бундан буён кечаси йўл юриб, кундузи иссиқда дам олинсин, деган янги буйруқ чиқди.

Штабнинг қарори тўғри: кундузи иссиқдан кўра кечаси салқинида юрган яхшироқ. Лекин қабариб, қонталашиб кетган товонлар барибир чўғ теккандай безиллайди. Ҳар соатдан кейин ўн минут дам олиш ёълон қилинганида, йўл ёқасига таппа-таппа ташлаб, зирқираб оғриган оёқларимизни осмонга кўтарамиз. Тагимиздаги қақроқ ер худди пар тўшакдай юмшоқ кўринади, бошлар ерга тегиши билан кўзлар илина бошлайди. Вақт тун ярмига яқинлашгана уйқу шундай қийнайдики, юриб кетаётган солдатларнинг хурраги эштилади, бирор уйқусираб қоқилиб йиқилади, бирор бунга кулса, бирор сўқинади... Баъзан шундай пайтларда кимдир секин ашула бошлайди:

Малинка, малинка, малинка моя...

В саду ягода малинка, малинка моя...

Ашулага олдин биринчи қатордаги солдатлар, кейин бутун рота қўшилади. Аста-секин бошқа роталар ҳам ашула бошлайди-ю, коронгиликка чўмган бепоён саҳро ларзага келади... Назаримда, саҳро билан бирга солдат қалби ҳам ларзага туплади, юмилиб бораётган кўзлар чарақлаб очилиб кетади, қадамлар зарб билан урила бошлайди. Сал ўтмай, ашулага қарсак қўшилади. Кимдир ротанинг олдига тушиб, рақс бошлайди. Ён-ёқадан завқланган овозлар эштилади:

— Яша, Оля!

— Қиз әмас, бамисоли олов!

— Бу оловнинг талтига бир тушиб кўр — ёндиради!

— Ёнсанг ҳам, шундай қизнинг таптида ёнсанг қанийди-я!

Қарсаклар авжига чиқади. Ён-ёқадан: «Ха, ҳаҳ, ҳаҳ, ҳаҳ!» деган жўр хитоблар янграйди.

— Қани, юрагида ўти бор бирор солдат йўқми? Бор бўлса даврага чиқсин!

Тўсатдан:

— Яша, Арслон!

— Қойил! — деган хитоблар янграйди.

Мен қоқиниб суриниб бўлса ҳам олдинга ўтаман. Ўтаману, уч-тўртта қўл фонарлар нурида юришдан тўхтамай, раҳсга тушиб кетаётган Оля билан Арслонни кўриб, оғриқ ҳам эсимдан чиқиб кетади. Арслон пилоткасини пешанасига суриб, қўллари билан сонларини аёвсиз шапатилаб Олянинг атрофида парвона бўлар, Оля ҳам бўш келмас, бежирим этикчаси билан шафқатсиз ер депсиниб, дам унинг атрофида айланади, дам муком қилиб, орқаси билан юриб узоқлашиб кетар эди. Қарсак, ҳуштак ва қичқириқлар тобора авжига минади, кейин:

— Яша, Вася!

— Бормисан, Колбаскин! — деган житоблар эшитилади.

— Шоирмисан? — Арслон коронгидан пилоткаси билан бўйинни, юзини артиб ёнимга келади. — Бало-да, бу Оля! Бир ўзи ўн йигитни чўқийди-я, қуриб кетмагур!

— Чарчасанг, нима қилардинг рақс тушиб?..

— Қизиқсан-а? — деди Арслон кулиб. — Шундай қиз таклиф қиласди-ю, чарчоқни ўйлайсанми? Хўш, ўзинг қалайсан, оғайнини?

Тўсатдан, қаердандир, орқадан — зим-зиё чўлнинг қаъридан гувиллаган овоз эшитилди, сўнг, коронгилекни машина фараларининг шуъласи ялаб ўтди. Лаҳза ўтмай оғир тўпларни шатакка олган тягачлар ёнгинамиздан «ғиз-ғиз» ўта бошлади...

— Тўхта! — деди Арслон. — Пулемётингни менга бер! Мен тягачларга осилиб оламан. Қўрқма: йигирма-ўттиз чақиридандан кейин тушиб, сенларни пойлаб ётаман!

— Агар булар бошқа йўлдан кетса-чи?

— Қанақа бошқа йўл? Бу саҳрода фақат битта йўл бор!

Арслон автоматини бериб, пулемётимни олди-да, коронгилекка, машиналар ғиз-ғиз ўтаётган томонга шўнгиди.

Пулемётни Арслонга топширгандан кейин бирдан енгил тортдим, лекин енгил тортганим ҳам қурсин, сал ўтмай юрагимни ваҳима боса бошлади. «Арслон бу поёнсиз саҳрода адашиб кетмасмикан? Агар артиллери яхши бошқа ёққа кетаётган бўлса-чи? Бирбиirimизни қандай топамиш? Пулемёт нима бўлади?..»

Саҳар пайти аллақандай бир кўлга яқинлашдик. Ғира-шира қоронғиликда олдинда нимадир ялтирагандай бўлди, кейин билсам, бу шўр кўл экан. Кўлга яқинлашганимизда дам олишга буйруқ берилди.

...Мен қанча ухлаганимни билмайман, юзимга офтоб тегиб уйғониб кетдим. Уйғониб кетдиму, Арслонни эслаб апил-тапил ўрнимдан турдим.

Полк рота-рота бўлиб, катта шўрҳок кўлнинг айланасига жойлашган, бировлар кўлда чўмилар, бировлар кийим-кечакларини юваб офтобда қуритар, бировлар сув иситар эди.

Юрагим така-пука, старшина Сало тугул, сержантга ҳам айтишга тилим бормай, у ёқ бу ёқни айланниб келдим. Арслоннинг қораси кўринмайди! Юрагимдаги ваҳима тобора ортиб бораради: ҳозир йўлга чиқишга буйруқ берилса нима қиласман? Пулемётинг қани, деса нима деб жавоб бераман?.. Арслон-чи? Бу белоён сахрода адашиб кетмадимикин? Битта-ю битта ҳамқишлоғимдан, акамдай суюниб қолган бу ажойиб йигитдан айрилиб қолмасмиканман?

Бир соатча у ёқ-бу ёқни айланниб келдиму, ахири чидай олмай сержантни четга тортиб, бўлган воқеани айтиб бердим. Сержантнинг кўзи ола-кула бўлиб кетди. У қаёққадир югуриб кетиб, старшина Салони бошлаб келди.

— Хўш, нима гап ўзи, ўғлим?

У шу топда «ўғлим» демасдан, бақириб-чақириб берса кошки эди!

— Ҳа, шу... ўртоқ старшина. Кечаси Арслон пулемётни олиб, машинага осилиб кетувди...

— Машинага осилиб кетишга унга ким рухсат берди?—Сало сержантга қаради. Жиккаккина сержант иягини осмонга кўтариб, гоз турди.

— Ҳеч ким, ўртоқ старшина!

Сало пилоткаси билан жимир-жимир терлаган ялтирок бошини артди.

— Топиши керак Арслонни. Топмасак чатоқ бўлади!.. Колбаскин!— деб чақириди у.

Боши чодирда, оёги офтобда, мудраб ётган Вася апил-тапил ўрнидан турди.

— Эшитаман, ўртоқ старшина.

— Оғайнинг пулемётини йўқотиб қўйибди-ю, сен

бўлсанг оёғингни осмонга қилиб ётибсан! Боринглар, ернинг тагидан бўлса ҳам топиб келинглар!

Вася иккимиз кўл ёқалаб кетдик.

— Нима бўлди ўзи? Қачон йўқотдинг? — деди Вася, оппоқ киприкларини пирниратиб.

Мен бўлган воқеани айтиб бердим.

— Арслон бўлса қўрқма! — деди Вася. — Бало ҳам урмайди унга! Ётгандир бир жойда хуррак отиб! Сен у ёқча бор, мен бу ёқни қарай!

Қуёш шўр кўл ортидаги ясси адирларга ёнбошлигини, кундузги ҳарорат хийла пасайган, афтидан бугун бу ердан жилмасак керак, солдатлар ҳали ҳам дам олиб ётишар, дала ошхоналарининг мўриларидан тутиш кўтарилимоқда эди.

Старшина айтган ярим соат әмас, бир соатга яқин вақт ўтди ҳамки, Арслонниг дарагини топмадим... Энди нима қиласман?

Узоқдан Вася кўринди. Юрагим ўйнаб унга қараб чопдим.

— Топилдими?

— Қаёқда! — Вася кўзини солиб қочди. — Юр, сени комбат сўрайлати.

Комбат билан старшина Сало вазвод жойлашган жойдан берироқда, дала ошхонасининг ёнида гаплашиб туришарди.

— Ўртоқ гвардиячи капитан!..

— Рапортни қўйиб тур! — деди капитан. — Арслондан дарак борми?

— Йўқ...

Старшина савол назари билан капитанга қаради.

— Нима қиласмиз, ўртоқ капитан?

Капитан ҳамон ер остидан менга тикилиб туар, унинг хиёл ранги ўчган, лаблари қисилган эди.

— Бунақа ишлар учун нима қилиш кераклигини билмайсанми? Иккаласини ҳам... ҳарбий трибуналга бериш керак! — Капитан шундай деди-да, шартта бурилиб кетди.

Мен жон ҳолатда унинг кетидан югурдим.

— Ўртоқ капитан!..

— Хўш?

— Биздан хато ўтди. Лекин... Арслон яхши йигит...

— Йўқ! — капитан кескин бурилди, тўсатдан

кўалари кисилиб.— Эсингдами,— деб сўради,— тунов куни, сафарга чиқишдан олдин, мен сизлардан бир нарсанни илтимос қилгандим!

— Эсимда, ўртоқ капитан...

— Йўқ, эсларингдан чиқибди. Ҳозир, уруш пайтида бундай қилиш, ишониб топширилган қуролни бирорга бериб юбориш — жиноят!..

Даврон аканинг гапини Олянинг: «Ўртоқ капитан!» деган овози бўлди. Оля, бир ўрим йўғон сочи орқасида ўйнаб, ниманидир боши уара айлантириб, биз томонга қараб чолиб келарди.

— Қани, ўртоқ капитан, битта ўйнаб беринг!

— Оленька! Бошқа пайт..

— Йўқ, йўқ, бунақаси кетмайди!— Оля қўлидаги хатни орқасига яшириб, бир-икки қадам чекинди.

— Агар ўйнаб беришга арзимайдиган хат бўлсанчи? Ҳўп, мана!..— Капитан бир-икки марта ер деп-синган бўлди-да, Олянинг қўлидан «шап» ушлаб хатни юлиб олди, сўнг, конвертга кўз ташлади-да, Шоша-Пиша нари кетди.

— Ўртоқ капитан!— Қизанинг лаблари тўсатдан аллақандай титраб кетди.— Бу ўша... Сиз кутган хат эканими?..

Капитан кўзини хатдан узиб, Оляга қаради. Унинг хаёли қаёқдадир бошқа ёқларда эди!

— А? Ҳа, ҳа... Раҳмат, Оленька!

Капитан йўлида давом этди. Оля эса, пастки лабини тишлаганча, бир-бир босиб, кўлга қараб кетди.

«Хат Саломатхондан!» Сафарга чиққач хаёлимдан кўтарилигани эски дард бир зум қайта эсимга тушди. Лекин ҳовир буни ўйлайдиган ҳолда эмас эдим. Нажот кутиб старшинага қарадим. У томоқ қириб:

— Ўртоқ капитан!— деди.— Буни нима қиласиниз энди?

Капитан тўхтади.

— Буни ҳозирча гауптвахтага юбор!— деди капитан, сўнг, бу саҳрова гауптвахта йўқлиги эсига тушди шекилли, қўлини силтади.— Арслон топилгунча нарядга юбор! Кечалари соқчиликда турсин, ошхонада ишласин! Шу!

Хаёлимга: «Бу одам... Ўша кунги гапларим учун мендан ўч олмоқчими», деган фикр келди. Бу фикр-

нинг бемаънилигига ақлим етса ҳам негадир ўқсиб, кўзим жиқ-жиқ ёшга тўлди...

* * *

Кечаси наряддан қайтиб, энди уйқуга кетганимда тревога эълон қилинди.

Саҳрони танк гилдиракларининг шарақлаши, баравар ишга тушган юзларча моторнинг гувиллаши тутиб кетган эди.

Қоронғиликда:

— Биринчи рота, сафлан!

— Учинчи вазод, сафлан! Ортимдан марш! — деган овозлар эшитиларди.

Кўл бўйида қаторлашиб турган студебеккерларнинг ёнида бизни рота командиримиз билан яна бир нотаниш офицер кутиб олиб, вазодимизга ажратилган машиналарни кўрсатишиди.

Мен капитаннинг кўзига тушишдан қўрқиб, машинага тезроқ чиқиб олдим.

Сал ўтмай, «Қўзғалдик!» деган хитоб эшитилди. Уфқдаги қирлар устида бир чети кемтиқ саргиш ой ботмоқда эди. Унинг аллақандай совуқ шуъласида кенг саҳро, теварак-атрофдаги ясси адирлар, кўзгудай ялтираган шўр кўл, ҳаракатга кирган қўшинилар аллақандай сирли ва улуғвор манзара касб этган. Солдатлар ҳам худди шу дақиқанинг бутун улуғворлигини хис қилгандай, сукутга чўмишган эди. Ёлгиз Вася Колбаскин питирлаб, жойида ўтиrolmas, ўрнидан туриб: «Қойил! Ҳамма ёқни танк босиб кетибди-я!. Вой-бў-ўй, машина деганлари жоннинг роҳати эканку!» — деб пиқир-пиқир куларди. Нихоят, у ҳам тинчиб жойига ўтириди.

— Самурайдан келадиган бало танклардан ортмас. Яқинроқ кёл, оғайни, жиндак мизғиб олайлик!

Мизғиш қаёқда? Кўзимни юмишим билан яна кечаги ўйлар хаёлимни чулғаб олди. Арслонга нима бўлди? Наҳот келиб-келиб бу олис мусофири юртда, Хинган тоғларида шундай дўстимдан айрилиб қолсам? Агар у қайтиб келмаса ўзим нима бўламан?..

Кўзим илиндими, йўқми, билмадим, бир маҳал машиналарнинг яраланган шердай ўкирган овозини эшитиб, уйғониб кетдим.

Тонг отган, биз барханлар орасида турардик. Аллақандай намхуш, тупроқдай майин бу қумликларнинг чегараси кўринмас, пўртанадай «тошиб», бир-бидан баландлашиб кетган кўкимтири барханлар уфқида тақалиб, осмон билан тулашиб кетган эди...

Олдимиздаги машиналар, тягачлар, ҳатто виллислар ҳам ҳар жой-ҳар жойда қумга тикилиб, тўхтаб қолган, солдатлар қўлларида белкурак, шох-шабба ва шувоқ йиғишга киришишган эди.

— Белкураклар олинсин! Шувоқ йиғилсин! — олдинги машиналарнинг биридан сакраб тушган старший лейтенант Харитонов кимнингдир белкурагини олиб, қум орасидаги шувоқларни чопишга киришди.

Биз ҳам машинадан тушиб шувоқ юлиш, тол ва жингилга ўхшаш қизғиши чакалакни буташга киришдик.

Солдатлар, йиғилган шох-шаббаларни гилдиракларнинг тагига ташлашаркан, истеҳзоли кулишар, асқия қилишарди:

— Йўқ, бунаقا машиналардан ўзимизнинг ўнинчи трамвай тузук экан!

— Бўлмасам-чи? Ўнинчи трамвайдада ҳозиргacha анча жойга бориб қолардик!

— Ҳалиям бўлса ўзимизнинг трамвайдада кетаверайлик!

— Йўқ-э, ёмон йўлдош ёлчитмас қабилидан бўлмасин, ёрдамлашиб юборайлик, биродарлар!..

Дарҳақиқат, қумлик бошлангач, ҳамма оғирлик яна шўрлик пиёда аскарларнинг зиммасига тушди.

Кечагина тягачларга миниб: «Дала маликасига оташин саломлар», деб ёнимиздан кулишиб ўтган артиллериячилар қумга киргач, «дала маликаси»нинг ёрдамига муҳтож бўлиб қолишиди. Ҳеч бир ғовни писанд қилмайдиган тягачлар, ўкирганда саҳрони бошига кўтарадиган студебеккерлар, ҳатто танклар ҳам барханлар орасида гилдираклари урчиқдай айланиб тикилиб қолар, биз уларнинг тагига саксовул ва шохшабба босиб, тўпларнинг гилдиракларига эса арқон боғлаб, «Ҳа, олдик! Қани, ҳа яна олдик!» деб ҳар бир қум уюми, ҳар бир барханга судраб олиб чиқар эдик. Қумлик эса чеки кўринмас, гўё бутун олам чексиз барханларга айлангану, биз ундан ҳеч қачон чиколмаймиз. Фақат баъзи-баъзидагина аллақандай таш-

ландиқ қўргонлар, уч-тўрт уйдан иборат мўгул қишлоқлари учрар, гоҳо-гоҳо ярим хароба будда ибодатхоналари кўриниб қолар эди. Четан деворлар билан ўралган қўралар ёнида тўлиғига тушадиган уаун чакмон кийган чоллар, кокил қўйган, мунчоқдай митти кўзлари ялт-ялт этган болакайлар кўринар, улар бизни жимгина қарши олиб, жимгина кузатиб қолишар эди....

...Хинган қумликларига кирганимизниг учинчи ё тўртинчи куни кечқурун, баланд бир барханга чиқаётганимизда, гвардиячи капитан билан юэма-юз келдим. У батальон штаб бошлиги — соchlарига оқ оралаган старший лейтенант билан йўл ёқасида туар, ёнларидан ўтаётган машиналар тиқилиб қолса, кифтини тутиб, солдатларга ёрдамлашар эди. Капитан Колбаскинни кўриб ҳазиллашди:

— Бир ой колбаса емагандай шалпайиб қопсанку, Василёк?

— Колбаса-ку, ўзимда бор,— деди Вася териси шилиниб қип-қизайл бўлиб қолган буринни жийириб.— Аммо бир ой йўл юриб битта самурайни кўрмагандан кейин кайфинг бузилар экан, ўртоқ капитан.

Комбат кулди.

— Самурайларни кўргани кўзинг учяптими? Бўлмаса билиб қўй: ҳар бир қум уюми самурайларнинг битта ротасига тенг. Ҳар бир барханга чиққанингда Квантун армиясининг битта ротасини тор-мор қилдим, деб ҳисоблайвер, Колбаскин!

Мен унинг кўзига тушишини истамай, машинанинг чап томонига ўтиб олган эдим, Даврои ака тўсатдан:

— Солдат Муродов!— деб чақириб қолди.

Олдига боришга мажбур бўлдим. Капитан уйқусизликдан киртайиб кетган кўзларини четга олиб:

— Кичик лейтенантнинг тоби қочиб қолди,— деди,

— ҳу ана у машинада ётиби...— У барханинг тепасида турган студебеккерга ишора қилди.— Сени сўраяпти. Бор, Харитоновга ўзим айтиб қўяман...

«Демак, Оля бечора менга бўлишибди да! Демак, ўша куни капитан унга ҳеч нарсани билдирамабди да!» Бархан тепасига югурниб чиққунча ўпкам оғзимга тиқилиб, ҳансираф қолдим. Лекин пастдаги манзарани кўришим билан чарчоқ ҳам эсимдан чиқиб кетди. Пастда — мен чиқкан барханинг этагида, атрофи

қумликлар билан ўралган кўм-кўк бир водий ёстаниб ётар, водийнинг кунгай томонида эса, қалин дарахтзор орасида гўё қизил мармардан қурилган катта бир ибодатхона кўринар, ибодатхонанинг қизғиси деворлари, ўймакорлик билан ясалган жимжимадор томи ботаётган қуёш нурида ялтираб турарди.

Оля машинанинг кузовида, саидиқ ва қутилар орасида, шинелига ўраниб, гужанак бўлиб ётар, унинг кўзлари юмуқ, иситмаси баланд бўлса керак, узунчоқ озғин юзи ловиллаб ёнар, лаблари қовжираб қолган эди.

Мен унинг ёнига тиз чўқдиму, нима қилишимни билмай:

— Ўртоқ кичик лейтенант, сув ичасизми? — деб сўрадим.

Оля чуқур ботгани кўзларини бир очиб яна юмди, қуруқшаган лабларини ялаб: «Совуқ», деб пичирлади.

Мен шинелимни ечиб унинг устига ёпдим. Оля чиндан ҳам титрамоқда эди.

— Безгак тутгандай қалтираяпман! — деди у кўвани очмай.

Машина шарқираб оқаётган сойдан ўтиб, баланд чинор тагида тўхтади. Биз ибодатхонанинг тош қўргони ёнида турардик. Бошқа машиналар ҳам биринкетин келиб тўхтамоқда, олдин етиб келганлар ибодатхона олдидаги очиқ майдонга чодирларини тика бошлишган эди.

Машинага гвардиячи капитан чиқди. У менга қарамай, ёнимга чўнқайиб, қизнинг пешанасини ушлади.

— Медсанбатга борасанми, Олењка?

Оля кўзини очди-да, Даврон ақанинг қўлини ушлади.

— Йўқ, ўтиб кетар... фақат совқотяпман!..

— Айтдим, гулхан ёқишаپти... Тушасанми?

— Майли... — Оля шинелига яхшироқ ўрнидан турди.

Кун ботган, боя олтиндай товланиб тургай ибодатхона энди жигар ранг тусга кирган эди. Ибодатхонанинг Темир панжарали дарвозаси олдида тўпигига тушадиган узун қора дуҳоба чакмон кийган икки кекса монах турар, лабларида сохта табассум, улар

солдатларга таъзим қилас, митти кўзларини қисиб илжайишар, лекин ҳеч кимни ичкарига қўйишишмас эди.

Чинор тагида чиндан ҳам ловиллаб гулхан ёнарди. Даврон ака пастда, сой томонда кўринган ғарамга ишора қилиб, бир қулоқ қуруқ пичан олиб келишни буюрди. Мен сойда қаторлашиб турган юк машиналари орасидан ўтиб бораётудим, тўсатдан:

— Мансур! — деган овоз аштилди.

Қарасам — Мирҳайдар, қўлида бир фуражка олма, тиржайиб турибди.

— Олма? — дедим ҳайрон бўлиб. — Қаёқдан олдинг?

— Топамиз-да! — деди Мирҳайдар керилиб. — Ма, ол. Сен бўлсанг... Ҳалиям юрибсанми чоригингни судраб? — У қип-қизил катта бир олмани қўлимга тутқазаркан, яна ишшайиб. — Юр қиттай-қиттай қилайлик!.. — деди ва қўлимдан ушлаб судрай бошлади. Шундагина мен унинг кайфи тарақ эканини сезиб қолдим... Арслонни ўйлаб кўнглимга қил сифмай турган пайтда «қиттай-қиттай» дейди-я!.. Қўлимни тортиб олиб, ғарамга югуриб кетдим.

Мен бир қулоқ қуруқ личанни кўтариб борганимда, Даврон ака штабга кетган, Оля эгнида шинель, гулханга қуруқ буталарни ташлаб, хаёлга чўмиб ўтиради. Бирдан чўнтағимдаги олма эсимга тушиб, уни олиб узатдим.

Олянинг кўзларида болаларга хос қувонч акс этди.

— Олма? Ростакам олма-ку? Қаёқдан топдинг?..

— Топдим-да! — дедим гердайиб.

Оля олмани кафтлари орасига олиб, ҳидлади.

— Бирам хушбўй, бирам хушбўйки!.. Агар... — деди у кўзларини гулхандан узмай, — агар ҳозир бир қултум вино бўлса ичардим...

— Спиртми?

— Йўқ! — Оля ижирғаниб юзини буриштирди. — Вино бўлса дейман. Биз гарбда, Австралияда турганимизда, шунаقا винолар бўлардики...

Оля бошимга иш тушиб, бир оғиз илиқ гапга зор бўлиб турганимда чақирди! Мен ундан шундай миннатдор эдимки, агар у анқонинг уруғини топиб кел деса ҳам йўқ демас эдим!..

Ўрнимдан сакраб турдим.

— Қаёққа Мансур? — деди Оля.

— Ҳозир келаман...

Мирҳайдар боя сой бўйида қаторлашиб турган юк машиналарининг бирида бўлиши керак, чунки юкларига қараганда, улар ПФСга тегишли машиналар эди. Лекин машиналар кўп, уларнинг ёнида соқчи турган бўлиши мумкин...

Тўхта! Қулоғимга худди бузилган мотордай хириллаган овоз чалинди. Мирҳайдарнинг машҳур хурраги!

У энг чеккадаги студебеккернинг кабинасига кириб, пинакка кетган эди.

— А? Нима? Қанақа вино? — деди у керишиб машинадан тушаркан.— Спиртми? Боя айтсан ичмовдинг-ку, ғирром?

Мен унга спирт эмас, вино кераклигини зўрга тушунтирдим.

— Винони нима қиласан? А-а... ўша, ҳалиги нозанинни кўнглини олмоқчимисан? — кулди у.— Сен ҳам балосан!..

— Менга қара, Хаёл!..

— Ҳазилни тушунмайсан-да! — Мирҳайдар елкамдан қучоқлаб кулди-да, турган жойимизни сўради.

Мен тушунтириб бердим.

— Вино бор,— деди у.— Лекин хўжайиндан беруҳсат беролмайман, оғайни. У бир жойга кетувди, ҳозир келиб қолади. Сен боравер, бир оздан кейин ўзим олиб бораман.

Гулхан деярли сўниб қолган. Оля, шинелига ўранаб, ёнбошлаб ётарди.

— Қаёқларда юрибсан? — деди у қаддини ростлаб.

— Бир жойга бориб келдим... — Мирҳайдарнинг олдига борганимни айтгим келмай, гулханг қуруқ буталардан ташлаб, пичанга тўшалган чодирнинг четига ёнбошладим.

— Овқатингни е! — деди Оля.— Совуб қолгандир... — У чире-чирс сачраётган учқунлардан кўзини узмай, яна хаёлга толди.

— Мансур,— деди у анчадан кейин.— Тошкент яхши шаҳарми?

•Тошкент• сўзи қулоғимга жуда илиқ эшитилиб, юрагим бир ҳаприқиб тушди.

— Яхши бўлганда қандоқ, Олењка! Ажойиб шаҳар!

— У ерда чет тиллар институти бормикан? Вилмайсанми?

— Уйисини билмадиму, лекин университет бор. Буни яхши биламан.

Оля секин хўрсаниб қўйди.

— Июлда, студентларни хизматдан бўшатишганда... кетаверсам бўлар экан. Негадир кетавермай бу ёққа келдим... Мана энди, Хинган тоғларида... будда ибодатхонаси ёнида ётибман... Нега ўшанда кетавермадим? Нега бундай қилдим? Ўзим ҳам билмайман...

Уйинг овозида, бошини бир томонга сал эгиб, гулханга ўйчан тикилиб ўтиришида қандайдир нозик бир мунг, киши бировга айтолмайдиган бир ҳасрат бор эди.

— Уртоқ кичик лейтенант,— дедим.— Сиз ўзингиз... қаерликсиз? Умуман...

— Умумай, қанақа одамсиз, демоқчимисан?— Оля секин кулди-да:— Неча ёшга кирдинг, Мансур?— деб сўради.

— Ўн саккизга. Ҳужжат бўйича ўн тўққиздаману, лекин аслида...

— Ёшингта бир ёш қўшиб, армияга кетгансан, тўғрими?— Оля аллақандай илиқ бир меҳр билан юаимга тикилди.— Мен засам... Уруш бошланганда ўн еттида эдим, Мансур. Ўша маҳалда Тания деган қизнинг номи чиқувди. Эшитгандирсан балки?

— Эшитганиман. Кейин Зоя Космодемьянская бўлиб чиқди-ку!

— Тўгри. Зоя Космодемьянская, Лиза Чайкина... Мен ҳам ўн тўққиз ёшимда, худди шулардай бўламан деб чет тиллар факультетининг иккинчи курсидан фронтга кетганиман. Улардай бўлолмаслигимни билмабман.

— Нега бундай дейсиз, уртоқ...

— Чунки... Менинг фамилиям уларникидай чиройли змас!—кулди кичик лейтенант.—Оля Куприянова! Йўқ, чиройли эшитилмайди!

— Кейин-чи? Кейин нима бўлди?..— дедим унинг кулгисига эътибор бермай.

— Кейин... Штабда, разведка бўлимларида таржи-монлик қилдим. Кейин радиостка бўлдим, ҳамширалика ўқидим. Кейин гвардиячи капитан билан десант-

да бўлдим. Чехословакияда, Словакия тоғларида... Сен душман орқасига десант тушиш нималигини тасаввур этолмайсан, Мансур. Тўқиз кишидан фақат учкиши омон қолганмиз, гвардиячи капитан, мен ва Дмитрий Михайлович...

— Уртоқ кичик лейтенант!.. — Уйқум қочиб ўрнимдан туриб кетдим. Мен «Уртоқ кичик лейтенант, ҳаммасини бир бошдан гапириб беринг», деб ёлвормоқчи адим, лекин худди шу пайт гулхан ёнида капитан Ногаев пайдо бўлди.

— Салом, Олењка! — у кўтариб олган қогоз қутисини ерга қўйиб, ёнимга чўккалади. — Яхшимисиз, Олењка. Ҳайрон бўлманг. Тобингиз қочганини эшишиб қолдим. Шунга... шифо бўлармикан, деб бир шиша вино билан майдачуїда олиб келдим...

Оля ер остидан менга қаради. Мен ичимда Мирҳайдарни сўкиб, ўрнимдан туриб кетмоқчи эдим, Оля:

— Қаёққа? — деди. — Шошма, штабга кетганлар келишсин.

Мен жойимга ўтиришга мажбур бўлдим.

Ногаев қалин қора қошлари чимирилиб, секин хўрсинди. Сўнг:

— Олењка, — деди аллақандай ёлвориб. — Тунов кунги қилиқларим учун яна бир марта кечирим сўрайман...

— Қўйинг шу гапларни, — Оля кулимсираб, пешасига тушган соч толаларини тузатди-да:

— Қани олинг винонгизни! — деди.

Ногаев шоша-пиша қогоз қутидан шампанскоега ўҳшаган бир шиша вино олиб ўртага қўйди-да, қутини ағдарди. Қутидан бир кило печенье, беш-олтита олмава иккита рюмка тушди...

— Рюмка?! — деди Оля, кичкина биллур қадаҳларни шуълала тутиб кўраркан. — Ишлар бошқача-ю, ўртоқ капитан!

Ногаев Олянинг қўлидан қадаҳни олиб вино қуаркан, мамнун илжайди.

— Ногаевнинг ишлари ҳеч қачон ёмон бўлган эмас, фақат сиз... Хўп, сизга шифо келтирсинг бу вино! Сиз учун, Олењка!

— Мансур-чи? — деди Оля.

— Мансурга ҳам қуямиз!

Ногаев Оля билан қадақ уриштириб ичди-да, менга ҳам бир рюмка вино қўйиб узатди. Мен иккиланиб Оляга қараган әдим, у рюмкасини чўзиб кўзини қисди: «Олавер!»

Мен ҳам таваккал қилиб кўтариб юбордим. Ногаев қадаҳларни яна тўлдирди.

— Ёқдими? Яна биттадан олайлик, Оля!

Иккинчи рюмкадан кейин дилимдаги ташвиш сал тарқалгандай бўлиб, киприкларим ёпиша бошлади-ю, тўсатдан Ногаевнинг аллақандай дардли овозини эшишиб, кўзим очилиб кетди.

— Олењка! Худо ҳақи, ўшандан бери ҳеч қаёққа сифмай колдим.

— Қўйинг шу гапларни,— деди Оля ҳам ёлвориб.

— Тўхтанг, Олењка. Дардимни айтиб қолай ақалли. Хоҳ ишонинг, хоҳ ишонманг, мен сиздай қизни биринчи учратишим. Шу маҳалгача бирорта аёл менинг муҳаббатимни рад этмаган эди. Тўхтанг, гапимни бўлманг. Биламан, бунинг ҳаммаси майда, бачканга гаплар! Узим ҳам шу маҳалгача қилиқларим бачканга әканини билмас әдим! Сизни кўрдиму... Сиз шундай маъсум, шундай...

— Капитан Ногаев!— деди Оля.— Ё бу гапларигизни қўйинг, ё...

— Яхши, бас қилдим!— Ногаев оғир жўрсиниб жим қолди. Оля ҳам жўрсинди.

— Яхши гапларингиз учун раҳмат, лекин...

— Лекин нима?— деди Ногаев фигони чиқиб.— Наҳот сиздай қиз келиб-келиб шу... қўрс, тошюрак одамни севса?

— Яна бачканалик қиляпсиз, Ногаев!— деди Оля.— Бас қилинг дедим-ку, сизга!— У бир лаҳза жим қолди, кейин секин қўшимча қилди:

— Сиз нимани ҳам биласиз, Ногаев...

Мен оҳиста чап ёнимга ағдарилиб ётдим. Кўзим илиндими, йўқми билмадим, бир маҳал ёнгинамииздан ўтган танк фиддиракларининг шарақ-шуруғидан уйғониб кетдим.

Гулхан ҳамон ловиллаб ёнар, боя Ногаев ўтирган жойда Даврон ака ўтирас эди. У тиззасига қора жилдлик қалин дафтарини қўйиб, бир нималарни ёзарди.

Оля ҳам уйғонди шекилли, шинелини түғрилаб, капитанинг ёнига ўтиб ўтириди.

— Ҳалиям ухламадингми?

Капитан соатига қараб:

— Энди ётишнинг фойдаси йўқ,— деди.— Ярим соатдан кейин қўзғаламиз... Узинг нега турдинг? Тузукмисан?

Оля кулди.

— Ногаевнинг виносидан шифо топдим... Айтмоқчи, унинг шикояти нима бўлди? Белобородов индамадими?

— Гап Белобородовда эмас. Эсингдами, даштда одамлар йиқилиб қолган куни...

— Ногаевнинг машиналарини тортиб олган кунинг...

— Ҳа, ўша куни Белобородовнинг муовини билан қаттиқ айтишиб қолган эдик. Энди Ногаев иккиси шу гапларимга қаттиқ ёпишиб олишиди.

— Нима дейнишяпти?— деди Оля безовталашиб.

— Пашибадан фил ясашяпти. Майли, қумликдан чиқайлик-чи, бир гап бўлар.

— Айтмоқчи, Арслондан дарак бўрми?

— Йўқ.

— Мансурнинг иши нима бўлади? Бола бечора жуда қийналиб кетди...

— Бола эмас — солдат! Арслон топилса бир гап бўлар. Топилмаса... Ҳайронман! Индинга машҳур Халангга истеҳкомига чиқамиз. Жангга кирамиз.

— Яна жанг!— деди Оля хўрсиниб.

— Қўрқма, бу уруш кўпга бормайди. Улар бизни ҳеч кутаётгани йўқ. Кейин бу куч, қудрат билан...

— Биламан. Ҳаммасини биламан. Бироқ бирор фалокат бўлиб, бу тоғлар орасида, она юртимиздан узоқда, ёт элда қолиб кетишни ўйласам...

— Қаёқдаги совуқ гапларни гапирма! Ким сени душман орқасида десантда бўлган машҳур разведкачи Оля Куприянова дейди. Чарчабсан, Олењка. Ярим соат бўлса ҳам мизғиб ол, азиазим!..

«Индинга жанг! Унгача Арслон топилса бир гап бўлар. Топилмаса... Ҳайронман!» Вино таъсирида хаёлимдан кўтарилигган оғир ташвиш қайта ёпирилиб келиб, юрагимни яна ваҳима босди.

* * *

Осмон билан ўшишган барханлар тўсатдан чекинди. Биз ярим кечагача йўл юриб, қандайдир водийга чиқдик. Машиналар, тўпларни шатакка олгани тягачлар, танклар тог орасида, панада қолди. Биз ротарота бўлиб, дарадан чиқнишимиз билан бошланган гаолян¹зорни оралаб кетдик.

Душмандан ҳали ҳам дарак йўқ, лекин буйруқларнинг шивирлаб берилишидан, товуш чиқармай, сокин одимлашимиздан ҳозир комбат айтган жанг бошланшини сезаман, сезаману, аъзойи баданимни нохуш бир қалтироқ босади.

Қамишдай қалин гаолянзор шатир-шутур бўлиб кетди, гаолянларнинг қуриб-қовжира бўлган япроқлари юаларни тирнар, сёғ остида чирс-чирс синарди. Ҳамма ёқ зим-эжё, фақат бегубор тиниқ осмонда оппоқ йирик юлдузлар чаракларди...

Қаердадир олдинда, гаолянзор орқасида, гоҳо-гоҳо пулемёт тариллар, сўнг яна жимлик чўкарди... Тўсатдан қоронгиликни ханжардай тилиб, осмонга кўк-қизғиш ракеталар отилди... Ракета отилган жой биздан чапроқда, хийла олисда эди. Шунинг учун бўлса кепрак, ракетага эътибор бермай бир чақиримча юрдик, кейин гаолянзор чекиниб олдинда — пастликда, симобдай ялтиллаган дарё кўриди. Юзларга бирдан намхуш ва салқин шабада урилиб, дарёнинг сокин шовиллаши эшитилди.

Дарё бўйида, қамишзор орасида, сапёрлар сувни шалоплатиб кўприк қуришмоқда, у ердан секин берилган буйруқ, сўкинган бўғиқ овозлар эшитиларди...

Қоронгиликда старший лейтенант Харитонов билан завод командиримиз старшина Сало кўриди.

— Пулемёт ва митиқлар ўқлансии! — секин буйруқ берди Харитонов.

— Пулемёт ва автоматлар ўқлансии!

Мен аллақачон ўқ тўла дисканни автоматимга жойлаб қўйганиман, чунки бугун, шу жангда ҳаёт-мамотим ҳал бўлишини биламан: агар ўзимни кўрсата олсанам, балки гуноҳимни кечиришар, кўрсата олмасам... нима бўлишимни ўзим ҳам билмайман. Аксига олиб, дард-

¹ Маккажўхорига ўхшаган ўсимлик.

лашадиган Вася ҳам йўқ. уни капитан ўзига алоқачи қилиб олган.

Тўсатдан ёнимда ётган жиккаккина сержант биқинимга туртди.

— Нима бало, ухлаб қолдингми?.. Олға!

Ҳамма жимгина қўзғалганини кўриб, ўрнимдан сакраб турдим. Старшина Сало бешчилдигида соҳидаги қамишзордан ўтиб, кўпrikка чиқдик. Ҳаво тўлдирилган резинка қайиқларга шоҳ-шабба тўшалиб ясалған «кўпrik» оёқ остида лапанглаб турарди.

Сувдан фақат бошлари кўринган сапёрлар кўпrik остида ҳамон нималарни дир боғлар, маҳкамлар, уларнинг шивирлашлари эшитилар эди.

Мен дорбоздай ликиллаб, кўпrikning охирига бориб қолганимда, қулогимга гвардиячи капитанинг кескин овози эшитилди:

— Мен ҳам разведкачи бўлгагман, лейтенант! Лекин мен ҳеч қачон дуч келган солдатни отрядимга олган эмасман!

Унинг галини нотамиш асабий овоз бўлди:

— Бу солдат қумлиқда, япон отлиқ отряди билан тўқнашганимизда жуда иш кўрсатди...

— У ёғи билан ишим йўқ! Лекин уни биадан берухсат разведкага олишингиз...

— Берухсат эмас. Белобородовда штабнимг буйруги бор...

— Белобородов менга ҳеч нарса дегами йўқ!

— Демаган бўлса дейди, ўртоқ капитан!

Миёмда чақмоқ чақнади: «Арслон!»

Назаримда, тўсатдан Арслоннинг овози қулогимга чалингандай бўлиб:

— Арслон! — деб юбордиму, сафдан чиқдим. Лекин шу пайт соҳидаги қоронги қамишзор орасидан капитанинг дарғазаб овози эшитилди:

— Ким у бақираётган?

Ёнимда жиккак сержант шайдо бўлди.

— Олами бошингга кўтардинг-ку, аҳмоқ? Сафни бузма! Олға!

Бўғзимга келган кўз ёшимни қулт этиб ютиб, сафга қўшилиб югуриб кетдим.

«Арслонми, Арслон эмасми? Наҳот Арслон бўлса?» — Қоронгига қоқилиб-суқилиб югуриб бораркан-

ман, «ишилиб, Арслон бўлсин!» деб кимгадир ялинар, куз ёши аралаш илтижо қилар эдим.

Қамишзордан кейин яна гаолян ва қўноқ экилган далалар бошланди. Бу далалардан ўтиб, қандайдир пастак қирларга чиқиб олдик. Боя чап томонда отиётган ракеталар энди рўпарамада, олис-олисларда чакнар, лекин биз тўхтамай, югуришда давом этар эдик. Назаримда, водийни солдатларнинг гурс-гурс қадамлари-ю, оғир ҳансирашлари тутган, бу овозларни ҳатто олисда ракета отаётган японлар ҳам эшитагетгандай туюлар эди.

Нихоят, тепасигача тариқ экилган қандайдир баланд қирнинг устига чиққанимизда, қоронғида қаёқдандир Харитонов пайдо бўлиб:

— Ет! — деб буюрди.

Осмон ҳамон юлдузга тўла, зим-зиё коронғиликда ҳеч нарса кўринмас, фақат олисдаги қорли чўққиляргини кўзга элас-элас чалинар эди.

Ногаҳон биз ётган қир қаттиқ силкингандай, қардадир олдинда катта қоя ағдарилиб тушгандай бўлди. Кейин устма-уст портлаган снарядлардан тоз устига тоз қулаётгандай туюлди-ю, ҳамма ёқ остин-устин бўлиб кетди. Мен қўлларим билан қулокларимни бекитиб, юз тубан тушиб ётган эдим, кимдир қувонч билан «Катюша!» деб юборди.

Катюшалар дарёнинг у юзида жойлашган бўлса керак, ўша томондан олов, чинакам олов сели қўйила бошлади. Бир-бирини қуваган олов тиллар қоронғиликни ялаб ўтиб, пастдаги ясси тепаликлар, олисда қатор тизилган уйлар, қандайдир истеъкомлар, қўргонлар, омбор ва вишкалар устига ёғилмоқда эди. Ана, бир, икки, уч жойда ёнғин кўтарилди. Назаримда, уйлар, вишкалар ва сим билан ўралган аллақандай қўргонларгина эмас, ясси қирлар ўпирилиб тушиб, горга ўхшаб қолган дотлар, ҳатто олисдаги чўққилар ҳам ёнаётганга ўхшар, водийни тутган бу аланга ва дуд орасида чумолидай югуриб юрган одамлар кўринар, бетартиб отилган пулемёт ўқларининг ялтилаши кўзга чалинар, гоҳо тўп овозлари эшитилиб қолар эди...

— Маладес, Катюша!

— Боплаялти!

Дилимдаги бояги мудҳиш қўрқув пасайган, айни

замонда, фавқулодда бир иш қилиш түғрисидаги ўйларим ҳам пучга чиққан эди. Чунки бу жанг мен тасавур этган жангларга мутлақо ўхшамасди. Бу — самурайлар бошига ёғилган бир оғат эди..

Тўсатдан яқиндаги соҳилда қаққайиб турган иккита вишқа бирдан ловиллаб ёнди-ю, тош қўргон ичиде осмонга сапчиб, ўзларини у ёқдан-бу ёққа отаётган отлар кўриниди. Отларнинг аччиқ ва зорли кишинаши тўп овоазларини ҳам босиб юборди.

— Эҳ, отларга жабр бўлди-да!

— Чоп! Қутқар!

Бу гапларни комбатнинг таниш, сал бўриқ овози бўлди:

— Ҳужумга тайёрмисан, Дмитрий Михайлович?

— Тайёрман, ўртоқ капитан!

Комбат, қўлида бинокль, тўзғиган соchlарини силаб пастдаги водийга тикилиб ётарди. У тўсатдан:

— Колбаскин! — деб чақирди.

— Эшитаман, ўртоқ капитан!

— Ҳу ана у ёнаётган жойни кўряпсанми? Қўргонни айтиётганим йўқ, бу ёқда: чўққининг тагида...

— Кўряпман ўртоқ капитан.

— Ўша жой 478-тепалик деб аталади. Иккинчи ротага чоп. Ведерниковга айт, пистирмада танклар борга ўхшайди. Эҳтиёт бўлсин!

— Хўп, ўртоқ капитан!

— Харитонов! — деди комбат.— Сен боя айтилган мўлжалдан сал чапроққа ол! Соҳилни кўзла!

— Хўп бўлади, ўртоқ капитан.

— Лекин эҳтиёт бўл, соҳилда амбразура, дотлар кўп!.. Ҳужумга ўтганда ҳамма қуроллардан баравар ўт очилсин! Тушундингми, ҳамма қуроллардан! Ана, танклар келяпти! — капитан шундай деди-да, қир багирлаб қаёққадир чопиб кетди...

Танклар ерни ларзага солиб яқинлашмоқда эди. Мана улар, тагимиздаги тепаликни титратиб ёнимиздан ўтди. Ўтди-ю, наъра тортганича, пастга — усиз ҳам жаҳаннамга айланган водийга қараб йўналди.

Старшина Сало қўлида автомат, ўрнидан сакраб турди:

— Олға!

Автоматимдан ўқ сочиб, ҳамма билан баробар пастга қараб чопдим. Бутун водий — пастдаги тепаликлар,

тиканли сим билан ўралган қандайдир бино ва қўргонлар дуд орасида қолган эди. Лекин биз ҳужумга ўтишимиз билан жимиб қолган тепаликларга жон кирди, у ердаги амбраузураларнинг оғзи ялтиллаб, ҳавони ўқларнинг ваҳимали виж-вижи тутиб кетди.

— Ет! — деб бақирди кимдир.

Ўзимни ерга отдиму жон ҳолатда орқага тисарилдим: мен тиканли симлар устига қулаган эдим, тўпбозлик пайтида узилиб, ўралиб қолган бу симлар қўлларимга чўғдай тегиб, жазиллатиб юборди.

— От! Бу ёққа! — старшина Сало қўлимдан «шап» ушлаб, отлар кишинаётган қўргон томондаги гумбазсимон тепаликни кўрсатди, тепалик остидан ялт-ялт ётган аланга чиқарди. Мен шоша-пиша алангани нишонга олиб, автоматимдан ўт очдим. Старшина эса, бошини кўтариб, уст-устига иккита граната отди-да, «олға!» деб буйруқ берди.

Биз ўралиб-чирмалиб қолган, лекин ҳамон олов тапти келаётган қат-қат тиканли симлар орасидан ўтиб, қандайдир чуқур траншеяларга сакрадик. Шу заҳотиёқ ҳавони қоплаган қўланса тутун ва тумаи орасида ана пулемётларнинг таниш тариллаши эшишилди. Тўсатдан мендан уч қадам олдинда автоматдан ўт очганича чопиб бораётган бўлинма командирим, жиккаккина сержант, кўкрагини чаңгаллаганича секин тиз чўка бошлади... Мен чопиб бориб, уни қучоқлаб олдим, лекин у боши қуий эгилиб, қўлимда осилиб қолди. Ўлимни биринчи марта кўрганим учунми, ҳушим учиб, қотиб қолдим. Хайрият, ёнимдан югуриб ўтаётган старшина Сало, тўхтаб орқасига қайтди.

— Ким у? Пронкинми? — Старшина кексаларга хос бир ғамхўрлик билан сержантни четроққа ётқизиб, устига шинелини ёпди.

— Ҳозир санитарлар келади. Олға, ўғлим!

Ўлим юрагимга солган совуқ ваҳимадан ларзага мелиб, олдинга интилдим.

Одам бўйи келадиган траншеялар пачақланган пулемёт, милтиқ, сим ўралган ғалтак, снаряд қутилари, ага алланималарга тўлиб кетган, уларнинг орасида самурайларнинг мурдалари ётар, ярадорларнинг инграши эшишилар, лекин отишма тўхтамаган, айниқса соҳилда, отлар қамалган тош қўргон томонда жанг сурони давом өттарди. У ерда, ўпирилиб тушиб горга ўхшаб

қолган дотларда ялт-ялт аланга сочиб, пулемёт, автоматлар тариллар, гоҳо-гоҳо гуп-гуп этиб, гранаталар портлар эди.

Траншеянинг охирига етиб, қўргонга бурилишда кимдир устимга сакраб, яна боягидаи:

— Ёт! — деб қичқирди.

Бирдан ҳамма ёқ остин-устин бўлиб кетди. Назаримда, кора тутун орасида қолган тош қўргон ағдарилиди-ю, йўлдаги ҳамма тўсиқларни емирувчи бир куч — қандайдир бир тошқин оқиб чиқди. Бу — отлар эди!

Қўргон дарвозасини ағдариб, бир-бирини босиб-янишиб чиққан юзларча от дуд орасида аянчли кишнаб, скоп ва траншеяларга гурс-гурс йиқилиб, тасур-тусур қилиб яқинлашиб келди-ю, хайрият, дарё томонга бурилди...

Мен траншеядан бошимни чиқардиму, юрагим зирқираб кетди: дуд орасидан отилиб чиққан чиройли оқ от, худди бошимиз устида тўхтаб, олдинги оёқларини кўтариб кишнади-да, ловиллаб ёнаётган думини ҳавода алвондай силкитиб, бояги тошқин кетидан отилди...

— Эҳ, ажойиб аргумоқ экан! — деди бирор. Угирилиб қарадим. Ёнимда старший лейтенант Харитонов турар эди. Мен шундагина боя устимга сакраб «Ёт!» деб бақирган одам рота командиримиз эканини англадим.

Орқадан траншея бўйлаб Вася Колбаскин югуриб келди.

— Ўртоқ старший лейтенант! — деб Вася ҳансираф тўхтади. — Комбат эгаллаган позициядан жилмасликни буюрди. Ҳозир яна танклар ўтармиш...

— Жуда соэ! Дмитрий Михайлович, буйруқни эшитдинг-а. Эшитган бўлсанг, ҳозирча жилма. Кейин чапдаги ҳу ана у тепаликни кўряпсанми? Тагида дот бор. Ўшани эгалла! — Старший лейтенант шундай дедида, ўзи траншеядан сакраб чиқиб ўнг томонга югуриб кетди.

Вася секин биқинимга туртди:

— Қалайсан? Ўтаканг ёрилмадими, оғайни?

— Сен-чи?

— Биз мана, юрибмиз, бутун батальонни бошқариб, — деб кулди Вася. — Ана танклар!..

Танклар орқадан эмас, водийнинг шарқ томонидан соҳилни ёқалаб келар, дам дуд ичига шўнгигиб, ёнаётган

Анна, анна!

уйлар, ўпирилган тепаликлар панасида кўринмай қолар, дам узун хартумларидан чақмоқ чақиб, қайта пайдо бўларди... Водий яна остин-устин бўлиб кетди, соҳилдаги япасқи тепаликлар, қулаб тушган вишкалар, ҳатто яқиндаги тош қўрғон — ҳаммаси яна тутунга бурканди.

Старшинанинг буйруғи билан иккига бўлиниб, иккита траншеядан югуриб кетдик. Тепаликка яқинлашиб қолганимда, бирор:

— Ай, Мансур! — деб чақиргандай бўлди.

— Серкабой? — дедим ҳайрон бўлиб.

Емирилган траншеянинг четидаги чакалакзор орасида Шоюсуп ётар, Серкабой оқ дока билан унинг сонини боғламоқда эди.

— Шоюсулга нима қилди? Қандай қилиб бу ерга келиб қолдиларинг?

— Немене? Борлиқ самурайди жалғиз ўзинг қирдингба? — деди Серкабой.

Шоюсуп мени кўриб тўлганди.

— Мансур! Дўстим! Агар бир нима бўлсан...

— Ай қўйсайши! — деди Серкабой жеркиб. — Жигитсингбўй! Мансур! Жардем бер!

Мен оғайниларимнинг ёнида қолиш-қолмаслигими билолмай, иккиланиб турган эдим, траншеянинг муюлишида Оля кўринди.

Қўлида ҳамшираларнинг сумкаси, Оля биз томонга югуриб келар эди.

— Ўртоқ кичик лейтенант!

— Тўхта! — деди Оля, гапимга қулоқ солмай. — Жанг тугади. Ана, қара!

Соҳил томонда, дуд ва туман орасида оқ байроқчалар пайдо бўлган эди.

Упирилиб тушган қир ён бағридаги ўнгирлардан афти-башараларини қора қурум босган, кийимлари йиртилиб кетган самурайлар битта-битта бўлиб чиқиб келишарди... Ана, биз турган тепаликнинг у томонида ҳам самурайлар кўринди. Уларни кўриб юрагим орқамга тортиб кетди: қўлларини кўтариб ўнгирдан чиқаётган, юзларини қора қурум босган самурайлар орасида... кўкраги аллақандай ялтироқ медалларга тўла бир япон ғалати қийшанглаб, қўлларини ҳавода ўйнатиб, рақсга тушмоқда эди... Унинг йирик сарғиши тишлигини кўрсатиб ишшайишида, хириллаб кулиши

Райман

ва этигидаги шпорларини жаранглатиб қийшанглашларида аллақандай мудҳиш бир нарса бор эди!..

— Епирмай! Минавга не бўлған? — деди Серкабой.

— Ақлдан озганга ўхшайди! — деди ёнимизга келиб тўхтаган Вася.

— Ҳани, ёрдамлашиб юбор, Мансур! — деди Оля. У Шоюсуннинг ёнига тиа чўкиб, ярасини боғламоқда эди.

Мен траншеядан чиқдим. Шу пайт чап қўлдаги ўпирлиб тушган тепаликни айланиб ўтаётган ўн чоғлиқ отлиқ кўринди. Мен уларга қарадиму, жойимда қотиб қолдим.

Отлиқларнинг орасида... Арслон ҳам бор эди! Елкасида автомат, Арслон келишган тўриқ отини ўйнатиб, бамайликстир ўтиб борар эди. Жон ҳолатда, «Арслон!» деб бақириб, унга қараб югурдим.

Отлиқлар тўхташи. Арслон тўригининг бошини буриб, чоптириб келди:

— Бормисан, шоир? — у отдан сакраб тушиб, қулочини ёэди. Мен унинг офтобда қорайган шиддатли юзига, шўх чақнаб турган кўзларига тикилдиму, ўпкам тўлиб:

— Қаёқларда юрибсан, ахир, — деб сўрадим.

— Э-э, айтаверса гап кўп, оғайнин! Қумликда разведкачиларга учраб қолиб, шунаقا ишлар қилдикки, бир йилда ҳам айтиб тамом қилолмайман!..

Югуриб келган Вася унга дўқ ура кетди:

— Сен қанақа одамсан ўзи? Бу бечорани балога қолдириб... қаёқларда юрибсан? Пулемёт ҳани?

— Бунга гап тегмайди. Қўрқма! — деди Арслон қўлларини белига тираб. — Пулемётни топширганман. Ҳаммаси жойида.

— Жойида эмиш! Комбат буни исканжага олиб...

— Комбат дейди-я! — Арслон кинояли кулимсиради. — Бизнинг лейтенант генерал билан гаплашган. Ҳаммаси ҳал бўлган!..

Шу пайт отлиқлардан бири:

— Арслон! — деб чақирди.

— Кечирасанлар, оғайнилар. Разведкага кетяпмиз!

Арслон Шоюсуп билан хайрлашида, тўригини қамчилаб, узоқлашиб қолган отлиқларни қувиб кетди...

Кўнглим бир хил бўлиб, то Арслон кўринмай кетгунча орқасидан тикилиб қолдим.

* * *

— Батальон, смирино!

— Вольно!

Комбат штаб бошлигининг рапортини охиригача эшитмай, қўргон ёнида саф тортган роталарнинг олдидан ўтиб, ўртада тўхтади.

— Уртоқ офицерлар, солдат ва сержантлар! — Комбат қовоғини солиб томоқ қирди. — Гоби саҳроси ва Хинган тоғларида чеккан мисслсиз машаққатларимиз бекор кетмади. Мана, бир қараб қўйинглар! — У қўлини чўзиб, олисдаги қорли чўққиларгача туташиб кетган кенг водийни кўрсатди.

Боя саҳарда водийни қоплаган туман тарқаган, ёнгин ўчган, ўпирилиб тушиб, ғорга ўхшаб қолган тепаликлар аниқ кўринар, қирлар орасидаги уйлар, аллақандай тош қўргон ва ертўлаларнинг емирилган деворлари хунук сўррайиб туар, қулаб тушган вишкалар қорайиб ётар, отлар қамалган ҳалиги қўргон олдида ўлжа қилинган милтиқлар, ханижар ва ҳиличлар тепа-тепа бўлиб уюлиб ётар, қўргоннинг ичидаги эса, тиззалирини қучоқлаб олган самурайлар ўтиришар, узсқдан улар негадир ташландиқ қабрларни эслатар эди...

— Мана! — деди капитан. — Японларнинг машҳур Халанган истеҳқомини бир зарб билан ишғол қилдик. Душманнинг отлиқ полки ва бутуни бир пиёда аскарлар дивизияси тор-мор қилинди. Қўмондонликнинг Хинган тоғларидан ўтиб, Квантун армиясининг орқасига чиқиши ва унга фавқулодда зарба бериш ҳақидаги стратегик плани ўз кучи ва пухталигини исбот қилди. Бугун ажойиб галабани қўлга киритдик.

Комбат бир зум ўлланиб қолди.

— Лекин... галаба қурбонсиз бўлмас экан. Бугунги жангда батальондан олти жангчи қаҳрамонларча ҳалок бўлди. Уларнинг хотираси учун бош кийимларини гизни олиб, бир минут сукут сақлашларингизни илтинос қиласман.

Бошлимидан шўр босиб, оқариб кетган фуражкаларимизни олиб, сукут сақладик.

Комбат фуражкасини кийиб, батальонга юзланди.

— Ҳа, батальон бугун мардонавор жанг қилди... Қўмондонлик номидан, полк командири, Совет Иттифоқи Қаҳрамони полковник Белобородов номидан ва

шахсан ўз номимдан Халанганди истеҳқомини забт этишида кўрсатган қаҳрамонликларингиз учун ташаккур билдираман!

— Совет Иттифоқига хизмат қиласмиш!

Одатда бу хитобдан кейин тарқалишга рухсат берилар эди. Лекин комбат қошларини чимириб ўйланиб туар, гўё оғир бир гапни айтишдан ийманар эди.

— Солдатлар! — деди у ниҳоят. — Виламан, сўнгги кунлар ҳаммамиз учун жуда оғир бўлди. Деярли ухламадик ҳисоб. Буни ҳам биламан. Лекин..., танк қисмларимиз фурсатни бой бермаслик учун илгарилаб кетди. Биз улардан узилиб қололмаймиз! Сизлардан янги куч, янги ирода ва сабр-тоқат талаб қилинади. Ҳозирга қадар кунига олтмиш-етмиш километр йўл босган бўлсак, эндиликда кунига саксон-тўқсон, балки юа километр йўл юришга тўғри келади... Ҳозир уч соат вақтимиз бор. Рота командирлари! Солдатларга дам беринг, овқатлантиринг. Соат ўни бешу ноль-нолда йўлга чиқамиз.. Бата-льон! Тарқал!..

* * *

Бошқалар дам олса ҳам бизнинг дам олишга вақтимиз йўқ, жангда ҳалок бўлган бўлим командиримизни дафи этишимиз керак эди. Белкуракларни олиб, энди қирга чиқаётганимизда Серкабой излаб келиб қолди.

— Жараблангандарни олиб кетпақши. Шоюсуп сени бир кўрсем дейди. Жур!

Старшинага мурожаат қилган эдим, нохушлик билан бўлса ҳам рухсат берди. Биз қўргонни ёқалаб, ўпирлиб тушган дотлар, ўралиб қолган тиканли симларни айланиб ўтиб, соҳилга тушдик. Соҳилда тую бўйи келадиган қалин қамишзордан берироқда иккинчи рота жойлашган. Солдатлар қуролларини бир-бирига суваб қўйиб пинакка кетган, ҳатто соқчилар ҳам милтиқларига суюниб мудрашмоқда эди. Солдатлардан нарироқда, дарёга қараб эгилиб ўсган қатор толлар соясида иккита студебеккер туар, биринчи машинанинг ёнида гвардиячи капитан билан иккинчи батальон командири — чўпдай оғгин майор капотга картани ёйиб, нима ҳақдадир баҳслашмоқда эди. Биз уларнинг ёнидан ўтиб, иккинчи машинага яқинлашганимизда, унинг кузовидан Оля сакраб тушди. Унинг юзидан

шиғ-шиғ тер оқар, гимнастёркасининг ёқаси очилиб, офтоб тегмаган оппоқ кўкраги кўриниб қолган эди.

Мени кўриб, Оля тўхтади.

— Машинага чиқавер,— деди у.— Ҳамшаҳаринг шу ерда. Агар комбат рухсат берса, медсанбатга бирга бориб келамиз. Бир соатда қайтамиз. Рухсат сўрайми?

— Кераги йўқ. Сувга бориб келай, ўзим айтаман.

— Мен бориб кела қолай сувга!— Серкабой унинг қўлидан флягасини олиб, ёлғиз оёқ йўлдан қамишзорга кириб кетди.

— Машинага чиқавер!— кичик лейтенант кафтиниг орқаси билан пешанасидаги соchlарини тузатиб кулди:— Ҳамшаҳаринг бирам бўш эканки...

Машинанинг пичан тўшалган кузовида ўн чоғлиқ ярадор ётар, бирининг қўли, бирининг оёғи, яна бирининг пешанаси танғилган. Солдатлар секин гаплашиб, ҳатто батъилари кулишиб ўтирас, фақат боши салладай ўралган кексароқ бир солдат, кўзлари юмуқ, секин инграб ётар өди. Шоюсуп дока билан ўраб-чирмалган сонини ушлаганича кабинага суяниб ўтирас, унинг кўзлари киртайган, пучук бурни ичига ботиб, тугмадеккина бўлиб қолган эди.

У мени кўриб, кўзига ғилт-ғилт ёш олди.

— Дўстим!— деди у ўпкаси тўлиб.— Келганинг учун раҳмат, бу яхшилигингни ўлгунча унутмайман...

— Нега йиғлайсан?— дедим ҳайрон бўлиб.— Яранг оғир әмас.

— Оғир әмас дейсану, оёғимни кесиб ташлашса... у ёқда хотиним, ўзинг биласан, ёш нарса...

— Ким айтди оёғинг кесилади деб? Кичик лейтенантми?

— Йўқ, у қайтага кўнглимни кўтаришти. Шунга... бир оғиз гаплашиб берсанг. Врачларга тайинлаб қўйса...

Ерни гурс-гурс босиб комбат келди.

— Кетдик, Оля! Кабинага чиқ!

— Кабинага сиз чиқа қолинг!— деди Оля.

— Мен штабда тушиб қоламан. Сен чиқавер, Оля.

— Йўқ, мен ярадорлар билан бўлай!— Оля, қўлида фляга, кузовга чиқди.

— Ким сув ичади?

Бопини дока билан саллага ўхшатиб ўраб олган кекса солдат секин ингради. Оля автоматини четга суриб, унинг ёнига чўккалади.

Кузовда Серкабойнинг боши кўринди.

— Омон бўл, Шоюсуп. Элга борсанг салом айт!

— Омон бўл, дўстим! — деди Шоюсуп лаблари титраб.

Машина қўзгалиб, соҳилни ёқалаб кетди. Йўл нотекис эди. Машина дам ўкириб юқори чиқар, дам ўйдим-чукурларда қаттиқ-қаттиқ силкиниб, ярадорларни беавота қиласмиш эди.

Бир километрча юрдикми, йўқми, билмадим, тўсатдан «тарс-тарс» этган милтиқ овози янгради ва машина қаттиқ силкиниб тўхтади.

Мен беихтиёр пусиб қолган әканман, автоматни олиб, ўрнидан тураётган Оляни кўриб, сапчиб турдим.

Машинанинг эшиги шарақлаб очилиб, комбат куазуга сакраб чиқди.

— Автомат борми? Чўз бу ёққа! — Ранги ўчган комбат Олянинг автоматини юлиб олиб, менга қаради:

— Қуролинг қани? Нега пусиб қолдинг? Ол милтиқни!

У шундай деб бақирди-да, кабинани паналаб, автоматдан ўт очди.

Мен ҳам жон ҳолатда автоматни қўлимга олиб, кабинанинг панасига ўтдим. Машина соҳилда, пастқамроқ жойда тўхтаб турарди. Дарё бўйидаги ўсиқ қамишзор орасида гоҳ эмаклаб, гоҳ бўйларини ростлаб чопиб бораётган уч-тўртта самурай кўзга чалинди. Кабинани паналаб автоматдан ўт очдим. Қамишсиз тақир жойга чиқиб қолган иккита самурайнинг бири қулади, иккинчиси ўсиқ қамишларга етолмай ўзини ерга отди.

Мен гўё уни капитан змас, ўзим отиб қулатгандай, қоним қайнаб, тепкини қаттиқроқ босдиму, тўсатдан комбатнинг:

— Оля! Тўхта! — деб қичқирганини эшитиб, ялт этиб қарадим.

Оля қўлида автомат, биздан йигирма қадамча нарида тўхтаган иккинчи машинага қараб чопиб борар эди.

У машинага яқинлашиб қолганида, йўл бўйидаги қалин қамишлар чайқалиб... иккита япон офицери кўринди. Бирининг қўлида граната, иккинчisinинг қўли-

да ханжар, лой чапланган қоп-қора юзларида ҳам қўрқув, ҳам аллақандай совуқ бир журъат, самурайлар галати ишшайиб туришар эди.

Комбат қаттиқ бақирди:

— Ет!

Лекин шу пайт, ишшайиб турған самурай, қўлидаги гранатани машинага қараб отмоқчи бўлди-ю, Оля автоматини тариллатганича ўзини унга ташлади.

— Оля! — капитан ҳавода умбалоқ ошиб, машинадан сакради. Мен ҳам жон ҳолатда капитанинг кетидан сакрадим, лекин ҳали оёғим ерга тегмасданоқ иккинчи самурай, ханжарини баланд кўтариб кичик лейтенантга ташланганини кўриб, беихтиёр кўзимни юмдим...

Кўзимни очганимда... самурай қонга бўялган ханжарини ҳавода силкитганича лойда сирғаниб, секин орқага тисариларди.

Капитан тўсатдан ўзбекчалаб:

— Ушла, даюсни! — деб бақирди-да, Олянинг ёнига тиз чўқди.

Мен автоматимни бошимга кўтариб, самурайга ташландим. Лекин самурай аллақандай хирилдоқ овозда бир нима деб қичқирди-да, лой чапланган юзи даҳшатли бужмайиб, ханжарини қорнига санчди.

Ханжарнинг қизғиши тиги офтобда икки марта ялт ялт килди, учинчисида ханжар қўлидан тушиб кетди. Кўзлари қинидан чиқаётган самурай кўйлаги остидан ағдарилиб тушган ичак-чавогини чангллаганича, юз тубан ийқилди.

Кўнглим ағдарилиб юзимни ўгирдим. Тепадан, қўргон томондан солдатлар югуришиб келар, Оляни икки қўллаб кўтариб олган комбат биринчи машинанинг ёнига чўккаلامоқда эди.

— Оля! — тирноқларимгача музлаб, машинага қараб чопдим. Даврон ака оёқ товушимни эшишиб қайрилиб қаради, унинг рангида қон йўқ, катта қўй кўзлари, худди нажот кутаётган боланинг кўзларидай жавдираб турар эди.

Оля, биқинидан яраланган бўлса керак, қўлларини қорнишининг пастроқ жойига қўйиб, тол тагида чалқанча ётар, кўзлари юмуқ, ечилиб кетган тилла ранг майин соchlари бўйни ва кўкрагига ёйилган эди.

— Ўртоқ кичик лейтенант!..

Оля кўзини очди, лекин шу пайт етиб келган солдатлар мени четга суриб қўйишиди. Олдинга старшина Сало билан Харитонов ўтди.

Старшина тиз чўкиб, Олянинг пешанасига қўлини қўйди.

— Олењка?

Оля қуруқшаган лабларини ялаб, тўлғанди...

— Дмитрий Михайлович...

— Сабр қил, қизгинам... — старшина Олянинг устуга ёпилган шинелни кўтарди-ю, юзи буришиб, дарҳол қайта ёпди: қизнинг гимнастёркаси тилим-тилим бўлиб кетган, кўкраги ва қорни қип-қизил қон эди.

Старшина, мўйлови титраб, капитанга юзланди.

— Тезроқ олиб борайлик медсанбатга...

Оля «кераги йўқ» деган маънода секин бош чайқади. У инграмас, лекин бир зумда сўлиб, сарғайиб қолган чеҳрасида, чуқур ботган кўаларида болаларга хос бир илтижо, унсиз бир фарёд бор эди.

У тўсатдан безовталаниб тўлғанди, гўё ҳамма билан хайрлашаётгандек, кўалари чарақлаб, атрофдаги-ларга тикилди. Назаримда, у менга қараётгандай бўлди.

— Оля!

— Мансур! — деди Оля. — Ўртоқ капитан! Даврон... — Оля гапиролмай секин ингради-да, кўзлари юмила бошлади.

— Оля! — комбат, гўё унинг сўниб бораётган ҳаётини тўхтатиб қолмоқчи бўлгандай бошини кўтариб пешанасидан, кўзларидан ўпди.

— Оля! Олењка!..

Старшина Сало мўйлови титраб, Даврон аканинг елкасига қўлини қўйди.

— Ўртоқ капитан!..

— Ҳа, ҳа, тўғри! Тезроқ медсанбатга олиб бориш керак! Тезроқ! — капитан Оляни даст кўтариб ўрнидан турди.

Мен, йиглаб юборишдан қўрқиб, сукут сақлаб турган солдатлар даврасидан чиқдим. Шу пайт кимдир «Ногаев!» дегандай бўлди. Беихтиёр тўхтадим.

Қўргон томондаги тепаликдан капитан Ногаев билан... елкасида қаппайган буюм тўрва, Мирҳайдар югуриб келишарди!..

— Нима бўлди? Нима гап ўзи? — Ногаев солдатларни четга суринг олдинга ўтди-ю, Оляни кўтариб олган капитанин кўриб, тўхтади.

— Оля! Қачон? Нима бўлди?

Комбат боши шалвираб қолган қизнинг жасадини кузонда турган старшинага узатиб, секин ўгирилиб қаради.

Капитанга ёрдамлашаётган Харитонов Ногаевнинг қўлидан ушлади.

— Менга қара, капитан.

Лекин Ногаев унинг қўлинни силтаб ташлаб, комбатга қараб талпинди.

— Нима бўлди ўзи? Шундай қиз!.. Шундай қизни эҳтиёт қилолмадингми? Нега индамайсан? Сенга айтяпман: шундай қизни эҳтиёт қилолмадингми? — Ногаев кўзлари ёниб, капитанга тикилди. Комбат уни силтаб ташлар деб ўйлагандим, лекин у бошини осилтириб:

— Ҳа, эҳтиёт қилолмадим,— деди секин.

Ногаев қўлларини мушт қилиб:

— Эҳ, сени қара-ю! — деди титраб. — Сен қаерда юрувдинг! Ким жавоб беради бунга? Сендан сўраяпман, бу ўлим учун ким жавоб беради?

Комбат, худди аччиқ қамчи еган аргумоқдай бир сапчиб тушди.

— Старшина Сало! Оляни медсанбатга ўзинг олиб борасан! — у шундай деди-да, Харитоновга юзланди, бирдан ўзгарган, бўғиқ ва шиддатли овозда:

— Старший лейтенант Харитонов! — деб бақирди. — Сен ротанг билан бутун соҳибли титиб чиқ!.. Бир қарич ҳам бўш жой қолмасин! Ҳаммасини титиб чиқ! Йўқ, тўхта, мен ўзим...

— Ўртоқ капитан! — деди Харитонов.

Комбат унинг сўзига қулоқ солмай, солдатларнинг олдига ўтди.

— Рота! Менинг орқамдан... Занжир бўлиб, олга! — Капитан пистолетини қинидан суғуриб олиб, қамишзорга кирди.

Биз ҳанг-манг бўлиб қолган Ногаев билан Мирҳайдарнинг ёнидан ўтиб, комбатнинг кетидан қамишзорга шўнғидик.

* * *

...Оляни медсанбатнинг машинасида олиб келишди. Машинада полк командири полковник Белобородов билан иккита ҳамшира қиз ҳам бор эди. Оляни гап-сўзсиз, чуқур сукут ичидаги қабрга қўйдик.

Бир соатдан кейин соҳилдаги тариқ экилган тепалик ён бағрида, ўша куни пайдо бўлган қабрларнинг ёнида яна бир қабр пайдо бўлди. Сало овози қалтираб, салют беришни буюрди. Биз қуролларимидан уч марта ўқ узид, салют бердик, ҳамшира қизлар олиб келган бир даста гулни қабрга қўйиб, орқага қайтдик.

Биз саф тортиб пастга тушаётганимизда ёнимиздан медсанбатнинг машинаси қувиб ўтди. Машинанинг кабинасида, бошини қуви солиб полковник Белобородов ўтирас, қизлар кузовга жойлашгаш, Даврон ака кўринмас эди.

Кўнглим вайрон бўлиб орқамга қарадим. Комбат тепалик устида, қабрлардан сал юқорироқда, бошини осилтириб, хаёлга чўмиб ўтирас эди.

* * *

Уч-тўрт кун ўтди. Манъҷжурия бўйлаб чекинаётган душманни қувиб кетяпмиз. Қаршилик йўқ ҳисоб. Танк ва артиллерия қисмларининг зарбасига дош беролмаган япон гарнизонлари позицияларини ташлаб чекинмоқда, истеҳкомларини топшириб, таслим бўлмоқда.

Бир кун кечқурун шоли экилган қандайдир сой бўйида тўхтаб, энди овқатга ўтирган эдик, Вася Колбаскин қидириб келиб қолди.

— Қани, юр, оғайнин,— деди у ҳовлиқиб,— сени штабга чақиришапти! Старшинанинг хабари бор. Тезроқ бўл. Комбат кутяпти!

Васянинг авоий бузуқ эди. Секин четта тортдим.

— Нима гап? Тинчликми ўзи?

— Билмасам,— Вася кўзини олиб қочди.— Штабга бирор келди. Погонларига қараганда, ҳарбий прокуратура ходимига ўхшайди.

— Ҳарбий прокуратура?!

— Ўтаканг ёрилмасин,— деди Вася.— Қўрқма. Пулемёт тўғрисида әмас, кичик лейтенантнинг ўлими тўғрисида келганга ўхшайди.

— Олянинг ўлими?

— Намунча титрайсан? — деди Вася жеркиниқираб.— Саволинг бўлса ўзидан сўра. Боравер. Мен ҳали Ведерниковни топишим керак!

Вася штаб жойлашган ерни кўрсатиб, ўзи сой ёқалаб чопиб кетди.

Штаб биз турган жойдан узоқ эмас, шолипоянинг охирида, тариқ экилган қир этагида эди. Кун ботган, лекин ҳали ёруғ эди. Мен взвод-взвод бўлиб жойлашган солдатлар, саф торган машиналар ва дала ошхоналарини оралаб ўтиб штабни топиб боргунимча тира-шира қоронғилик тушди. Таниш чодирга яқинлашиб қолганимда ичкаридан штаб бошлиги — сочларига оқ оралаган старший лейтенант чиқди. У мени кўриб: «Киравер!» деган маънода бош иргади-да, қовоғини солиб, сойга тушиб кетди. Юрагим гупиллаб чодир томон юрдиму, тўсатдан комбатнинг таниш бўғиқ овозини эшитиб, беихтиёр тўхтадим:

— Кечирасиз, ўртоқ старший лейтенант. Бу фожия ҳақида қанча сўрасангиз, марҳамат, жавоб бераман. Лекин ана у гапларни қўзгаманг!

— Нега энди? — савол берган одамнинг овози жуда босиқ, ҳатто мулойим эди.

— Чунки бу гаплар кичик лейтенантнинг хотира-сига нисбатан ҳақорат бўлади!

— Сиз ҳам мени кечирасиз, ўртоқ капитан. Лекин бу жавобингиз салобатли одамнинг жавобига ўхшамайди.

— Майли, нима десангиз деяверинг, лекин мен бу саволиягизга жавоб беришни истамайман!

— Ихтиёр сизда. Бироқ эсингизда бўлсин: бу гаплар масалани баттар чигаллаштириши мумкин, холос!

— Менга барибир! Ўша куни ҳушёрлик қилмадинг, дейишга ҳаққингиз бор... Лекин масаланинг бу томони...

— Хўп. Яхши!

Ичкарида нимадир тарақлаб кетди. Пилоткамни тўғрилаб, чодирга кирдим.

— Ўртоқ капитан. Буйруингизга биноан...

— Вольно! — Чодирнинг ўртасида турган комбат, рапортимга қулоқ солмай, қўл фонаръ нурида столдаги қоғозларни йиғиштираётган юмалоқчина одамга юзланди.

— Мана, чақирирган солдатингиз келди!

Юмалоққина одам қўл фонарини юзимга тўғрилади. Мен унинг синовчан кўзларига кўзим тушиб, ерга қарадим.

— Хўп, мен кетдим,— деди комбат.

Юмалоқ одам яна фонарини ёқиб, менга бошдан-оёқ разм солди-да:

— Рус тилини яхши биласанми?— деб сўради.— Билсанг, Халангтан истеҳкоми ёнидаги жангдан кейин бўлган воқеалар тўғрисида изоҳнома ёзиб берасан. Ҳозир сени сўроққа тутиб ўтиришга вақтим йўқ. Сен ёлғон-яшиқ гапларни қўшмай, бўлган воқеани қисқагина ёзиб, батальон штаб бошлиғига топширасан. У ёғини яна кўрамиз. Уқдингми?

— Уқдим, ўртоқ старший лейтенант!

— Яхши!— старший лейтенант кўчма столдаги қоғозларни йигиштириб папкасига солди-да, чодирдан чиқди.

Мен ҳаяжон устида «уқдим», деган бўлсам ҳам ҳеч нарсага тушунолмай довдираб қолган эдим. «Нима бўляпти ўзи? Наҳот ўша кунги кўнгилсиз воқеа учун комбат айбдор бўлса! Е ўртада бошқа гаплар борми? Бор бўлса... нима қилишим керак? Нима деб ёзаман?..

Бошим ғовлаб, чодирдан чиқдим. Теварак-атроф қоронғиликка чўмган, фақат сой бўйида, у ер-бу ерда гулжан ёнарди.

Комбат чодир ёнида қўлларини қовуштириб хаёлга чўмиб турарди.

— Ўртоқ капитан...

— А?— Комбат ўғирилиб қаради.—Хўш?

— Старший лейтенант менга изоҳнома ёзишини топшириди, нима деб ёзаман?

— Нима деб ёзишини мендан сўрайсанми?— деди комбат зарда билан.— Билганингни ёзавер!

— Тўғри. Лекин... наҳот ўша кунги кўнгилсиз воқеа учун сиз жавобгар бўлсангиз?..

Даврон ака индамай яна қоронғиликка тикилди.

— Кошки гап фақат жавобгарликда бўлса!-- деди у анчадан кейин.—Эҳ, одамлар, одамлар...— Комбат оғир хўрсинди, сўнг шинелини ерга ташлаб, ёнбошлар-кан:

— Утири, ука, гап бор,— деди.

Мен унинг ёрилгиси келиб, тўлиб турганини сездимда, ёнига чўккаладим.

Бу камгап, камсухан одам, ўша окшом чиндан ҳам ёрилди.

Мана унинг ҳикояси.

* * *

...Қирқ тўртинчи йил. Август ойининг охирлари. Фарбий Украина ўрмонзорларида душман орқасига десант туширишга тайёрлананаётган пайтларимиз. Ҳамма нарса тахт бўлган. Отрядга фақат бир жангчи — немис ва чех тилларини яхши биладиган, ҳам радиостлик, ҳам ҳамширалик қила оладиган бир одам керак.

Бир кун мени дивизия разведка бўлимининг бошлиғи таклиф қилиб, «Фозиев, сенга ажойиб бир жангчи топдим», деб қолди. Кейин кулимсираб бориб эшикни очди-да:

— Куприянова! — деб чақирди.

Хонага кичик лейтенант формасида нозиккина бир қиз кириб, полковникка рапорт берди.

Полковник иккимизни таништириб қўйди. Мен уч йил урушда юриб ҳамма нарсага кўниккан, мардликда ман-ман деган йигитларни йўлда қолдирган аёлларни, ҳатто ёш қизларни ҳам кўрдим. Лекин кўм-кўк кўзлари порлаб турган бу қиз... шундай нозик, шундай маъсум туюлдики, ер остидан полковникка қараб, елкамни қисдим. Полковник менинг кўнглимдагини тушуниб, кулимсиради, сўнг Оляни чиқариб юборди-да, қисқа қилиб:

— Олавер, Фозиев! Пушаймон қилмайсан! — деди.

Ҳали-ҳали эсимдан чиқмайди.

Биз тўққиз кишидан иборат десантчилар гуруҳи самолётда учиб кетяпмиз.

Ер-дўстлар билан. Москвадан келган вакил, полк командиримиз полковник Белобородов — ҳамма-ҳамма билан хайрлашиб, ҳужжатларимизни, уйга ёзган ҳатларимизни топшириб, оладиган қурол-яроғ, озиқовқат қўйим-кечакларимизни олиб, самолётга чиқазнимизга бир соатдан ошган. Самолётнинг ичи зим-зиё.Faқат учувчилар кабинасининг эшигига кўк ва қизгиш нуқталар милтираб кўринади. Оля менинг ёним-

да гужанак бўлиб, ёш боладай пинжимга суқилиб ўтириди. Бошқалар ҳам бир-бирининг пинжига кириб, пинакка кетганга ўхшайди. Лекин мен биламан — ухлаган бирорта одам йўқ, ҳамма уйғоқ. Ҳамманинг хаёли бизни кутаётган хатарли операцияда. Йўқ, гап қўрқиши ё қўрқоқликда эмас. Самолётда ўтирган тўққиз жангчининг ҳар бири бир неча мартадан душман орқасида бўлиб, энг оғир, энг хатарли вазиятларда ҳам довдирмаган! Лекин душман орқасига тушиб «иш қилиш» қанчалик оғир бўлмасин, ҳозиргача бу «иш» ўз мамлакатимиз, ўз тупрогимизда амалга оширилар, ҳар бир нигоҳ, ҳар бир дарахт бизга хайриҳоҳлик қиласар, бизга она юрт ўзи мадад берар эди. Бу сафар эса, биз мутлақо нотаниш мамлакатга, нотаниш ҳалқ орасига бориб тушамиз. Мана, нари борса ярим соатдан кейин люк очилади-ю, пастда зим-зиё бўшлиқ кўринади. Самолётда сукутга чўмиб ўтирган тўққиз жангчи шу тубсиз уммон қаърига, сирли ғордай мудҳиш бўшлиққа сакраши керак. Бу гор, бу зим-зиё уммон қаърида уларни нималар кутяпти, эсон-омон ерга қўна оладиларми ёки осмондаёқ ўққа тутиладиларми, ерга эсон-омон қўнгандан ҳам ёт элда улар нималарга дуч келади — буни ким билади? Ким айта олади?

Мана, ёнимга учувчилардан бири келиб тўхтади.

— Манзилга етдик, старший лейтенант! — деди у.

Мен ҳали команда бериб улгурмаган ҳам эдим, пинжимга суқилиб гужанак бўлиб ўтирган Оля дик этиб ўринидан турди.

Люк очилиб, боя мен айтган зим-зиё бўшлиқ кўринди. Пастда, қоронги ўнгир тубида, тез сузиб ўтётган булутларнинг сояси кўзга чалинди, самолётга вишиллаган совуқ шамол ёлирилиб кирди.

— Команда, ҳозирлан! — деб буйруқ бердим, лекин ҳеч кимнинг исми фамилиясини чақирмадим.

Ногаҳон кўзим қоронғида Олянинг кўзларига тушди. Унинг бутун отряд мафтун бўлган катта-катта мовий кўзлари ўша мен айтган ўпқонда эди.

Мен унинг қўлинни топиб қисган эдим, у ялт этиб қаради-ю, ўпқонга қараб бир кадам ташлади. Хайрият. Ладислав Немец деган чех офицери сезиб қол-

ган экан, қизнинг олдини тўсди-да, Ўнгирга биринчи бўлиб сакради, Ладиславдан кейин Оля, Олядан кейин старшина Сало, Салодан кейин бошқалар.

Мен душман орқасига биринчи марта тушишим ёмас эди. Лекин учувчи билан ҳайрлашиб, люкка яқинлашганимда ва қора булут парчалари лип-лип өтиб ўтаётган зим-зиё бўшлиқни кўрганимда, бир зум вужудимни совуқ титроқ жимиirlатиб ўтди. Иродамдан зўр бир куч елкамдан «шапла» ушлаб, ўпқон олдида тўхтатмоқчи бўлди. Лекин мени бу кучга бир дақиқагина итоат этсан бас, шарманда бўлишимни билардим. Ундан кейин ҳеч бир куч, ҳеч бир ақлийдрок мени бу ўпқонга сакрашга мажбур этолмайди. Мен буни яхши билардим, бу совуқ ваҳимага бир зум таслим бўлиб, кейин ўзини ўнглаб ололмаган не-не одамларни кўрган эдим, шунинг учун кўзимни юмдиму тўққиза жангчи, тўққиз дўст, ака-ука тутингган тўққиза мардининг бири бўлиб тубсиз уммон қаърига ҳатладим...

Кейин-чи? Кейин нималар бўлганини эсласам, юрагим безиллади.

Рост, десант тушган кеча отряд учун муваффақиятли ўтди деса бўлади. Немислар бизни пайқашмади, ҳар ҳолда, ўша дақиқада пайқашмади. Буни чинакам омад деса бўлади. Лекин мени учун... Мен қандайдир катта бир дараҳтга тўғри келган эканман, чап оёғим бехосдан икки шоҳ ўртасига кириб қолиб... кўзларимдан юлдузлар сараб кетди. Кейин билсан, тўпигим тойиб, оёғим қаттиқ лат еган экан!

Қоронғида тишимни тишимга қўйиб, оқсаб-тўқсаб бошқаларни излашга киришдим.

Биз тушган жой тог ён бағри бўлиб, калин арчавор эди. Ярим соат ўтар-ўтмас шартли белгилар ёрдамида бир жойга тўпландик... Кўлимиздаги разведканинг ахбороти бўйича биз тушган тоғлик жойдан беш-олти чақирим пастда, жанубда, немис дарё флотилиясининг қисмлари бор, бу қисмлар муҳим ҳарбий порт ва темир йўл ўтадиган катта кўприкни мудофаа қиласар эди.

Бизга юкланган вазифаларнинг бири шу порт ва шу кўприкка боғлиқ. Лекин бу режани амалга ошириш учун тоғларда ҳаракат қилаётган партизан отрядларини топиш, улар билан алоқа боғлашимиз ке-

рак. Вақтни бой бермасдан, дарҳол тоқقا чиқиб кетишга аҳд қилдик.

Мен олдин сөғим лат еганини билдири маслилка уриндим, тишимни тишимга босиб, ўзим юришга ҳаракат қилиб кўрдим. Қаёқда, юролмай ўтириб қолдим. Бир ёнимдан Сало, бир ёнимдан Ладислав қўлтиқлаб олишди. Нотаниш жойда, қоронғида юришдан қийини йўқ. Дам қалин чакалакзорларга дуч келамиз, дам жарликларга тушиб кетамиз, дам қоя тошлар учрайди, айланаб ўтамиз. Мен отрядга завол бўлишмдан қўрқиб, ич-ичимдан эзиламан, бир сөқлаб сакраб-сакраб юришга ҳаракат қиласман, чунки тушган жойимиздан мумкин қадар тезроқ узоқлашишимиз, ҳарбийчасига айтганда, изимизни йўқотишимиз керак.

Шу зайлда бир соатча юрганимизда, тўсатдан олдинда ит ҳургандай бўлди. Дарҳол тўхтаб, Ладиславни ўша ерга жўнатдим. Ладислав сал ўтмай қайтиб келиб, төг этагида кичикроқ бир қишлоқ борлигини айтди.

Йўлни чапга олиб, қишлоқни айланаб ўтишга аҳд қилдик.

Бу ўртада төғ чўққиларининг усти оқариб, юлдузлар хирадашиб қолди.

Бир маҳал, олдинда кетаётган Сало тўхтаб, қора-йиб турган баланд қояни кўрсатди. Синчиклаб қарасам, қоя деганимиз ярим ҳароба, эски қаср экан. Ладислав билан Сало бориб келиб, қаср кимсасиз эканини айтишди. Маслаҳат билан кечқурунгача қасрда яшириниб ётишни лойиқ кўрдик, чунки тонг отиб қолган эди.

Битта-битта бўлиб қасрга яқинлашдик. Бу — готик услубида қурилган жуда қадимий бир қаср эди. Кейин билсақ, у ўрта асрларда яшаган ва теваракатрофни зир титратган машҳур бир графининг қасри бўлиб, кўп афсонавий воқеаларнинг шоҳиди бўлган экан. Биз девори емирилиб, ғорга ўхшаб қолган туйнуклардан ўтиб қоронғи подвалга кирдик. Кейин зах хоналардан, қандайдир тор йўлаклардан ўтиб, зинама-зина юриб, юқорига чиқдик.

Мен ҳамон тишимни тишимга қўйиб, Сало билан Ладиславнинг ёрдамида судралиб келяпман. Охири юқоридаги қоронғи бир хонада тўхтадик. Оля сөғимни тахтакачлаб, маҳкам боғлаб ташлади.

Ладислав атрофни кузатиш учун чердакка чиқиб кетди.

Биз энди маслаҳатга ўтирган эдик, Ладислав чердакдан сакраб тушди.

— Немислар! — деди у. — Биз келган томондан келишяпти. Камида бир взвод бор!

Фурсатни бой берсак, бутун отрядни ҳалок қилишимиз мумкин эди.

— Дмитрий Михайлович! — дедим. — Отрядга командирлик қилишни сенга топшираман! Дарҳол қасрдан чиқиб, ўрмонга киришларинг керак!

Сало бир оёғимга, бир юзимга қараб:

— Шу ерда жанг қилсак, қандоқ бўларкин? — деди.

— Старшина Сало! Буйруқни бажар! — деб бақирдим. — Сўнг, юрагим беихтиёр «шиғ» этиб, тескари бурилдим. — Хайр, омон бўлинглар, дўстлар!

Шу пайт Оля ёнимга келиб:

— Ўртоқ старший лейтенант! — деди. Мен шу ерда қоламан!

Ялт этиб қарадим. Оля, пастки лабини тишлаб, қўзимга тикилиб тураг эди.

— Кичик лейтенант Куприянова! Буйруқни бажаринг! — дедим.

Оля рангидан қони қочиб:

— Агар отиб ташласангиз ҳам кетмайман! — деди.

— Майли, ўртоқ старший лейтенант, — деди Сало. — Оля қолсин!

— Буйруқни бажаринглар!

— Кетдик! — Сало зинадан пастга отиларкан, бир зум тўхтаб: — Ўртоқ старший лейтенант! — деди. — Чердакка чиқиб олинглар. Чердакка!

Мен уларнинг оёқ товушлари узоқлашгунча кутиб турдим. кейин секин Оляга қарадим.

— Ўртоқ старший лейтенант! Ахир мен... ҳамшираман-ку! — деди у.

— Хўп, бўлар иш бўлди. Қани, чердакка чиқ!

Мен елкамни тутиб бердим. Оля елкамга миниб чердакка чиқди-да, қўлини чўзди. Мен ҳам бир амаллаб юқорига чиқиб олдим.

Эски-туски, латта-путта, пачоқ қути, мис қандил, яна аллақандай лаш-лушлар билан тўлган чердак

ярим қоронғи, агар шифтдаги түйнук беркитилса, мутлако зим-зиё бўлиши мумкин эди.

Мен энди шуни ўйлаб турган эдим, қаердадир пастда, ўрмон томонда, автоматларнинг тариллаши эшитилди. «Наҳот немислар кўриб қолишган бўлса?»

Мен жон ҳолатда шифтдаги түйнукка тармашдим. Бир зумгина кўз олдимда баланд тоғлар намоён бўлди. Пастда, қасрнинг тагида, жилга оқар, жилғанинг у томони қалин арчазор эди. Йигирма чоғлиқ немис автоматларини тариллатганларича арчазорга қараб чопиб борар, бизниклар кўринмас, чамаси, улар арчазорга киришга улгуришган эди.

«Хайрнят-э!» Елкамдан тоғ қулагандай бўлиб түйнудан тушдим. Худди шу пайт, пастда, қасрнинг ичида нимадир портлаб, бўш хоналар вангиллаб кетди. Кетма-кет автоматлар тариллади. Немисларнинг бўғиқ, асабий овозлари эшитилди. Афтидан, тинтуб бошланган эди.

— Түйнукни бекитиш керак. Ана уларни олиб бер, Оля!— мен бурчакда уюлиб ётган аллақандай ромлару латта-путталарни кўрсатдим.

Түйнукни шулар билан беркитдик-да, зим-зиё чердакнинг ўртасидаги мўри орқасига ўтиб, писиб олдик. Бу ўртада пастда яна бир-икки марта нимадир портлаб, эски қасрни титратиб юборди. Наздимда, немислар қоронғи хоналарга киришдан олдин ҳар эҳтимолга қарши граната отишмоқда эди.

Сал ўтмай, зиналардан кўтарилаётган гурс-гурс оёқ товуши ва автоматларнинг тариллаши эшитилди... Мен ҳаммадан бурун бир нарсадан ҳадиксирадим: тинтуб қилаётганларнинг итлари йўқмикан?

Йўқ, акиллаган, ириллаган овоз эшитилмас эди. Автоматимни пастдаги түйнукка тўғрилаб, Оляга қарадим. У ҳам қўлида автомат, менга юзланди. Қоронғида унинг кўзлари жавдираб турарди. Мен: «қўрқма, Оленька» деган маънода унинг елкасидан секин қучдим. У сал силжиб, пинжимга суқилди-ю, чаккасига тушган майин соchlари билан юзимга суйкалди. Оля ҳеч нима демади, лекин унинг бу ҳараратида ҳам ишонч, ҳам меҳр, ҳам «йўқ, қўрқаётганим йўқ», деган бир ишора, айни замонда аллақандай илтижо, умид бор эди...

Пастда, боя биз турган хонада пулемёт тариллаб, деворлардан ғишт парчалари кўчиб тушди. Кейин чердакка чиқадиган туйнукда каска кўринди. Каска кийган бош у ёқ-бу ёққа қараб кўзини ўйнатди-да, қаттиқ сўкинди. Немис тилини Олядай мукаммал билмасам ҳам гапларига тушунардим.

— Шайтоннинг макони-ю бу! — деди каска кийган немис.

— Гранатангни от! — деди пастдагиси.

— Гранатам қолмади. Сенда борми?

— Битта бор. Ҳозир запални тўғрилаб бераман.

Бир зум жимлик чўқди. Олянинг елкалари титраб кетдими ё менга шундай туюлдими. Мен унинг қўлига қўлимни қўйдим, у ҳам яна боягидай соchlари билан чаккамга сўйкалди..

Пастда нимадир тарақлаб, мармар полга тушди.

— Падарига лаънат! — сўкинди немис. — Запалга бир бало бўлибди. Автомат билан тўрт томонга отгину қўрқмай чиқавер!

Тариллаб отилган ўқлар мўрига, шифтга, деворларга тегиб, чанг-тўзон кўтарилди, устимизга кўчиб тушган тош парчалари ёғилди.

Бошимизни кўтармай писиб ётибмиз.

Автомат тариллаши тўхтаган заҳоти пастдан яна бояги овозлар эшитилди.

— Энди мен елкамни тутиб тураман, сен чиқ тепага!

— Нега мен чиқар эканман? Ўзинг чиқавер!

— Навбат билан чиқишимиз керак!

— Нима? Юрагинг пўкиллаятими?

— Пўкилламаса чиқиб кўр!

Битта тушираман, тўппа-тўғри жаҳаннамга кетасан! Қани, чиқ деялман сенга!

Қаттиқ сўкинган овоз эшитилди, кейин туйнукда яна бояги каскалик бош кўринди.

«Бош» шифтга қаратиб яна ўқ узди.

— Ким бор? Жонингда умидинг бўлса чиқ бу ёқка!

Каскалик немис бир лаҳза кутиб турди, сўнг, ҳеч бир садо чиқмагач, секин тирмашиб кўтарила бошлиди. Қоронгиликка кўзимиз ўрганган. Ҳамма нарсани кўриб ётибмиз. Солдат чердакка чиқиб қўрқа-пи-

са қаддини ростлади-да, худди бир нимага қулоқ солгандай қулогини «динг» қилиб қотиб қолди. У кўп бўлса ўн тўққизга чиққан, ходадай узун, озғингина ўспирин эди! У тўсатдан бошини кўтариб шифтга қаради, қараганда латта-путта орасидан қуийлиб турган бир ҳовуч нурни кўриб қолди шекилли, автоматини силтаб, ром ва қандилларни учирив юборди. Чердак ёришиб кетди.

Солдат оёғи остига тушиган қандилни шарақлатиб тепиб, бир қадам олдинга юрди, юрди-ю... ўзига қаратилган иккита автоматни кўриб, оғзини очганча қотди-қолди.

Пастдан:

— Нима бало? Олтин-полтин топиб олдингми?
Индамай қолдинг? — деган овоз эшишилди.

Мен ўнг қўлимни автоматнинг тепкисига тутганимча, чап қўлимни лабимга босдим: «Жим!»

Солдат кўм-кўк кўзларини катта очиб, ҳамон серрайиб турар эди.

— Нима бало, тирикмисан? Ўликмисан? — қичқирди пастдаги шериги.

Солдат чўчиб тушиб:

— А! Ҳа, ҳа,— деб гудранди.

Мен «орқангга қайт!» деб ишора қилдим.

Солдат «хўп» деган маънода бошини иргадида, тўсатдан узун сариқ тишларини кўрсатиб ишшайди.

— Ҳей, жонинг борми, жавоб берсанг-чи? — деди пастдаги солдат.

— Бор! Бор! Бу ердан бир қоп олтин топиб олдим. Шерик бўламан десанг чиқ!

Солдат шундай деди-да, секин орқага тисарила бошлади.

Мен қўлимга гранатамни олиб, «агар гинг десанг, отаман» деган маънода ишора қилдим. Солдат туйнукдан оёгини тушириб пастга сакаркан «уқдим» деб бош иргади-да, яна ишшайди. Бу сафар унинг тиржайиши менга қандайдир ғалати туюлди. «Бу абллаҳ бир балони бошламаса эди!» — дедим ичимда.

Йўқ, бир лаҳзадан кейин икки солдат гунгур-гунгур гаплашиб, пастга тушиб кетди. Мен Оляга қарадим, у чуқур тин олди, худди қаттиқ чарчаган одамдай кўзини юмиб, бошини елкамга қўйди... Шу топда

у менга худди бир нимадан қаттиқ қўрқсан ёш қиз-
чага ўхшаб кетди-ю, соchlарини тузатиб, пешанасидан
ўпдим...

* * *

Комбат гап шу ерга келганда ўрнидан туриб кет-
ди...

Икки ҳафтадан кейин, бошқа бир оғир вазиятда
у менга коленкор жилдлик қалин дафтарини берди.
Дафтарни варақлаб ўтирганимда шу мисраларга кў-
зим тушди:

«Кечак дивизиядан ҳарбий прокуратура ходими
келди. Чамамда, Ногаев бўлса керак, прокуратура
ходими буни айтмади, устимдан маълумот
ёзибди. Гўё мен Оля билан эр хотин бўлиб яшаган
эмешману, энди ундан қутулиш учун жўрттага чоҳга
итарган эмишман!..

Бу гапни ё ақлидан озган жинни, ё одамгарчи-
лигини тамом йўқотган бир нокас ёзиши мумкин.
Хўп, у номард-ку ёзибди, лекин бу мудҳиш тужматга
ишониш, ишонмагандан ҳам уни текшириб ўтиришнинг
ўзи қаттиқ ҳақорат қиласар экан кишини. Айни замон-
да, бу чиркин гапларга алоқаси бўлмаган бир ўй,
бир фикр юрагимни эзади: чамамда, Олянинг кўнг-
лида менга нисбатан аллақандай нозик бир туйғу
бор эди. Оля буни яширишга ҳаракат қиласарди. Чунки
у жуда магрур қиз эди. Лекин баъзан беихтиёр бил-
дириб қўярди. Мен эсам... Йўқ, мунофиқ эмасман.
Тўрт йил урушда мен кўрмаган бало қолмади, ҳамма
нарсани кўрдим, ҳамма нарсага ўргандим, лекин
Оля.. мен уни алдашни истамас эдим! Мен ҳали ҳам
бўлса уни алдамай, тўғри қилганимга имоним комил.
Лекин ким билсин, балки Олянинг дилида бу маъсум
ҳис уйғонмагандан, у кўкламдаёқ армиядан бўшаб
кетармиди, бу ёкларга келиб юрмасмиди? Келмага-
нида бу фожиа ҳам рўй бермасмиди?.. Ҳар сафар
хаёлимга шу фикр келса... юрагим зирқираб кетади...»

* * *

Мен бунинг ҳаммасини бир-икки ҳафтадан кейин
бошқа бир оғир вазиятда, комбатнинг қалин дафта-
рини ўқиганимда билдим. Прокурор келган кечаси эса

Даврон ака бу гапларни айтмади. У факат десантда бошидан кечирган воқеаларни гапириб берди, холос. Шунга қарамасдан мен гап бўлакча бир поклик, биздай ўртамиёна одамларнинг ақли бовар қилмайдиган мусаффо бир дўстлик, ҳамдард-ҳамжиҳатлик ҳақида бораётганини сездим. Сездиму, комбатга саҳрова айтган гапларим эсимга тушиб, ўзимдан ранжиб кетдим...

Эрталаб изоҳномани ёзиб, штаб бошлигига топширдим-да, Даврон аканинг юзига қарашга уялиб, ротага кетдим.

* * *

Үйқу аралаш қулогимга бетартиб отилган пулемёт ва автоматларнинг тариллаши эшитилгандай бўлди. «Яна тревогами? Жангми?» ўйладим мен, лекин киприк қоқишга чамам келмай, яна ухлаб қолдим.

Биз кечаси билан йўл юриб, тонг пайтида қандайдир тог ёнбагрига келиб ётган әдик. Бир ҳафтадан бери шу аҳвол — илгарилаб кетган танк қисмларидан узилиб қолмаслик учун кеча-ю кундуз йўл юрамиз. Ҳатто, таслим бўлаётган душман гарнizonларини асир олишга ҳам фурсат йўқ, ҳар куни етмиш-саксон километр йўл босамиз.

Сўнгги икки кеча-кундуз айниқса оғир бўлди, биз деярли ухламадик. Лекин бу отишмалар... йўқ, тревогага ўхшамайди!

Мен базёр кўзимни очдим. Пулемёт, автоматлар ҳаердадир яқинда, биз қўнгган жойдан пастроқда тариллар, ялтираб учувчи ўқлар осмонда кўк, қизғиши из қолдириб, қоронғиликка сингиб кетар, сўнг янги ўқлар кўкни ханжардай тилиб ўтар әди.

«Қанақа отишма бу? Наҳот?..»

Хаёлимга келган фикрдан юрагим ўйнаб, ўрнимдан турмоқчи бўлдиму, ёнгинамда комбатнинг овозини эшитиб, қўзғалмадим.

— Унга тегмай қўя қол, Вася, ухлайверсин!
— Наҳот рост бўлса, ўртоқ капитан?— деди Вася.
— Нега энди рост бўлмас экан, кўриб турибсан-ку, салют беришяпти!..

— Одам ишонгиси келмайди, ўртоқ капитан! Жуда тез тугаб қолди-да!

Капитан кулди.

— Тез тугасин деб, Гоби саҳроси-ю, Хингая төғларида шунча машаққат чекдик-да! Ўзинг кўрдинг-ку, қанча таңк, қанча артиллерия ўтиб келди!..

— Энди юртимизга қайтамиши, ўртоқ капитан?

— Қайтамиша, албатта.

Улар студебеккернинг орқасига ўтиб ёнбошлиши шекилли, овозлари эшитилмай қолди. Мен бир ўйим, туриб ёнларига бормоқчи ҳам бўлдим, лекин дилимни чулғаб олган аллақандай ёруг туйғулардан аъзойи баданим яйраб, кўзимни юмдим... «Уруш тугади! Энди элга — Қорасувга қайтамиш...»

Кўзим илиндими, йўқми, билмадим, яна гангургунгур овозлардан уйғондим. Атроф ҳали қоронги, осмондаги юлдузлар чарақлаб турар, лекин бояги отишмалар тўхтаган эди. Ёнгинамда гулхан ёнар, гулхан тепасида, қўлларида кружка, капитан билан старшина Сало гаплашиб туришар эди.

— Майли, кўп куйинаверманг, ўртоқ капитан, сабаби уруш!..

— Сабаби уруш!..—Комбат оғир хўрсинди.—Илгарироқ бўлса ҳам майли эди! Уруш тугасига бир ҳафта қолганда-я!.. Шундай қизни эҳтиёт қилолмадик!..

— Қўйинг, ўртоқ капитан. Сўнгги пушаймон, ўзингга душман, деган гап бор. Ишқилиб, бу ёги тинчлик бўлсин. Ғалаба учун!

— Ғалаба учун...

Темир кружжаларнинг шак-шаки, кейин чўлпачўлл ўшишган овозлар эшитилди.

— Хўп, ўртоқ капитан, дам олинг!— деди старшина.

— Сендан илтимос, Дмитрий Михайлович, уруш тугади, деб бепарволик қилишмасин. Соқчилардан хабар олиб тур!..

Даврон ака старшина узоқлашиб кетгунча жойидан қимирламади, кейин гулханнинг ёнига ёнбошлаб, планшетдан таниш дафтарини олди.

«Борайми, бормайми?..» Олянинг вафотидан кейин комбат менга кандайдир меҳрибон бўлиб қолган, у куни дардлашганимиздан кейин эса, штабга қайта чақиририб олган эди... Бирпас иккиланиб ётдиму секин ўрнимдан турдим.

Тоғ яқин бўлгани учунми, тун жуда салқин, рота-рота, взвод-взвод бўлиб, тепалик ёнбагрига жойлашган солдатлар бир-бирларининг пинжига суқилиб ухлаб ётишар, фақат пастроқда яна бир жойда гулхан ёнар, у ердан қўшиқ айтган ширакайф овозлар эши билар эди.

Капитан ерга тўшалган чодир устида чордона қуриб, дафтарини варақлаб ўтирас, Вася эса, гужанак бўлиб ухлаб ётар эди.

— Салом, ўртоқ капитан! Ғалабалар билан табриклайман!

— Кел, ука! — капитан сурилиб, ёнидан жой берди. — Мен сени маза қилиб ухлаб ётибсанми десам, эши билсан-да!

— Ҳа, эшидим, бироқ тўғрисини айтсам, мен ҳам Васяга ўхшаб ҳеч ишонолмаяпман!..

— Ҳозир ишонмасанг, зарталаб ўйин кулги бошлигандай ишонасан.

— Кейин... чиндан элга қайтамиэми, ўртоқ капитан?

— Албатта.

— Яна ўша йўлдан юрамизми?

— Йўғ-э! Авваламбор, бир-икки кун шу ерда дам оламиз, кейин боя кундуз кўринган ҳу ана у тоғлардан ўтамиа! — комбат кулди. — Қўрқма, энди Хинган тоғларида машақватлар қайтиб келмайди. Кунига кўп бўлса ўттиз-қирқ километр йўл юрамиз. Ҳаммаси бўлиб юз эллик-икки юз километр масофа. Кейин Темир йўлга чиқамиз, поездга миниб, элга қайтамиз. У ёғи — Ўзбекистон, Қорасув, Қорасувни соғиндингми, ахир!

— Соғинмасдан-чи, ўртоқ капитан!

— Мен ҳам соғинидим, ука, жуда соғинидим!

Юрагим ўйнаб, галати бўлиб кетдим.

— Уртоқ капитан! — дедим. — Ҳу ўшанда, саҳро да мен сиздан бир нарсани сўрайман деб хафа қилиб қўйган эдим. Кечиринг, ўртоқ капитан!..

— Майли! — комбат мийигида кулиб, гулханга тикилди. — Сен Ногаевга ўхшаб туҳмат қилиш ниятинг йўқ эди шекилли?..

— Айтмоқчи, ўша гаплардан тинчидан кетдигизими?

— Қвёқда? Биз, бирордан шикоят тушса бас, гирт туҳмат экани кўриниб турса ҳам, текшир-текшир қи-

либ, ҳамманинг асабини бузмасдан қўймаймиз!.. Майли, гап унда эмас!— деб комбат қўлини силтади!— Лекин ўша куни саҳрода мен ҳам сени ранжитдим, чамаси? Чунки, десантдан қайтганимдан кейин уйдан хат ололмай ҳар хил хаёлларга бориб юрган эдим... Кисқаси, сен ҳам мени кечир, ука!

— Кейин хат олдингиами, ахир?

— Олдим, ука, олдим. Саволинг ҳам эсимда турибди!— Даврон ака ширақайф одамларга хос бир мулоийимлик билан кулди.— Йўқ, ука. Саломатни олиб қочган йигит мен эмасман, қайтага уни олиб қочиб кетмоқчи бўлган йигитлардан қутқариб қолганман! «Қорасув»лик йигитлардан,— деди комбат.

— Йўғ-э!

— Нега ҳайрон бўласан? Ё Қорасувда киз олиб қочадиган юрагида ёли бор йигитлар йўқми?

Кўз олдимга гузардаги чойхонада бошларини қуян солиб ўтирган йигитлар, кўз ёшлири соқолига томчилаб сўкиниб гапираётган кекса тегирмончи келди.

— Э-э, айтаверсан гап кўп,— деди Даврон ака.— Саломат билан танишишимизга қамоқ сабаб бўлган, ука.

— Қамоқ?

— Шундай...— деди капитан.— Саломат учун қамоққа ҳам тушганимиз, ука. Ё ҳамқишлоқларингдан Саломатни тортиб олиш осон бўлган дейсанми?— Гулхан шуъласида унинг кўзлари шўх чақнади.

— Қиттай-қиттай отамизми?— деди у тўсатдан.— Жиндак спирт бор.

Мен солдат бўлиб ҳам спиртни оғзимга олмаган эдим. Лекин... биз ахир она юртимииздан шундай олисда, бошқа эл, бошқа осмон тагида Қорасувнинг энг суюкли қизи тўғрисида гаплашиб ётар эдик. Ичмасдан бўлармиди?

— Майли, ўртоқ капитан!— дедим таваккал қилиб.

* * *

— Ёшинг нечада, Мансурбек?

— Ўн саккизда, ўртоқ капитан.

— Унда бошингга ҳали ишиқ-муҳаббат савдоси тушмабди!— ҳазиллашди комбат.— Ё Арслоншер айтган гўзал маъшуқалардан борми?

— Йўғ-э, ўртоқ капитан.

— Хуллас калом, у маҳалда камина эндиғина институтни битириб, ёшлар газетасига ишга борганиман. Маданият бўлимида адабий ходим бўлиб ишлайман. Бутун шаҳарни кезиб, ўн беш сатр хабар топсаму бу хабар саҳифага чиқса... ёстиқдай роман ёзган адибдай гердайиб юраман. Бир кун ҳаваскор мухбирчалардан бири хабар топиб келди: «Қизлар билим юртининг талабалари «Майсаранинг иши»ни саҳналаштирган эмиш. Жуда боплашган эмиш. Айниқса, Майсара ролидаги чиққан Саломатхон Сайдкаримова деган қиз қийиб ташлаган эмиш!..»

Саломатхоннинг исмини эшитиб, юракларим тақа-пука бўлиб кетди. Сабаби — бу гапдан бир ҳафта олдин Саломатхон редакцияга уч-тўртта шеър кўтариб келиб... нима десам бўлади?.. — Даврон ака кўзларини юмиб, жилмайиб қўйди.— Хуллас, шеър кўтариб келиб, каминанинг юрагига чўг ташлаб кетган эди!.. Нега куласан?

— Йўқ, ўзим....

— Бошингга тушмаган да, куласан! Бошингга тушсин биласан... Ўша куни премьера экан, билим юртининг кичкинагина залига одам сигмайди. Бир томонда ўқитувчилар, бир томонда кечагина паранжидан чиққан ёш жувонлару, студент қизлар гулдай очилиб, яшнаб ўтиришибди. Ҳамма нарса тайёр, фақат... бош қаҳрамон, яъни Саломат йўқ! Спектакль соат олтида бошланиши керак экан, соат етти бўлди ҳамки, Саломатдан дарак бўлмади. Секин саҳнанинг орқасига ўтдим. Қарасам, ҳамма безовта, шивир-шивир гап. Режиссердан сўрасам, қишлоқ хўжалик техникумидаги ўқийдиган уч-тўртта ҳамқишлоқлари бор эди, улар Саломатхоннинг спектаклда қатнашишига қарши эди, ўшалар бир ишкан чиқармаганмикан, деб қолди. Маслаҳат билан бир-икки киши Саломат турадиган уйга бориб келадиган бўлди. Мен ҳам қўшилдим.

Саломат қорасувлик дугоналари билан Шайхантархурнинг орқасидаги тор кўчалардан бирида турар экан. Борсак, уйда ҳеч ким йўқ, уй бекасининг гаплига қараганда, эрталаб чиқиб кетганича қайтиб келмаган... Балки техникумга боргандир, деган умидда орқага қайтдик. Йўқ, бормабди. Спектакль бекор қили-

ниб, одамлар тарқаб кетибди. Режиссёр қишлоқ хўжалик техникумiga кетди. Мен вокзал томонда, «Тезиково бозори» деган жойда туардим. Кўнглим хит бўлиб, «Пиён бозори» деган жойгача яёй бордим. Бекатда одам кўп эди. Мен яна пиёда кетмоқчи бўлиб турган эдим, келиб тўхтаган трамвайд... Саломат кўрингандай бўлди. Жон-жаҳд билан тармашиб трамвайга чиқдим. Қарасам... чиндан ҳам Саломат! Этнида оддий чит кўйлак, қўлида кичикроқ чамадон, деразадан ташқарига қараб турибди. Атрофини эса... олифталарча кийинган уч-тўрт йигит қуршаб олган.

Одамларнинг орасидан ўтиб, яқинроқ бордим.

— Яхшимисиз, Саломатхон! — дедим.

Саломат ялт этиб қаради, мени таниб, ғалати бўлиб кетди...

— Нега спектаклга бормадингиз? Сизга нима бўлди, Саломатхон? — деб ёнига ўтмоқчи эдим, Саломатнинг олдида турган новча қора йигит... Танимайсанми? Оғанда тилла тиши ҳам бор?

Кўз олдимга яна ўша чойхонада ҳомуш ўтирган олифта йигитлар келди. Уларнинг орасида новча қора йигит йўқ эди шекилли.

— Билмадим... — дедим.

— Сен у пайтда ёш бўлсанг керак! — деди комбат. — Лекин қорасувлик йигит. Иеми Ҳошим. Ҳошим Холматов. Қисқаси, ўша йигит йўлимни тўсиб:

— Менга қара, акаси! — деди шивирлаб, — Саломатхонда нима ишинг бор? Қани, жонингда қасдинг бўлмаса... туёгингни шиқиллатиб қол, акаси!

Қарасам, ёнидаги шериклари ҳам ўдагайлаб, пайт пойлаб туришибди.

Саломат кўз ёшини қулт этиб ютиб: «Булар ёмон, сиз аралашмай қўя қолинг!» дегаян маънода ишора қилиди.

У маҳалда юзи очиқ, кўчлик қизлар шаҳарларда ҳам оз учарди. Ҳамманинг кўзи Саломатда, ҳамма унга нисбатан бир ёмонлик бўлаётганини сезиб турибди, лекин бутун трамвайда жонимизга ора кирадиган бир одам йўқ!..

Ўзимни четроққа олиб, кутиб турибман. Трамвай вокзал олдидаги майдонга яқинлашганда бояги қора йигит, Саломатнинг қўлидан чамадонини олиб, боши билан «туш!» деб буюрди.

Саломат кўзлари жавдираб менга бир ҳараб қўйди, кейин яна боягидай қулт этиб ютиниб, трамвайдан туша бошлади. Саломатдан кейин тилла тишли қора йигит, ундан кейин ёнидаги шериклари тushiшди.

Саломатни зўравонлик билан олиб кетишаётгани аниқ эди. Нима қилиши керак? Арз қиладиган милиционер ҳам кўринмайди. Кетларидан сакраб тушдим.

— Саломатхон, тўхтанг! — дедим.— Бир оғиз гапим бор.

Қора йигит, қалтироқ босиб олдимга келди.

— Сен кимсан ўзинг? Хўш, нима гапинг бор? Айт!

— Ҳозир айтаман, нима гапим борлигини! — дедим.— Саломатхон! Уртоқ Сайдкаримова!

Шундан кейин нима бўлганини билмайман. Ҳошим Холматов қулочкашлаб жағимга битта тушириди шекилли, қулоқларим шағиллаб, чалқанча йиқилдим. Лекин бахтимга ёмон тушмаган эканман, ўзимни ўнглаб, қорнига тепганимни биламан, бир маҳал ҳушими ни йиғиб қарасам... Ҳалиги йигит трамвайнинг изида сулайиб ётиби, кўзлари юмуқ, оғзидан лахта-лахта қон оқяпти! Атрофимда тумонат одам! Икки милиционер икки қўлимдан маҳкам ушлаб олган. Саломат йиғлаб туриби. Лекин унинг гапига қулоқ соладиган одам йўқ, ҳамма қон қусиб ётган йигит билан овора. Ҳаш-паш дегунча чинқириб иккита машина етиб келди. Биттасига ҳушидан кетган қора йигитни солиб, касалхонага жўнатишиди, биттасига каминани тикишиб, милицияяга олиб кетишиди... Қамоққа тушишимиз ана шунақа бўлган, ука.

— Нега сизни қамашади? Ҳақиқат қилишмадими?

— Ҳақиқат... — комбат гулханга шох-шабба ташлаб, истеҳзоли кулимсиради.— Ҳақиқат қилиш осон бўлса унинг қадри бўлмас эди, ука... Биринчидан, Ҳошим полвон қулаганда бошининг қатиғи чиқиб кетган эканми, билмадим, касалхонада икки ой ётиб, ўрнидан зўрга турди. Иккинчидан, биринчи кунданоқ терговчи билан айтишиб қолдигу, иш чаппасига айланди.

Хаёлимдан: «Тунов кунгидай бўлибди-да!» — деган фикр ўтди-ю, индамадим.

— Лекин, ҳаёт қизиқ нарса экан! — Даврон ака гулханга ўйчан тикилиб яна жилмайди.— Шу қамоқ сабаб бўлмаганда өхтимол Саломат билан ҳам топиш.

мас эдик! Ҳали-ҳали әсимдан чиқмайди. Қамоққа тушганимнинг учинчи ё тўртинчи куни иккимиз терговчининг хонасида учрашдик. Саломат мени кўриб, йиғлаб юборди. «Мени деб бошингиз балога қолди, кечиринг, акажон!» дейди. Мен уни тинчитмоқчи бўлман, у бўлса ҳадеб бир гапни такрорлайди: «Мени деб азият чекяпсиз, кечиринг, акажон!» деб йиғлайди.

Ростини айтсан, чеккан ҳамма изтиробларим ҳам бир бўлди-ю, Саломатнинг шу гаплари бир бўлди.. Бахтга қарши, терговчи ёш бўлса ҳам соchlари тўкилиб, тепакал бўлиб қолган, тирноқларигача заҳар бир одам экан, бечорани жеркиб ташлади. Саломатни кўриб, ичи қоралиги тутиб кетдими, билмадим, нуқул bemаза саволлар беради, абллаҳ! Қаёқдаги ифлос нарсаларга шама килади, кишининг нафсониятига тегадиган тагдор гаплар гапиради. Саломат бечора кўзларини қаёққа яширишни билмайди. Қарасам, абллаҳ тепакал ҳаддидан ошиб кетяпти! Менини ҳам тутиб кетди:

— Бу тагдор гапларингиз билан нима демоқчилиз? — дедим.— Нимага шама қиляпсиз ўзи? Амалингизни суиистеъмол қилишга ким ҳуқуқ берди сизга?

Гапнинг қисқаси, бирпасда чарс-чурс уришдик-қолдик. Терговчи чаёндай кўкариб, тугмачасини босди. Дарҳол милиционер кириб, каминани яна ўша «роҳатижон» жойга олиб кетди. Саломат кўзида ёш, терговчининг олдида қолди...

Комбат бошини қашиб, хўрсиниб қўйди.

— Уришмагин арбоб билан, арбоб ураг ҳар боб билан дегандек, терговчи билан уришаман деб, чиндан ҳам балога қолдим. Сен ёшсан, ука, билмайсан. У пайтларда бальзи нопок одамлар пашшадан фил ясаб, обрў орттиришарди. Қарасам, тепакал ҳам каминага сиёсий айб тақишидан тоймайдиган!.. Дам олиш куни эди. Бир ўзим бир хонада нима қилишимни билмай, бошим қотиб ётган эдим, бир маҳал дастурхонга ўралган бир товоқ ош кирди. Ошнинг устига катта патир босилган!..

Қариндош-уруғлар Фарғонада. Ёр-дўстлар ҳам ўзларини четга оладиган оғир пайтлар. Давр ўзи шунақа. Кимдан бўлиши мумкин бу передача? Ҳайрон бўлиб патирни ушатдим, ушатсам... ичидан икки энлик хат чиқди! Саломатхоннинг хати!.. Бошида яна

ўша гаплар: «Мен деб бошингиз балога колди, ке-чиринг, акажон!..» Охирида: «Терговчининг нияти ёмон, нима қилай, қаерга борай, кимга арз қилай?»— деб маслаҳат сўрабди.

Хайрият, чўнтағимда қаламнинг синиги қолган экан: «Билим юртининг парткомига киринг, редакцияга ўтиб, бўлган воқеани оқизмай-томизмай, муҳаррирга гапириб беринг», деб икки энлик хат ёзиб, дастурхонниң учига туғиб чиқардим.

Бу ўртада «Уруш бошланганмиш, Гитлер Ватани-мизнинг чегарасини бузиб кирганмиш», деган мишишлар тарқалди. Мен ўша куниёқ кўнгиллилар сафира урушга юборинглар, деб ариза бердим. Лекин терговчи мени ашаддий душманга чиқарган шекилли, аризам жавобсиз қолди.

Бир ҳафтадан кейин яна передача келди. Яна бир товоқ ош, ошнинг ёнида иккитагина олма-ю, ўртасидан тенг бўлингак ёғлиқ патир!

«Наҳот Саломатнинг хатини топиб олишган бўлса?»— ошга қарагим ҳам келмай, олмани олиб ҳидлаб кўрдим. Олма жуда хушбўй эди, ўзи ҳам оппоқ, пиёладай келарди. Кейин билсам, бу Қорасувдан келган олма экан. Уни «дастор олма» дейишар экан. Шунақами ахир?

— Худди шундақа, ўртоқ комбат!— дедим. Бир зумгина кўз олдимга илиқ ёз оқшомида даштда кетаётган арава келди, эсимга райҳон ҳиди уриб қолган Саломатхоннинг дастор олмаси тушди, қулоқларим остида қизларнинг шўх кулгиси янграгандай бўлди...

— Иккинчи олманинг узун банди бор эди,— деди комбат.— Шу бандидан ушлаб, ҳидлаб кўрмоқчи эдим, узилди-ю, олманинг кавагига қистирилган қоғознинг уни кўринди. Саломатнинг хати! «Айтганларинизни қилдим, билим юртининг парткомига ҳам, муҳарриргизга ҳам учрашдим, улар ҳаракат қиласмила, деб ваъда беришди. Лекин барибир, эрта-индин ўртоқ Охунбобоевнинг олдига чиқмоқчиман...» деб ёзибди.

Комбат: «Қалай!» деган маънода менга бир қараб қўйди.

— Саломат сўзининг устидан чиқди,— деди у.— Лекин унинг Охунбобоевга учраши жуда қизиқ бўлибди. Қамоқдан чиқканимдан кейин Саломат кула-кула гапириб берди: «Бир борибди — қўйишмабди. Икки

борибди — қўйишмабди. Аризангиз бўлса секретариатга ташлаб кетинг, дейишармиш. Учинчи борганида бундоқ қараса... юзи очиқ хотинлар киролмас әмишу, паранжилик хотинлар кириб кетармиш...

Улар Охунбобоевнинг йўлини пойлаб туришармишу, Ота кўриниши билан, унинг олдига дод солишиб, йиғлаб боришармиш... Шундан кейин ота ўзи уларни олиб кириб кетармиш... Тўртинчи куни Саломат ҳам уй бекасининг паранжисини ёпиниб борибди. Тонг отмасдан бориб, Отанинг йўлини пойлаб турибди. Бир маҳал Отанинг машинаси кўринибди. Саломат ҳам кечаги паранжилик хотинларга ўшшаб, дод солиб йиғлаб борган экан, Ота: «Йиғламанг, қизим, йиғламанг», деб ўзи бошлаб олиб кириб кетибди. Киргандан кейин Ота, албатта, «ким бўласиз, қаердан келдингиз», деб сурнтирибдилар... Саломат билим юртида ўқишини айтган экан, «билим юртида ўқисангиз нега паранжи ёпинасиз», деб ҳайрон бўлибдилар.

Саломат паранжи воқеасини гапириб бериб, юзидан чимматини олибди. Ота қотиб-қотиб кулибдилару дарҳол республика прокурорига телефон қилибдилар...

Шу телефон сабаб бўлдими, билмадим, ишқилиб, бир-икки кундан кейин ишим бошқа терговчига ўтиб, тезлашиб кетди. Хуллас калом, салкам қирқ кун деганда камина ёруққа чиқиб, офтоб кўрди... Мен осмондаги офтобни айтаётганим йўқ,— кулди капитан.— Ердаги офтобни айтаяман... Қамоқхонанинг кийимларини топшириб ўз кийимларимни кийиб, ҳужжатларимни олиб, дарвозадан чиқсан, кўчада, қўлида гулдаста, Саломат кутиб турибди! Кулмоқчи бўлади-ю, кўз ёшларини тиёлмайди!

Ростини айтсанам, ука, уни кўрдиму, қирқ кун чеккан азобларим ҳам эсимдан чиқиб кетди... Эртасига ёқ уч-тўртта ёр-биродарларни тўплаб, кичкина тўй қилиб бердик...

Комбат мийигида кулимсираб, хаёлга толди. Мен унинг аллақандай мулойимлашиб қолган чеҳрасига тикилиб ётар, лекин хаёлим олис-олисларда, Саломат хонда эди!..

Ҳа, мен янгишмаган эдим! Комбат айтган Саломат худди мен таниган, мен билган Саломатхоннинг ўзгинаси эди!

— Бир ҳафтадан кейин урушга кетадиган бўлдим,— деди комбат.— Маслаҳат билан урушдан қайтганимча Саломат қишлоқда, ойимларнинг олдида турадиган бўлди. Июлнинг охири. Ватанимиз хавф остида турган кунлар. Қорасувга бориб, тўй-томоша қилиб беришга фурсат йўқ эди... Қишлоқда бор-йўғи уч-тўрт кун турдим, Саломатни мактабга ишга жойлаштириб, урушга кетдим...

— Шундан кейин кўришмагандирсизлар-да?

— Йўқ, кўришдик,— деди комбат.— Яна бир марта кўришдик.— Даврон aka оғир хўрсиниб олди. Унинг чеҳрасидаги мулоҳимлик таниш шиддатли ифода билан алмашди.

— Ноябрнинг охири эди. Биз, Семипалатинскда уч ойлик завод командирлари курсини тамомлаган ёш лейтенантлар, бир эшелон бўлиб, фронтга жўнайдиган бўлдик. Семипалатинскдан кетишимиздан икки кун олдин, фронтга жўнашимиз аниқ бўлгач, Саломатга телеграмма юбориб, Арис деган станцияга келиб туришини илтимос қилдим. Кейинчалик бу телеграммам учун ўзимга айтмаган гапим, сўкмаган сўкишим қолмади, ука. Нега шундай қилганимни ҳали ҳам билмайман, тўғрироғи, билишга биламану, бунинг оқибати нима бўлишини, оғир уруш йили ёш бир жувонни Фарғонадан Арисга чақириш аҳмоқона бир нарса эканини ўйламабман!. Эшелонимиз Арисга кечқурун, қош қорайиб қолганда кириб борди. Қизил вагоннинг очиқ эшигига кўзим тўрт бўлиб аланглаб турибман. Перронда одам оз, солдатлар билан милиционерларгина кўринади. Саломат билан ойимларни вагонимиз вокзал рўпарасига яқинлашганидагина кўрдим. Улар почта ёнида йўлни тўсиб турган милиционерлар билан олишишмоқда эди! Кейин, хат ёзишича, Саломат ҳам мени худди шу пайт кўрган экан. Мен ўзимни вагондан отдим, мени кўриб Саломат ҳам олдинга талпинди... Ойимнинг йўлини милиционерлар тўсиб қолишиди. Саломат бўлса, уларнинг қуршовидан чиқиб, эшелонга қараб югурди. Қўлида тугуни, соchlари тўзғиган Саломат қоқиниб-суриниб келиб, ўзини қучогимга отди... У ёқда дод солиб милиционерлар билан олишаётган онам, бу ёқда беҳуш бўйнимга осилиб қолган Саломат!

Капитан кўзини юмиб, бошини чайқалида, яна хўрснди:

— Да, эсимга тушса ҳануз ўзимни сўкаман, ука... Саломатни сал тинчтитгандай бўлиб, энди ойимларга қараб юргурган эдим, тўсатдан вагонлар шарақ-шуруқ қилиб, эшелон юриб кетди. Уруш вақтида эшелоъдан қолишининг оқибати нима бўлишини биласан!.. Перроннинг ўртасида қотиб қолдим. Эшелон қўзгалганини кўрган Саломат бўлса, ўзини яна менга отди... Унинг кўз ёшларини артиб, ялинаман «хайр, омон бўлинг, эшелондан қолиб кетмай», деб ёлвораман. Қани қўйиб юборса!. Сўнгги вагон яқинлашиб келяпти... Жон ҳолатда Саломатнинг қўлларини қайириб қучогидан чиқдиму, эшелонга қараб югурдим. Хайрият, вагондаги йигитлар кузатиб туришган экан, қўлларини чўзиб, кўтариб олишди... Вагонга чиққандай кўриб қолдим: Саломат перронда йиқилиб ётарди. Милиционерларнинг даврасини ёриб ўтган ойимлар эса, икки кўзлари эшелонда, яланг бош, уни қуchoқлаб ўтирадилар.

Комбат афтини буришириб, бошини чайқади.

— Тавба! Нега шундай қилдим — ҳалиям тушунолмайман!

Капитаннинг ҳолати менга аён эди. Чунки мен ҳам бирор ножӯя иш қилиб қўйсам, анчагача қийналлиб юрардим. Лекин тўрт йилгача буни эслаб қийналиш!..

— Кейин-чи? — дедим гапни буриш учун.— Кейин нима бўлди, ўртоқ капитан?

— Кейин... Кейин фронт. Госпитал. Яна фронт... Сўнгги икки йил десант қисмларида бўлдим. Десант жуда оғир нарса. Не-не йигитлар ҳалок бўлиб кетишди. Мен бўлсам, жоним савил эканми, билмадим, ҳалиям юрибман! — Капитан гўё тирик қолганига таажжубланётгандай бошини сарак-сарак қилди.— Охирги марта бултур кузда Карпат тоғларига десант тушдик. Чех ва словак партизанларига қўшилиб, душман билан салкам ўн ой олишдик. Бу — бутун бир достон, ука... Бир кун гапириб бераман... Ўз қўшинларимизга шу йил майда, Прага озод қилингандан кейин қўшилдик... Дарҳол уйга телеграмма бердим, хат ёздим. Бир ой деганда уйдан хат олдим... Саломат ўғилчами олиб ўз юртига, Қорасувга кетиб қолган экан. Қишлоқда майда-чуйда гаплар... Ўша куниёқ Қора-

сувга ҳам хат ёздим: Лекин сал ўтмай бу ёққа қараб жүнадик.

— Боя хат олдим дедингиз-ку?

— Ҳа, олдим. Ўша... Сен пулемётингни йўқотиб қўйган куни олдим,— деди капитан кулиб.— Гап хатда әмас, албатта. Ойлаб хат олмаганимда ҳам хаёлимга ёмон фикр келган әмас. Бу ерда бошқа бир гап бор, ука!

Йўлдан тарақлаб бўш машина ўтди. Машина пастда, гулхан атрофида ашула айтиб ўтирган солдатларнинг ёнида тўхтади.

Даврон ака қаддини ростлаб ўтириди. Гулхан шуъласида унинг мисдай қизарган чеҳрасида, қисилган кўзларида аллақандай ички тутғён, йўқ, совуқ бир газаб акс этди.

— Сен ёшсан,— деди у.— Биз урушда юрганимизда, фронт орқасида... кўп нопок ишлар қилган ифлослар ҳам бўлган. Хотин-қизларимиз кечак-ю кундуз фронт учун тер тўкиб ишлашганида халқ мулкини шамолга совуриб, кўҳлик қиз-келинчакларни йўлдан уриб, айш-ишрат қилган аблажлар ҳам бўлган. Менга кўп солдатлар йиглаб гапириб беришган. Бунаقا номардлар менинг қишлоғимда ҳам бўлган... Баъзан шуларни ўйлаб хит бўлиб кетардим. Сен ёшсан, кўп нарсани билмайсан!..

Ҳаяжондан юзимга қон тепиб:

— Йўқ, ўртоқ капитан,— дедим.— Ёш бўлсам ҳам биламан. Сиз айтган номардлар Қорасувда ҳам бор!..

— Шунақами?— деди капитан кўзлари қисилиб.— Биз фронтда юрганимизда қасам ичардик. Элга эсономон қайтсак, ҳаммадан бурун шунақа номардлар билан олишамиза, деб қасам ичардик!.. Демак, Қорасувга қайтсак, бирга курашар эканмиз-да, ука. Сен ҳам мана, фронтовик бўлдинг-ку!

Комбат кулимсираб менга қаради. У яна бир нима демоқчи эди, лекин шу пайт студебеккернинг орқасидан старший лейтенант Харитонов чиқиб келди. Гимнастёркасининг кўкраги чапаниларча очилган, кўзлари мастонона сузилган.

— Ўртоқ капитан!— Харитонов оёқларини кериб гулхан ёнида тўхтади.— Нима бўляпти ўзи? Нега биздан яширасиз?

— Нимани яширибман? — Комбат шахт билан ўрнидан турди.

— Ҳозир биттаси келди, — деди Харитонов. — Юмалоқ, хомсемиз одам. Ҳарбий прокуратурадан эмиш. Сизни сўраяпти.

— Қани?

— Утирибди ўша ерда! — Харитонов пастдаги гулхан томонга ишора қилди. — Жиндай қуиб бердик. Ғалаба-ку, ахир, ич, дедик. Лекин... Сизни ғалаба куни терговчи қидирадиган нима гуноҳ қилдингиз? Нега биздан яширасиз. Агар туҳмат қилишса... Қўйиб беринг, мен ўзим уни...

— Нима? — Комбатнинг овози газаб билан янгради. — Нима деб алжираяпсан? Анархияга йўл қўймоқчимисан? Ёқангни ил! Кимнинг олдида турибсан?

— Кечириласиз, ўртоқ капитан...

Комбат гимнастёркасини тўғрилаб, ер остидан менга қаради-ю, тўсатдан ёмон бир нарса эсига тушгандай, афтини буриштириди.

— Кайф устида тоза алжирадим шекилли? Бема-за нарса-да, шу ичкилик!

— Нега ундей дейсиз, ўртоқ капитан? Қайтага... Агар керак бўлса мен ҳам борай...

— Кераги йўқ! Қани, юр, Саша, борайлик, — деди комбат тўсатдан қандайдир илиқ бир меҳр билан. У қовоғини солиб турган Харитоновни қўлтиқлаб олдида, пастга тушиб кетди.

Кўнглим бир хил бўлиб ўрнимдан турдим.

Тонг отган, ҳавони қоплаган ҳарир туман орасидан олисдаги тоғлар элас-элас кўринар эди...

Мана, Манъжурия бўйлаб чекинаётган Квантун армияси қисмларини қувиб кетаётганимизга ўн кундан ошди, ўн кундан бери шу манзара. Атрофда дўппидай бўш жой йўқ, ҳамма ёқ кўм-кўк экинзор, тариқзор, гаслянзор... Ҳатто қир ён бағирлари ҳам зина-вина қилиниб, экинзорга айлантирилган, фақат ҳар жой-ҳар жойда ўн-ўн беш уйдан иборат кичик-кичик қишлоқлар учрайди. Томлари қамиш билан ёпилиб, устидан лой босилган бу уйлар, четан деворларига қовоқ ўрмалаган ҳовлилар водийлардаги ўз қишлоқларимизни эслатади-ю, ҳар сафар кўнглим бир хил бўлиб кетади... Мана, бу ерда ҳам ўнг томондаги тепаликда кичик бир қишлоқ кўриниб турибди. Қишлоқ-

нинг орқасида қабристон бўлса керак, кичикроқ ибодатхона кўзга чалинади. Ҳавони қоплаган ҳарир туман орасида ибодатхона ҳам, қишлоқ ҳам тоғларга тулашиб кетганга ўхшайди..

«Шу тоғлардан ўтсак бас, у ёғи темир йўл, она юрт, Қорасув!..

Қулогимни динг қилиб, гулхан томонга тикилдим. У ердаги гала-ғовур босилган, ҳамма ёқ жимжит эди.

«Ростдан ҳам, нима бўляпти ўзи? Наҳот бир иғворнинг бемаъни гапларига ишониб, комбатдай одамга осилишса? Ё ўртада мен билмаган сир-синоат бормикан?..»

Хаёлимни нотинч ўйлар чулғаб олди. Мени ҳам чақиришар, деган умидда жойимга ўтириб кута бошладим.

* * *

Тонг отар-отмас ўйин-кулги, хурсандчилик бошлиниб кетди. Ҳамма бир-бирини ғалаба билан табриклиар, қучоқлашиб ўпишар, топганлар темир кружкаларни шақ-шақ уришириб, қиттай-қиттай ичишар, ёшлар рақсга тушар, кексароқ солдатлар эса, қўноқзорнинг четига ёнбошлаб, сұхбатлашишар эди.

Мен ҳам хиёл ёзилиб келиш нијатида ўз ротамга бориб, эди даврага қўшилган эдим, комбат чақиририб қолди.

Даврэн ака, қўлида бир-икки варақ қофоз, чодирнинг олдида у ёқдан-бу ёқча ўйчан одимлаб юради. Мени кўриб, юришдан тўхтади, уйқусизликдан киртайиб қолган кўзларини олисларга тикиб:

— Ғалаба куни ҳам тинч қўймадим-а.— деди.

— Ҳечқиси йўқ...

Комбат мийигида кулиб қўйди.

— Битта муҳаббатнома ёзишга тўғри келди. Шуни кўчириб берсанг, ука. Хатимни ўқий оласанми?— деди у, қўлидаги қофозларни узатиб.

Хат ўчирилавериб, жуда чаплашиб кетган эди.

— Билмадим...

— Бўлмаса қофоз-қаламингни ол! — деди комбат.

— Ўзим айтиб тураман, сен ёзасан!

Чодирга кирдик. Мен ўртага кўчма столни қўйиб, қофоз-қаламимни олдим.

Комбат қўлларини орқасига килганича хаёлга чўмид турар, гўё мени эсидан чиқариб юборган эди.

— Ўртоқ капитан...

— А?.. — комбат бошини кўтарди.— Тайёрмисан? Ез! Лекин шошмай, чиройли қилиб ёз... «Бир ўн еттинчи гвардиячи ўқчи десант полкининг командири гвардиячи полковник Белобородовга...»

— Тагини чизиб қўй! Чиздингми? — комбат ёнимга келиб, ёзганларимни ўқиб чиқди. — Яхши. Энди сал чекиниб, майдароқ қилиб ёзасан...

♦Хурматли Мстислав Владимирович!

Бу хатни мен сизга полк командири бўлганингиз учун эмас, қўл остингизда салкам уч йил хизмат қилган бир офицер сифатида ёзяпман...»

Комбат юришдан тўхтаб, қўлидаги ёаувларига қараб олди. Сўнг, бир нуқтага тикилиб, давом этди:

♦Хабарингиз борми-йўқми, билмадим, бундан бир ҳафта олдин, ҳарбий прокуратура ходими келиб, батальон фельдшери, гвардиячи кичик лейтенант Ольга Куприянованинг ўлими тўғрисида тергов қилди. албатта, ёш офицер аёлнинг жангдан кейин ҳалок бўлиши баъзи одамларнинг кўнглида шубҳа туғдириши мумкин. Демоқчиманки, гап терговда эмас. Гап менга тақалган айбда. Гўё мен кичик лейтенант Ольга Куприянова билан эр-хотин бўлиб яшаган эмишману, энди, уруш тугаш олдида ундан қутулиш учун қасдан доғлашган эмишман... Бу айб шунчалик уйдирма ва бемаъники, прокуратура ходимига батафсил жавоб бериб ўтиришни лозим топмадим. Агар менга тақилган айб шу билан чекланганида, бу хатни ҳам ёзиб ўтирамас эдим...»

Комбат ёқасининг тугмаларини ечиб, чуқур нафас олди. Унинг фифони чиқиб бўғилиб кетаётганини сезиб, қаламимни ушлаганимча қотиб қолдим.

— Хўп,—деди комбат ниҳоят.— Ез. Хат бошидан ёз.

♦Бугун, ғалаба куни эрталаб, прокуратура ходими яна келди. Бу сафар илгаригисига қўшимча яна бир гап топиб келибди. Бу гап чўлдаги машина жанжали ва бу жанжал оқибатида муовинингиз, гвардиячи подполковник Хряшко билан бўлган тўқнашувга боғлиқ. Сиз машина воқеасини яхши биласиз. Лекин муовинингиз, подполковник Хряшко билан бўлган кўнгил-

сиз тўқнашувнинг тафсилотларини билмасангиз керак. Бу тўқнашув пайтида айтилган баъзи гаплар бугун менга жиддий айб қилиб тақилаётгани учун унга ба-тафсил тўхтамоқчиман...»

Даврон ака яна гапини бўлиб, чодирнинг четларини кўтариб қўйди. Бирдан ғир-ғир шабада ўйнаб, олисларга чўзилган тариқ ва қўноқ экилган ясси қирлар кўринди. Яқиндаги қир этагида, дала ошхонасининг ёнида бир гурӯҳ солдатлар рақсга тушмоқда эди, у ердан гармонь овози ва хушнуд қичқириқлар эшитиларди... Тўсатдан комбат елкамга қўлини қўйиб:

— Ўша куни,—деди,— машина жанжали бўлган куни, сен ҳам йиқилиб қолган эдинг шекилли?

Кўз олдимга жазира машина даштда чўзилиб ётган солдатлар келди, қулогум остида: «Сув! Сув!» деб илтижо қилган овоалар янграгандай бўлди.

— Ҳа,— дедим қизариб,— йиқилиб қолган эдим. Ногаевни силтаб ташлаганларингиз ҳам эсимда.

Комбат қовоғини солиб:

— Хўп,— деди.— Ёз!. Хат бошидан ёз.

•Хурматли Мстислав Владимирович!

Мен армияда қаттиқ интизом бўлиш кераклигини, ҳеч бир командир ўз ҳуқуқини сунистеъмол қилишга ҳаққи йўқлигини тушунаман, албатта. Ва буни тушунганим ҳолда, ўша куни ПФС нинг машиналарини тортиб олган эканман, бунга мени вазият мажбур қилган эди. Мен солдатларни ўйлаган эдим. Эсингизда бўлса керак, ўша куни биз сув бор деб умид қилган қудуқлар қуруқ чиқиб, кўп солдатлар саҳрода йиқилиб қолган эди. Йиқилиб қолганлар орасида ёшлар ҳам бор эди, тўрт йил уруш машақкатларини бошидан кечирган кекса солдатлар ҳам. Буни ўзингиз ҳам кўргансиз. Бу тўғрида гаплашганимиз ҳам. Ўша куни сиз билан гаплашишдан олдин ПФСнинг бошлиғи капитан Ногаев хўжалик ишлари бўйича муовинингиз, подполковник Хряшкони бошлаб келди. Мен саҳрода йиқилиб қолган солдатларни йиғиб юрган, асабий бир ҳолатда эдим. Лекин ҳамма гап эсимда. Сўзма-сўз баён қилиб беришга уринаман.

Подполковник гапни: «Сизга ким ҳуқуқ берди?» дан бошлади. Мен вазиятни тушунтира бошлаган эдим, подполковник гапимни бўлиб:

— Тўхтанг!— деди. — Сиз ўз ҳуқуқингизни оши-

ришга қандай ҳаққингиз бор? Қимматли юкларни ағдариб, полк ихтиёридаги машиналарни тортиб олишта ким ружсат берди?

Мен солдатларни ўйлаганимни айтдим. Солдатлар ҳам одам, дедим. Уларнинг қадрини билиш керак, дедим. Менинг бу гапим негадир подполковник Хряшкодан кўра капитан Ногаевга қаттиқроқ тегиб кетди.

— Эшитяпсизми, ўртоқ подполковник? — деб пичинг қилди у. — Бу киши солдатларнинг ғамхўри-ю, сиз билан биз душманимиз! (Гапни қаранг, ўртоқ полковник!)

— Сиз ҳам ғамхўр бўлсангиз, — дедим мен, — арзимаган нарсага шовқин кўтариб, кетимдан қувиб юрмасдан, солдатларнинг жонига ора киришни ўйлардингиз. Аҳволни кўриб турибсиз-ку, ахир?

Шундан кейин гапга подполковник Хряшко аралашди:

— Гоби саҳросидан пиёда ўтишни мен ўйлаб топган эмасман! — деди у киши. — Бу — қўмондонликнинг стратегик плани асосида бўлаётган иш!..

Ногаев подполковника қараб:

— Бу киши қўмондонликнинг стратегик планини нима билсин? — деди, кейин менга юзланиб, пиchinг билан:

— Балки, сиз умуман, бу урушга қаршиидирсиз? (Гапни буришини қаранг, ўртоқ полковник!)

Ростини айтсам, унинг бу гапидан кейин менини ҳам тутиб кетди.

— Гапни бошқа ёққа бурманг! — дедим. — Мен қўмондонликнинг стратегик планини шубҳа остига олаётганим йўқ. Лекин бу плани сен эмас, мана шу солдатлар амалга оширади! Шундоқ экан, уларнинг қадрини билишимиз керак. Бу солдатларнинг кўпчилиги тўрт йил урушда бўлган, ҳамма машаққатларни бошидан кечирган одамлар!..

Менинг бу гапим капитан Ногаевга яна ёқмади, у яна пиchinг қилиб, қаёқдаги гапларни гапира бошлиди. Гўё мени, ўзимни солдатларга ғамхўр қилиб кўрсашиб, сокта обрў орттиromoқчи эмишман ва ҳоказо...

Шундан кейин гап майдалашиб кетаётганини подполковник ҳам сезди шекилли:

— Хўп. Етади! — деди қатъий. — Бундан кейин сиз

бунақа ўзбошимчалик қилманг. 'Агар бундай ҳодиса қайта такрорланса мен ўзимга берилган ҳуқуқлардан фойдаланиб, сиз билан бошқача гаплашаман!..

Бўлган гап шу, ўртоқ полковник...»

— Ёздингми?

— Ёзим, ўртоқ капитан.

Комбат тепамга келиб ёзганларимни кўздан кечирди.

— Яхши...— у пешанасини ишқаб, ўйланиб қолди.

Мен унинг оашиб, қорайиб кетган шиддатли чеҳрасини, ғазаб билан порлаган қўй кўзларини зимдан кузатардим. Мен комбатнинг бошидаги кўп ташвишлардан бехабар эдим. Уни ўз муваффақиятларидан эсанкираб, раҳм-шафқатни эсидан чиқариб юборган тошюрак бир одам деб ўйлаган эдим. Мен умуман комбатнинг — тўрт йил урушда жонбоазлик кўрсатиб кўксиси орден-медалларга тўлиб кетган бу одамнинг бошида бунақа ғурбат бўлишини тасаввур ҳам қилмаган эдим. Менинг назаримда, худо унга ҳамма нарсани қўш қўллаб тутган: ҳам улуг шон-шуҳрат, ҳам Саломатхондай ёр ато қилган баҳтиёр бир йигит эди!.. «Кечиринг, Даврон ака», дедим хаёлимда.

— Ёз!— деди комбат. У гўё менинг ўйларимни пайқаб қолиб, дарғазаб бўлгандай писанда қилиб гапирди. — Хўш, нимага келиб тўхтадик?

— «Бўлган гап шу, ўртоқ полковник!» деб ёзди.

— Яхши! Ёз!..

«Хурматли Мстислав Владимирович! Балки, мей ўшанда, саҳрова, оғир вазият таъсирида гвардиячи подполковник билан гаплашашётуб қизиққонлик қилгандирман. Балки, янгишгандирман. Чунки кейинчалик, Квантун армияси қўшинлари билан тўқнашганимизда мен кўп нарсага тушундим. Масалан, ҳамма техника қурол-аслаҳа ташишга сафарбар этилиб, тўғри қилинганини тушундим. Чунки бу қурол-аслаҳа бўлмаганида, душман бундай осон тиз чўкмас эди, албатта. Лекин бунинг ҳаммасини тушунганим ҳолда, бугун ҳам қўлимни кўксимга қўйиб айта оламан: ўшанда, саҳрова солдат тўғрисида гапирганимда, кўнглимда қилча ҳам кир йўқ эди!.. Ҳолбуки, бугун баъзи лар ўша гапларни рўкач қилиб, менга мудҳиш айблар тақишимоқда: гўё мен ўшанда, саҳрова, қўмондонлик-

нинг стратегик планига қарши чиқибман, гёё умуман бизда одамнинг қадри йўқ, деб галирган эмишман ва ҳоказо, ва ҳоказо...

Ҳурматли Мстислав Владимирович! Подполковник Хряшко ҳам, капитан Ногаев ҳам полкимиизда янги одамлар. Мен подполковник Хряшкони деярли танимайман, лекин ундан шундай гаплар чиқишига ишонгим келмайди... Назаримда, бунинг ҳаммаси капитан Ногаевнинг иши. Бунинг чуқур сабаблари бор. Мен бу сабабларни батафсил галириб беришим ҳам мумкин эди, лозим бўлса галириб ҳам берарман, лекин ҳозирча унга тенг бўлиб, майда-чуйда гапларни ёзиб ўтиришни ўзимга эп кўрмадим... Үртоқ полковник! Менга тақилган айблар шунчалик уйдирма ва бемаъники, уларнинг пучга чиқишига шубҳам йўқ. Ҳақиқат қарор топади, албатта. Лекин шу сохта маълумот асосида тергов бошланиши (бу тергов ҳақиқат учун бўлаётганига тушунганим ҳолда) мени қаттиқ таҳқирламоқда. Мен сизнинг қўйл остингизда салкам уч йил хизмат қилдим. Энг мураккаб операцияларда қатнашдим. Уч марта оғир ярадор бўлдим. Бу баҳона армиядан сенингина бўшаб кетишим ҳам мумкин эди, лекин душман Ватанимиз тупроғидан ҳайдаб чиқарилмагунча фронтдан кетишини ўзимга лойиқ кўрмадим, виждоним йўй қўймади бунга!..»

Комбат тўсатдан сўзида тўхтаб, ўйланиб қолди, сўнг: кутилмаган бир қатъият билан:

— Ўчир! — деб буюрди. — Уч йил хизмат қилдим, уч марта оғир ярадор бўлдим, мураккаб операцияларда қатнашдим. Бунинг ҳаммасини ўчир. Ўчирдингми?

— Ўчирдим. Лекин... тўғри-ку, ахир?..

— Кераги йўқ! — деди капитан, юзини буришиб.— Ез! Янги хат бошидан ёз!

«Үртоқ полковник!

Кейинги кунларда батальонда содир бўлган янгиликлардан бири — шу. Бу янгиликлардан хабарингиз борми-йўқми, билмадим, лекин сизни бундан хабардор қилиб қўйишни лозим кўрдим.

Сизга ҳурмат билан *гвардиячи капитан Ғозиев*.

3 сентябрь 45 йил».

— Езингми? Яша! Демак, бояги гапларни ўчириб, охирги бетни қайта кўчириб ёзасан. Эсингда бўлсин:

бу ҳам ҳужжат. Махфий гап... Ёзиг бўлгандан кейин сандиққа солиб қўй. Полковникка ўзим жўнатаман. Уқдингми?

— Уқдим, ўртоқ комбат! Лекин...

— Хўш?

— Ўртоқ капитан!— дедим, ҳаяжондан қулт этиб ютиниб. — Наҳот энди шу арзимаган гапни деб, сизни?..

Комбат ер остидан хўмрайиб қаради.

— Туҳматнинг умри қисқа. Қўрқадиган жойим йўқ. Шунчаки... полковник билиб қўйсии, дедим. Қискаси, охирги бетини кўчириб сандиққа солиб қўй. Тушундингми? Кейин дамингни олавер. Солдатларга кўшилиб ўйнаб-кул. Бугун галаба куни, ахир. Буйруқ берганман: сергўшт шавла пиширишади. Қиттай-қиттай қуиб беришади...

Комбат кўзини қисиб кулди-да, чодирдан чиқди.

* * *

Уч кун ўтди. Кечқурун кун ботиш олдида тоғ орагидаги кўкаламзор сойликда тўхтадик.

Сойликнинг икки томонидаги чўққиларнинг ён бағирлари туаш олмазор боғлар билан қопланган, боғлар орасида томлари черепица билан ёпилган уйлар кўринар, ўнг қўлдаги тоғ тепасида қизилга бўялган накшинкор ибодатхона кўзга чалинар эди...

Биз тўхташимиз билан сой ярим-яланғоч болакайларга тўлиб кетди. Улар чуғур-чуғур қилишиб, мунчоқ кўзлари чақнаб тиржайишар, қўлларини чўзишиб, бош бармоқларини кўрсатишиб:

— Шанго! Руси солдат шанго!— деб қичқиришар эди.

Болалардан кейин юзлари шафтоли қоқидай буришган аллақандай митти кампирлар, мункиллаб қолган кўса чоллар кўринди. Чоллар қамишдан ясалган узун чилимларини бурқатиб, жимгина кузатишар, ликопчага ўшаган похол шляпа кийган, қотма озгин дехқонлар қисиқ кўзлари юмилиб, илжайиб қўйишар, аёллар, қизлар кўринмас эди.

Сал ўтмай, сойликни оқиш ҳарир туман қоплади, олмазор боғлардан тутун кўтарилиб, димоққа болалик-

дан таниш аччиқ тезак ҳиди урди, бир дақиқа, гүё олис Манъжкурияда эмас, ўз қишилгимда, таниш сойликда юргандай туюлиб, ғалати бўлиб кетдим...

Вася Колбаскин иккимиз штаб чодирини тикиб бўлиб, энди овқатга ўтирган эдик, иккита житой дехқонини бошлаб, старшина Сало келиб қолди. Старшина ҳам, шимларининг почалари тиззаларагача шимарилган, ялангбош, ялангоёқ дехқонлар ҳам жуда ҳаяжонда әдилар.

— Комбат қани?

Комбат штаб бошлиги билан чодирда нима ҳақидадир маслаҳатлашиб ўтирас эди. Старшина чодирга кириб, лаҳза ўтмай комбат билан штаб бошлигини бошлаб чиқди.

— Мен буларнинг гапларига унча тушунмадим, ўртоқ капитан. Лекин, назаримда, японлар тўғрисида гапиришяпти... — Старшина дехқонларнинг ёнига бориб: «Жапон! Да? Жапон?» деб сўради: «Жапон» сўзини эшитган дехқонлар тақир бошларини силкитишиб бидирлашди:

— Жапон! Жапон!

Улар ибодатхона томонга ишора қилишиб, бармоқларини кўрсатишарди.

— Кўп дейишяптими? — деди штаб бошлиги. У ҳам бармоқларини кўрсатишиб:

— Жапон кўпми? Жапон? — деб сўради.

Дехқонлар илжайишиб, бош иргашди, кафтларини томоқларига ишқашиб, қўрқув билан такорлашди:

— Жапон! Жапон!

— Японлар зулм қиласпти, ўлдиряпти, — дейишипти шекилли,— деди комбат... У пешанасини тириштириб, олдин соатига, кейин осмонга қаради. Осмонда илк юлдузлар пайдо бўлган, тог чўққилари устидаги нафис шафақ сўниб, ибодатхона кўринмай қолган эди.

— Бундай қилайлик! — деди комбат ниҳоят. — Бугун кеч бўлди. — У бошини кўтариб юлдузларни кўрсатди, кейин имо-ишоралар билан офтоб чиқишини тушунтирди. Дехқонлар «тушундик» деган маънода сарғиш тишларини кўрсатишиб, яна илжайишли.

— Бу самурайлардан ҳар нарсани кутиш мумкин,—комбат штаб бошлиғига юзланди.—Сиздан илти-

мос: роталарни шахсан айланиб чиқинг. Соқчиларга қўшимча ҳар ротада биттадан пулемётчи тайинланг. Гулханлар ўчирилсин! Дмитрий Михайлович Харитоновга ҳам айт: эҳтиёт бўлсин!

Старшина ҳалиги хитой дэҳқонларни бошлаб келган томонига, старший лейтенант эса роталарни айлангани кетди. Комбат қўлларини орқасига қилиб, анчагача чодир олдидা айланиб юрди. Кейин бир нарса эсига тушгандай, тез-тез юриб, шовиллаб оқаётган сойга тушди.

— Капитанга нима бўлди? Бир нарсадан хафами?

— Билмасам! — дедим.

— Адъютантсан-ку, сўрамадингми? Адъютант деган ҳамма нарсани билиши керак!

— Мен адъютант бўлсан, сен ҳамшаҳарсан. Менга айтмаган сирларини сенга айтиши керак!

Мен индамадим. Даврон ака чиндан ҳам мени ўзиға яқин олиб, ҳеч кимга очмаган юрак сирларини менга очди, менга ёрилди. Агар ғалаба кечаси прокуратура ходими келмаганида, балки яна кўп нарсаларни гапириб берарди... Ғалаба куни зартасига Белобородовга ёзган рапортини кўчириб берганимдан кейин биз умуман гаплашмадик, чунки, ўшандан кейин комбат ҳандайдир жуда хаёлчан, камгап бўлиб қолди... Мана, йўлга чиққанимизга уч кун бўлди, шундан бери бирор билан кулиб гаплашганини кўрмадим.

Вася қаддини ростлаб, сойга тикилди.

— Комбат қаёққа кетди? Ёлғиз юриши мумкин эмас-ку? — У автоматини олиб, капитан кетган томонга югуриб кетди.

Атроф қоронгиликка чўмган, фақат икки томондаги тоғ чўққилари осмон сатҳида элас-элас ҳорайиб кўринар эди... Жимжит. Тиқ этган товуш эшитилмайди. Фақат сой шовиллаб оқади. Гўё бу сойликда бутун бир батальон эмас, ёлғиз ўзим қолгандай, юрагимни хатарли бир туйғу чулғаб олди... Шинелимга бурканиб ёнбошлидим, қулогим эса, шовиллаб оқаётган сойда: на комбат кўринади, на Вася! Қаёққа кетишди? Боя Вася билан бирга кетаверсам бўлар экан...

Ваҳима босса ҳам кўзим илинган эканми, билмадим, тўсатдан Арслоннинг овози қулогимга чалингандай бўлиб, уйгониб кетдим... Тушимми, ўнгимми?

Йўқ, ўигум! Чодир ёнида уч тўрт киши комбатни қуршаб олган, қоронғида иккита от кўринар, Арслон ҳаяжонланиб гапирмоқда эди:

— Изига кеча кечқурун тушган эдик, бугун ҳаммасини аниқладик. Камида уч юз киши бор, ўртоқ капитан. Ҳаммаси деярли офицерлар...

— Қуроллари? — деди комбат, унинг гапини бўлиб.

— Яхши қуролланган. Кўпчилигига автомат. Пулемётлари ҳам бор.

— Кўприкни портлатиш ниятлари борлигини қаёқдан билдиларинг?

— Кўринниб турибди! — деди Арслон. Унинг гапини ёнидаги шериги бўлди:

— Кўприк ёнида, шаҳар чегарасида озиқ-овқат, қурол-аслача омборлари бор. Балки уларнинг мақсади кўприк эмас, шу омборларни талашдир! Чунки булар бир ҳафтадан бери атрофдаги қишлоқларни талаб бўлган!..

— Хуллас, ниятлари бузуқ! — деди Арслон.

Мен «Арслон!» деб юборгим келди-ю, комбат уришиб беришидан қўрқиб, секин ўрнимдан турдим.

— Шаҳар комендатураси-чи? — деди комбат.

— Комендатурада бўлса бир взвод одам бордир, — деди Арслон.

Гапга яна шериги аралашди:

— Танкчилар кетиб бўлишгач, фақат медсанбат қолган. Беш-ўнта ярадорлар...

Комбат тоқатсизланиб томоқ қирди.

— Йўл яхшими? Қоронғида адашиб қолмаймиэми?

— Йўқ, — деди Арслон қатъий. — Мана шу сой олиб чиқади. Нари борса етти-саккиз чақирим келар...

— Ҳмм...

Мен яқинроқ бордим. Арслон мени кўрди, лекин индамади. Қоронғида у отининг жиловидан ушлаб, кўкрагини кериб турар, бутун важкоҳати билан: «Мен билан ҳазиллаша кўрма. Разведкачиман!» — дерди.

— Яхши! — комбат негадир оғир хўрсиниб, ёнида турган штаб бошлиғига мурожаат қилди:

— Сиз, комиссар иккингиз, учинчи рота билан шу ерда қоласиз! Эрталаб боя хитой деҳқонлари айтган жойлардан ўтиб, соат ўн иккита кўприкка етиб бора-сиз. Лекин тонг отгунча қўзгалмайсиз. Уруш тугаган-

да беҳуда талафотнинг кераги йўқ. Мен билан алокани узманг. Душман сон жиҳатдан кўп бўлса жанг қилишдан олдин менга хабар беринг. Мен икки рота билан булар айтган жойга бораман. Рота командирларига буйруқ беринг. Ярим соатдан кейин қўзғаламиш!

Комбат кетиши билан Арслонга отилдим. Биз узоқ жудоликдан кейин мусофири юртда учрашган ака-укалардай қучоқлаша кетдик. Арслон, назаримда, бўйи чўзилиб, забардаст йигиттга айланган эди. Хатти-ҳаракатларида аллақандай салобат, гап-сўзларида эса, ҳамма разведкачиларга хос бўлакча бир гурур пайдо бўлган эди.

Арслоннинг айтишича, разведкачилар изига тушган самурайлар — императорнинг энг содиқ офицерлари экан.

— Ҳаммаси генерал ва офицерлар,— деди Арслон негадир шивирлаб.— Бу капитуляция тўғрисидаги буйруқка бўйсунишдан бош тортиб, тоққа чиқиб кетишган. Сабаби дейсанми? Сабаби... жа зўр яшашган, аплаҳлар. Ҳар бирида бир қаср. Шоҳона уйлар, борроғлар. Кўрсанг, оғзинг очилиб ҳолади. Лекин... эҳтиёт бўл, оғайни: жуда ашаддийлари булар!

Арслоннинг сал мақтаниб, лоф уриб гапираётганини сезсан ҳам негадир кўнглим ғаш бўлиб, тафсилотларини суриштирмай қўя қолдим.

Сал ўтмай, тревога эълон қилиниб, икки рота йўлга чиқди.

Тревогани кутмаган, ширин уйқуда ётган солдатлар уйқусираб пўнгиллашар, секин сўкинишар эди:

— Уфф... тағин нима бўлди?

— Нима бало, яна уруш бошландими?

— Ғалабадан кейин ҳам тинчлик йўқ экан да, биз бечорага!

Мен штаб бошлиги билан қолишим ҳам мумкин эди, лекин Арслон билан гаплашмай туриб ажрашгим келмай, комбатдан рухсат олиб, бирга кетдим.

Биз шовиллаб оқаётган сойни ёқалаб бораардик. Икки томондаги тоғ чўққилари гоҳ чекиниб, сойлик кенгаяр, гоҳ торайиб, худди чуқур жар орасига тушиб қолгандай бўлардик. Шунда бошимиз устида, тубесиз кўкда гуж-гуж ёнган юлдузлар биз билан бирга секин жилиб бораётганга ўхшарди.

Бир оз юрганимиздан кейин комбат Арслон билан унинг шеригини олиб, от чоптириб илгарилаб кетди.

— Эҳ, биз ҳам юрган эканмиз-да, чорифимиэнд судраб? — деди Вася Колбаскин, узоқлашиб бораётган от дупурига қулоқ солиб. — Бўлганга яраса разведкачи бўлиш керак экан-да, оламда!

— Ҳамма разведкачи бўлаверса... подани ким боқади, дўстим,— дедим қулиб.

— Ҳамма эмас, мен ўзимни, Вася Колбаскинни айтяпман, каллаварам! — деди оғайним хуноби чиқиб.

Атроф жимжит, ҳеч қандай хавф-хатар сезилмас, тоғ ён бағридаги боғларда итлар акиллар, хўроҳ қичқириқлари эшитилар, бир зум хаёлга чўмсам, гўё кечаси ўз қишлоғимни оралаб бораётгандай туюлиб, юрагим ҳаприқиб кетар эди...

Тўсатдан, олдиндан от туёқларининг дупури, сўнг Арслоннинг овози эшитилди.

— Ўртоқ старший лейтенант!

— Эшитаман,— деди Харитонов қоронғида.

— Комбат жадаллашни буюрди! Вақт эиқ, ўртоқ старший лейтенант...

Худди унинг галини тасдиқламоқчи бўлгандаи, қаерданdir олдинда тўсатдан пулемёт тариллади, гуппуп портлаган овозлар эшитилди:

Харитонов, гўё севиниб кетгандай:

— Рота! — деди хушчақчақ овозда. — Бегом марш!

Қўлимда автомат. Вася Колбаскин билан ёнма-ён чопиб борарканман, худди боййўғлининг ҳув-ҳувлашидай совуқ бир туйғу вужудимни чулғаб олди. Гўё мудҳиш бир воқеа содир бўлишини сезандай, юрагим орқага тортиб кетди... Кўп бўлса бир километрча юргургандирмиз, тўсатдан икки томондаги чўққилар чекиниб, атроф хиёл ёришгандай бўлди, олдинда — қоронғида, баланд осма кўприк кўринди. Отишмалар шу кўприк орқасида, дарёнинг у томонида давом этарди.

Кўприкка етиб қолганимизда йўлимизни қандайдир отлиқлар тўси, коронғида комбатнинг таниш, ўқтам овози эшитилди:

— Ведерников!

— Эшитаман, ўртоқ комбат.

— Кўприкдан ўтиб, нариги соҳилни әгаллайсан. Самурайлар озиқ-овқат омборларига ҳужум бошлади. Бир ротача келади. Икки взводни омбор соқчиларига ёрдамга юборасан. Мана, разведкачи бошлаб боради. Учинчи взвод билан соҳилни әгаллаб, душманнинг чекиниши йўлларини тўсасан... Ҷазира ойдинми?

— Ойдин, ўртоқ комбат.

— Ойдин бўлса бажаравер!.. Харитонов! Сен ўнг соҳилни әгалла! Самурайлар ҳозир чекиниши керак. Йўлини тўсиб, қопқонга туширасан. Арслон! Йўл кўрсат буларга!.. Колбаскин!

— Эшитаман, ўртоқ комбат!

— Ёнимдан жилма!

Дарёning у юзида пулемёт ва автоматлар ҳамон тариллар, гранаталарнинг гуп-гуп портлаши эшистилар эди. Биз ўнгга бурилиб, соҳил бўйлаб чопиб кетдик. Дарёning у юзидаги отишма тобора кучайиб борар, зим-зиё қоронгиликда пулемёт ва автоматларнинг тариллаши қандайдир мудҳиш туюлар эди...

Тўсатдан йўлимизни нотаниш одамлар тўсди, сўнг: «Ет!» деган буйруқ эшистилди. Бу буйруқ занжирдай чўзилган саф бўйлаб шарпадай елиб ўтди: «Ет! Ет!..»

Биз занжирдай тизилиб, дарёга қараб ётдик. Бу ерда дарё бир оз торайган, қамиш ҳам сийраклашган, сув ғалати мавжланиб ялтиллаб оқар эди. Ўнг томонда, хийла олисда, дарёга туташиб кетган қандайдир чўққилар ваҳимали қорайиб турарди...

Орт томонимдан гурс-гурс қадам товушлари эшистилиб, лаҳза ўтмай, комбат билан Вася келиб ёнимга чўзила кетишиди.

— Харитонов? Шу ердамисан?

— Шу ердаман.

— Лейтенант қани?

Қоронғида ҳаяжон билан шивирлаган овоз эшистилди:

— Секинроқ, ўртоқ капитан. Чиқишияпти... Қолнинг чап томонида. Дарёга қаранг. Учта қайиқ. Ана, яна иккитаси чиқди...

Бошимни сал кўтариб лейтенант айтган томонга қарадим, лекин ҳеч нарсани кўролмадим.

— Бургут бўп кет-э, лейтенант! — деди комбат завқланиб... — Ҳаммаси шуми? Асир нима деяпти?

— Ҳаммаси шу бўлса ўзимизоқ боплардик. Пистирмада ётганилари яна бир ротача келади, ўртоқ комбат.

— Улар ёрдамга келишармикан?

— Ким билади? Тоқقا чекинишлари ҳам мумкин.

— Чекинишга йўл қўймаслигимиз керак. Боя дехонлар мадад сўраб келишиди... Сойлик каттами?

— Йўқ, катта эмас. Уч томони қир...

— Қуршаш керак! — деди комбат. — Нима дейсан, Харитонов?

Харитонов хушнудлик билан қувватлади:

— Албатта: қуршаш керак!

— Бундай қиласмиш... — Комбатнинг овозида бўлакча бир шиддат, чапаниларча мардлик, йўқ, завқ бор эди. — Бу ерда бир изводни қолдирсак бўлади... Дмитрий Михайлович!

Старшина Сало қоронгида пишиллаб, яқинроқ келди.

— Эшитаман, ўртоқ капитан!

— Сен шу ерда қолиб, қайиқларни ўққа тутасан. Биттасини ҳам ўтказмайсан. Агар яна келишса яна ўққа тутасан. Эҳтиёт бўл! Император учун жонларини тиккан ашаддийлари булар. Беҳуда талафот бўлмасин. Тушундингми?

— Тушундим, ўртоқ комбат!..

— Харитонов! Ротани бошла! Кетдик!

— Ўртоқ комбат, сиз қолаверинг, мен ўзим!

— Кетдик! — деди комбат. У ўша жасорат ва завқ билан ўрнидан сакраб туриб, ўзини қоронгиликка урди.

Зум ўтмай, улар қоронгиликка сингиб, узоқлашиб кетишиди...

Биз старшина Салонинг буйруғи билан эмаклаб, беш-олти қадам олдинга силжидик. Дарё ўртасидаги қора нуқталар секин яқинлашмоқда эди...

— Командасиз отилмасин! — старшинанинг буйруғи саф бўйлаб секин такрорланди:

— Командасиз отилмасин!

Мана, биринчи қайиқ рўпарамдан ўтиб, учинчи бўлинма солдатларининг қаршисига борди, иккинчи қайиқ ҳам... Ҳар бир қайиқда учта, баъзиларида тўртта одамнинг қораси кўринар, қирғоққа қаратилган милтиқ стволлари кўзга чалинар эди.

— От!

Салкам ўттиз автомат, милтиқ ва бир неча қўл пулемётининг баравар тариллаши атрофни янгратиб юборди.

Қатор келаётган қайиқлар, худди ҳурккан отлардай, бир зум дарё ўртасида чайқалиб тўхтаб қолди, битта иккита одам қулаб тушди шекилли, сув щалоплаб кетди, ҳавода тартибсиз отилган ўқларнинг машъум виз-визи эшитилди...

— От!

Японлар жон ҳолатда қайиқларини нариги қирғоққа қараб буришди, бироқ сал ўтмай у томонда ҳам пулемётлар тариллади-ю, гранаталар гуп-гуп портлаб, иккита қайиқ ағдарилиб тушди... Қолган қайиқдаги японлар ўзларини сувга отиб, қамишларга уришди. Лекин автомат, пулемётлардан ёғилган ўқлар қадмишзорни ҳам титиб юборган эди.

Отишма тўхтаб, ғовур-ғувур, қулги эшитилди:

— Ўзларини императорларига багишлиганлар шуларми?

— Императорга багишиласа ҳам жон ширин-да, оғанини!

— Жон ширин бўлса ким уларга уруш тугагандан кейин ҳужум қил деди?

Солдатларнинг овоенини пулемётларнинг тариллаши бузди. Олисда, қоя томондан отишма бошланган эди... Старшина Сало ўрнидан туриб кетди. Буни кўриб, қулогимни динг қилиб қотиб қолдим. Атроф ёришгандай бўлди. Қоя орқасида, тоғ чўққилари устидা, муздай ялтиллаб бир парча ой кўринди...

Тўсатдан қоронғида от туёқларининг дупури эшитилди. Қоя томондан кимдир жон ҳолатда отини чоптириб келарди. Отлиқ тепамизга келиб тўхтади. Арслоннинг ҳаяжонли бўғиқ овози эшитилди:

— Разведкачилардан ҳеч ким борми?

— Бор, — қоронғида кимдир ўрнидан турди.

— Арслон? — деди старшина Сало.— Тинчликми?

Самурайлар қуршалдими?

— Қуршалди, ўртоқ старшина, қуршалди... Взводнинг машинаси қаёқда? — деди Арслон.

— Қўприк ёнида, — деди ўрнидан турган солдат.

— Ут олдир. Тезроқ! — тўсатдан бақириб юборди Арслон.

Старшина отнинг жиловидан ушлади.

— Нима бўлди? Нега бунча шошяпсан...

— Уртоқ старшина,— деди Арслон.— Қўйиб юборинг... Комбат яраланди...

— Нима?— деди старшина.

— Комбат дейман... яраланди...

— Оғирми?

— Билмадим. Граната парчалари тегди... Вася иккиси... — Арслон сўзининг охирини айтмай, отини ҳамчилаб, кўприк томонга чопиб кетди.

Мен тирноқларимгача музлаб, ерда ўтириб қолдим.

* * *

Тушдан кейин олисда элас-элас кўриниб турган шаҳар томондан от чоптириб Харитонов келди.

Рота осма кўприк ёнидаги соҳилда дам олмоқда эди. Старший лейтенант тўғри ёнимизга келиб, отдан сакраб тушди... Кўлаги жиққа ҳўл, юзидан оққан тер томчилари очиқ кўкрагига қўйилар, кулгичлари ўйнаб турадиган мулойим чеҳрасида шафқатсиз бир ифода бор эди.

У оқ кўпикка ботган отининг жиловини пешвоз чиққан биринчи солдатга тутқазиб, ёнимизга келди.

— Қалай, тинчликми, Дмитрий Михайлович?

— Бизда-ку, тинчлик!— деди старшина Сало, кўзлари жавдираб. — Комбатдан галиринг...

— Комбатнинг аҳволи оғир,— деди старший лейтенант. — Жуда оғир, Дмитрий Михайлович...— У ер остидан менга бир қараб қўйди.— Комбат сени сўраяпти, Мансур. Тайёрланиб тур. Ҳоаир кетамиз... Учинчи рота келдими?

— Келди,— деди старшина.

— Штаб қаерда? Мен штаб бошлиғига учраб келай. — Харитонов соҳил бўйлаб, учинчи рота жойлашган томонга югуриб кетди.

Старшина оғир хўрсиниб жойига ёнбошлади. Биз врталабдан бери Харитононни тоқатсизлик билан кутар эдик, чунки комбат тўғрисида кечаси Арслон айтган гаплардан бошқа тузукроқ хабар эшитолмаган эдик. Харитонов ҳам гапни мужмал қилди, унинг бу мужмаллигида қандайдир муддиш бир нарса бор эдик, киши тафсилотларини сўрашдан ҳам қўрқарди.

— Тўқиз кишилик десантдан бор-йўғи уч киши омон қайтувдик,— деди старшина.— Бири Оля, бири мен, бири комбат... Капитан мени «старшина» демасдан, Дмитрий Михайлович, деб чақирса ҳамма ҳайрон бўларди! Билмадим, нимага ҳайрон бўлишади? Биз ота-бала бўлиб кетган эдик.

Мен унинг оқиш мўйлови титрай бошлаганини кўриб, шоша-пиша буюм халтамни ковлашга киришдим. Кўзимга ёш олганимни пайқаган старшина:

— Йўқ,— деди қовоғини солиб. — Метин одам Даврон Фозиев! Тузалиб кетади у!

«Айтганингиз келсин, ўртоқ старшина»,— дедим ичимда.

Сал ўтмай, Харитонов қайтиб келди.

— Аксига олиб, штабнинг машинаси ҳам шаҳарга кетибди,— деди у. — Нима қиласмиш, қирчангига миңгашиб кетаверамизми? Қани юр!

Кўприкнинг олдига борганимизда олисда биз томонга қараб келаётган юк машинаси кўринди.

— Штабнинг студебеккери әмасми?—деди старшина.

— Кошкийди!

Машина кузовида кимдир кабинага суюниб турарди.

— Йўқ, штабнинг машинасига ўхшамайди,— деди старшина. Кузовда турган солдатни таниб, юрагим «шиғ» этди. Мирҳайдар!

— ПФСнинг машинаси-ку, ўртоқ старший лейтенант!

— Тўғри, — деди старшина. — Ногаев ўтирибди кабинада!

— Тўхтат! — Харитонов ранги ўчиб, йўлнинг ўртасига чиқди.

Мирҳайдар мени таниб, сўйлоқ тишини кўрсатиб ишшайди, бошидан тўпчи офицерлар киядиган фуражкасини олиб, осмонда силкита бошлади. Машина кўприкка уч-тўрт қадам ўтмай тўхтади, Ногаев кабина ойнасидан бошини чиқариб:

— Хўш, нима гап?— деб сўради.

У тунов кунгидан ҳам қорайиб, озиб кетган, жингалак соchlари ўсиб, чеҳрасида аллақандай шерсифаг бир ифода намоён бўлган эди.

Ранги ўчган, лаблари қаттиқ кисилган Харитонов яқинроқ борди.

— Ярим соатта машинангни бериб тур, бизни шаҳарга ташлаб келсин!

Ногаевнинг ингичка чиройли мўйлови ғалати қумирлаб кетди.

— Мен ҳу ана у омборларга кетяпман... — Ногаев ёилини силтаб, дарёнинг нариги юаидаги кечаси жанг бўлган қатор қўргонларни кўрсатди. — Кўп нарса қўбул қилиб олишим керак. Умуман... Нега ҳадеб менинг машинамга ёпишиб олдиларинг?

— Менга қара, Ногаев,— деди Харитонов,— шу омборларни деб кечаси жангда бир неча киши оғир ярадор бўлди... — Старший лейтенант негадир комбатнинг исмини айтмади. — Биз бориб, кўриб келишимиз керак.

— Марҳамат, кўриб келинг, лекин...

— Лекин-пекини йўқ! — Харитонов бир ҳатлашда машина ёнига бориб, кабина тутқичини ушлади. — Яхшилийча туш! Бўлмаса машинангни тортиб оламан! Кейин... комбатнинг устидан ёзган ўша ғаламис арзингга ўҳшатиб менинг устимдан ҳам маълумот ёзсан!

Ногаев кабинани очиб ерга тушди. Икки офицер бир дақиқа юзма-юз туриб қолишиди. Ногаев чиндан ҳам нимаси биландир шерга ўхшар, у новча, яғриндор, бақувват эди, Харитонов эса, Харитоновнинг пайдан иборат пишиқ ҳоматида, чақнаб турган кўзларида шундай бир нафрат ва ғазаб бор эдики, капитан беихтиёр орқага тисарилди, тисариларкан:

— Мен... ёзган бўлсам,— деди овози қалтираб.— Принципial масалалар устida ёздим...

— Принципial эмиш! — деди Харитонов.— Қайси гапларинг принципial? Кичик лейтенант ҳақидаги ифлос шамаларингми?

Ногаевнинг бурун катаклари керилиб, кўзлари чарақлаб кетди.

— Менга қара, Харитонов,— деди у ҳансира. — Мен ҳеч қачон кичик лейтенант тўгрисида ёмон гапирган эмасман. Агар билсанг, мен уни... яхши кўрардим. Ҳа!..

— Сен-а?!

— Ишонмайсанми? — деди Ногаев аллақандай ранжиб.

— Йўқ! Севгига қодир одам бунақа пасткашликка бормайди.

— У-чи? — тўсатдан бақириб юборди Ногаев. — Ғозиев-чи? Унинг кўрсатган наъмлари эсингдан чиқдими? Бутун полк олдида менга солдатга бақиргандай бақириб, ноҳақ ҳақорат қилганлари эсингдан чиқдими? Арзимаган гап учун Олянинг олдида кечирим сўрашга мажбур қилиб, нафсониятимга текканлари-чи?.. Йўқ, кечирасан, Ногаев буни ҳеч качон эсидан чиқармайди!..

Харитонов кинояли кулимсиради.

— Бунақа экан, принципга бало борми? Ундан кўра, қасд олиш учун туҳмат қиляпман, деб қўя қолмайсанми?

— Нима қиласан билмаган ишининг аралашиб? — деди Ногаев яна боягидай ранжиб. — Сенинг суюкли комбатинг қўмондонликка қарши чиққанда, бизда одамнинг қадри йўқ, деб бўхтон гаплар айтганда сен йўқ эдингу, Харитонов?

— Комбат-а? — деди Харитонов. — Капитан Ғозиев-а?! Улимларни писанд қилмай, тиззадан қон кешиб, тўрт йил урушган, неча марта десантда бўлган мард жангчи-я?! Сен «десант» деган сўзнинг маъносига тушунасанми? Биз десантда юрганда сен қаёқларда юрувдинг ўзи? — Харитонов, муштларини сиққанича, бошини әгиб, Ногаевга қараб юрди. Ногаев қўллари билан кузовни пайпаслаб, орқага чекинаркан:

— Сен фронтдаги ишларингни кўп пеш қилаверма! — деди қўрқув аралаш писанда қилиб. — Уруш тугади. Энди тинч турмуш бошланди!..

— Ҳа, сенга бу гаплар ёқмайди! — деди Харитонов. — Сендақалар энди бизнинг оғзимизни юмишга ҳаракат қилади! Ишқилиб... комбат бир нима бўлмасин, агар бир нима бўлса... — Харитонов гапининг охирини айтмади, кабинани шарақлатиб очиб, машинага чиқди-да, менга юзланиб: «Кузовга чиқ!» деб ишора қилди.

Мен машина ғилдирагига оёғимни қўйиб, боядан бери анграйиб турган Мирҳайдарнинг ёнига чиқиб олдим. Мирҳайдар тушиб қолишини ҳам, қолмаслигини ҳам билмай Ногаевга қараган эди, машина қаттиқ

силкиниб қўзғалди. Ногаев нимадир деб қичқирганича кўпrik ёнида қолди...

Мен ер остидан Мирҳайдарга қарадим. У худди жеч нарса бўлмагандай, сўйлоқ тишини кўрсатиб яна ишшайди.

— Тавба! Бу офицерларга ҳам ҳайронсан киши. Худди жўжакўролардай араимаган нарсага тепишгани тепишган... Ҳўш, аҳволлар қалай, оғайни? Ту азумисан?

— Юрибмиз...— дедим гаплашгим келмай.

— Тўғри,— деди Мирҳайдар.— Бош омон бўлса кун ўтаверар экан. Мана, ўзимдан қиёс. Кечагина ҳаммангга кулги бўлиб юрган оддий бир солдат эдим. Мана әнди, худога шукур, жир битиб, одам бўлиб қолдик...— У бағбақаси осилиб, тўлишиб қолган юзини силаб кулди, сўнг «кўриб қўй» дегандек, жун газламадан тикилган яшил гимнастёркасининг этакларини тузатиб, фуражкасини тўғрилади. Дарҳақиқат, унинг эгнидаги гимнастёрка, оёғидаги гарчли хром этик Харитонов у ёқда турсин, комбатда ҳам йўқ эди! Бирдан юрагимга қуйилиб келган нафратни яширишга уриниб, тескари қарадим...

Машина икки томони қўноқзор тош йўлдан ғизиллаб учиб борарди. Йўлдан пастроқда, ёйилиб оққан дарё бўйидаги шолипояларда ярим ялангоч деҳқонлар бамайлихотир шоли ўришарди. Йўлда эшак, ҳаҷир қўшилган резинка ғилдиракли кичкина аравачалар учрар, уларда шаҳардан қайтаётган кўса чоллар, тақир бошларининг тепасида бир тутам соchlари ҳилпираган болакайлар ўтиришар, болалар машинани кўрганда қий·чув кўтаришиб, қичқиришар эди. Шаҳар яқинлашган сари аллақандай кичик·кичик ибодатхоналар, қандайдир тош қалъалар, пишиқ гиштдан қурилган қадимий деворларнинг харобалари учрай бошлиді...

Бефаросат Мирҳайдар кўнглимга қил сифмай тўлиб турганимни пайқамай, тинмай вайсар эди:

— Сенларга ҳам ҳайронман. Манманлик қилиб, гапимга кирмадиларинг. Оқибат нима бўлди? Женларингга жавр қилдиларинг, холос!. Мана мен ўзимни олай. Бир кун пиёда юрмадим. Саҳрова ҳам, қумлика ҳам жонимни койитмадим. Сабаб? Сабаб, одамини толиб, яхши муомала қилиб келяпман... Не-

га юзингни буриштирасан? Мен унақа нозик томонларини билмайману, лекин ёмон одам эмас хўжайним! Худо ҳақи. Фақат ҳурматини бажо келтириб, сиздан яхши одам йўқ, деб турсанг бас. Бошқаси билан иши йўқ... Халангандан истеҳкомидан кейин не-не мол-дунё қўллимизга тушмади... Сенга ёлғон, худога чин, оғайни, қанча олсам — иши йўқ. Агар Германиядагидай посылка қилишга рухсат беришганида, миллионер бўп кетардим! Лекин, бир томони посылкага рухсат беришмагани ҳам яхши. Бош омон бўлса, мол топилади. Нима дейсан, оғайни?..

Ғашим келиб, яна индамадим. Олдинда, шаҳарга кираверишда, кечаси асир олинган самурайлар колоннаси кўринди. Икки юз эллик, балки уч юз кишидан иборат самурайлар колоннаси бир километрча масофага чўзилиб, тош йўлнинг четида қуюқ чанг кўтариб, аста одимлаб борарди... Уст-бошлари йиртилиб, соч-соқоллари ўсиб кетган, кўпчилиги яланг оёқ-яланг бош самурайлар бизга ер остидан хўмрайиб қарашар, баъзилари лаблари пичирлаб, қисиқ кўзлари чақнаб алланималарни гапириб қолишар эди.

— Тавба! — деди Мирҳайдар. — Боя ҳам шунака бир колонна ўтувди. Қаёқдан келяпти? Осмондан тушяптими булар?

Мирҳайдарнинг гапи юрагимга гўё ханжар бўлиб қадалди-ю, боядан бери ичимда дуд бўлиб йигилаётган аламим бирдан «портлаб» кетди.

— Осмондан тушган дейди-я! Булар таслим бўлишдан бош тортиб тоғларга чиқиб кетган... императорнинг содиқ фарзандлари бўлади, нодон! Деҳқонларни талаб бўлиб, ўша сен қабул қилиб оладиган омборларни талагани келган самурайлар булар! Тушундингми? — деб бақирдим, бақирдиму, негадир кўзимдан ёш чиқиб кетди. — Осонликча жон бергани йўқ булар! Кечаси жангда бир неча кишининг бошига етишди. Бир неча киши ярадор бўлди. Булар қаёқдан келганини энди тушундингми, гўрсўхта!

Мирҳайдар узун гўштдор бурнини жийириб, лоқайд қулди.

— Энди... уруш бўлгандан кейин шунақа бўлар экан-да, оғайни, илож қанча?

— Ҳа, шунақа бўлар экан! — дедим титраб. — Енровлар жон аямай душман билан олишар экан, бирор-

лар машиналарда катайса қилиб юрар экан. Яна баъзан буларнинг ғаламис гаплари инобатга сминар экан...

Мирҳайдар мунчоқ қўзларини лўқ қилди:

— Нима деяпсан ўзи, оғайни? Қанақа ғаламис гаплар?

— Нима деганимни эшитдинг-ку,— дедим титраб.— Қолганини ўша яхши кўрган хўжайинингдан сўраб ол!

Биз самурайлар колоннасини қувиб ўтиб, шаҳарга кирдик. Худди қурум босгандай қорайиб кетган бир қаватли тош уйлар бошланди. Бу уйлар билан си-қилган тор кўчаларда одам гавжум, одатда бошқа шаҳарчаларда ёпиқ бўладиган қатор дўкончалар бу ерда очиқ эди. Яна ҳамма ёқ бола. Кўзлари қисиқ митти болакайлар одатдагидай қўлларини чўзиб, бош бармоқларини кўрсатиб: «Шанго!» деб қичқиришар, яланг сўёқ, яланг бош йигитчалар ёғоч челакларда кўчаларга сув сепишар, тўлиғига тушадиган узун кўйлак кийган қийғоч кўз, калта соч қизлар панароқ жойларда бир-бирларини туртишиб, бизларга имо қилишиб кулишар, фақат кўса чоллар, соchlари тўкилиб кал бўлиб қолган кампирлар, оғизларида узун чилим, раста олдида лоқайд тикилишиб ўтиришар эди.

Уйлари, дўконлари бир-бирига туташиб кетган сершовқин тор кўчалардан кейин шаҳарнинг японлар яшаган қисми бошланди. Тош ётқизилган, кенг, ўқдай тўғри кўчанинг икки юзида оқ, кўк, пушти, сариқ рангга бўялган бир қаватли бежирим уйлар. Ҳар бир уйнинг олди чиройли гулзор. Уйлар ва кўчалар бўмбўш, ҳамма ёқ сув қуйгандай жимжит...

Машина уйларнинг ёнидан ўтиб, катта майдонга чиқди, сўнг ўнгга бурилиб, баланд тош девор билан ўралган боғнинг темир панжарали дарвозаси олдида тўхтади. Дарвозанинг олдида полк командирининг таниш амфибияси турарди.

Мирҳайдар билан совуққина хайрлашиб, ерга сакраб тушдим. Харитонов дарвоза ёнида турган солдатга ҳужжатини кўрсатиб, ичкарига киаркан, менга қараб «юр» деб ишора қилди. Ичкарига қадам қўяр эканман, негадир ваҳима босиб оёқларим қалтираб кетди. «Ишқилиб, тинчлик бўлсин!»— дедим, кўнглимда кимгадир илтижо қилиб. Дарвозадан киргач,

икки ёнида худди ҳозиргина ювиб таралғандай кўмкўк арчалар ўсган узун йўлка бошланди. Йўлканинг охирида сариқ мармардан қурилган икки қаватли бежирим бино, худди ювилгандай ялтираб туарди. Бинонинг мармар зиналари ёнида полк командири полковник Белобородов билан эгнида оқ халат, бошига оқ қалпоқ кийган йўғон барваста бир одам гаплашиб туарди. Старший лейтенант иккимиз баравар честь бериб берироқда тўхтадик.

Белобородов бизга ер остидан бир қараб қўйди, сўнг оқ қалпоқли барваста одамга юзланиб:

- Машҳур дегин? — деб сўради.
- Машҳур,— деди барваста одам. — Армияда энг катта нейрохирург. Сталин мукофотининг лауреати.
- Тушунтириб айтдингми, ахир?
- Айтдим. Хўп дейишди. Лекин, фурсатни бой беряпмиз. Ахир бош мия...

Белобородов соатига кўз ташлаб:

— Бундай қиласиз, майор,— деди. — Яхшиси, Харитоновни юборамиз!.. — У қовоғини согланича биз томонга юрди. — Қани, бу ёққа қара, Харитонов. Ҳозир армияга бориб келасан. Госпиталга. Нейрохирург... ким эди фамилияси?

— Левитанус,— деди майор.— Медицина хизматлари полковниги Левитанус.

— Ӯшани топиб келасан. Икки соат муҳлат. Ернинг тагидан бўлса ҳам топиб келасан!

Улар ёнимдан ўтиб дарвозага қараб кетиши. Мен, ёпирилиб келган совуқ туйғудан юрагим увишиб, арчага суюниб қолдим.

* * *

Барваста майор полковник билан Харитоновни кузатиб қўйиб орқасига қайтаркан:

— Сен узоққа кетма, солдат,— деди.— Ҳозир капитаннинг олдига кириш мумкин эмас. Қачон кириши ўзим айтаман...

Эсимга Вася тушиб, майорни тўхтатдим.

— Солдат Колбаскинни-чи? Уни кўрсам бўладими?

— Йўқ,— деди майор. — Мумкин эмас. Лекин... қани, юр-чи, суриштириб кўрайлик...

Мармар зиналардан юриб, бинонинг биринчи қаватидаги кенг фойега кирдик, фойсанинг шифтидаги олтин қандиллар, ёнғоқ ёғочидан ясалган ойнабанд эшиклар, сариқ чарм ҳолланган диван ва креслолар — ҳаммаси аллақандай ялтиллаб, чарақлаб турар эди. Мен госпиталь эмас, худди хон саройига кирган фажир-бечорадай кўзгудек ялтираб турган паркет полни босишга ийманиб, оstonада тўхтадим.

Майор ўнг томондаги очиқ эшикдан мўралаб:

— Роза Моисеевна! — деб чақирди.

Эшикдан капитан формасида заҳил юзли кичкинагина аёл пайдо бўлди.

— Роза Моисеевна,— деди майор. — Фозиев илтимос қилган солдат келди, нима қиласми?

Роза Моисеевна нимжон елкаларини қисди.

— Билмасам?

— Мен суриштириб кўрай-чи, — деди майор. — Сиз бунга халат беринг, солдат Колбаскинни кўриб чиқсин...

Роза Моисеевна ҳайрон бўлиб кўзини катта очган эди, майор «майли» деган маънода қўлинни силтадида, ялтироқ мармар зиналардан юриб, иккинчи қаватга чиқиб кетди.

Роза Моисеевнанинг буйруги билан фойеда ўтирган ҳамшира қиз елкамга оқ халат ташлаб, деразалари боққа қараган каттагина чорси хонага бошлаб кирди. Хонада ҳаммаси бўлиб учта каравот турар, бир-бирига яқин қўйилган иккита каравотда бирининг боши, бирининг ўнг қўли боғланган иккита солдат шашка ўйнаб ўтирас, дераза ёнидаги учинчи каравотда... юзи худди ганчдан ясалгандай оппоқ оқарган кичкинагина бир солдат ётар, бу — Вася эди! Васянинг бир парчагина юзи жонсиз ишқобни эслатар, ҳатто ҳамманинг кулгисини қўзгайдиган машҳур бурни ҳам узун оппоқ бўрга ўхшаб сўррайиб қолган эди!

Юрагим увишиб оstonада тўхтадим. Шу пайт Васянинг таниш ингичка овози эшитилди:

— Ҳа, нимадан қўрқасан, Мансур? Кел, келавер, оғайнин!..

Мен унинг ёнига бориб, юмшоқ креслога ўтирдим. Вася беззак тутгандай титрар, чуқур ботган кўм-кўк кўзлари бежо ёнарди.

— Гўзал қиз, сув! — деди у. — Бир қултум!..

Ҳамшира қиз тумбочкада турган бежирим оппоқ чойнакни олиб, унинг лабига тутди.

— Кўрдингми,— деди Вася лабларини ялаб.— Генералнинг чойнагидан чой ичяпман... Нега кўзингни олиб қочасан? Аҳволим чатоқми? Қўрқма. Ҳорнимнинг ярминигина кесиб ташлашди, холос. Хирургнинг айтишича, фақат сало билан колбаса еёлмас эмишман. Йўқ, дедим, сало билан колбасани мисорубкадан ўтказиб бўлса ҳам ейман, дедим...

Вася — шу аҳволда ҳам Вася эди! Қулишимни ҳам, йиғлашимни ҳам билмай ерга қарадим.

— Нима бўлди, Вася? Граната ташлашдими?

— Битта граната бўлса бунчалик бўлмас эди я!— деди Вася кўаларини юмиди. — Белига беш-олтида граната боғлаб олган битта абллаҳ самурай ўзини оёгимиз остига ташлади... Биз уларни қуршаб олганимиздан кейин бўлди. Генерал эканми, билмадим, жуда ашаддийси экан, абллаҳ! Ўзи парча-парча бўлиб кетди, капитан иккимиз ҳам... — Вася сўзида тўхтаб, чуқур ботган бежо кўалари билан юзимга тикилди.

— Комбатни кўрдингми?

— Йўқ, рухсат беришмаяпти...

— Комбат!— деди Вася тўлғаниб,— ўртоқ комбат...— Йиғлаб юборишдан қўрқиб ўрнимдан турдим.

— Омон бўл, Вася.

— Омон бўл,— деди Вася кўзини очмай.— Ҳамма дўстларга салом айт. Қўришолмасак хайр, оғайнни...

Ўпкам тўлиб фойега чиқдиму ўзимни четроқдаги креслога ташладим.

Ёнимдаги зинада оёқ товушлари эшитилди. Ялт этиб қарадим. Тепамда майор турарди.

— Бу нимаси?— деди у кўз ёшли тўксанг, ҳамшаҳарингни кўрганда дод солиб йиглар экансан да? Арт кўз ёшингни! Солдатмисан ё?.. Қани, юр!

Кўз ёшлиаримни артиб, кийимларимни тузатдим. Майорнинг кетидан иккинчи қаватга чиқарканман, юрагимни яна бояги мудҳиш қўркув чулғаб олди...

Иккинчи қаватда ҳам пастдагидай кенг фойе бўлиб, ўнг қўлда аллақандай нафис гулларга тўла катта балкон кўринар эди. Майор балкондан ўтиб, ойнабанд эшикни очди. Юрагимда ўша совуқ мудҳиш туйғу билан майорнинг кетидан ичкарига кирдим.

Деразаларидан арча шохлари мўралаб туғган кенг ёруғ хонанинг тўридаги икки кишилий қиммат баҳо диванда... комбат, тўғрироғи, боши ёстиқдай қилиб ўраб ташланган бир одам чалқанча ётар, унинг юзи, кўзи, ҳатто бурни ҳам қўшиб ўраб-чирмаб ташланган, фақат оғзигина қорайиб кўринар эди. Адёлнинг устида, икки ёнида ҳолсизгина ётган қўллари ҳам тирсакларигача боғланган эди...

Диваннынг бош томонида, қандайдир шишаҷалар, ялтироқ пичоқ ва шприцлар терилган стол ёнида ўрта ёшлардаги ҳамшира аёл ўтиради.

Киришимиз билан ҳамшира аёл жимгина ўрнидан турди, майор оёқ учida юриб диванга яқинлаши.

— Капитан Фозиев!

— А? Ҳа, ҳа, уйгоқман... — комбатнинг овози ҳам таниш, ҳам аллакандай нотаниш, хирилдоқ эди!..

— Мана, чақирган солдатинг келди...

— М-Мансурбекми? — деди комбат дудуқланиб.— Қаёқдасан, ке-ке, ука, ке-ке...

Унинг «ука» деганини эшитиб, яна ўпкам тўлди-ю, майорнинг қадалиб қараганини кўриб, қадимни ростладим:

— Ўртоқ капитан, буйругингизга биноан келдим!

— Б-буйругингизга биноан! — деди комбат энтикиб.— Намунча р-расмий гапирасан, ука? Қ-қани, якинроқ к-кел. Анюта, стул бўлса б-бер бунга...

Ҳамшира хотин чарм қопланган креслони диваннынг бош томонига суриб берди.

Юрагимни ҳовучлаб секин ўтирдим, ўтирдиму, бошдан-оёқ докага ўраб ташланган комбатни яқиндан кўриб, вужуд-вужудларимгача зирқираб кетди: ёш гўдакдай ўраб-чирмаб ташланган бу одам қандайдир оташ ичида ёнар эди!

Хонага совуқ жимлик чўкди. Комбат индамас, у дам энтикиб, чийиллаб нафас олар, дам аллакандай қўрқинчли жимиб қолар эди.

— Капитан Фозиев! — деди майор.

— А? Ҳа, ҳа?.. — деди комбат чўчиб уйгонган одамга ўхшаб, сўнг дудуқланана-дудуқланана энтикиб гапира бошлади:

— Менга қ-қара, ука. Қ-қўриб турибсан, аҳволим оғир. М-мен сенга айтадиган бир-икки оғиз г-гапим бор. Ж-жуда муҳим гаплар. Лекин булар қўйишмаял-

ти. Кечаси тилка-тилка қилиб сўйиншганлари етмагандай, яна н-нималардир қилишмоқчи эмиш... А? Н-нима деётган эдим? Ҳа, с-сенга айтадиган гапим бор. К-кечаси чақиририб оламан. Унгача... Анюта, п-планшетимни олиб бер!..

Ҳамшира хотин тумбочкадан комбатнинг таниш планшетини олди.

— Мана, ўртоқ капитан.

— Солдатга бер... Планшетда бир дафтар б-бор, Мансурбек. Ўша дафтарни ол. Олдингми? Балли!.. Шу дафтар ҳар эҳтимолга қ-қарши сенда турсин. Йўқолиб қолишидан қ-қўрқаяпман. Уқдингми?

Бу ўша кора жилдлик қалин дафтар эди.

Ўзимни тутолмай йиғлаб юборишдан кўрқиб, секин ўрнимдан турдим.

— Уқдим, ўртоқ комбат.

— Яхши... Жаҳлинг чиқмасин, К-Котельников. Мана, айтганингдай, уч м-минутдан ортиқ гаплашмадим...

Майор иккимиз оёқ учида юриб хонадан чиқдик.

— Нима? Яна кўз ёшими? — деди майор йўлакда тўхтаб.

— Ўртоқ майор. Ахир наҳот... У киши менинг қариндошим, ҳамشاҳарим, ахир!..

— Одам қандай бўлиши кераклигини ҳамشاҳарингдан ўрган! Қаддингни тут! Агар яна ҳиқилласанг, кечаси киритмайман. Овқатланасанми?

Шу топда томоғимдан овқат ўтармиди? Юрагими ни эзиб, кўкрак қафасимни ёриб юборгудай бўлаётган алам ва фарёдга чидай олмай, секин боққа чиқдим.

Кун ботган, боянинг ҳар жой-ҳар жойидаги чирмоvuқ гуллар билан ўралган шийпонларда чироқлар ёнган эди.

Мен комбат ётган балконли хонанинг рўпарасидағи шийпонга кириб ўтиредим, дафтарни очганимни ўзим ҳам билмай қолдим.

* * *

«21 август 45 йил.

Икки кунгача қўлимга қалам ололмадим. Мен учун бу урушда рўй бериши мумкин бўлган энг оғир

Фожиға рўй берди: Олядан — синглимдай яқин бўлиб қолган ажойиб қиздан, ҳаётим қил устида турганда ёлғиз ташлаб кетмаган, ҳамма қийинчиликларни баравар ўртоқлашиб, ҳамдард, ҳамнафас бўлиб келгаян дўстимдан айрилдим...

Уни гаолян экилган кир ён бағрига дағи этдик. Ҳамма кетди-ю, мен ҳали тупроғи қуrimаган янги қабр ёнидан кетолмай узоқ ўтиредим...

Дилимизни ажиг нурга тўлдириб юрган бу маъсум қиз наҳот абадий кўз юмган бўлса? Наҳот биз кетсангу, Оля бу ёт элда, бу совуқ тупроқ тагида қолса?..»

Қалбимни аллақандай тиник, теран бир мунг чултаб олди. Секин олдинги саҳифани очдим.

«6 август 45 йил.

Мана, салкам уч ой соғиниб кутганим хат — С.нинг хати, ниҳоят, етиб келди!

Азизим! Кўз ёши нималигини аллақачон эсимдан чиқариб юборган эдим. Лекин хатингни ўқиб, титраб кетдим. Қўрқма, жонгинам: бу уруш кўпга чўзилмайди. Насиб бўлса дийдор кўришадиган кун яқин. Бизнинг кўчада ҳам байрам бўлади...»

Юрагим зирқираб, дафтари ёпмоқчи бўлдиму, ёзувлар орасида ўз исмимга кўзим тушиб, яна ўқий бошлидим.

«7 август 45 йил.

Кечаки С.нинг ҳамқишилсги, Мансурбек деган ёш солдатни қаттиқ... хафа қилдим. У кечаси саҳрова кетаётганимизда қўйл пулемётини шериги Арслон деган солдатга берибди. Арслон унинг қўйл пулемётини олиб, машинага осилиб кетибди. Энди на Арслондан дарак бор, на қўйл пулемётдан!

Мансурбек кўзига ёш олиб, ўқсиб қолди. Лекин командир сифатида бошқача қилиш имумкин эмас эди, чунки ҳамشاҳарларимга «кўнгилчанлик» қиласман деб, уларга яхшилик эмас, ёмонлик келтирган пайларим ҳам бўлган. Ҳали-ҳали эсимдан чиқмайди. Қирқ иккинчи йилнинг декабрь ойи. Воронеж фронтининг юз ўн тўртинчи ўқчи дивизиясида рота командириман. Бир кун полкимизга, шу жумладан, менинг ротамга янги солдатлар келишди. Ротамга келган йигирма беш солдатнинг ҳаммаси Фарғона водийсидан өди.

Урушда юрганимга бир ярим йилдан ошган, она юртни, ўзбек диёри, тили қон-қариндош кишиларни жуда соғинган пайтларим. Ротамга келган ҳамشاҳарларимни кўрганимда, улар билан ўз она тилимда гаплашиб ҳол-аҳвол сўрашганимда, худди Фарғонага бориб, ёр-биродарларни кўргандай бўлдим. Сезиб турибман, ротага келган ҳамшаҳарларим ҳам мени кўриб қувониб кетишди. Уларниг кўпчилиги ўттидан ошган, баъзилари қирқقا бориб қолган соддагина колхозчи йигитлар эди. Улар бўлимларга тақсимлаб юбормасдан, ўзларини алоҳида бир взвод қилиб ажратиб қўйишими мендан цитимос қилишди. Офицерлар кам эди, ўзлари билан бирга келган старший сержантни командир қилиб тайинладим-да, алоҳида бир взвод қилиб ажратиб қўйдим. Кейин то жангга киргунимизча оғир фронт шароитида қўлимдан келганча енгиллик бориб, яхшилик қилиб турдим. Бечоралар хурсанд. «Сизни биага ота-боболаримизнинг арвоҳлари дуч келтири», деб дуо қилишади.

Ниҳоят, биринчи жангга кирдик. Тиззадан қор, туғ деган тупук ерга тушмайди. Тўпбозликтан кейин ҳужумга ўтиб, душман позициясига қараб чопиб боряпмиз. Бир маҳал, душман миномётлари ишга тушиб қолди. Бундоқ қарасам... ҳамشاҳарларимдан биттаси йиқилган экан, қолганларининг ҳаммаси тепасига бориб, айюҳаннос солиб йиглашяпти!.. Худди шуни кутиб турган лаънати душман ҳамшаҳарларимни мўлжалга олиб, минани ёмғирдек ёғдирди. Жон ҳолатда чопиб бориб, тўппонча ўқталиб, биттасини у ёқقا, биттасини бу ёқقا отдим!.. Лекин мен бориб, уларни қунгунимча ҳамшаҳарларимдан етти-саккиз киши ҳалок бўлган эди!..

Шу-шу кўнгилчанлик балосидан қутулишга, ҳамшаҳарларимга нисбатан бошқа миллат солдатларидан ҳам кўра талабчанроқ бўлишга онт ичдим.

Мўгулистанда учраган ёш солдатлар Фарғонадан бўлмаса ҳам (ҳаётдаги тасодифни қаранг!) С.нинг ҳамкишлоқлари бўлиб чиқди. Шунинг учунми, билмадим, уларни кўрганда худди ўз укаларимни кўргандай бўлдим. Лекин Воронеж фронтидаги фожиа ёдимдя, мен бу йигитларнинг бошларини силамадим. Улар оқ кўнгиллик билан ўзларини менга яқин олишга интилаётганларини, ёзилиб гаплашгилари, дардлашгилари

борлигини кўриб турсам ҳам, жўрттага ўзимни четга олиб юрдим, совуқроқ муомала қилдим. Улар орасида энг ёши — Мансурбек деган шоир табиат йигитчани ёса, бир-икки марта силтаб ташлашга тўғри келди. Мана бу сафар яна жазолашга мажбур бўлдим. Мансурбек пулемётини Арслонга бериб, ҳам дўстидан, ҳам пулемётидан айрилгани учун ўзи ҳам изтироб чекяпти. Кўриб турибман. Лекин бошқача қилишим мумкин эмас эди!

Майли, бу қийинчилик, бу жазолардан чиниқиб, пишиб чиқишин. Уруш тамом бўлсин, кейин йигитлар билан бир отамлашиб, йигилган ҳамма гина-кудуратларни кўнгилларидан чиқариб юбораман...»

Бошимни қўлларим орасига олиб узок ўтиридим. Комбатнинг охирги гаплари мени титратиб юборди... Наҳот у менинг қалбимда ёмон таассурот қолдирдим деб ўйласа?.. Даврон ака, азиазим, ишқилиб, худо сизга шифо берсин! Бизнинг кўкглимида сизга нисбатан қилча ҳам гина-кудурат йўқ! Биз сизни туғишган акамиздай яхши кўрамиз? Сиз билан фахрланамиз, Даврон ака!..

Шип-шип оёқ товушларини эшитиб, бошимни кўтардим. Йўлка бўйлаб ҳамшира аёл келарди.

— Юр, солдат,— деди у.— Сени капитан йўқлаяпти...

* * *

Боққа аллақачон қоронги тушган, иккинчи қаватдаги комбат ётган хонанинг деразаларидан аллақандай кўк-яшил шуъла ёғилиб тураг эди. Хона ичи ҳам, ундаги жиҳозлар ҳам ўша кўк-яшил шуълага чулғанган. Комбат ҳамон боягидай чалқанча ётар, унинг боши, юзи, қўлларига ўралган оқ докалар ҳам гўё кўк-яшил рангга бўялгану, аллақандай совуқ бир руҳ касб этган эди.

— Қ-келдингми, Мансурбек?— деди комбат тез-тез нафас олиб.— Ўтир! Мен сени қ-қийнаб юбордими? Умуман, сени к-кўп хафа қилдим, кўнглингни кўп оғритдим...

— Ўртоқ капитан! Наҳот сиз мени шунчалик...

— Т-тўхта! — деди комбат. — Бундай дейишимдая м-мақсад... шафқатсизлик қилганим учун к-кечир, қ-қаттиққўл бўлсан ҳам аслида яхши одам эдим, д-демоқчи эмасман. М-мендан кейин батальонда с-сизлар қоласизлар... Гапимни б-бўлма! Усиз ҳам хаёлим чувалашиб к-кетяпти... Нима д-демоқчи эдим? Ҳа, зсларингда бўлсин, ҳар бир с-солдат ўз ҳалқининг армиядаги вакили! Бошларингга қандай иш тушмасин, но-лиманглар! Ҳалқимиз номига иснод келтирманглар. Сенга, б-батальондаги ҳамма ҳамشاҳарларга айтадиган б-битта васиятим — шу, ука!

— Ўртоқ капитан!..

— Н-нега ҳиқиллайсан? — деди комбат ҳансирааб. — М-мен сени йигласин, деб ч-чақирганим йўқ бу ерга! Кўзингни арт! М-менинг аҳволим оғир. Ҳали сенга айтадиган анча гапим бор!..

Комбат тўсатдан гапини узиб, жим қолди. У қандайдир чидаб бўлмайдиган оғриқ ва ҳарорат ичидатўлғанар, менга эшиттирасликка ҳаракат қилиб, сенинг инграр эди.

— Анюта! Сувинг б-борми?

— Бор, бор... — ҳамшира хотин комбатнинг лаблиридаги докани тузатиб, оғзига чойнак тутди.

Комбат тишлари чойнакка шақ-шақ тегиб, уч-тўрт қултум чой ичди-да, тинчигандай бўлиб жим қолди.

— Анюта, п-планшетимни олиб бер, бу йигитга! — деди у тўсатдан. — Олдингми, М-Мансурбек?

— Олдим, ўртоқ капитан.

— Планшетнинг ичидаги битта хат б-бор. Саломагнинг хати. Ўша хатни ол!.. Т-топдингми?

— Ҳозир...

— Ўзи битта-ю б-битта хат... Эсингдами, сен п-пулемётингни йўқотиб қўйган куни олувдим. Оля бечора олиб к-келиб берувди...

— Топдим, ўртоқ капитан! — дедим қўлимга илингтан қалин конвертни олиб.

— Я-яхши, сендан илтимос, ука... — комбат эшик очилганини эшитиб, сўзида тўхтади.

Остонада майор Котельников билан... эгнида оқ ҳалат, полковник Белобородов тураг эди. Ўрнимдан сакраб турдим.

- Б-бу ким? — деди комбат ёқтирмай..
- Мен Даврон, мен... — Полковник оёқ учида юриб келиб, менинг ўрнимга ўтиреди.
- М-Мстислав Владимирович! С-сизмисиз? — деди комбат ҳаяжонланиб. — С-сизмисиз, Мстислав Владимирович?
- Бу учинчи келишим, Даврон, — деди Белобородов, — боя келганимда мана, Котельников киритмади...
- Ҳа, К-Котельников шафқатсиз одам, — деди комбат.
- Аҳволинг қалай? Тузукмисан?
- Аҳволимни Александр Ф-Федорович айтгандир, ахир?
- Айтди. Тузалиб кетади деяпти.
- Александр Федорович айтса, д-демак, тузалиб к-кетаман. Лекин... К-келганингиз яхши бўлди, Мстислав Владимирович. Жуда яхши бўлди. Сизга айтадиган г-гапларим бор эди. Айттолмай кўнглимда қолиб к-кетармикан, деб қўрқаётувдим.
- Даврон! — деди Белобородов овози қалтираб. — Сенга нима бўлди? Бунақа тушкунликка тушиш одатинг йўқ эди-ку!
- Тўхтанг, ўртоқ полковник. Олдин айтинг: Бу ж-жанг учун мендан и-норози эмасмисиз? Лекин норози б-бўлсангиз ҳам айтай: бошқа иложим й-йўқ эди. Дехқонлар арз қилиб к-келиши, ўртоқ полковник, дехқонлар...
- Йўқ, норози эмасман, — деди Белобородов. — Сенинг ўрнингда бўлсам, мен ҳам шундай қиласдим. Фақат... ўзингни эҳтиёт қиласдан, Даврон.
- М-майли! — деди комбат тоқатсизланиб. — Энди бу гаплардан фойда йўқ. Ундан к-кўра айтинг: рапортимни олдингиами?
- Белобородов кўзини юмиб, секин бош иргади:
- Олдим, Даврон, олдим. Сен ҳақсан: ҳаммаси фисқу фасод гаплар.
- Ўртоқ полковник!..
- Даврон! Тинчлан, азизим... Арзимайди...
- Йўқ, ўртоқ полковник. Арайдими-йўқми, билмадим, лекин бу фисқи фасод гаплар кейинги кунларда ичган ошимни заҳарлаб, юрагимни қ-қон қи-

либ юборди! — деди капитан. Тўсатдан унинг дудуғланиши йўқолиб, титроқ босиб, ёниб гапира бошлади. — Сиз аразимайдиган дедингиз, туҳмат гаплар, дедингиз. Хўш, туҳмат экани кўриниб турса... нега менга қарши иш қўзғашади? Нега тергов қилишади?

— Даврон, азизим! — деди полковник. — Сен ташвишланмай қўя қол...

— Мен ҳалиям ташвишланамётганим йўқ! — деди комбат куйиниб. — Шунчаки... юрагимни қон қилаётгандан нарса... менга бўлган ишончсиалик. Мени шубҳа остига олишлари эзяпти дилимни!

— Гап ишонмасликда эмас, бирор маълумот бергандан кейин, уни текшириш керак бўлгандир, ҳақиқат қилиш керак бўлгандир, Даврон!..

— Ҳақиқат! — деди комбат фифони чиқиб. — Ҳақиқат қилиш учун нега терговни мендан бошлаш керак экан? Нега ўша одамдан, гирт туҳмат гапларни тўқиб юрган ўша нокасдан бошлашмайди? Мени тергов қилишдан олдин кимлигимни суриштириб кўришса бўлмайдими? Ё тўрт йил фронтда тиззадан қон кечиб қилган хизматларим инобатга олинмайдими? Жонимни аямай тўрт йил душман билан олишганимда, уч марта яраланганимга қарамай жанг майдонини ташлаб кетмаганимда... ахир оқибат қадрим шу бўлдими? Қилган шунча хизматларим, чеккан азобларим, тўккан қоним... Бунинг ҳаммаси битта галамиснинг абраҳона туҳматига бас келолмадими? Менга — жанговар совет офицерига ишонч шу бўлдими, ўртоқ полковник?

Белобородов индамади. У уйни чулғаган кўк-яшил шуъла акс этиб ялтираган катта бошини эгиб сукут сақлар, комбат эса, нафас етмаётгандай кўкрак қафаси паст-баланд кўтарилиб энтикар, тўлғанар эди. Эшик олдида қотиб турган майор оёқ учида юриб, полковникнииг ёнига келди ва унинг елкасига қўйини қўйди.

Белобородов чўчиб, бошини кўтарди-да, «тушундим», деб ишора қилди.

— Ўртоқ полковник! — деди комбат. — Нега индамайсиз?

— Даврон, азизим! — полковник қўйини аста унинг қўлига қўйди. — Ҳозир сенга бир нима дейишим қийин, лекин сенинг ҳамма гапларингни қўймондон-

ликка оқизмай-томизмай етказаман. Бунга имонинг комил бўлсин.

— Р-раҳмат Мстислав Владимирович? — Раҳмат...

— Капитан Гозиев! — деди майор.

— Т-тўхта, Александр Федорович! — комбат бақириб юборди. — Яна б-битта гап... Эшитяпсизами, ўртоқ п-полковник.

— Эшитяпман, азизим...

— Эсингиздами, шу йил б-баҳорда, десантдан қайтиб полкка қўшилганимизда к-кичик лейтенант билан старшина Салога «лейтенант»лик унвонини б-беришлиарини сўраган эдик.

— Эсимда...

— Кичик лейтенант-ку, майли, ўлиб к-кетди. Лекин старшина Сало... унинг хизматларини б-биласиз-ку, ўртоқ полковник.

— Биламан, азизим, биламан. Яхши. Яна ҳат ёзиб, эслатамиз.

— Тўхта, К-Котельников, охирги г-ган! Ўртоқ полковник... М-Мстислав Владимирович...

— Айтавер. Эшитяпман, Даврон.

— Х-Харитонов... — деди комбат. — Батальонда, балки б-бутин полкда энг яхши офицерлардан бири шу Х-Харитонов. У ўсиши к-керак, Мстислав Владимирович.

— Яхши. Яна нима гапинг, нима илтимосинг бор?

— Ўзим учун... ҳеч қандай илтимосим й-йўқ. Фақат... мендан к-кейин... Ногаевга ўжшаган п-пасткаш одамлар... номимга доғ туширмасалар б-бас. Битта-ю битта тилагим шу, Мстислав Владимирович...

— Даврон, азизим,— деди Белобородов. — Ногаев тутул юзта Ногаев ҳам сенинг номинг, сенинг Ҷатан олдидаги хизматларингга доғ туширолмайди...

Комбат индамади. У қандайдир ҳуштакка ўхшаш овоз чиқариб, чийиллаб нафас оларди...

Белобородов тўсатдан тиз чўкиб, унинг дока билан ўралган пешанасига лабини босди...

— Бардам бўл, Даврон. Ҳозир машҳур нейрохирург келади. Яхши бўлиб кетасан, азизим.

— Х-хайр, М-Мстислав Владимирович,— деди комбат, эшитилар-эшитилмас товушда.

Белобородов оёқ учida юриб, эшикка борди, лекин

чиқишидан олдин тўхтаб соатига қаради. Котельников «ҳайронман», деган маънода елкасини учирди, сўнг: «Ҳозир, ўртоқ полковник», деди-да, комбатнинг ёнига келди.

— Фозиев! Энди бас. Укол қиласиз, операцияга тайёрланамиз!

— Я-яхши. Фақат ўн минут рухсат б-бер.

— Менга қара, Фозиев...

— Котельников!— деди комбат инграб.— Мени к-кечир, Александр Федорович, лекин сенга б-битта саволим бор: сен ҳам шу ахволга т-түшсанг... охириги дақиқаларда она юртингни э-эслармидинг?

— Ёш болага ўхшаяпсан, Фозиев. Мен сендан буни кутмаган...

— Саволимга ж-жавоб бер. Оилангни, б-бала-чангни эслармидинг? Она тилингда бир оғиз г-гаплашгинг келарми? Лоақал ўн м-минут. Фақат ўн ми-нут!..

— Хўп, яхши!— Котельников бошқа ҳеч нарса демай, секин юриб ҳонадан чиқди.

* * *

Хонага яна аллақандай совуқ жимлик чўкди.

Комбат ҳаво етишмаётгандай, ҳуштак чалиб ҳамон энтикиб нафас олар, дам-бадам секин инграп, лекич индамас, гўё мени эсидан чиқарган эди.

Ташқаридан йўлкада у ёқдан-бу ёққа югуришиб юрган ҳамшираларнинг шип-шип сёқ товушлари, баъзан буйруқ берган бўғиқ овозлар эшитилар, хона эса, сув қуйгандай жимжит эди. Мен, комбат ҳушидан кетиб қолмадими, деган хаёлга бориб, қўрқиб кетдим. Лекин шу пайт, Даврон aka яна қаттиқ дудуқланниб:

— М-Мансурбек,— деб чақирди.

— Эшитаман, ўртоқ капитан.

— М-мен жуда... ғ-галати кўринияпманми?

— Йўқ, нега энди?

— Миям... қопқоғи к-кўтарилиб кетяпти...— деди комбат. — Г-граната парчаси ўрнаб қ-қолган эмиш.

Балки шунинг учун ёш болага ўхшаб қ-қолгандирман...

Юрагим увишиб:

— Нега ундаи дейсиз, ўртоқ капитан? — дедим.

— Майли! — деди комбат. — Х-хўш. С-Саломатнинг хати қўлингдами? Г-галати кўринсан ҳам майли... Унинг хатини... эшитгим к-келяпти. Очі..

Хат оддий серкатақ дафтар варақларига ёзилган эди. Аёлларга хос йирик юмалоқ ҳарфлар билан ёзилган мактубнинг биринчи сатрларига кўзим тушиши билан, худди хат ёзиб ўтирган Саломатхоннинг матьюс чеҳрасини кўргандай бўлиб, аъзойи баданим жи-мирлаб кетди.

— Очдингми? — деди комбат. — Ўқи! Й-йўқ, т-тўхта!..

У ўлим билан олишиб қийналар, тишларини гичирлатиб тўлганар эди. Юрагим эзилиб, кўзимни олиб қочдим. Шу пайт эшик қаттиқ очилиб, хонага Котельников билан кичкинагина, чўққи соқол бир чол кирди. Чол олтин бандли кўзойнагини ярқирашиб:

— Бу ким? — деди менга қараб. — Қани, хона бўшатилсин!

Мен жон ҳолатда комбатнинг дока билан ўралган қўлига қўлимни қўйдим.

— Ўртоқ комбат... Даврон ака...

— М-майли, к-кераги йўқ! — деди комбат. — М-мабодо мен... С-Саломатга айт... Й-йўқ, тўхта. М-мен ўлишим мумкин эмас... Н-ноҳақлик бўлади. Ж-жуда ҳ-катта ноҳақлик...

Чол кўзойнаги ялтираб, Котельниковга қаради. Котельников менга қараб, «чиқ» деб ишора қилди.

— Хайр, ўртоқ капитан! — дедим ўпкам тўлиб. — Операция муваффақиятли ўтсин!

— Р-раҳмат, ука... С-сен билан хайрлашмайман, ука...

Мен комбатнинг дилида аллақандай эзгу бир тилак борлигини, у бу гапни дам айтгиси келиб дам айтолмай қийналаётганини сездим, сездиму, дод деб юборишимдан қўрқиб ўзимни ташқарига отдим.

Яшил лампочкалар билан ёритилган ярим қоронги

йўлкада Белобородов билан Харитонов гаплашиб турар, оғизларини боғлаган ҳамшира аёллар у ёқдан-бу ёққа шарпасиз одимлаб югуришиб юришарди.

Боғ зим-зиё эди. Тоғдан салқин шабада эса бошлаган, арчазор боғ ҳазин гувиллар, гўё алланимадан нолир, зорланар эди. Кимсасиз хиёбон бўйлаб, боғ оралаб кетдим. Қаёққа кетаётганимни, нима қилиб юрганимни ўзим ҳам билмас эдим. Бир маҳал қарасам... бояги шийпонга бориб қолибман. Бошимни кўтариб иккинчи қаватга қарадим. Комбат ётган хона деразалиридан ҳамон ўша кўк-яшил шуъла ёғилиб турар, лекин тиқ этган тошуз эшитилмас эди.

Арчазор боғ ҳамон гувиллар, кимгадир нолир, зорланар эди. Тўсатдан комбат ниманидир айтольмай қийналгани, унинг юрагида қандайдир бир армон қолгани эсимга тушиб, ўрнимдан туриб кетдим. Қарасам... қўлимда... Саломатхоннинг хати! Хат менда қолганини на мен билибман, на комбат!

«Даврон ака! Азизим!

Ҳар куни минг кунга татиган, салкам бир йилга чўзилган дараксилиқдан кейин бугун кечқурун, ниҳоят, табаррук мактубингизни олдим, олиб қўзларимга суртдим.

Сиз тириксиз! Тирик! Жонимдан азиз ёрим, меҳрибоним, ёлғизим тирик!

Хатингиз кечаси келди. Ташиб чекиб, тўлиб юрганимни биладиган почтачи — инвалид йигит кеч бўлса ҳам олиб чиқибди. Хатингизни ўқибману, нега шундай қилганимни ўзим ҳам билмайман, қабристонга чиқибман.

Келсангиз кўрарсиз, боғимизнинг орқасида, тегирмоннинг устида эски қабристон бор. Қабристон ўртасида Фойиб ота деган авлиёнинг қабри турибди. Бувим раҳматлик оиласизнинг бошига бирор мусибат тушса ё аксинча, бирор қувончли воқеа содир бўлса (бувим бечора баҳтдан ҳам, баҳтсизликдан ҳам бара-вар қўрқардилар) шу авлиёга чиқиб, қуръон ўқир, шам ёқиб, қабр устидаги архар шохига оқ мато боғлаб тушардилар.

Кечаси тиқ этса юраги «шиғ» этадиган одам, зимзиё гўристонни оралаб ўтиб, авлиё бобо қабри олдида тиз чўкибман.

Нималар деганим ҳозир эсимда йўқ. Нима ҳам дер-

дим? Сизнинг тирик қолганингиз, урушдан эсон-омон чиққанингиз рост бўлсин, деб илтижо қилиб йигладим шекилли. Кейин никоҳ кечамиз ўзингиз ҳадя қилган сўнг шойи рўмолимни (сиз кетгандан кейин уни сандиққа солиб қўювдим) архар шохига боғлаб, орқамга қайтдим...

Сиз тириксиз, тирик!.. Шу бир оғиз сўз билан тўрт йил чеккан ҳамма уқубатларим, сизни ўйлаб, бедор ўтказган тунларим, хатларингиз кечикканида кечалари қирларга чиқиб, телбалардай тентираб юрганларим — ҳамма-ҳаммаси эсимдан чиқиб кетди. Қўйинг, тўрт йил чеккан изтиробларим беҳуда кетмай, сиздан хушхабар келган баҳтиёр кунда мен бу ғуссаларни эсламай, сиз эшитмай қўя қолинг!..

Сиз Фарғонадан Қорасувга кетишимнинг сабабларини сўрабсиз, бирор ранжитмадими, дебсиз. Йўқ, ҳеч ким ранжитмади. Ойимлар, опамлар, акамлар, ҳамма қариндош-уругларингизга минг-минг раҳмат. Улар бизни — мени ва ўғлингизни — уч йил қўлларида кўтариб юришди, десам муболага бўлмас. Ишқилиб, уларнинг менга кўрсатган яхшиликларини қайтаргилик қиласин, яхши кунларида хизматларида бўлай, битта-ю битта тилагим шу, азизим.

Кетишимга сабаб эса... қирқ тўртинчи йилнинг ёзида директоримиз вафот этиб, мени директор қилиб тайинлашди. Августнинг охири, хатларингиз тўхтаб, эзилиб юрган пайтларим. Бир кун район маориф бўлимига Холматов деган янги бошлиқ келди, сиз билан шахсан танишмоқчилар, деб чақириб қолишиди.

Соддалик қуриб кетсин, «Холматов», деганларида ҳам хаёлимга ҳеч нарса келмабди. Бордим. Секретарь киз: «Кираверинг, эрталабдан бери ўн марта сўрадилар» деди.

Кирдим. Кирдиму ҳушим бошимдан учиб, остоңада лол бўлиб туриб қолдим. Қарасам (турмушнинг ўйинлари кўп экан, азизим!), кабинетнинг тўрида ўша «қадрдон» оғайнингиз, урушдан олдин мени олиб қочиб кетмоқчи бўлган, сиз аралашиб, бошингиз балога қолган... Ҳошим Холматов ўтирибди!..

Тўрт мучаси тугал, давангирдай йигит урушга ҳам бормабди. Институтни битириб, областда уч-тўрт ой ишлаб, маорифга мудир бўлиб келибди!..

Гап-сўзлари, муомалалари бирам мулойим, бирам меҳрибон денг! Шунчалик меҳрибонки, шаҳарга аравада келганимни эшитиб, азбаройи хафа бўлиб кетганиларидан шахсий файтонларини бердилар!. Орадан икки кун ўтмай, шахсий файтонларида мактабни кўргани келдилар, яна бир-икки кун ўтказиб, файтонларини юбориб, шаҳарга бу сафар ўтиришга таклиф қилдилар.

Ўртоқ Холматов таклиф қилган ўтиришга бормадиму, лекин ўша куниёқ Қорасувга кетишга аҳд қилдим.

Албатта, менинг кетишим «эрини кутишга сабри етмади, бевафо!» деганга ўхшаган майдачуида мишишларга сабаб бўлишини билардим, лекин Фарғонада қолиб, «Холматов» билан гап-сўз бўлишдан кўра, бу ноҳақ «миш-мишлар»га чидаб беришни афзалроқ кўрдим. Чунки бизнинг муҳаббатимизга бирор доғ туширишини, айниқса, рақибингиз Холматов доғ туширишини истамас эдим. Кетишимнинг сабабини ҳеч кимга айтмаганим ҳам шундан. Агар бу ишда мендан хато ўтган бўлса, кечиргайсиз, жонгинам!

Эртага кетаман деган куни кечқурун Нориннинг бўйига тушиб, мажнунтоллар ёнида (эсингиздами) узоқ ўтиридим. Уша кеча гапирган гапларингиз, берган насиҳатларингиз, иккимиз жўр бўлиб «Излайман»ни айтганларимиз ёдимга тушиб, ўзимни тутолмай бўзлаб юбордим.

Бу оламда бахт деган нарса борми ўзи, йўқми, билмадим, лекин инсон боласи уни излагани излаган экан. Мен ҳам сизни излай-излай базўр топган эдим, қаёқларда қолдингиз, қаёқларда юрибсиз, азизим?..

Мана, вақт тун ярмидан оғди. Суратингизга тикилиб, бидирлаб ўтирган Улуғбек (ажабо, сиз урушда юрганингизда туғилган ўғлингиз уч ярим ёшга тўлибди!) бобосининг қўйнига кириб ухлаб қолди. Мен эсам уйда, ўнинчи лампа шуъласида сизга хат ёзиб ўтирибман...

Даврон ака, азизим! Тўрт йил урушганингиз етмаганими? Нега бир урушдан чиқиб, бошқа урушга кетдингиз? Ё отпуска беришмадими? Ёки биз бечорани унча соғинмадингизми?.. Соғинмассангиз ҳам майли, ишқилиб, сизни бир кўрсам, кўкрагингизга бошим.

ни қўйиб, юрак уришингизни бирпас эшитсан бўлди, шундан бошқа тилагим йўқ худодан...»

Кўзимни хатдан узиб кўк-яшил шуълага чўмган жонага қарадим. У ердан тиқ этган товуш эшитилмас, арчалар билан ўралган икки қаватли мармар бино аллақандай мудҳиши сукут сақларди... Наҳот Саломатхоннинг нидоси кўкларга бориб етмаса? Наҳот тўргийил урушда не-не ўлимлардан омон қолган Даврон акадай одам, уруш тугаб, ҳамма ўйнаб-кулиб бола-ча-қасининг олдига қайтаётганда Саломатхонни додга қолдириб, оламдан ўтса?

Боғни чулғаб олган мудҳиши сукут тонг пайти бузилди. Саломатхоннинг ноласи кўкларга бориб етмаган, комбат, операциядан кейин, бир неча соат ўлим билан олишиб, тонг пайти жон берган эди...

* * *

Эрталаб госпиталь жойлашган боғ олдидаги майдонга бутун полк йигилди. Майдоннинг ўртасида, агрофи арчалар билан ўралган гулзор орасида уч-тўртта янги қабр пайдо бўлган, қабрларнинг ёнида ҳарбий оркестр мотам маршини чалар, ҳавода қандайдир улуғвор сукут ҳукм сурарди.

Ногаҳон худди ўзбек сурнайининг овозидай ингичка, чийиллоқ овоз эшитилди. Майдонга сурнай чалиб, мис лаганчаларини жаранг-журунг уриб бир тўп хитойлар кириб келишди. Булар дафн маросимига қатнашгани келган дехқонлар эди!

Мен ҳалиям ҳушимга келолмай, ўзим билан ўзим овора, хаёлга чўмиб турган эдим, тўсатдан Харитоновнинг «Сен нима қилиб юрибсан бу ерда?» деб бақирганини эшитиб, бошимни кўтардим.

Биздан сал нарироқда, гулзорнинг четида, қўлида фуражка, бошини ҳам қилиб капитан Ногаев туради!..

— Нега келдинг? — деди Харитонов қалтироқ босиб.

Ногаев, рангида қон йўқ, кўзини олиб қочди.

— Харитонов, — деди у секин. — Кеча нега айтмадинг?

— Нимани айтардим? — деди Харитонов.
— Капитан Фозиев... ярадор бўлганини...
Харитонов кўзлари ёниб:
— Айтганимда нима қилардинг? — деб сўради.—
Кечирим сўрармидинг?

Ногаев ерга тикилганича:

— Билганимда... сўрар эдим,—деди.

Харитонов индамай тескари бурилди.

Ногаев бошини хам қилиб яна бир оз турди, сўнг, бир-бир босиб, орқасига кайтди...

Ўлимнинг кучини мен биринчи марта ўшанда тушиудим. Даврон аканинг ўлими... ўзидан бошқани ўйламайдиган бу мунофиқни ҳам инсофга чақирган эди!..

Сал ўтмай бояннинг икки тапақали дарвозаси очилиб, қизил мато ёпилган тобутни кўтарган офицерлар чиқиб келишди. Офицерлар орасида кичик лейтенант Сало ҳам бор, энг охирида эса... Арслон келарди.

Васяни таниса бўлар, унинг бир парча бўлиб қолган юзи ганчдан ясалгандай оқариб кўринар, Даврон аканинг юзи эса... гуллар билан ёпилган эди.

Мотам митингини кўкраги орденларга тўлиб кетган ёш генерал очиб, Белобородовга сўз берди. Белобородов, сийрак, оппоқ соchlари шабадада ҳилпираб, қайта-қайта томоқ қириб, анчагача гапиролмай турди. Унинг нималар дегани эсимда ҳам йўқ.Faқат бир нарса ҳануз ёдимда: Белобородов гвардиячи капитаннинг Ватан учун қилган хизматлари, мардлиги, жасурлиги, десантчи қўшинлар сафида кўрсатган қаҳрамонликларини битта-битта санаб, ҳалқимиз шундай ажойиб фарзандидан айрилгани ҳақида гапирганида яна овози қалтираб кетди-ю, назаримда, бутун полк бир тўлғангандай бўлди...

Юракларни зир титратган мотам марши садолари остида тобутларни қабрларга туширишди. Ҳалок бўлган ўғлонлар шарафига етти марта ўқ узиб, салют бердик...

Мотам митингидан кейин полк рота-рота бўлиб, арчалар билан ўралган янги қабрлар ёнидан ўтди. Ўтаётгандан мен секин сафдан чиқиб, гулларга кўумилган қабрларнинг ёнида тўхтадим. Қейин Арслон билан Серкабой келди. Биз жимгина қўл бериб кўриш-

дик. Ўртадаги қабрнинг бошида ўтирган старшина Сало ер остидан бизга бир қаради-да, яна кўзини олиб қочди. У офтоб тегмаган катта ялтироқ бошини зигиб, оқ оралаган шоп мўйловининг учини лаби билан ҳимарганича кўзини юмиб ўтирас, оқиш киприклари орасидан қалқиб чиққан ёш томчилари катта гўштдор бурнининг четидан юмалаб, мўйлови орасига сингиб кетарди...

Қайси бир китобда «йигит кишининг йигисидан даҳшатли нарса йўқ», деган гапни учратган эдим. Кечаси билан йиглайвериб, кўзимда ёш қолмаган эди, старшинанинг унсиз йигисини кўрдиму, кўнглим яна вайрон бўлиб, Даврон аканинг қабри ёнига тиз чўкдим. Ёнимга Арслон келиб чўккалади, чўккаларкан:

— Нега йиглайсан? — деб бақирди.— Гвардиячи капитаннинг гаплари эсингдан чиқдими? Йиғлоқи одамни жонимдан ҳам ёмон кўраман, демаганими? У? Ундан кўра бор, Саломатхон опамларга хат ёэ! Шоириона қилиб ёэ! — деди у. Ўзи эса... тирқираб оққан кўз ёшларини тиёлмас эди...

Ўша оқшом комбатнинг қабри ёнида мен дўстларимга Даврон аканинг ўлим олдида айтган ҳамма гапларини, сўнгги васиятини гапириб бердим.

Биз комбатнинг қабри ёнида унинг васиятларига ҳамиша содиқ қолиш тўғрисида бир-бири мизга сўз бериб, қасамёд қилдик.

Хотима

Беш йил ўтди. Беш йил Порт-Артур шаҳрида хизмат қилдим.

Эллигинчи йил, сентябрь ойининг бошларида, ниҳоят, хизматдан бўшадим.

У маҳалда Порт-Артур — Владивосток поезди қатнарди. Шу поездга миниб, беш йил кутган соғинганими издан ҳар кеча тушларимизга кирадиган суюкли эл — Она юртимизга қараб йўл олдик.

Олис сафарнинг ўн тўртинчи куни поезд таниш станцияга келиб тўхтади. Офтоб ғарбга ёнбошлаган, лекин ҳали барваҳт эди.

Вокзалдан Қорасувга машина қатнар эди. Лекил Даврон аканинг кундалигига: «Агар урушдан эсон-омон қайтсам, қишлоққа пиёда кириб бораман», деган гап бор эди. Шу гап эсимда, хизматда юрган чоғларимдаётк «мен ҳам урушдан эсон-омон қайтсам, Қорасувга пиёда кириб бораман», деб ният қилган эдим.

Шаҳар билан Қорасув ораси ўн беш-йигирма чақирим келади. Чор-атроф кенг дашт, худди Гоби саҳросидагидай гиёхлари қовжираб қолган ясси қирлар. Фақат ҳар жой-ҳар жойда ўсган тўп-тўп толлар, олис уфқда кўринган қишлоқ боғлари гўё илиқ куз офтобида эркалагандай дам пушти ранг, дам қирмизи тусга кириб товланади. Лекин менинг кўзимга олисда оловдан ёнган бу боғларгина эмас, ёэги жазирамада қовжираб қолган бу дашт ҳам жуда иссиқ кўринади, ерга тиз чўкиб, бу тупроқни ўпгим, кўзларимга суртгим келади, негадир кайта-қайта Даврон ака эсимга тушиб, дилимни қандайдир ҳазинлик чулғаб олади.

Ниҳоят, кун ботиш олдида, боғларга кўмилган Қорасув ҳам кўринди.

Мен хизматдан бўшаб, уйга қайтаётганим ҳақида хабар бермаган эдим. Лекин қишлоқнинг «узун қулоқ» — телеграфи ўз ишини қилган эди: қишлоққа кираверишдаги боғларга яқинлашганимда... олдинда ойимлар билан опамлар бошлиқ бир тўп хотин-халаж, қийчув кўтарган болалар, беш йил ичиди бўй етган хотаниш қизлар кўринди... Улар билан энди кўришиб бўлганимда, қаёқдандир, етти-саккиз ёшлардаги кўзлари катта-катта бир бола чопқиллаб келиб, тиззамни қучоқлади, қучоқлади-ю:

— Акажон! — деди кўзлари жавдира. — Дадамларни кўрган солдат амаким сиз бўласизми?

Бу — Улуғбек эди. Кўнглим вайрон бўлиб, уни даст кўтариб бағримга босдим. Улуғбек ҳам бўйнимдан маҳкам қучоқлаб олди...

Саломатхон опа кўринимас эдилар. Буюм халтамни жиянимга бериб, Улуғбекни кўтарганимча тўғри Саломатхон опамларнига кетдим.

У киши мени боғ эшиги олдида қарши олдилар. Кўзларида ҳалқа-ҳалқа ёш, жимгина келиб пешанамдан ўпдилар.

Мен ўша маҳалдаёқ Саломатхон опага Даерон еканинг кундалигини, ҳамма ҳужжат да хатларини юборгандим. Биз беш йил давомида хат ёзишиб турган эдик, айтилмаган гап ҳам қолмаган эди.

Саломатхон опанинг юрагидаги эски ярани тирна масликка ҳаракат қилиб, Даврон аканинг сўнгги дақиқалари тўғрисида эҳтиёткорлик билан гапириб бердим.

Саломатхон опа бошини эгиб, гапларимни жимгина эшитдилар. У кишининг соchlарида битта-яримта оқ толалар пайдо бўлган эди. Лекин гўзал чеҳрасида, маъюс кўзларида, бошини эгиб, гапларимга жимгина қулоқ солишида фақат дард эмас, оғир мусибатларни бошидан кечирган одамлarda бўладиган бўлакча бир бардош, қандайдир юксак бир мунг бор эди. Мен унинг ғамгин нигоҳига тикилиб, мусибат ҳам кишини улуғлай олиши ҳақида ўйлар, улкан фожиаларни бошидан кечирган олижаноб аёлларни эслар эдим.

Кетаёттанимда Саломатхон опа яна пешанамдан ўпид:

— Бизникига келадиган йўлни эсингиздан чиқаруб қўйманг, гоҳида йўқлаб туринг,— дедилар.— Улуғбекка: дадангни кўрган солдат амакинг келади, деб ўйламай гапириб қўйган эканман, ҳар куни сизни сўрайвериб эси кетди...

Саломатхон опа шундай дедилару, аёл эмасми, бирдан ўзини тутолмай, юм-юм йиглаб юбордилар...

...Ииллар ўтди. Улуғбек катта йигит бўлди, институтни битирди, уйланди. Саломатхон опа невара кўриб, исмини Даврон қўйдилар...

Мен Саломатхон опани тез-тез йўқлаб тураман. У кишига тасалли бериш учун эмас, аксинча, ўзим Саломатхон опадан тасалли истаб йўқлаб бораман.

Ҳар сафар бошимга бирор мусибат тушса ё бирор ноҳақликдан ранжиб тўлиб кетсан, негадир эсимга Даврон ака тушади, тушади-ю, Саломатхон опани қўмсаб қоламан. Ва ҳар сафар у кишининг меҳрига қониб, кўнглим тоғдай ўсиб қайтаман.

Даврон ака оламдан ўтганда Саломатхон опа атиги йигирма уч яшар гўзал бир жувон эди. Даврон аканинг вафотидан кейин кўп йигитлар ўртага одам қў-

йишиди. Лекин Саломатхон опа ҳаммасига рад жавобини берди. Бировлар буни маъқуллашса, яна бировлар: «Ёш умрини жувонимарг қилди», деб койишиди. Уларнинг қайси бири ҳақ — билмадим, лекин ҳар сафар бу тўғрида ўйласам, барча Саломатхон опалар тўғрисида шоир айтган тиниқ мисралари әсимга тушибади:

Ҳатто зеб-зийнатни юлқиб эмёда,
Ҳайкал ҳам ўрнатинг бамисли ҳаёл.
Шундайлар бўлмаса агар дуиёда,
Бу қадар муҳтарам бўлмасди аёл.

*Toшкент — Туркистон.
1970—1971 йиллар.*



ВИДО

Ҳ и к о я

Уста Қобилнинг аҳволи оғирлашганига бир ҳафта-дан ошди. У катта меҳмонхонанинг тўрида, боққа қараган очиқ деразанинг олдидағи ёғоч каравотда бошига қўш ёстиқ қўйиб чалқанча ётарди. Калта қирқилган оппоқ соқоли шифтга қараган, икки чаккаси худди ўйиб олингандай чуқур ботган, узун қирра бурни сўррайиб қолган. Фақат кўкрагида ётган қўллари, айниқса томирлари бўртиб чиққан катта суюкдор кафтлари, гарчанд тарашадай қотиб кетган ва дағал бўлса ҳам, бурунгидай бақувват ва гўзал кўринади.

Устанинг дарди ошқозонида. Назарида, ичига очкўз бир типратикан киргану, бир ойдан бери гоҳ ичакларини тирнаб тимдалайди, гоҳ чанглаб гижимлайди, гоҳ усиз ҳам безиллаб турган жойига мисоли чўғ босгандай қовуриб-куйдиради...

Мана бир ҳафта бўлдики, уста овқатдан қолди. Фақат ичи ёниб кетган маҳалда сопол кўзада турган муздай қатиқдан бир қултум ютиб қўяди, холос.

Хасталик енга бошлаганидан кейин уста шаҳардаги кенжা ўғли Нодирга хабар бердирган эди. Бурноги куни келинни олиб у ҳам етиб келди.

Устанинг дарди оғирлашиб қолганидан бўён уйдан одам аrimас эди. Нодир келгандан бери келди-кетди яна ҳам авж олди, шунчалик авж олдики, катта келини Гулжаҳоннинг қозон-ўчоқдан қўли бўшамай қолди. Йўқлаб келувчиларнинг аксарияти бир-икки соатсиз тарқашмас эди. Одатда улар меҳмонхонага ғамгин бир қиёфада кириб келишар, хусусан, ҳол-аҳвол сўрашаётгандарида кўзларида, овозларида чуқур ачиниш, ҳатто изтироб акс этиб турар, аммо, эҳтимол, уста озор чекаётганини сира билдири-

магани учундир, эҳтимол, ҳамманинг саволига бир хилда «Худога шукур!» деб жавоб бергани учундир, хиёл ўтмасдан уни унугиб қўярдилару, суҳбат қизиб, ҳазил-мутойиба, кулги бошланиб кетарди. Мана ҳозир ҳам катта деразанинг олдидаги сўрида уч-тўрт киши пешиндан бери чақчақлашиб ўтиришибди.

Тўрда соchlари оппоқ оқарган бўлса ҳам ўзи хийла ёш кўринадиган Азиз домла ўтирибди. Унинг ёнидан Нодир жой олган. У ҳаво ранг ипак бриджга кийган, эгнидаги нафис ипак майканинг орасидан думбадай оппоқ юмалоқ қорни кўришиб турибди. У шундай ғалати семирганки, тарам-тарам қип-қизил юзи, қовоқлари шишиб, кўзлари қисилиб қолган. Ўзиям қандайдир салобатли, вазмин кўринади, шоҳи рўмолчаси билан бўйини, мунчоқ-мунчоқ терлаган узун қирғий бурнини тез-тез артиб, сукут сақладиди, саволларга кўпроқ бошини қимирилатиб жавоб беради ёки жилмайиб қўя қолади.

Эҳтимол, уч-тўрт йилдан бери кўрмагани учундир, ўғлининг бунчалик ўзгариб кетиши устага қандайдир ғалати туюлади.

Нодир охирги марта, бундан тўрт йил муқаддам, раҳматлик кампир вафот этганида келин билан бирга келиб, бир ҳафта-үн кун туриб кетганди. Шундан кейин иши оғирлашиб кетди чамаси, чақиртирса ҳам келмаган, фақат бултур кузда «илмий асаримни тутгатиб олгунимча қишлоқда туриб турсин», деб тўнғонич қизлари Фирузани бериб юборганди. Мана, ниҳоят ўзи ҳам келди, келди-ю устани ҳайратда қолдирди: тўрт йил ичидаги тамоман бошқа одам бўлган-қолган. Ё уста азалдан семизликни хуш кўрмаганидан шундай туюляптимикин?.. Нодирнинг рўпарасида чордона қуриб, колхоз бухгалтери Икром деган йигит ўтирибди. У ҳам шунчалик семирганки, боши билан бўйни қўшилиб кетганга ўхшайди, катта юмалоқ қорни чордона қурган оёқларининг ўртасида ҳўппайиб турибди. фақат раисликка яқинда сайланган Самад деган йигитгина қотма, новча, ўзиям юзлари кунда куйиб қорайиб кетган.

Уларнинг суҳбатиям ғалати. Мана, бир соат бўптики, гап ҳозирги ёшларнинг ахлоқи устида кетялти. Бу гапни одатдагидай Азиз домла бошлаган. Узун, нимжон бармоқлари билан лабларини тез-тез

силаб, ҳозирги ёшларда одоб қолмаганидан, ўқишга, илмга қизиқиши сўниб бораётганидан шикоят қиласди, куюниб-тутақиб гапиради:

— Тўғри айтасиз, домла! — дейди Икром бутун гавдаси билан қўзғалиб. — Ҳозирги ёшлар на урфодатни билишади, на иззат-икромни!

Самад пешанасини тириштириб:

— Сен ҳам жа... — дейди. Унинг овозида, чўзиқ, қорамагиз юзида қандайдир ўнғайсизлик ифодаси жилва қиласди. Аммо Икром буни сезмайди.

— Нима, ёлғонми? — дейди у калта, семиз қўлини силкитиб. — Бизлар ўқиган маҳалда қанақа эдик? Мана, домла ўзлари айтсинлар!

Домла лабларини тез-тез силайди:

— Ҳа, у чоғлар бошқача эди! — дейди у ва галати жилмайиб қўяди.

«Эски ҳаммом — эски тос! — ўйлади уста. — Ёшларни камситишгани камситишган...»

Икром яна бир қўзғалиб:

— Яшанг, домла! — дейди мароқ билан ва Самадга юзланади. — Нафсиlamрига бизлар бошқача эдик! Орамиздан тузук-тузук одамлар чиқиши ҳам бежиз амас!..

— Масалан, машҳур бухгалтерлар,— дейди Самад кулиб.

— Мен ўзимни айтаяпганим йўқ... Мана, масалан, Нодирни олайлик. Олим бўлди. Диссертация ёқлаяпти.

Ҳамма Нодирга тикилди. У бир қўзғалиб, кулимсираб қўяди, аммо юзи ҳамиша қип-қизил бўлгани учун Икромнинг сўзларидан ўнғайсизландими, йўқми, буни билиб бўлмайди.

«Ҳа, олим! — дейди уста хаёлида. — Улуғ сўз, табаррук сўз!»

Азиз домла қандайдир бўлакча ҳурмат билан жилмайиб ҳарайди. У Нодирни ёшлигидан севади, уни ўзининг энг яхши шогирди деб билади, ҳамиша ундан фахрланиб юради.

— Бизни қўявер,— дейди у қўлинни Нодирнинг тиззасига қўйиб.— Қани, ўзингдан гапир. Қалай, диссертация битдими?

Нодир рўмолчаси билан бўйинини, юзларини артади, қошларини чимириб, хиёл сукут сақлайди.

— Битди, — дейди у ниҳоят. — Авторефератният ёзиб тарқатганмиз. Башарти бобой бунақа бўлмаганларида эди... — У кўз қири билан уста ётган томонга бир қараб қўяди,— келаси ҳафталарда ёқлаган бўлардим. Энди кузга қолиш хавфи бор, аммо бобой бунақа бўлгандаридан кейин... илож қанча?

Ўртага жимлик чўкади.

•Ҳа, бобой,—дейди уста.—Бобой...•

Бу сўз, эҳтимол, Нодир уни шу маҳалгача «дада» деб чақиргани учундир, қулогига ғалати эшитилади, негадир дилини оғритади.

Бир ойдан бери ёпишиб олган бу дард асабларини қақшатиб қўйган эканми, ё Нодирни азалдан яхши кўргани учунми, ишқилиб, бурноғи кун эрталаб келин иккиси кириб келгандаридан, устанинг кўнгли бирдан эриб, қўлларини ёғоч каравотнинг қирраларига тираб, ўрнидан тура бошлади. Лекин шу пайт, худди уни биринчи марта кўргандай тикилиб қолган Нодир шошиб қўлларини чўзди:

— Қўзғалманг, қўзғалманг!— деди у энтикиб. Сўнгра каравотнинг четига ўтиаркан:

— Ҳа, бу қандай бўлди, бобой?— деб сўради.

Қизиқ, уста шу сўзни эшитди-ю, Нодирни кўрганида тарқагандай туюлган дармонсизлик аъзойи баданини қайта чулғаб олди. У остонаяда ранги ўчиб турган келинига: «Омонмисан, болам?»— деди-да, ўзини ёстиқча ташлади...

Шундан бери уста «бобой» сўзини Нодирнинг оғзидан ҳар куни бир неча марта эшитади, бироқ, ажабо: унга ҳеч ўргана олмайди...

Ўртага чўккан сукутда Икромнинг ғўлдираган овози эшитилади:

— Ҳа, бобой... бобой молодец, шифо берса ҳали отдай ўйнаб кетадилар.

Нодир сёқларини йигиштириб чордона қуриб ўтириди, бир-икки марта йўталиб қўйди.

— Ҳа, албатта,— деди у. — диссертацияни олдинроқ ёқлаш ҳам мумкин эди. Аммо ўзларингдан қолар гап йўқ. Оила қурдик. Янги уй, янги рўзгорнинг ташвиши ҳам осон бўлмас экан...— у кўпроқ домлага мурожаат қиласи, домла эса, бошини тез-тез иргаб, кулимсираб қўяди.— Илгари бошимизга тушмагунча

билмас эканмиз,— дейди Нодир кулиб. — Илидан-игнасигача деганларидек, қозон-товоғу, чўмичгача муҳтож бўларкансиз, киши. Тўғри, бобой ёрдам бераб турдилар. Буни инкор этиш адолатдан бўлмайди. Лекин оила бўлгач, моддий ва маънавий эҳтиёж ҳам минут сайин ўсиб бораркан... Аммо...— Нодир қийгир бурнининг учларидағи терларни бармоғи билан сидириб ташлаб илжаяди. — Аммо бу ташвишлардан қутулиб олдик. Борсаларингиз кўрасиз, ҳеч нарсадан муҳтоҗлигимиз йўқ. Ҳаммасини саранжом-сариштаб-лаб олдик...

«Саранжом-саришта,— дейди уста.— Қозон-товоқ...»

Самад секин йўталади:

— Диссертациянгизнинг темаси?.. — дейди у қошлиарини чимириб.

— Темаси...— Нодир бир қўзгалиб қўяди, пешана-сини артади.— Шу соҳада мўътабар бўлмаган кишиларга бир қадар ғалати туюлиши мумкин. «Бақанинг асаб системаси...»

— Йўқ, йўқ, нега?— дейди Самад.

— Гап шундаки, бақа билан одамнинг асаб системаси ўртасида маълум яқинлик бор. Мана, домла биладилар.— Нодир Азиз домлага юзланади, домла шошқалоқлик билан бош иргайди:

— Албатта, албатта,— деди у лабларини силаб.

«Бақа,— ўйлади уста,— одам, асаб...»

Тўсатдан у бу гаплардан боши оғрий бошлаганини сезади, бор кучини тўплаб ёнига ёнбошлаб ётади. Ётган заҳоти юзини майин тоғ шабадаси силаб ўтади, димоғига райҳон ҳиди уради. Уста бошини кўтариб олманинг соясига қарайди. Соя у мўлжаллаган жойга борибди: демак, Абдуллажоннинг қайтиш маҳали яқинлашибди.

Мана, бир ой бўлтики, Абдуллажон, қурилаётгая шифохонада унинг ўрнига усталик қиляпти. Ҳар куни кечқурун ишдан қайтганидан кейин устага ҳисобог беради.

Уста кўнглининг бир четида бу бино ундан қоладиган сўнгги ёдгорлик бўлишини сезгани учунми, ё бу ишни савоб деб билиб, тўшак ёзиб ётиб қолгунгача унга бор кучи, ҳунари, меҳр-муҳаббатини бераб келгани учунми, ишқилиб, ҳар куни Абдуллажоннинг йўлига интизорлик билан тикилар, унинг қурилиш тўғ-

рисидаги гапларини эшитаётганда эса ҳатто оғриқ ҳам эсидан чиқиб кетарди.

Шифохона ярми район ҳисобига, ярми колхоз ҳисобига қурилмоқда эди. Ўзи унча каттаям эмас, саккиз хоналиқ оддийгина бир бино эди. Лекин ўтган йил район катталари айни иш қизиган бир маҳалда, шаҳардан коптоқ тепадиган майдон қуриш баҳонаси билан ўз улушларини олиб қўйдилару (коптоқ тепадиган майдон қаёқда-ю, шифохона қаёқда?), колхознинг қуввати етмасдан, қурилиш тўхтаб қолди. Башарти уста масалани йиллик-ҳисобот мажлисида кўтариб чиқмаганида, эҳтимол, бу йил ҳам битмас эди. Мана энди раис ҳам хурсанд, аҳли қишлоқ ҳам.

Уста шу бинони битказсам бас, кейин кампирнинг ёнига жўнасам ҳам розиман деб ўйлаганди, аммо ниятига етолмади — унинг тўрт деворини тиклаб, энди устини ёпаман деб турганида тўшак ёзиб, ётиб қолди.

Устанинг хаёлини рўпарадаги шафтолжорда пайдо бўлган бир тўп болалар бўлиб юборди. Болалар орасида Абдуллајоннинг иккита ўғли билан Нодирнинг кизи Фируза ҳам бор эди. Қизиқ: уста шу неварасига бўлакча меҳр қўйганди. Айниқса, унинг кўзларини яхши кўрар, унинг ҳамиша кулиб турадиган чарос кўзлари устага негадир кампирни, тўғрироғи, унинг ёшлиқ чоғидаги кўзларини эслатарди... Нодирлар келгунча Фируза ҳам Абдуллајоннинг болаларидай кийим боши лой бўлиб, яланг оёқ, яланг бош чопқиллаб юрарди, онаси келгач, қизига калта оқ кўйлак кийгизиб, соchlарига оқ лента бояглаб қўйди. Мана энди дараҳтлар орасида бир қарашда шоҳдан шоҳга учиб қўнган ниначига, бир қарашда капалакка ўхшаб яйраб-яшнаб юрибди.

«Ишқилиб умри узоқ бўлсин...»

Уста унинг шўх қилиқларини суқланиб кузатаркан, хаёлига фавқулодда бир фикр келди, у Нодирни ҳам бошқа фарзандларидан кўра кўпроқ севган, болалигиданоқ унга муҳаббат қўйганди.

Эсида бор: урушдан олдин уста йигирма тўрт хоналиқ янги мактаб солган, тўғрироғи, ҳамма усталарнинг тепасида туриб, қурилишга бошчилик қилганди. У маҳалда умуман қурилиш кам экан чамаси, унинг бошланиши қишлоқда катта воқеага айланган, фақат колхозчилар эмас, ўқитувчилар ҳам ишга енг шима-

риб киришгандилар. Ўшанда баъзан тушда, баъзан кечқурун Нодир устага овқат олиб келарди. У пайтда Нодир ё иккинчи, ё учинчи синфда ўқир, ўзим устага ўхшаган новча, озғин, аммо юлдузи иссиққиана, ниҳоятда озода бир бола эди. Уста уни ҳамиша ёнига ўтқазиб бағрига босарди. Уни бошқалар ҳам очиқ чеҳра билан қарши олишар, әркалашар, ўқитувчилар эса бири биридан ошириб мақтаб кетишарди. Айниқса, Азиз домла кўп мақтар, «ўзи иккинчидаги-ю, аммо зеҳни бешинчи синф боласининг зеҳнидан ўткир буни!» дерди қайта-қайта таъкидлаб ва бу билан даврадагиларга: «Сенларнинг фарзандларинг ҳам шундоқ бўлсин» демоқчи бўларди.

Дастлабки пайтларда Нодир бу гаплардан жуда ийманар, юзини устанинг слюсига яширас, уста эса кулиб қўя қоларди. Лекин Нодир бу гапларга ўрганиб қолди, ҳатто мақтов кутиб одамларнинг оғзига қарайдиган бўлди.

Сўнгра уруш бошланди-ю, ҳар ким ўз ғами, ўз ташвиши билан бўлиб қолди. Аммо уруш тамом бўлгач, бу гаплар қайта бошланди. Бу сафар Нодирнинг шуҳрати тонг юлдузидай чарақлаб кетди, бир-икки марта газетада сурати босилиб чиқди, ёш бўлса ҳам баланд минбарлардан гапирадиган, чет элдан келган меҳмонларни табриклайдиган одат чиқарди, ўқитувчилари эса катта олим бўлишини каромат қила бошлидилар. Аста-секин уста ҳам унга бошқача қарайдиган, у билан фахрланадиган бўлди. Ўзиям китоб мутолаа қилишдан, бошқа ҳамма рўзгор ишларидан озод бўлди. Бир жиҳатдан шундай қилганилари ҳам чакки бўлмаган экан, мактабни юксак баҳо билан тугатди. Кейин шаҳарга кетди. Уста ундан топганини аямади. Абдуллажон ҳам ойма-ой қарашиб турди. Нодир бу сафар ҳам яхши ўқиди, яхши ўқигани учун бўлса керакки, шаҳарда олиб қолишид... Бу жиҳатдан уста ўғлидан мамнун, ҳатто узоқ вақт жимиб кетганида ҳам ранжимаган, негаки, улуғ мақсад йўлида юрганини тушунар, бу тўғрида домлалар, айниқса, Азиз домла гапирганда, кўнгли тоғдай ўсарди. Ҳалиям бўлса уста ундан ранжимас эди, фақат бир нарса унга ғалати туюлади: шунчалик ўзгариб кетган, илгариги Нодирга, устанинг ўзидай новча, қадди-қомати келишган ўғли Нодирга сира ўхшамайди.

Тўсатдан уста ичидаги типратикан бир ағнаб, юрагининг тагига қаттиқ қадалганини, оғзи, томоқлари қуруқшаб қолганини сезди.

Бош томонида сопол кўза, кўзада муздай қатиқ. Уста ичини аланга олганда қатиқдан бир-икки қошиқ ичади. Лекин ҳозир буни ўзи олиши керак, токи улар сезиб қолишиса, ҳаммаси сапчиб туришади, яна ўша жонга теккан бир жил савол-жавоблар бошланади...

Уста бор кучини тўплаб, ўнг ёнига секин ағдарила бошлади, бироқ қанчалик эҳтиёт бўлмасин, Самад пайқаб қолди чамаси, ўрнидан сакраб турди.

— Уста ака!

Самаддан кейин Нодир ҳам оғир қўзғалди:

— Ҳа, бобой, нима гап?

— Йўқ-йўқ, — деди уста,— ўзим, бир қошиқ қатиқ...

У Самад тутган қатиқдан икки-уч қошиқ ичди. Муздай қатиқ, назарида, худди жиз-жиз куйиб турган жойига бориб тегди-ю, ором берди. У ўзини ёстиққа ташлаб кўзларини юмганди, Самад энгашганини ссанаб, қайта очди.

— Хўп бўлмаса, уста ака,— деди Самад,— яхши ётиб туринг...

— Барака топ, болам.

— Рангингиз анча яхши. Умуман... у ёқقا кўп шошаверманг, уста ака. Ҳали қиладиган иш кўп-а, ўзингиз биласиз-ку?

Самаднинг кулимсираганини кўриб, уста ҳам жилмайди. Сўнгра яна кўзини юмди.

«Кўп бамаъни йигит. Ишқилиб, умри узоқ бўлсин! Шу раис бўптики, колхознинг иши юришиб, турмуш пича тузалди. Ташибиши бошидан ортиб ётибди-ю, ҳар куни, жилла бўлмаса, кун ора бир келиб хабар олиб кетади...»

Уста ўз ўйлари билан бўлиб, кўзи илинганини пайқамай қолган экан, бир маҳал Абдулла жоннинг овози қулогига чалингандай бўлиб, уйғониб кетди.

Ўрнидан қўзғала бошлаганди, оstonада Абдулла жон кўринди.

Устанинг ўзидай, балки ундан ҳам оғзин, новча, шунчалик новчаки, ягриндор бўлишига қарамасдан, хипча, ҳатто нозик кўринади. Калта қирқилган, аммо

қалин қора соқоли, учлари сагал олифталик билан буралган мўйлови юзининг чўзиқлигини билинтирганиди.

— Уйгоқмисиз, дада? — овози бўғиқ, аммо мулоҳим.

Уста бошини қиммирлатди. Абдуллажон четроқдазги стулни каравотнинг ёнига суреб ўтири, энгашиб сўради:

— Қалай, тузукмисиз, дада?

— Худога шукур...

— Оғриқ, босилай дедими?

— Оғриқ... — деди уста. — Шу гап кимга керак, болам?

Абдуллажон тирноқлари синиб, ёрилиб кетган узун бармоқлари билан мўйловининг учини тўғрилиб, кулимсиради. Шунда худди раҳматлик онасиникига ўхшаган қуралай кўзлари ҳам кулди-ю, чеҳраси ёришиб кетгандай туюлди. Шу сабабданми ё бошқами, уста унинг ниҳоятда кўҳлик, хушбичим эканини, қирқдан ошганига қарамасдан ҳали жуда ёш кўринишини кўнглидан кечирди. Уста ўзи ҳам шундай бўлган — эллик ёшида уни ўттиз беш-қирқ яшар деб ҳисоблошарди.

Абдуллажон ҳисбот берга бошлади.

— Бугун, ниҳоят, бинонинг устини ёпиб бўлиши. Аммо, на шифер, на тунука топилмагани учун қора қоғоз билан ёпиши. Эрталаб, эҳтимол ганч сувоққа киришсалар.

Бунинг ҳаммаси деярли маълум гаплар эди. Лекин уста одатда унинг бу гапларини зўр эътибор билан әшитар, маслаҳатлар берар, гоҳ койинса, гоҳ қувонарди. Бугун эса, гарчи Абдуллажонни ҳар кунгидай сабрсизлик билан кутган бўлса ҳам, унинг гапларига одатдагидай эътибор қилмас, гапидан ҳам кўра кўпроқ нигоҳини, худди кампирникига ўхшаш қуралай кўзларидаги илиқ, майин табассумни кузатиш билан банд эди.

Улар йигирма беш йилдан бери ёнма-ён меҳнат қиладилар, аммо уста шу бугунгача унинг нақадар хушбичим, мўмин-мулойим бир йигит бўлганини сезмабди! Бирор марта унинг чеҳрасига суқланниб қарамабди, ишидан, гап-сўзларидан миннатдор бўлиб: балли болам, демабди!..

Йўқ, бу фикр ҳозир устанинг дилига азоб берадиганни йўқ, у шунчаки, буни пайқамаганига ажабланяпти, ҳатто бу кашфиётидан қувоняпти...

Абдуллахон гапириб бўлдими, йўқми — уста буни англай олмай қолди: уйга катта келин Гулжаҳон кирди.

Уста унга кўзи тушган ҳамон қандайдир қимтиниб, безовталаниб қолди. У бир ойдан бери ҳаммадан кўра шу келинidan тортинар, ҳатто вижданан эзиларди. Ёш аёл унинг қуриб-қовжираб қолган суюкларини кўриб, таъби хира бўлишидан қўрқар ва иложи борича уни ташвишлантирмасликка ҳаракат қиласарди. Буни Гулжаҳоннинг ўзи ҳам сезса керак, эшикдан кирган жойида тўхтади: бўйи новча бўлса ҳам, эрига ўшаган ягриндor, ҳатто қўллари ҳам Абдуллахоннинг қўлларида катта-катта, меҳнатдан дагаллашиб, қотиб кетган. Фақат чакка суюклари туртиб чиққан озғин, юмалоқ юзи мулойим, аллақандай тиник, қўй кўзларидан меҳр ёғилиб турибди.

— Келди-кетди билан бўлиб, сизга қарай олмадим, тузукмисиз, дада?

Уста сийрак, оппоқ қошларини чимиради, бошини чайқайди.

— Раҳмат, болам, ишингни қиласавер, сенгаям қийин бўлди...

Гулжаҳон рўмолининг учини узун бармоқларига ўрайди, секин энтигади.

— Менга нимага ҳам қийин бўларди, дадажон, ишқилиб, сиз... худо сизга шифо берсин... — у нажот сўраган назар билан Абдуллахонга қарайди:

— Ақалли бир-икки қошиқ ош ичинг, дада, қатиқлаб берай, мадад бўлади.

— Майли,— дейди уста,— кўп эмас...

Унинг овқатга тоби йўқ, аммо Гулжаҳоннинг кўнглини қолдиргиси келмайди...

Эр-хотин секин уйдан чиқишади.

Гулжаҳоннинг келин бўлиб тушганига йигирма йил бўлди. Аммо уста унинг лоақал бир кун тинибтиничиганини билмайди. Йигирма йилдан бери ҳам уйнинг, ҳам даланинг ишини ўтайди. Ҳар куни эрта наҳорда туриб, ярим кечада ётади. Қампир раҳматлиқ кўзини юмибдики, бутун рўзгор, ҳатто Нодиржоннинг қизи ҳам унинг зиммасида. Шундай бўлса

ҳам уста на бир марта унинг турмушдан ҳолиганини эшитди, на бирор муносабат билан қовоғини солганини кўрди. Аммо уста энди ўйлаб қараса, унга жабр бўлибди! Абдуллажонга айтиш керак: жонига ора кирсинг, у ёқ-бу ёққа олиб борсин...

Уста Абдуллажон келтирган угра ошдан икки-уч қошиқ ичиб, қайтариб берди. Абдуллажон косани четга суриб, сўнгра қўлинни устанинг қўлига қўйди.

— Нима бўляпти ўзи, дада? Шаҳардан тунов куниги докторни чақирилсақмикин?

Уста бошини чайқади:

— Бор,— деди у,— дамингни ол, бугун анча тузукман, дармоним йўқ, холос.

Йўқ, уста Абдуллажонни авраётгани йўқ, дард, оғриқ чиндан ҳам деярли тўхтаган, фақат беҳол эди.

Ниҳоят, у уйқуга кетган бўлса керак, туш кўрди. Гўё меҳмонхонанинг ёнида яна бир ҳужра қура бошлигаган эмиш. Уни уста гўё кампир иккисига мўлжаллаган, қариган чоғимиизда осойиштароқ кун кечирайлик, деб ўйлармиш. Шунинг учун ҳам кеча-ю кундуз ҳордиқсиз ишлар, ўсиям жуда чарчаган эмиш.

Бир маҳал қўлида тугун, ҳужрага кампир кириб келганимиш. Эгнида кўк кўйлак, бошида кўк рўмол, қўзларига ҳам ғалати кўк сурма қўйганимиш.

— Шу ҳужрага жуда шошилдингиз-да, дадаси,— дермиши у бошини ғамгин чайқаб.— Олдин болаларни уй-жойлик қилиб, кўнглини олсангиз девдим.

Уста мўйловини силаб кулармиш:

— Қачонгача бола-чақани деймиз? Үзимизниям бир ўйлайлик-да. Сенга яқинроқ бўлай деб қуряпман буни!

Уста бу гапни ҳазил қилиб, қўзларини ғалати қисиб айтармиш. Шундан кейин кампир ёплигидаги истараси иссиққина келинчак қиёфасига кирганимиш ва устадан уялган бўлиб юзини ўгирамиши:

— Қўйинг, ҳар нимани гапираверманг,— дермиши у ва ташқарига шошилармиш.

Уста уни тўхтатмоқчи бўлиб интилармишу, аммо ўрнидан қўзгалолмас эмиш... Уста уйгониб кетди.

Кун чиқмаган бўлса ҳам меҳмонхона ёп-ёргуғ, қўчадан подачининг: «Ҳей, ҳайда!» деган овози эшитилиб турарди.

Устанинг нафаси бўғилган, дармонсизланган эди.

У бир дақиқа қўй-қўзиларининг маърашига қулоқ солиб тушини ўйлаб ётди. Шу пайт рўпарадаги деразанинг орқасидан икки кишининг паст, аммо асабий товуши қулогига чалинди.

— Сиз масалага тушунмадингиз!

«Нодир!» — хаёлидан ўтди устанинг.

— Ўзи тушумайдиган гап бўляпти-да, ука, ахир кўриб турибсан-ку!

Бу Абдуллажоннинг овози эди.

— Кўриб турибман. Аммо сиз ҳам бир мuloҳаза қилиб кўринг, ахир: башарти шу сафар ёқлаб олмасам, олти-етти ойга сурилиб кетади бу савил.

— Суриса нима бўпти? Дадамиз бу аҳволда ётганда...

У киши яна бир йил шу кўйда ётишлари мумкин. Биламай бу дардни.

— Ҳар қанақа олим бўлсанг ҳам шу сафар пайтамбарлик қилма, ука.

— Майли.

Нодирнинг овози бирдан ўзгарди, худди кўнгли озор чеккан ёш боланинг овозидай титраб кетди...

Уста кўзини секин юмди... Қани энди бу овозни эшитмаса, билагида қуввати бўлса-ю, тескари ўгирилиб ётса. Аммо ўгирилиш у ёқда турсин, қимир этишига мажоли йўқ, асабий овоз эса тобора баланд пардаларга кўтарилмоқда эди.

— Майли, танаси бошқа дард билмас, деб бекор айтмабдилар. Аксинча, наҳотки, менинг бутун келаҗагим, ҳаёт-мамотим шунга, фақат шу нарсага боғлиқ эканини тушунмасаларинг? Бу ишнинг юзага чиқиши фақат мен учун әмас, ҳаммамиз учун катта бир обрў бўлишини айтмай қўя қолай (бунга барип тушумайсиз!), пул деган савил ҳам бир неча марта ошади-ку: ошса зарар бўлмас дейман? Сизларгаям нафимиз тегармиди дейман?

— Раҳмат. Шу кунимизга ҳам шукур.

— Ана! Тагин пичинг отадилар.

— Хўп,— тўсатдан Абдуллажон бўғиқ йўталди.—

Аммо шуни билиб қўйгинки... ўзинг уятга қоласан,— деди у,— одамларнинг гап-сўзи...

— Мен мешчанлик ботқогига ботиб қолган чиркин одамларнинг гап-сўзини сариқ чақага ҳам олмайман, ҳа!

Бир дақиқа ғалати жимлик чўқди, сўнгра Абдуллајон:

— Шунақами? — деди секин.— Майли бўлмаса, ўзинг биласан...

Овозлар тинди, вазмин қадамларнинг «турс-турс» ёши билди...

Устанинг кўзи секин очилди. Назарида, ҳамма ёқ сув қўйгандай жимжит, ҳовлида тирик бир жон қолмаган эди.

«Нодирмиди у ё уста янгишдими? Наҳот Нодир, унинг кенжатои, эркаси, фахри — Нодир шу гапларни айтса?...»

Уста нимадир томогидан қаттиқ бўғганини, икки томчи илиқ кўз ёши чуқур ботган ёноқларига юмалаб тушиб, соқолига сингиб кетганини ҳис этди...

«Бу... сенга нима бўлди, қария?» — деди уста, лекин худди шу саволни кутиб тургандай, кўз ёшлари соқолига оқиб туша бошлади. Назарида, бошига оғир мушкул тушган маҳалда ҳам бунчалик эзилмаган, хўрланмагандай эди. У умрида биринчи марта шундай йиғлаши эди, айни маҳалда кўз ёши оғриган кўнгилга тасалли беришини ҳам биринчи дафъя ҳис қилиши эди...

Ҳар холда бир оздан кейин Абдуллајон кириб келганида, уста уни одатдаги қиёфада қарши олди, сўнгра ишга боришга ижозат этди-да, Нодирни чақириб юборишини илтимос қилди.

Абдуллајон бир дақиқа қошлирини чимириб, савол назари билан тикилиб қолди, кейин индамай чиқиб кетди-да, хиёл ўтмасдан Нодирни бошлаб кирди.

Нодирнинг эгнида ипак пижама, оёғида ўша шиппак, фақат кечаси яхши ухламаганми ё кечқурун ич-килик қилишганми, ишқилиб, қовоқлари шишин-қираган, кўзлари ҳам кичрайганга ўхшар, ранг-рўйи ҳам қандайдир тунд эди.

— Қани, ўтири, ўтирларинг-чи,— деди уста,— бир оғиз гапим бор...

Нодир Абдуллајоннинг ёнидаги стулга ўтиаркан, унга ер тагидан бир қараб қўйди.

Уста бир оа сукут сақлаб, ўзини босиб олди.

— Мен бугун анча тузукман,— деди у ниҳоят.— Уйқум тинч бўлди, оғриқ ҳам қўйді ҳисоб... Сен дол-

зарб маҳалда келганга ўхшайсан,— уста кўзларини секин очиб, Нодирга тикилди. Нодирнинг узун, қийғир бурни бирдан ялтиллаб кетди, у шошиб рў-молчасини қидира бошлади.

— Йўқ, гап унда эмас...

— Мен... иккаловингдан ҳам розиман. Сен ҳам рози бўл, болам...— уста кўзини юмди. Ўртага оғир сукут чўқди, сўнгра Нодирнинг бўғиқ овози эшитилди:

— Иш бўлса, бир гап бўлар... Сиз бу аҳволда ётганда...

Уста кўзини қаттиқроқ юмди, ҳаво етишмаётгандай бўлиб, чуқур тин олди.

— Аҳволим... Аҳволимга нима бўпти?— деди у.— Бу дард ўзи шунаقا: бир йилга чўзилса ҳам ажаб эмас...

Нодир кўзларини отасининг юзидан узиб, очиқ деб разадан боққа қаради.

«Бу бобой нима демоқчилар ўзи? Ё унга пичиниг отмаган энди шу киши қолганмиди?»— Нодирнинг юзига қўйилган қирмизи бўёқ секин тарқади.— Ҳа, булар учун, бутун қишлоқ учун у катта олим, турмушда кам-кўсти йўқ. Мана, тўрт йил бўптики, бир кун тиниб-тинчимади. Кундуз диссертация устида тер тўқса, кечалари чакана иш олди: мақолалар ёзди, кечки мактабларда дарс берди. Фақат тирикчилик тебратиш, инсонга ўхшаб кун кечириш учунгина қилди бу ишларни.

Рост, бобой ҳам ёрдамлашиб турди унга. Буни Нодир инкор этмайди, инкор этиш адолатдан эмасди, аммо унинг ёрдами Нодир учун, ёш оила учун мисоли, дарёдан томчи эди, холос! Буни на ста тушунди, на ака, Нодир ўз ёғида ўзи қовурилди. Ниҳоят иши юришиб, эрта-индин ёқлаб мен ҳам ёруғликка чиқаман деб турганда бундай бўлди!..

Албатта, бобой жўрттага касал бўлгани йўқ. Лекин...

Майли, нима дейишса ҳам ихтиёр ўзларида. Фақат... кўнглида уйғонган түғёнга йўл бермаслик керак, холос... Жаҳл чиққанда ақл қочади дейдилар. Индамай енгиш керак буларни!»

Уста бошини секин иргатди:

— Бас. Гап шу. Рози бўл, болам!— деди у эшитилар-эшитилмас, кейин бошини қуи солиб ўтирган Абдуллажонга юзланди:

— Келинга айт, менинг яктағим билан ҳассамни берсин...

Уста бир неча дақиқа кўаларини юмиб қимир этмай ётди: у Нодир чиқиб кетишиниям-кетмаслигиниям билмай ўтирганини сезди, аммо чурқ этмади, зотан чурқ этишга мажоли ҳам йўқ, дилида уйғонган өўр галаён билан олишмоқда эди.

Нижоят, Абдуллажон, унинг кетидан Нодир ҳам қўзғалди.

— Майли, ишқилиб, омон бўл! — деди уста энтишиб.

Бир оздан кейин «шип-шип» этган овоз эшитилди. Уста Гулжаҳонмикин деб ўйлади, бироқ оёқ товуши ниҳоятда енгил эди. Шу пайт кўзи яктағини стул суяничигига илаётган қўлларга тушди: бу қўллар, тилла занжир чуқур ботган юм-юмалоқ билаклар оппоқ пуфакка ўхшарди.

Уста кўзини юмди. У ўрнидан туришга аҳд қиласанди. Туришга мадори етармикин? Аммо турмаса Нодир кетмайди, негаки боя уста қанча уринмасин, гали хиёл илмоқли чиқди чамаси, довдираб қолди.

Довдирарамасин! Иши шунчалик зарур экан, бора-версин. Унинг тобути устида бир одам ортиқ бўлди нима-ю, кам бўлди нима?

Уста оёқларини қимирлатиб кўрди, худди чўян! Гўё белидан юқори томонида жон бору пастида жон йўқ!

Аммо туради, чўян тугул симобдан ясалган бўлса ҳам туради у.

Уста қўлларига бутун кучини тўплаб, тирсакларини каравотнинг четларига тиради, сўнгра тишини тишига қўйиб, қаддини тутиб ўтирди. Нафасини ростлагач, чойшабни очиб, оёқларига қаради, қаради-ю, қўзларида илиқ табассум пайдо бўлди: ахир, наҳотки унинг оёқлари шунчалик узун, бесўнақай, хунук бўлас-ю, у ҳеч қачон буни сезмаган бўлса!

Нижоят, уста қўлларини каравотга тираб секим тура бошлади, аммо энди қаддини ростлаб олганида, қўсатдан, кечадан бери тинчиб қолган типратикан, наварида, уйғониб кетди-ю, бир ағдарилди.

Уста қўзларини юмганича қотиб қолди. Хайрият, типратикан фақат бир ағанаб тинчиди...

Эгнида узун яктак, қўлида ҳасса — уста тўсатдан ҳовлида пайдо бўлганида ҳамма, ҳатто ёш болалар ҳам бирдан жим бўлиб қолишиди.

Уста ҳассага суюнганича кўзларини юмиб айвонда анча турди.

Ҳовли гарчанд қуюқ сояга чўмган бўлса ҳам жуда ёруғ кўринди унга. Дарахт япроқлари гўё гард юқмагандай тикиқ, ям-яшил әди. Айвоннинг олдиндаги, сўрининг теварагидаги ҳар бири пиёладай атиргуллар эса шундай очиқ қизил рангга бўялган, хиналар шундай нафис пушти рангга чўмилган эдикি, дилини равшан қилиб юборди унинг!

Ҳаммадан олдин болалар шов-шув кўтаришди. Улар еб ўтирган қаймоқларини ташлаб чопиб келишибди. Фируза устанинг оёгини қучоқлаб, тиззасига юзини ишқалади. Ошхонадан икки коса овқат кўтариб чиқсан Гулжаҳон, севинганидан, овқатни қаёққа қўйишини билмасдан қолди.

— Вой ўлмасам, нима бўлди, дадажон, ё ҳовлига жой солиб берайми? — деди у устага гирдикапалак бўлиб.

Ниҳоят, сўрида кичик келин билан ионушига қилиб ўтирган Нодир ҳам етиб келди:

— Ие, бу қандоқ бўлди, бобой? Турниш ман қилинган әди-ку сизга?

— Сен қачон кетмоқчисан? — деди уста унинг сўзини бўлиб.

Нодир елкасини қисди, ўнгайсизлангандай жилмайди.

— Билмадим энди, сиз бу аҳволда...

— Аҳволимга нима бўпти? Айтдим-ку, тузукман дебі Мана... Шифохонага боряпман... бир хабар олиб келмоқчимая...

Нодир яна ўнгайсизланниб кулимсиради.

— Қайдам. Боя раисдан машина сўрагандик. Аммо, тўғрисини айтинг: мабодо ҳалигига... Сиз турганда ҳар қанақа иш бўлсаем!..

Нодир сўзидан адашиб, дудуқланиб қолди. Уста секин ерга қаради:

«Машина сўраб кўйиб, тагин бу гапни айтасанми, болам?»

— Хўп, мен кетдим, мендан хавотир олма,— деди уста.— Кўриб турибсан, тузалиб қолдим.

У бошини кўтарди, назарида, тўсатдан иликларига қандайдир бир куч қуйилиб келгандай, ҳатто чўяндай оёқлари ҳам енгиллашгандай туюлди унга.

Қуёш терак бўйи кўтарилган бўлса ҳам кўча салқин, деворлардан осилиб тушиб, чирмасиб кетган олча ва гилослар ажойиб бир чодир ҳосил қилган.

Олчалар териб олинган, ўриклар ҳам ҳазон бўлган, фақат чанг япроқлар орасида чуғурчук чўқиган ва туршак бўлиб қорайиб қолган мевалар кўзага чалинади.

Уста гузарга буриладиган жойга етганида, чап қўлдаги боғ эшиқдан катта саватда олма кўтарган бир кампир чиқди. Устани кўрди-ю, саватини ерга қўйиб йиғлаб юборди:

— Вой, айланай, уста акажон, тузалиб кетдингизми?

Уста аёлнинг ажин босган озғин, қорамагиз юзиға, ёш билан пардаланган нурсиз кўзларига хиёл тикилиб турди-ю, тўсатдан, уруш тамом бўлган йили кузда, биринчи ёмғирдан кейин бу жувон эрталаб унинг олдига йиғлаб келганини, ёмғирда уйининг бир томони девори қулаб тушиб, тўрт боласи билан кўчада қолганини гапириб бергани зеинга тушди.

Уста ўшанда, гарчи совуқ тушган бўлса ҳам, пахса девор олиб уйини тузатган, томини ҳам суваб берганди.

«Ўшанда хўп бамаъни иш бўлган экан, савоб иш...» — ўйлади уста аёлнинг фронтда дом-дараксиз кетган эри ҳам ёдига тушиб...

Шу бўлди-ю, уста йўл-йўлакай ўзи қурган уйларни кўздан кечириб кетди. Санаб ҳараса, гузарга етгунча ўн олтида уйни ўз қўли билан қурган экан.

Бу уйлар сал илгарироқ солинган бўлиб, кўпчилиги қамиш билан ёпилган, аммо шундай бўлса ҳам мустаҳкам, яна юз йил турадиган, ихчам, хушбичим бинолар эди! Ҳозир одамлар қамишни менсимай қўйишиди, томини шифер, ҳатто тунука билан ёпишади, элликдан ортиқ хонадон шунаقا янги уйларга кўчиб ўтишиди. Бу уйларни ҳам, ярмини деса лоф урган бўлар, учдан бирини Абдуллажон билан бирга уста қурган!

Ҳа, уста қурилишни севарди! Бундан беш йил муқаддам бир кунда беш минг гишт терган пайтлари бўлган!.. Гоҳо йигитлардан иккитаси унга гишт ташлаб

етказа олмас, уста эса уларни шундоқ илиб оларди-ю, териб кетаверарди. Фиши ҳам айни кўзлаган жойига бориб тушаверар, унинг бу ишини томоша қилгани ман-ман деган усталар келишарди...

Гузардаги анҳорнинг бўйида, мажнунтоллар орасига яширинган шинамгина чойхонадан йигитларнинг хушчақчақ қаҳқаҳаси эшитиларди. Улар устани узоқдан кўриб қолиб, «гур» қўзғалиб, пешвое чиқиди. Таниш чойхоначи, шошганидан бўлса керак, чойнагини ҳам қўймасдан югуриб келди.

— Э,вой, уста акамларми? Бормисиз? Балли сизга, балли!..

Уста бутун оғирлигини ҳассага ташлаб мажнунтолларнинг тагида (бу толнинг соясида не-не гулгун суҳбатлар ўтганди) бир нафас турди, кўнгли, бутун вужуди билан сўрига ёнбошлаб дам олгиси келади, лекин ўтирса қайта тура олармикин, туришга мадори етармикин?

— Раҳмат!— уста бошини чайқади.— Мен шифохонани бир кўрай девдим...

Курилаётган шифохона гузардан атиги юз әллик қадам нарида эди. Бу масофа устага Маккадан ҳам узоқ туюлди. Аммо кўча юзида қад кўтарган баланд пештоқли бинога кўзи тушиши билан бу чарчоқнинг ҳиссаси чиқиб кетди!

Шифохонанинг лойиҳасини уста ўзи чизганди. Бошда шаҳардан келган лойиҳа бўйича хоналарнинг ҳаммаси қуёшга тескари эди, сабаби — бетоблар учун соя-салқин лозим әмиш! Бўлмаган гап! Авваламбор, оламда тирик бир жон йўқки, унга әфтоб ёқмаса, қолаверса, дард деган нарса кўпроқ қариқуриларга ёпишади, қари одамга эса, дори-дармондан кўра ҳам кўпроқ иссиқ керак!

Ҳа, уста лойиҳани тузатиб тўғри қилган экан. Шифохона жуда серқуёш, ихчам бир бино бўлибди! Лекин устани бир нарса салгина ранжитди: қурилиш тугаган бўлса ҳам, атроф ахлатга тўлиб ётарди!

Уста буни Абдуллажонга айтишга аҳд қилди, аммо кириб бориши билан қурилишда шундай шов-шув кўтарилдики, уста ўйлаган гапларини ҳам унуди.

Илк таажжуб ва шодлик хиёл босилиб, ҳол-аҳвол сўрашиб бўлганларидан кейин, уста ичкарига кирди.

Одамларнинг самимий қувончи сабаб бўлдими ё бинони кўриб кўнгли кўтарилиб кетдими, ишқилиб, чарчоқ тарқаб оёқларига қувват киргандай туюлди-ю, хоналарни битта-битта айланиб чиқди. Иш кечада Абдуллажон айтгандек борар — ҳамма хоналар сомон сувоқдан чиқарилиб, ганч сувоққа киришилган эди.

Сомон сувоқ чакки бўлмаган: фақат бир-икки хонанинг бурчаклари нотекисроқ чиққанди. Бунинг сабаби—газчўп ишлатишни яхши билмасликда эди. Уста буни айтмоқчи ҳам бўлди-ю, кейин бу ўйидан қайтди, чунки нотекис жойларни ганч сувоқда тўғрилаб юбориш қийин эмас эди, қолаверса, уста умуман ҳамчилик қидиришни ёқтирумас, буни «қариллик касали» деб биларди.

Уста хоналарни айланиб бўлиб, ташқарига чиққач, ҳамма унга жимгина тикилиб қолганини кўриб, шогирди Комилжонга юзланди:

— Раҳмат!— деди секин, сўнгра чуқур нафас олиб қўшимча қилди:— Кўп яхши иш бўпти, балли, азаматларим!

Уста азалдан шогирдларини кўп мақтамас, мақтагиси келганда: «Балли, азаматлар!» деб қўярди. Аммо бу икки оғиз сўз шогирдларига гўё қанот боғларди. Бу сафар ҳеч ким чурқ этмади. Уста одамларнинг юзига яна бир қаради-ю, дарҳол тушунди: афтидан, унинг аҳволи яна ҳам оғирлашганга ўхшайди...

— Машина чақирирайми, дада?— деди Абдуллажон. Уста бошини чайқади.

— Йўқ, аслол!

— Бўлмаса ўтиринг, бир оз дамингизни олинг, устоз.

Бу гапни Комилжон айтди, аммо уста яна бошини чайқади.

— Йўқ, ўзим аста-аста...— деди у, кейин атрофиши ўраб олган одамларга тикилди.

— Мен розиман, чироқларим,— уста энтикли.— Рози бўлинглар...

— Розимиз, минг марта розимиз, устоз...

Бурилаётуб, бир неча киши ганч юқи қўллари билан кўзларини артаётганларини кўриб қолди. Абдуллажон билан Комилжон орқасидан баравар эргаш-ганларини сезиб, тўхтади:

— Хотиржам ишлайверинглар, мен ўзим астасекин етиб оламан...

...Уста ҳовлига етганида, ҳолдан тойган, зўрга турарди. Эшик олдида раиснинг «Волга»си кўринар, афтидан, Нодирлар жўнаб кетаётган бўлса керам, қўни-қўшни, хотин-халаж йигилган эди.

Уста етиб борганида, ичкаридан нимагадир қизарип кулган келини билан Нодир, уларнинг кетидан катта тугун кўтарган Гулжаҳон чиқди.

Устани кўриб ҳамма, ҳатто «Волга» теварагида қий-чув қилишаётган болалар ҳам бирдан жимиб қолишибди.

Нодир «бобой» юзма-юз келишини кутмаган эказми, уни кўриб довдираф қолди.

— Қалай, бобой... чарчаганга ўхшайсизми?

Тўладан келган қип-қиаил юзини тер босиб, чуқур ботган кўзларида изтиробга ўхшаш бир ифода жилва қилди.

Йўқ, устанинг ундан ранжиши адолатдан эмас! У ҳам одам! Афтидан, у ёқдаги иш ниҳоятда зарур бўлса керакки, ўзиям хижолат чекяпти!

— Ҳа, чарчадим... Чарчадим, холос.— Уста четроқда турган ва энди қандайдир жимиб, бошини эгиб қолган келинга бир қараб қўйди.— Хайр, омон бўл, болам, омон бўлинглар...

Ҳовлининг сатқи кўчага қараганда бир оз баланд. Ишқилиб, йиқилиб тушмаса бўлгани. Йўқ, хайрият йиқилмади. Мана сўри. Яна олти-етти қадам босса — айвон. Устунга суюниб хиёл дам олиш мумкин.. Ажабо: худди оёқлари йўқча ўхшайди. Аммо, оёқлари бўлмаса ҳам босиб ўтади шу масофани! Ҳеч кимнинг ёрдамисиз, фақат ҳассага таяниб ўтади бу масофани!

Ҳа, ҳаракатда баракат деб бежиз айтмаганлар! Мана, уста каравотининг олдида турибди. Барака топкур Гулжаҳон тўшагини янгилаб, ёстиқларини тўғрилаб қўйибди.

Уста бир амаллаб яктагини ечди, ҳассасини четга суяб қўйди. Сўнгра худди жазирама ёз куни сувга шўнғиган одамдай, роҳат билан, бўлакча бир лаззат билан тўшакка секин чўзилди...

... У вақт ҳисобини билмай қолди, бир ўйида кўзи илингандай, бир ўйида ҳушидан кетгандай туюл-

ди унга, ўзига келиб кўзини очганда эса, назарида, қўл-оёғидан айрилгандай эди! У тўсатдан умри ту-
гаганини, эҳтимол, шу кечадан ўтмаслигини, балки
ундан ҳам олдин жон таслим қилишини тушунди.
Аммо бу фикр унинг дилида на қўрқув, на бир аф-
сус уйғотди! Аксинча, кўнгли осойишта, дили равшан
эди. Унинг қалбидаги бу туйғу кун бўйи қаттиқ иш-
лаган ва ўз ишидан мамнун бўлган одамнинг уйқуга
кетиши олдида ҳис этадиган кечирмаларига ўхшарди..

Хаёли худди қўён араванинг гилдирагидай ваз-
мин ва секин айланарди: ҳа, у энди кампирнинг қо-
шига боради! Уста унинг қабри ёнидан аллақачон ўзи-
га жой танлаб қўйган...

Бу ўй, кампирнинг ёнига бориш фикри, кўнглига
бўлакча ором бергани учунми, уста бу ҳақда узоқ
ўйлади, сўнgra, ўзиям сезмасдан хаёли яна қури-
лишга кетди...

У эсини танибдики, усталик қилади. Аммо ҳеч
қачон, ҳатто донғи узоқларга кетганда ҳам нафсга
берилган эмас, бир кунлик иш ҳақини эски пул ҳисобида
етмиш беш, янги пул ҳисобида етти сўм эллик
тийиндан оширмади. Ҳатто турмуш анча яхшиланиб,
қурилиш авж олиб номига уста одамлар кунига юз-
юз эллик сўмга чиққан маҳалда ҳам уста ўз аҳидан
қайтмаган, фақат ўзи эмас, Абдуллажон, ҳатто шо-
гирдларининг нархини ҳам шундан оширмаган эди.

Бунинг учун кўплар устани «галати одамга» чи-
қаришган, аммо уста ўз йўлидан сира қайтмаганди.
Негаки, у бир нарсага амин эди: бурунги замонда,
энг яхши устанинг нархи бир пуд буғдойдан ошмас
эди, ҳозир етти ярим сўмга қанча буғдой беради —
тўрт ярим пудми? Ҳа, балли, инсоф қани, азизим?—
дерди уста ўзича...

Ҳа, уста буни жуда тўғри қилган экан, мана, ўлим
тўшагида ётиб биляпти — жуда тўғри қилган экан...

Уста ўз хаёллари билан банд бўлиб, унча пайқа-
маган бўлса керак, кеч кирганини Абдуллажон
кириб келганидагина билди.

Устанинг унга кўзи тушди-ю, назарида, ичига яна
чироқ ёқилгандай бўлиб, дили ёришиб кетди! Ҳа,
Абдуллажон унинг ўзига ўхшайди, худди ўзгинаси!..

Абдуллажон стулни суриб ўтирди-да, одатдагидай
эгилиб сўради:

— Қалай, тузукмисиз, дада?

Уста бошини қимирлатди, ўзича жилмайган бўлди:

«Раҳмат, болам, тузукман...» Сўнгра:

— Болаларни олиб кир, кўрай,— деди секин.

— Дада,— деди Абдуллажон. Бироқ кўзи отаси-нинг кўзи билан учраши-ю, индамай чиқиб кетди.

Бир оздан кейин Фирузани кўтариб қайтиб кирди, кетма-кет иккита ўғлини етаклаб олган Гулжаҳон кўринди. Унинг киприклари орасида дўланадай-дўланадай ёш томчиларини кўриб, устанинг кўнгли эриди:

«Умрингдан барака топ, болам!»— деди ўзича.

Уста невараларига бир нафасгина тикилиб ётди, кейин кўзи билан имо қилди: «Бўлди».

У невараларидан мамнун эди. Фақат бир нарсадан рози бўлмади: Нодирнинг қизи ниҳоятда озода кийинган, ўзиям Абдуллажоннинг тиззасидан тушмас, афтидан, жуда эркатой эди. Гулжаҳоннинг икки ўғли эса, юпунроқ кийинган, яланг оёқ, яланг бош эди.

Абдуллажон қайтиб киргач, уста ўзига имо қилди:

— Болалар...— деди энтикиб,— ҳаммасига бирдай қаранглар. Баравар кўринглар уларни... Уқдингми?

— Тушундим, дада.

— Кейин ҳалиги... Гулжаҳонни ҳам қадрини бил...
Унга жабр.

Абдуллажон бошини эгиб маъқуллади.

— Домла келдилар, Азиз ака,— деди у.— кирсалар майлимни?

— Майли.

Уста бу кекса ўқитувчини яхши кўрарди. У жуда содда, ниҳоятда оқ кўнгил бир одам эканини биларди.

Азиз домла кириб Абдуллажоннинг ўрнига ўтириди. Лабларини тез-тез артиб, устага энгашди.

— Қалай, тузукмисиз, уста ака?

Уста кўзлари билан ташаккур билдириди: «раҳмат».

Домла бошини секин чайқади.

— Нодиржон... кетиб қолибди-да!— Унинг овоги қалтираб кетди.

— Ҳа, кетди,— деди уста эшитилар-эшитилмас бир овозда. Уста бу сўзни астойдил, чин кўнгилдан

айтди, аммо шундай бўлса ҳам, тўсатдан нимадир томогини гип бўрги-ю, кўзлари жиққа ёнга тўлди, сўнгра Азиз домла ҳам рўмолча қидириб қолганини кўриб, ўзини босишга ҳаракат қилди:

— Майли, омон бўлсин...

Шу гапдан кейин уста, назаридаги, бир зум кўзи илиниб кетганда туулди. Кўзини очганида домланинг ўрнида Самад ўтирас, унинг ёнида соқолини тутамлаб Абдуллажон турарди.

Уста кўзини очганини кўриши билан Самад унга томон талпинди, қўлини қўлига қўйди:

— Сизга нима бўлди, уста ака? — деди у. — Мен правлениенинг қарорини олиб келдим. Шифохонани сизнинг номингизга қўядиган бўлдик. Тўйингизни қиласиз ҳали, қаёққа шошасиз, уста ака?..

«Номингизга қўйдик... Кимга керак бу?»

Уста Самаднинг кўзлари ялтиллаб кетганини кўриб бор кучини тўплади, ўнг қўлини кўтариб елкасига қўйди:

— Сен мени қўявер, — деди титроқ бир товушда. — Халқни ўйла, болам. Ёш бўлсанг ҳам шу халққа ота бўлдинг, халқни ўйла. Бева-бечоралар бор, ўшаларни ўйла, болам, ўшаларни...

У ҳолдан кетиб, индамай қолди, ёнига тиз чўккан Абдуллажонга сўнгти марта қаради:

•Раҳмат, болам, рози бўл!» — деди заиф овоз билан.

...Устани кампирнинг қабри ёнига, ўзи ҳаёт вақтида белгилаб қўйган жойга кўмдилар. Кўумиш маросимиға бутун қишлоқ кўчиб чиқди, атроф қишлоқлардан ҳам жуда кўп одам келди, фақат бир киши — Нодир бўлмади, лекин унинг йўқлигини ҳеч ким сезмади ҳам.

1963 йил.



БАХТ ҚУШИ

Ҳикоя

Жамшид «Кўк сой»ни шундай соғиндики, эсига тушса кўза олдига ёз бўйи қармоқ билан балиқ тутган катта тўғон, бутун қишлоқ болалари йигилиб кураш тушадиган, чиллак ва ёнғоқ ўйнайдиган кенг сойлик, сойликнинг четидаги ион оқизиб ейдиган муздай чашма келарди. У айниқса қўшинилари Санобар деган эркакшода қизни, унинг «Қоравой» деган катта ҳора мушугини кўп эслар, уларни эслаганда негадир Мозира холанинг қўрда кўмилган жўхори сўтлари-ю, муздай гўжаси кўза олдига келиб, оғзидан суви қочарди.

Жамшид «Кўк сой»ни бултур ёзда акасиникига меҳмон бўлиб борганида кўрган. Акаси билан келин ойиси эса у ерга узоқ йили, институтни битиришганидан кейин врач бўлиб боришган, қишлоқда уларни «қўш дохтур» деб аташар ва жуда ҳурмат қилишарди.

Кечқурунлари акаси Суръатжон қўштиғ милтиғи-ни елкасига илиб атроф боғлардан мусича, тўғондан балиқчи қушлар отар, Қоравой эса худди овчи итга ўхшаб уларни йигиб келарди. Баъзан акаси билан келин ойиси Тамиллахон сойда бекинмачоқ ўйинлари-га қўшилиб кетишар, сувга чиққаи аёллар турна қатор бўлиб уларни томоша қилишар, «Вой ўлмасам», деб юзларини четга буришар, ёшлар эса азбаройи хурсанд бўлганларидан уларни қийқиришиб қарши олишарди. Шундай пайтларда Жамшид акаси билан келин ойисидан дил-дилидан фахрланар, акасининг чаққон ҳаракатлари, ундан қочган кен^нойисининг шамолда тўзигиган бир ўрим соchlари, оловдай ёнган чиройли юзи, кулгидан чақнаган катта қўй кўзлари-га завқ билан боқарди.

Кузда, Жамшид кетишдан сал олдинроқ, акаси тажриба учун, деб уч-тўртта қуён боқа бошлаган эди. Жамшид кетишидан икки кун аввал қуёнларнинг биттаси қушчадай-қушчадай тўққизта қуёнча туққан эди, акаси сўнгги хатида: «Қуёнчаларинг ҳалиям сени эсидан чиқаргани йўқ, ҳар куни: «Жамшидни соғиниб қолдик, қачон келади», деб сўрашяпти!» деб ёзди-ю, усиз ҳам тоқати тоқ бўлиб юрган Жамшидга ҳар бир соат бир йилдай туюла бошлади.

Ниҳоят, бахтиёр дам етиб келди. Ойиси майдо-чуйда олиб берди. Жамшид ўзи Санобарга катта коптоқ олди. Уйдагилар бунинг ҳаммасини бир чамадончага жойлаб, уни поездга олиб чиқиб қўйишиди.

Поезд станцияга кечаси келди. Акаси негадир кўринмай, Жамшидни қарши олгани Санобарнинг дадаси — Шомурод ака чиққанди. Шомурод ака унинг қўлидан чамадонини олиб, олисроқда турган шотилик аравага бошлаб кетди.

Арава ҳам, отлар ҳам Жамшидга таниш — бу аравада у қанча марта пичан ташиган, отларни тўғонда чўмилтирган. Жамшид дили илиқ бир меҳрга тўлиб, отларнинг бошини силади, сўнг, аравага чиқиб қуруқ бедага чўзилди. Димогига какра, яллиз ва яна аллақандай ўтларнинг сал тахир ва хушбўй ҳиди «гуп» урди-ю, дили яйраб кетди.

Шомурод ака аравага чиқиб ўса жойига ўтиаркан, қоронгида ниманидир чўэди: «Ма, болам, чиллаки ўрик. Санобар бериб юборди...»

Жамшид бир дўппи ўрикни олиб кўкрагига босаркан:

— Санобар! — деди кўнгли сув ичгандай бўлиб.— Санобар...

Арава қўзгалди. Бахмалдай тиниқ осмон оҳиста айланиб, битта-битта терилган йирик кўкиш юлдузлар дарёда оққандай секин оқа бошлади.

Жамшид кўзини юмди-ю, назарида, шу заҳотиёқ кимдир соchlарини секин тортқилилагандай бўлди, қулоқлари остида қиз боланинг мулоийм овози эшитилди:

— Тур, Жамшид, тура қол энди...

У кўзларини очмоқчи бўлди-ю, очолмади, киприклиари бир-бирига ёпишиб қолгандай оғир эди.

— Санобар,— деди у хаёлида.— Санобар...

— Тура қол,— ёлворди Санобар.— Мен сенга лайлак кўрсатаман. Тўғондаги оқ теракка кўкламда лайлак уя соглан...

Санобарнинг гапини Моҳира холанинг ўқтам овози бўлди:

— Бирорнинг боласига тега кўрма, ҳой, Эркакшода. Йўл юриб келган—ухласин. Ундан кўра ўрик қоқ, бола бечора турса ейди!

Жамшид ўзича кулймсиради, кўзи яна илина бошлиди-ю, ёнгинасида «дув-дув» тўкилган ўрикларнинг патирлашидан уйғониб кетди.

Ажабо: Жамшид аравада эмас, сўрида ётарди! Моҳира хола Санобарни Эркакшода деганича бор, у бутун ҳовлига шох ёзиб ўстган кекса ўрикнинг энг учидаги катта бир шох устида депсиниб турибди. Энди чиққан офтобда унинг оддийгина қизил чит кўйлаги хонатласдай товланади, ўзиям проҗектор шуъласида баланд гумбаз остида ўйин кўрсатаётган акробат қизга ўхшайди.

Жамшид ўрнидан сакраб турди:

— Санобар!

Санобар эгилиб пастга қаради, кейин худди маймундай бир шоҳдан иккинчи шохга сакраб, «тап» этиб ерга тушди.

Юмалоқ қол-қора кўзлари артилган чаросдай чараплайди, қалин паҳмоқ соchlари саватдай тўзғиган, бурун катаклари кулгидан керилган.

— Юр,— деди Жамшидинг қўлидан ушлаб.— Мен сенга лайлак кўрсатаман!

Улар пахса девордан ошиб боқقا тушишди, япроқлардаги қалин шудрингни ёмғирдай «дув» тўкиб, олчазор орасига шўнғишиди.

Жамшид уст-боши шудрингдан ҳўл, яланг оёқ юришга ўрганимаган оёқларига тикан қадалиб, ҳар қадамда бир тўхтар, Санобар эса на шудрингни парво қиласди, на тиканини, унинг қўлидан тортилаб, дараҳтлар орасига боши билан бузоқдай шўнғиб кириб, шўнғиб чиқарди... Тўсатдан олисроқда сойга қараб чопқиллаб бораётган нозиккина бир жувон кўринди. Жувон йўл-йўлакай эгнидаги ҳаво ранг кўйлагининг устидан оқ халат киймоқда эди.

Жамшид беихтиёр унга томон талпиниб:

— Кеннойи!— деб юборди.

Жувон тўхтади, дараҳтлар орасидан мўралаб қара-

ди-да, чопқиллаганича келиб, Жамшиднинг пешанасидан, икки юзидан чўлп-чўлп ўпди, сўнг, ўзини сал орқага ташлаб, қуралай қўзларини «юмалоқ» қилди:

— Вой-бўй... бирам катта, бирам чиройли йигит бўпсан!..— деди Тамилла ва кулиб қўшимча қилди:— Санобарга қара: уям чиройли қиза бўлди!

Санобар:

— Боринг-э!— деди тескари бурилиб.

Тамилла Жамшидга қараб қўзини қисди. У шошапиша эсон-омонлик сўрашди, Жамшиднинг овқати ошхонада столда турганини, у эса шошайдиганини, сойда «скорая помошь» кутаётганини айтди-да, чопиб кетди. Лекин сал юрмай тўхтаб қичқирди:

— Аканг қирдадир. Айтиб қўй, мен касал кўргани кетдим!

Жамшид эндигина акасини эслаб, Санобарнинг қўлидан тортди:

— Юр, олдин акамни кўрайлик.

Санобар негадир қовоини солди, ювилган чаросдай чақнаган қўзларини ерга тикди.

— Шунақами? Акангни соғиниб қолдингми?

— Биз ҳали кўришганимиз йўқ ахир. Мен кечаси сизларникида ухлаб қолибман...

Санобар кўзлари сал қисилди, ранги ўчиб:

— Билиб қўй, Жамшид,— деди.— Аканг — ёмон одам! Кенинйинг... яхшилару, Аканг ёмон одам! Ўзиям, қуёниям жонимга тегди. Тушундингми?

Жамшид нима дейишини билмай лол бўлиб қолди.

— Нега энди? Ахир бултур ўзинг бу қуёнларни...

— Лайлакни кўрасанми ё суюкли акажонингни ми?— деди Санобар ва жавоб кутмасдан боғларнинг ортидаги сойга қараб кетди. Сал юрмасдан боғ чекиниб терак бўйи келадиган чуқур жарлик кўринди. Жарликнинг тагида кенг ажриқзор сой, сойнинг у юзида тўғон, тўғоннинг устида бир-бирига тулашиб кетган шафтолизор боғлар.

Жамшид тўғон бўйидаги оқ теракнинг учида пайдо бўлган катта уяни, ҳатто ундан чиқиб турган иккита лайлакнинг бошини Санобар айтмасданоқ кўрди, лекин кўнглидаги бояги илиқ нур сўнган эди, у шафтолизор боғларга, пастдаги сойга маъюс тикилди.

Бултур ёзда Санобар иккиси ҳар куни шу боғлардан дўппи-дўппи луччак шафтоли ўғирлаб чиқиб, тўғон бў-

йида ўтириб ейишар, кузда эса қўйниларини ёнғоқقا тўлдириб, сойда болалар билан ёнғоқ ўйнашарди. У пайтларда акаси Суръатжон Санобарни жуда яхши кўрар, Жамшид ҳатто рашк қиласади. Бу йил қанақа ола мушук ўтдийкин ораларидан. Тўсатдан ён томондаги мажнунтоллар орасидан иккита боланинг боши кўринди. Уларнинг биттаси — паканагина қора бола Жамшидни кўриб ёнидаги кўк кўз болани туртди:

— Бу ёққа бир қара: бултурги олифта кепти!
— О! — деди кўк кўз кемшик тишлирини кўрсатиб.— Уст-бошига бир қара: худди қизлардай гулдор кўйлак кийибди!

— Стилляг-да стилляг! — кулди қора бола.

Жамшид ҳали ўзига келмаган эди ҳамки, Санобар бир ҳатлашда уларнинг ёнига борди, соchlаридан «шап» ушлаб, бошларини бир-бирига уриштира кетди:

— Мана сенга стиляга! Мана сенга олифта! Мана! ✓
Санобар улардан бўлса бир ёш каттадир, лекин у шундай чаққон ва чалдаст эдикӣ, болалар унинг қўлидан базур чиқиб жуфтакни отиб қолишибди ва анча узоқлашгандагина тўхтаб Жамшидга муштларини кўрсатишиди:

— Шошмай тур сен олифта! Бир кун учрайсан ҳали!

— Бор, бор, туёқларингни шиқиллатларинг! — деди ✓
Санобар.— Бўлмаса тутиб олиб, тумшуқларингни тошга ишқайман!

Жамшид Санобарни унга бўлишгани учун эмас, ма-на шунақа абжирлиги, «эркакшода»лиги учун ҳам яхши кўрарди. Шунинг учун ҳам унинг акаси билан аразлашиб қолгани кўнглини яна оғритди.

— Санобар,— деди.— Нима бўлди ўзи? Эсингдами, бултур акам тўртта қуён олиб келганда...

— Тўртта қуёни энди юзта бўлди! — деди Санобар.

— Кузгача бутун бир ферма бўлади!

— Юзта бўлса нима қипти?

— Нима қилганини ҳозир биласан!

Санобар Жамшидни уйларининг орқасидаги ошхоналарига — сузма, ачиған қатиқ, қуриганрайхон, қалампир ва яна алланималарнинг ҳиди анқиб турган катта хонага бошлаб кирди.

Ошхонанинг ўртасида, шифтдаги туйнукдан тушиб

турган бир тогора офтобда, худди занжирбанд шердай, бошини оёқларига қўйиб Санобарнинг суюклиси «Қоравой»— кучукдай келадиган бир мушук мудраб ётарди. Мушук Санобарни кўриб секин ўрнидан турди, хушнуд ғингшиб роҳат билан керишида, эшикка томон юрди, лекин бўйнидаги чилвир тутиб қолди.

Санобар тиз чўкиб уни қучоқлаб олди. «Қоравой» чиидан ҳам жуда чиройли, қоп-қора жунлари қундуздей майин, силлиқ, йўлбарсифат бир мушук эди.

Санобар мушукнинг олдига косада сут қўйиб бошини силаркан:

— Мана, кўрдингми акажонингнинг қилганини?— деди Жамшидга юзланиб.— Унинг дастидан итгаям кун йўқ, мушуккайм!

Жамшид бирдан енгил тортиб кулиб юборди.

— Энди шу... «Қоравой»ни деб!..

— Нима, «Қоравой» худонинг маҳлуқи эмасми?— деди Санобар, кимгadir тақлид қилиб.— Агар билсанг, мушукни пайғамбар силаган. Томдан ташласанг оёғи билан тушади. Ишонмасанг, ана, ойимлардан сўра!— Санобар лабини чўччайтириб тескари бурилиб олди.— Шундай дейишингни билувдим. Ҳар қанча дўст бўлсақ ҳам акангга бўлишасан-да!

Жамшид ялиниб-ёлвориб, ўшандаям унга атаб олиб келган коптогини берганидагина Санобар сал паст тушди ва «қуён фермага» бирга чиқишга рози бўлди.

«Қуён ферма» боғнинг бошида, бир маҳаллар тупроқ олиниб, бир томони горга айланган тепаликнинг ён бағрида эди. Бултур тўртта қуён шу горда яшарди, бу йил тепалик тўқилган сим билан ўралиб, қуёнларнинг инидан илма-тешик бўлиб кетган, ўзиям ҳар бир чанглал, ҳар бир янтоқнинг соясида иккита қулоқ дикрайиб турарди!.. Горнинг оғзида худди эндигина тухумдан чиққан оппоқина жўжаларга ўхшашиб ўн чоғлик қуёнчалар дам гуж-гуж бўлиб, катта оқ қуённинг эмчакларига ёпишар, дам митти оёқчалари билан «таптап» ер депсиниб ўйноқлашар эди.

Санобар, бояги адоват ҳам эсидан чиқиб, ариқ бўйнадаги жийдалар орасидан ўт юлишга киришиб кетди. Жамшид ҳам ариққа тушаётган эди, тепаликнинг орқасидан беда ортилган эшагини хиҳ-хиҳлаб акаси чиқиб келди.

Қизиқ: одатда беками кўст кийиниб юрадиган Суръ-

атжон, ҳозир оёғида бесўнақай этик, эгнида дод тушган сур ранг кўйлак, бошида эски похол шляпа, камарида ўроқ, Жамшиднинг кўзига жуда ғалати кўринди. Узиям шундай озиб кетибдики, гўё шоҳлари буталган миrzатеракдай сўррайиб қолибди!

— Э, қаёқларда юрибсан, огайни? — деди у Жамшидни кўриб ва оппоқ тишларини кўрсатиб кулди. — Менга ёрдамчи келди деб қувонсам, келмасдан туриб бу пучук билан топишибсан да!

Суръатжон Жамшидни эркалаб, осмонга отиб қочиб олди, сўнг, тескари ўгирилиб турган Санобарга қараб:

— Қалай, «Қоравой»ни қўйиб юбормадингми? — деб сўради.

— Нега қўймас эканман, қўйиб юбордим! — деди Санобар.

— Йўқ, рост айтаман, пучук! Кеча кечқурун ариқда «Қоравой» юргандай бўлувди...

— Вой тавба! — деди Санобар ўксиб. — Жинингиз ит-мушукка тушди...

Суръатжон унинг гапига қулоқ солмай, шляпасини олиб, бошини қашиди:

— Ҳайронман, боя санадим, иккита қуён йўқ. Қаёқка кетади бўлмаса...

— Ҳа, ўша иккита қуёningизни менинг «Қоравоийим» еган! — Санобар ранги ўчиб, лаблари титраб шундай деди-да, ўзини боқقا уриб кўздан ғойиб бўлди.

Суръатжон «парво қилма» деган маънода кўзини қисди ва Жамшиднинг тумтайиб қолганини кўриб деди:

— Тентак қиз. «Қоравой» деган битта мушуги бор — буридай келади. Кўк қуён туққанда битта боласини олиб қочганини ўз кўзим билан кўрганман. Айтсам ишонмайди... Қани, қарашиб юбор, ука!

Ака-ука эшакдаги бедани тушириб ярмини қуёnlарга сочиб, ярмини жийдаларнинг соясига элтиб қўйишиди, сўнgra уйга бориб, — Суръатжонлар Шомурод аканинг урушда ҳалок бўлган укасининг уйидагу турishарди, — нонушта қилишиди. Нонуштадан кейин Суръатжон Жамшидни яна тепага бошлаб чиқди ва қуёnlарга сув бериб, қараб туришини тайинлаб, ўзи ишга кетди.

Жамжид тепада, атрофида дик-дик сакраган қуёnlар орасида ёлғиз қолди. Унинг дилидаги эрталабки

«ФТСБ сўнгани, кўнгли куа ҳавосидай сербулут эди. Теварагида дик-дик сакраган қўёйлар, ҳатто оппоқ жўжалардай митти қуёнчалар ҳам кўзига қандайдир соvuқ кўришиб кетди...

Шу кундан бошлаб «қуён ферма»нинг ҳамма майдачуда ишлари Жамшиднинг зиммасига тушди.

У ҳар куни эрталаб акасига ўт ўришар, сўнг бу ўтларни уч маҳал қуёнларга улашар, уларга сойдан сув ташиб берарди. У «ферма»дан акаси билан келин ойиси ишдан қайтгандагина озод бўлар, ўшанда ҳам уни акаси эмас, келин ойиси озод қиласади. Баъзан Тамилла унинг важидан Суръатжон билан уришиб ҳам қолар, гўё әрининг шафқатсизлиги учун Жамшидан узр сўрагандай, ҳар хил ширинликлар бериб, бошини силарди.

Жамшид эса ишнинг оғирлигидан эмас, фақат бир жарсадан азилар, у ҳам бўлса Санобар билан оралари бузилиб қолгани эди.

Санобар биринчи кунданоқ тўнини тескари кийиб олди. У Жамшид билан деярли гаплашмас, гаплашса да, «салом»дан нарига ўтмас эди. Рост, Санобар уни ўйинлардан ҳайдамас, лекин кўрганда илгаригидек қўёллари чақнаб, чопқиллаб пешвоз чиқмас, фақат болалар «стиляга-стиляга!» деб мазах қилган пайтларидагина: «Тегмаларинг унга!» деб жеркиб ташлар, сўнг, жстеҳзоли кулимсираб қўшиб қўярди:

«Хозир бу хаёлида минг қуённи олдига солиб ҳайдаб кетяпти! Аттанг, хаёлинни бўлдиларинг!»

Жамшидга ҳаммадан кўра Санобарнинг мана шу ҷочириқлари алам қиласар, шундай пайтларда акасига билдирамасдан секин қишлоқдан чиқиб кетгиси келарди.

Бунинг устига сўнгти пайтларда қуёйлар тўқилган зимнинг тагини ковлаб қўни-қўшниларнинг экин-тикинига тушиш одатларини чиқарди. Қўни-қўшнилар ҳар куни уларни қарғаб-сиқтаб қувиб келишарди. Суръатжон бу қарғиш-сўкишларни писанд қилмас, Жамшид эса ич-ичидан азилар, чунки қўни-қўшнилар аксарият ҳамма аччиқ гапларни унинг юзига солишар: «Хой, бола, акажонингга айтсанг-чи, ўлиб бўлдигу, бу ер ют-кир шалпанд қулоқларингдан!» деб нола қилишарди. Шундай пайтларда ер ёримлас эдики, Жамшид кирса! У ариқ бўйидаги жийданинг соясига чўзилиб узоқ ўйга жолар: «Акамга нима бўлди? Шундай яхши, мард,

жушчақчақ йигит, бир йилда нега бунчалик ўзгариб кетди?» деган фикр унга тинчлик бермас, лекин ўйлаб ўйининг тагига етолмас эди.

Бир кун Жамшид очиқ деразадан келин ойисининг ҳаяжонли овозини эшитиб, беихтиёр тўхтади.

— Сизга нима бўлди ўзи? — дерди Тамилла қуиниб. — Узингизни бир кўэгуга солиб кўринг! Бу қанақа юриш ахир?

Суръатжон аввал қаҳ-қаҳ отиб кулди, кейин:

— Хўш, нима бўлти ўзи? — деди. — Оддий меҳнаткаш одамнинг юриш-туриши, вассалом!

— Қўйинг энди шу қуён-муёнигизни! — деди Тамилла ёлвориб. — Сизга ҳеч ярашмайди шу иш!

Суръатжон бир зум жим қолди, кейин Жамшидга аллақандай маъюс туюлган бир товушда:

— Биламан, ҳаммасини биламан, жонгинам! — деди чуқур тин олиб. — Лекин... бир-икки ой сабр қилинг. Кузда ҳаммасини шартта сотамизу, кўчамиз-кетамиза.

— Кўчсак бир кунимизни кўरармиз.

— Гап унда эмас, жонгинам. Мен сизни ўз дугоналарингиз, қариндош-уругларингиз олдида юзингиз ёруғ бўлсин деб!..

— Мени ҳалиям бирорнинг олдида юзим қора эмас.

— Йўқ, жонгинам, мен сизнинг олдингизда гуноҳкорман. Сиз ҳаммадан яхши кийиниб, ҳаммадан... Сиз катта баҳт... сазоворсиз..

— Вой тавба! Мен сизга баҳтсизман дедимми? Ахир одамлар, бутун маҳалла, гап-сўз...

— Ўргилдим ўша одамлардан! Мен сизни шундай яхши кўраманки, ҳар қанақа фисқ-фасодга...

Жамшид бу гаплардан кейин эшитилган бўса ва кулги овозларидан уялиб, уйнинг орқасига бурилиб кетди.

Лаҳза ўтмай уйдан кулимсираб Суръатжон чиқди ва тепага қараб йўл олди. Унинг кетидан бир ўрим майин соchlарини тузатиб ва кўзлари ўт чақнаб Тамилла чиқди. Жамшидга кўзи тушиб кулди-да, қўлидан ушлаб, юрганича сойга етаклади...

Жамшид ҳайрон эди. Акаси билан келин ойисининг гаплари унинг кўнглидаги жумбоқни ечиш у ёқда турсин, баттар чигаллаштириб юборди. Бу ўртада бир воқеа юз берди-ю, Жамшид ахирин акаси билан гаплашишга аҳд қилди.

Жамшид кечқурун нимадандир кўнгли чўкиб уйга кирган эди, Тамилла Санобар келиб, уни гўжага тақдиф қилиб кетганини айтиб қолди.

Жамшид гўжадан ҳам бурун Санобар чақириб келтанидан хурсанд бўлиб, Моҳира холаникига қараб чопди.

У чиққанда бутун оила ишкомнинг тагидаги сўрига бингилган эди. Санобарнинг дадаси Шомурод ака ёнбошлиб гўжа ичмоқда, Санобар «Қоравой»ни силаб ўтирас, Моҳира хола эса қўлини пахса қилиб ниманидир қаттиқ-қаттиқ гапирав эди. Жамшид унинг гапидан фаялот: «Қўни-қўшиларнинг таънасидан ўлиб бўлдик!» деган сўзларини эшитиб қолди. Гап Суръатжон ҳақида бўлса керак, Шомурод ака Жамшидни кўриб Моҳира холага бир нима деди ва бошидаги эски дўпписини тўғрилаб кулимсиради:

— Ке, Жамшидбек ўғлим, сўрига чиқ! Қишлоқча кепсану, кўринмайсан. Оббў сени-эй!..

Моҳира хола эса, Жамшидинг олдига бир коса гўжака қўяркан, деди:

— Жамшиджон ўзиям билади. Акасининг дастидан бутун сой маҳалла дод деяпти... Йўқ, адаси, айтинг дўхтирингизага: ё қуённи қуритсин, ё кўчсин боғимиздан! Ё бўлмаса боғни уларга бериб биз кўча қолайлик!

Шомурод ака яна боягидай хижолат чекиб йўталди, Жамшидга қараб: «Бу гапга парво қўлма», деган маънода кўзини қисди, сўнг:

— Отанг тақачи бўлсаям қўйгин энди, хотин,— деди бошидаги дўпписини тўғрилаб.— Улар ўқиган одамлар, биз айтмасак ҳам ўзлари тушуниб қолишади, ҳа!

— Ўқиган одамлар!— деди Моҳира хола,— Тамиллахонга даъвом йўқ, олим деса арзиди. Мен айтсам бунинг акасини айтаман!

— Бунинг акаси қуён боқиб бой бўлмоқчи!— деди Санобар.

Моҳира опанинг ҳамма гапи бир бўлди-ю, Санобарнинг сўзи бир бўлди. Жамшид ичган гўжаси томогига тиқилиб, ўрнидан сапчиб турди. У анча жойга бориб қолганида Шомурод аканинг:

— Шуям иш бўлдими? Ўзинг чақириб, ўзинг тагин бола бечоранинг ошини заҳар қилдинг!— деганини эшитиб қолди.

Суръатжон ғорнинг олдида «қиরт-қиরт» беда чайнаётган қуёнларга тикилиб, нимагадир кулимсираб ўтиради. У Жамшидни кўриб имлади: «Бери кел, ука!»

Жамшид унинг хушнуд чеҳрасидан беихтиёр кўзини олиб қочди.

— Акажон! — деди титраб. — Қўйинг шу ишингизни. Сиз шундай яхши... йигит эдингиз. Ҳамма Сизни яхши кўрарди!

Суръатжон қовоғини солиб:

— Ўзи нима гап? — деди.

— Шу... ҳамма бизни ёмон кўради. Қуён боқиб бой бўлишмоқчи, деб масхара қилишади...

Суръатжоннинг узунчоқ юзи оппоқ оқариб, қизларникидай катта, серкипприк кўзлари қисилди. Жамшид акаси уни силтаб ташлар, деб ўйлаган эди, лекин Суръатжон бир зум ўйлангач:

— Қани, ўтиргин-чи, ука, бир гаплашайлик, — деди оҳиста.

Жамшид кўнгли умидга тўлиб унинг ёнига чўнқайди.

— Қуён боқиб бой бўлмоқчи эмишманми? — Суръатжон истеҳзоли жилмайди. — Сеж шу гапларга ишонасанми, ука?

— Йўқ, бироқ...

— Хўп, — деди Суръатжон. — Сенга битта савол: дейлик сен жонингни ҳам аямайдиган бир... дўстинг бор, кимни айтсак бўлади, масалан... Санобар!

— Санобар мен билан гаплашмайдиям! — деди Жамшид.

— Йўқ, — деди Суръатжон. — Гап очилдими, тўғрисини айтиб қўя қолай. Мен бу ишни бойлик орттириш учун эмас, кенойинг учун, Тамилла учун киляпман ука?

— Биламан. Лекин...

— Йўқ, билмайсан, ука. Гапимга қулоқ сол аввал... — Суръатжон чуқур хўрсинди, сўнг, худди юрак сирларини очишга қийналалаётгандай, секин гап бошлади:

— Ҳали катта бўласан, ука, севги нималигини биласан... Тамилла кенойингни ўзинг биласан. Бундан уч-тўрт йил аввал танишганимизда кенойинг шундай... кўҳлик эдики, ман-ман деган йигитлар, казо-ка-

золарнинг ўғиллари унинг изини... унинг бир оғиз сўзи-
га бор эди. Лекин кенойинг уларни эмас, мени деди.
Мен бу олис қишлоққа кетганимда, тўғрироғи, юбо-
рилганимда лом-мим демасдан бирга келди, мана уч
йилдирки, шу тешикда ётибмиз... Ҳозир, бир маҳаллар
кенойингдан рад жавобини олган ўша йигитлар, ҳар
биттасининг тагида битта «Волга», юришипти катта
манрабларни эгаллашиб!.. Мен эсам... кенойинг бечо-
ра нима кўрди менга келиб?

— Ахир... кенойим Сизга таъна қилаётгани йўқ-
ку, буни!

— Бундан кўра таъна қилгани яхши эди!— деди
Суръатжон оғир хўрсиниб.— У ақлли, олижаноб ин-
сон. Шунинг учун ҳам таъна қилмайди. Мен эсам унга
сайин қийналяпман, ука! Нега дессанг, кенойинг ўзи
тушунса ҳам, ота-онаси, қариндош-урұғлари тушунмай-
ди. Бизнинг гапимизга кирмай топганингдан кўрга-
нинг шуми дейишади. Яқинда шаҳарга кўчамиз. Нима,
икки қўлимизни бурнимизга суқиб борамизми? Ҳамма
тушунмаса ҳам сен тушунишинг керак, ука. Мен ўғир-
лик қилмасам, бошқа қилмасам. Ўзинг биласан — бош-
да бу ишни тажриба учун қилувдим, кейин қарасам
етти хазинанинг биттаси шу экан... Хуллас, яна бир-
икки ой тишни тишга қўйиб чидаш керак, ука... Бой-
лик орттиromoқчи эмишман! Йўқ, ука, бойлик учун
эмас, Тамилла кенойинг учун қиляпман бу ишни. У
мисоли..., бошимга қўнган бир баҳт қуши, ука. Учиб
кетмаса деб қўрқаман. Сен ҳам ёшсан. Бу гапларга кат-
та бўлганинг тушунасан, ука.— Суръатжон маъюс
кулимсираб укасининг елкасига қўлини қўйди. Унинг
«ука» деб гапиришида, овозида, кулимсирашида бўлак-
ча бир самимият бор эди, Жамшид ўпкаси тўлиб,
акасининг қўлини қаттиқ сиқди.

Кечаси Жамшид тўғондаги бақаларнинг сайрашига,
узоқ-яқиндаги итларнинг вовиллашига, шамол ўйнаган
даражат япроқларининг шитирлашига қулоқ солиб қўл
чўзса етадиган юлдузларнинг милт-милт ёнишига кўз
тикиб, узоқ ётди.

Дам унинг эсига Моҳира бувининг аччиқ гаплари
тушар, дам кўз олдига Санобарнинг истеҳзоли табассу-
ми келар, дам қулоқлари остида акасининг аллақан-
дай мунгли овози янгарди...

У энди акасини қораламас, унинг яхши одам экани-

га деярли шубҳа қилмас, айни маҳалда уни тамом оғлаш ва Санобарни қоралашга ҳам тили бормас, бунине учун нимадир етишмас, лекин етиши маётган нарса нима эканини тушунолмас эди...

Бир ҳафта ўтди. Уша суҳбатдан кейин анча муло-йимлашиб қолган Суръатжон уст-устига бир-иккита қуён йўқолиб, асабийлаша бошлади.

Бир кун кечқурун тўғонда чўмилаётган Жамшид акаси чақираётганини эшишиб қолди.

Борса, акаси Суръатжон беда ташийдиган кўк эшакни эгарлаб, шай қилиб турибди. Жамшид бориши билан у икки кўзи қаппайган хуржунни эгарга ташлаб, қирга имо қилди:

— Ана у қирнинг орқасида яна бир пастроқ қирбор. Унинг устига чиқсанг пастда чуқур жар кўринади. Мана бу хуржунда...— У хуржуннинг қаппайиб турган ўнг кўзига қўлини қўйди.— Жун қоп бор. Шу қопни олиб, жарга отгину, дарҳол қайтгин!

Жамшид акаси кўрсатган томонга қаради. Ҳали қоронги тушмаса-да, қирга туташган осмон қизғиш тусга кира бошлаган эди.

— Нима, қоронги тушиб қолади, деб қўрқяпсанми? Ё жин-шайтон, бўри-мўрига ишонасанми?— Суръатжон аллақандай асабий кулди.— Бекор гап, оғайні! Кўк ҳангининг бошини қўясану, чопиб бориб, чопиб келасан!

Жамшидинг кўнглидан: «Шу ишни эрталаб қилса нима бўларди?» деган гап ўтди-ю, акасини ранжитмай деб, тўғрироги, унинг кўзига қўрқоқ бўлиб кўринмай деб, эшакка миниб йўлга тушди.

Жамшид акаси айтган жарликни бултур ёзда кўрган, бир кун кечқурун Санобар иккиси йўқолган қўзиини қидириб бориб, ваҳимага тушиб қайтишган. Жамшид кўк ҳангини савалай-савалай биринчи қирга чиққанда олисга чекинган уфқ кул ранг тусга кирди, иккичи қирга чиққанида гира-шира қоронғилик тушиб қолди.

Мана, таниш жарлик, тўғрироги, таги чангл билин қопланган, қоронги ўнгирга ўхшаш ваҳимали чукурлик...

Жамшид шу ўнгирдай қора ваҳима босиб, эшакдан зўрга тушди. У хуржундаги жун қопни тортиб оларкан, қўлига оғир ва юмшоқ бир нарса тегди, нимадир

хириллагандай бўлди-ю, соchlари тиккайиб, тиззалари қалтираб кетди. Шу пайт қопдаги оғир ва юмшоқ нарса яна типирлаб, хириллаган овоз такрорланди.

«Ит! Йўқ, мушук!..» тўсатдан Жамшидинг миясида нимадир ярқ этгандай бўлди: «Қоравой!..»

У богочни қандай ечгани ҳам эсида йўқ, қопнинг тагидан ушлаб силкиган эди, боши латта билан ўралган, оёқ-қўли боғланган «Қоравой» қора қундуздай юмалаб тушди. Жамшид «Қоравой»нинг бошидаги латтани юлиб олди, оёқларини ечиб юборди. «Қоравой» бир ағанаб ўрнидан турди, қўзлари олазарак бўлиб атрофга тикилди, сўнг, Жамшидни таниди-ю, аянчли миёвлаб, оёқларига сурканди.

Бояги ваҳимадан асар ҳам йўқ, Жамшид «Қоравой»ни кўтариб бағрига босди-да, эшакка миниб, орқага қайтди.

У ҳали акасига нима дейишни билмас, тўғриси, бу ҳақда ўйлагани ҳам йўқ, бутун хаёли Санобарда эди!.. У акасининг бу қилиғини изоҳлашга ақли етмас, фақат бир нарсани сезар — тунов куни Суръатжон уни алдаган, у энди акасининг мунгли гапларига ишонмас эди!

Жамшид, акам кўриб қолмасин, деб, аяча жойни айланиб, олдин пахтазорга тушди, кейин ариқ ёқалаб кетди ва Санобарларнинг ҳовлисига сой томондан кирди.

Санобар қўйларини тушовлаб, сигир-бузогига ўт бераётган экан, Жамшидинг олдига истар-истамас чиқди-ю, «Қоравой»ни кўриб, оғзи очилиб қолди.

— Вой, «Қоравой»? Яна бўшаб кетибдими бу тен-так!

Жамшид ҳаяжондан нафаси тиқилиб, тили ғулдурай-ғулдурай, бўлган воқеани айтиб берди.

Санобар қоронгига қўзлари чақнаб, Жамшидинг қўйини «шап» ушлади, энтикиб гапирди:

— Жамшид! Мен... Мен сени акангдай деб ўйловдим. Хафа қилган бўлсам кечиргин! Энди биз... Энди бирор сенга тегадиган бўлса! — деди-ю, тўсатдан иссиқ лаблари билан Жамшидни «чўлп» этиб ўпиб олди.

Жамшид, назарида, офтоб чиқиб, ҳамма ёқ ёришиб кетгандай туйилиб, Санобарларнинг ҳовлисидан қушдай енгил тортиб чиқди.

Суръатжон сўрида овқатланиб ўтиради. У Жамшидни кўриб, кўзини қисди.

— Қалай, буйруқ бажарилдими?

Жамшид акаси кўз қисиб кулганини кўрганда бир зум ҳақиқатни айтгиси ва тунов кунгидай уни қучоқлаб, бундай қилманг, акажон, деб ёлворгиси келди-ю, нимадир бунга халақит берди.

— Бажарилди,— деди у ва гапни калта қилиш учун ювениш баҳонасида сочиқни олиб сойга қараб кетди.

— Молодец! — деди акаси.— Катта бўлсанг яхши солдат бўласан!

Эртасига Жамшид аллақандай ёқимсиз, ваҳимали бир қийқириқдан уйғониб кетди. Овоз бир зум тинди-ю, яна такрорланди. Бу сафар у худди бўғизланаётган одамнинг товушини эслатди Жамшидга.

У ўрнидан сакраб турди, лекин своз келган томонни билмай жойида қотиб қолди. Ошхонада газ плитада чой қайнатаётган Тамилла ҳам бир зум тўхтаб, қулоқ сўлди, сўнг яна ўз ишига киришди. Шу пайт аянчли гингшиган товуш гўё ёрдамга чақиргандай чинқириб юборди-ю, Жамшид қирга қараб чопди. Энди шубҳа қолмаган: бола йигисига ўхшаш чинқириқ ариқ бўйидаги қатор жийдалар орасидан келарди. Жамшид нафаси томоғига тиқилиб ўша томонга отилди, отилди-ю, юраги шартта узилгандай бўлиб, жийдага суюниб қолди.

Акаси Суръатжон, қўлида жингил сопли узун ҳамчи, жийдага ортки оёғидан осилган «Қоравой»ни қулочкашлаб урмоқда эди!

Суръатжон қулочини ёзганда кўзи косасидан чиқаётган «Қоравой» гужанак бўлиб осмонга сапчир, арқондай эшилиб тўлганар, ҳамчи текканда одамдай зорланиб чинқирав, сўнг оғзидан қон қусиб, бир зум тинчиб қоларди...

Жамшид ҳали ҳушини йигиб олмаган эди ҳамки, Тамилла билан Санобар, уларнинг орқасидан яна аллақимлар кўринди...

Жамшид бирдан ҳушига келиб, ўзини акасига ташлади:

— Ака! Тўхтанг, ака!

Суръатжон, кўзлари қон талаган, ўгирилиб қаради. Жамшид унинг қўлига осилиб қолди. Кетма-кет етиб келган Санобар эса, дод солиб Суръатжонни муштлай кетди:

✓ — Жаллод! Нима қилиб қўйдинг, жаллод! Оппогим, «Қоравой»жон! Қамаб қўювдим-ку, қанақа қилиб учрай қолдинг бу жаллоднинг қўлига, жонгинам!

Ҳамма, худди «Қоравой»нинг ўлими эмас, катта бир фожианинг устидан чиққандай сукут сақлар, ёлғиз Санобар ҳамон Суръатжонни дўпослаб йигларди. Суръатжон эса, гўё бу ишни мастиликда қилгаву, ҳушига келиб, қўрқиб кетган одамдай, давранинг ўртасида беҳол турар ва ён-верига аланглаб қаради. Шу пайт қаёқдандир етиб келган Шомурод ака, бошидаги дўпнисини тўғрилаб:

— Бу қандоқ бўлди, дохтур ука,— деди.— Мушук ҳам худонинг махлуқи-ку...

— Мен... нима қилай, ҳар куни битта-иккита қуён йўқоляти. Шундан бошқа...

— Ёлғон!— қичқирди Санобар.— Сиз қуён боқиб-сизки, «Қоравой» бечора қамоқда!..

— Санобархон, сен билмайсан...— Суръатжон гапини тугатмади, Тамилла, ранги девор, ўзини боққа урганини кўриб, унинг кетидан талпинди.

— Тамилла! Тўхтанг, Тамилла...

Тамилла тўхтаб кескин бурилиб қаради-ю, гўё шишимшиқ бир нарсадан изжирғангандай, юзи буришиди:

— Кўлингизни артинг... Қон!...

Суръатжон дармони қуриган одамдай қўлидан қамчиси тушиб, лол бўлиб қолди. Шомурод ака камаридағи қиндан пичогини олди, «Қоравой»нинг оёқлари бояланган чилвирни кесди ва мушукни ўтга ўраб кўтариб олди.

— Бўлди, қизим, бўлди, юр, бир жойга кўмайлик бу бечорани...

Жамшид ҳозир акасининг чиндан изтироб чекаётганига дил-дилидан ишонар, шунинг учун Санобарларга эргашишини ҳам, Суръатжоннинг ёнида қолишини ҳам билмас эди. Тўсятдан Суръатжон худди бир нима эсига тушгандай бошини кўтариб:

— Шомурод ака!..— деб хитоб қилди.— Худо ҳақи... нимага шундай қилганимни ўзим ҳам билмайман.

Падарига лаънат шу қуёнларнинг! Кечириг мени! //
Менга биттаси ҳам керак эмас! Олинг шуларни! Илти-
мос қиласман — олинглар шу қуёнларни!

Шомурод ака тўхтади, шошмасдан бир икки марта
тomoқ қирди, кейин:

— Раҳмат, ука,— деди ўйчан товушда.— Биз
дэҳқон одам. Қуён жонивор боф-роғни-ю экин-тикии-
нинг заволи. Дэҳқон одамга тўғри келмайди бу иш,
ука...

«Қоравой»ни боғининг қоқ ўртасидаги бир туп бозор
ўрикнинг тагига кўмишди. Бечора шу ерда ўтириб ўрин
пишганда чумчук пойларди.

Суръатжон ўзича ниманидир мулоҳаза қилиб,
пешанасини ушлади, лекин қўли қон экани эсига
тушди шекилли, юзи буришиб, уйга қараб югуриб
кетди.

Суръатжон шу кетганича тушдан кейин усти берік
бир машина олиб чиқди. Ҳамма қуёнларни ўшанга ти-
қиб, шофердан қаёққадир жўнатиб юборди. Кейин кун
ботгунча тепанинг атрофидаги ҳамма қозиқларни сугу-
риб, симларни йиғиштириб ташлади.

Жамшид унинг юзига қарашга юраги дов бермас,
юзига қараса жон-жони ачишиб кетарди.

Тамилла эрталаб кетганича кечаси алламаҳалда
қайтиб келди. Жамшид унинг:

— Рухсат беришди, кетаман,— деганини эши-
тиб қолди. Суръатжон нимадир деган эди, у асабий
товушда:

— Иўқ, бир кун ҳам туролмайман,— деди кескин.—
одамларнинг юзига қарай олмайман. Қўйинг, гапир-
манг. Жазонгиз...

Тамилла кийимларини бир чамадонга жойлаб эрта-
сига кун чиқар-чиқмас жўнаб кетди. Жамжид би-
лан Суръатжон юкларни шайлаб, яна бир кеча туна-
дилар.

Эртасига юкларни машинага ортиб бўлиб, энди жў-
намоқчи бўлиб турганиларида Санобар кўринди. У се-
кин имлаб Жамшидин четга чақирди.

— Жамшид,— деди у,— «Қоравой» бўлса, ўлди.
Сен кетмай қўяқол. Ё кетсанг ҳам... келиб тур..., мени...
бизни унутма. Унутмайсанми?

Жамшид «ялт» этиб акасига қаради. Суръатжон

машинанинг кабинасига суюниб, хаёлга чўмиб маъюс ўтиради.

Жамшид акасидан кўзини узиб, тўғонга, оқ теракнинг учидаги ўтирган иккита лайлакка, сойликда кураш тушаётган болаларга тикилди. У бултур ёнгоқ отиб, ағнаб ўйнаган бу сойликни, жарликинг тагидаги муздай булоқни, балиқ тутиб, кечакундуз чўмилган бу тўғонни, әркакшода бўлса-да, ҳозир кўзларида ёш, мўлтираб турган бу ажойиб қизни энди ҳеч қачон кўрмаслигини биларди. Лекин... Санобардан айрилиш — қанчалик оғир бўлмасин, акасини бу аҳволда ташлаб кетиш мумкин эмас, Жамшид ҳозир унинг ёнида бўлиши керак эди.

Жамшид «қилт» ютинди-да, кескин бурилиб, кутиб турган машинага қараб чопди.

1964 йил.

МУНДАРИЖА

Эр босига иш тушса (<i>роман</i>)	3
Излайман (<i>қисса</i>)	285
Видо (<i>ҳикоя</i>)	436
Бахт қуши (<i>ҳикоя</i>)	459

На узбекском языке

Адыл Якубов

ВЕЧНЫЙ ПОИСК

роман, повесть, рассказы

Редактор Ж. Насридинова

Рассом Б. Будаев

Расмилар редактори А. Бобров

Техн. редактор Т. Смирнова

Корректор Ш. Собирова

Босмахонага берилди 20/VII-1976 й. Босишга руҳ-
сат этилди 27/IX-1976 й. Формати 84×108^{1/3}мм.
Босма л. 16,0. Шартли босма л. 25,2. Нашр-
л. 24,93. Тиражи 46000. Гафур Гулом номида-
ги Адабиётга санъат нашриёти, Тошкент, На-
вовий кўчаси, 30. Шартнома № 77-76.

Узбекистон ССР Министрлар Советининг Наш-
риётлар, полиграфия во китоб савдоси ишларж
бўйича давлат комитетининг Тошкент поли-
графкомбинатида № 1 ёнгозга босилди. Тош-
кент, Навовий кўчаси, 30. 1977 йил. Заказ № 363,
Баҳоси 93 т.

Еқубов Одил.

Излайман. Роман. Қисса. Ҳикоялар. Т., Адабиёт ва санъат
нашриёти, 1977.
480 б.

Қўлинигиздаги ушбу китобга ёзувчи Одил Еқубонинг «Эр бошига
иш тушса» романни, «Излайман» қиссаси ва бир нечта ҳикоялари хи-
ритилди. Ёзувчининг бу асарларида Улуг Ватен уруши йилларида этик
билим сув кечиб хизмат қилган ёшлиримизнинг олижаноб фазиятлари,
уларнинг пок муҳаббати, изтироблари, кураши все эттирилган. Ҳикоя-
ларида эса буғунги кун кишилари улугланган.

Якубов А. Вечный поиск. Роман, повесть, рассказы.

Уз2